

近代中國史料叢刊續編第三十二輯
沈雲龍主編

樂道堂文鈔

奕訢著

文海出版社
有限公司
印行

泉
齋
堂
文

泉

齋
堂
文

近代中國史料叢刊續編 第三十二輯

目錄

樂道堂文鈔	奕訢著
樂道堂文鈔·續鈔	奕訢著
樂道堂詩鈔	奕訢著
<small>唐獻集·帖吧懷音 試帖詩·幽風詠</small>	
樂道堂詩鈔	奕訢著
古近體詩·春帖子詞	奕訢著
萃錦吟 卷一——卷四	奕訢著
萃錦吟 卷五——卷八	奕訢著
戊戌變法檔案史料	佚名輯
戊戌變法人物傳稿	湯志均編
故宮清錢譜	黃鵬霄編
清代名人翰墨	黃氏憶江南館藏

自序

文以載道六經皆載道之文也故言文者必權
輿於經韓退之論文曰養其根而埃其實經其
根也文其實也又曰加其膏而希其光經其膏
也文其光也柳子厚曰本之書以求其質本之
詩以求其恆本之禮以求其宜本之春秋以求
其斷本之易以求其動皆所以取道之原也離
經則畔道矣古今作者實繁有徒而孰是說以
衡之其原本經術者辭達而理舉氣盛而言宜

解經者必破其的闡道者必抉其原卽一時託興之作紀事之編不必皆與經義相比附而不戾於理不背於道切而按之蔚然皆經籍之光也文不宗經譬猶木之無根水之無源欲其末之茂流之長不可得也余所見如是卽余之爲文亦常蘄至於如是溯自童年就傅治經之功旣畢執筆學爲文幾二十寒暑其閒難易之故淺深之境與年俱異與學俱殊旣不可以強同其所爲者或論理或論事或因事而紀述或卽

境而涉筆體製亦不一例而當操觚之時儼乎若思茫乎若迷不敢以輕心掉之不敢以怠心易之則有如韓柳二子之所云者誠懼其戾於理而背於道也歷年旣久積稿遂多久欲輯而錄之匆匆未暇迨其後散軼者過半矣年來公事稍簡始檢篋笥掇拾殘賸僅得十之三四焉余固不敢謂余文之盡合於經旨而足以傳也第以夙昔心思嘗寄於是不欲聽其湮沒而無存爰命手民卽原本鈔之不復有所竄易蓋工

拙亦不計云刻既成因誌其緣起且抒所見質
諸世之學人以爲何如也同治丁卯孟冬之月
樂道主人自記

樂道堂文鈔目錄

樂道堂文鈔五卷

樂道堂文續鈔一卷

卷之二 金

目録

樂道堂文鈔卷一

恭親王著

魏絳和戎論

昔祭公謀父以穆王之征犬戎也諫曰先王耀德不觀兵夫固謂兵不可黷而犬戎氏以其職來王又未可以不享征之自古帝王未有不懷遠以德者也春秋時戎狄擾攘中原爲患已久然吾謂戎不足患患在綏戎之不得其道耳觀於晉悼公和戎一事猶有先王懷遠之遺意而

歎魏絳之謀至深遠矣當其時無終子因魏絳請於晉侯以和諸戎晉侯以戎狄無親而貪不如伐之魏絳乃卽勞師矢華之說以切陳其弊且卽和戎之有五利而諄諄言之曩令晉侯不用其言而果興師於戎雖軍帥強禦一戰而克然構怨諸戎以啟寇讎彼則閒而協以謀我晉能無四境之虞乎且是時也晉與楚爭陳陳新來和方觀德於我而乃勞師襲遠罷敝民力若楚人乘釁而取陳陳無晉援必歸於楚矣諸華

見晉之不能救陳亦將叛矣晉雖獲戎何利之
有况乎外患之來非惟棄陳而失華也楚人閒
晉師之悉起也而以師臨之諸侯或有狡焉思
啟封疆者又得閒而侵伐之豈其亡利耶而爲
害不可勝言誠如魏絳之謀諸侯見諸戎之睦
於晉而愈歸附矣楚卽與晉相爲敵讎而勢已
孤矣楚不敢爭諸侯皆不敢攜貳則諸戎亦何
惡之能爲魏絳之謀可謂忠於國矣其後悼公
以不得志於鄭歸謀息民三駕而楚不能與爭

亦賴魏絳之請也雖然魏絳之言晉侯能用之此其所以復霸也

和眾豐財論

先王不敢窮兵於武以其害民而傷財也然則先王無用武者乎武王以武功自古稱之惜乎人知武王之用武而不知武之所以爲武也其在頌曰綏萬邦屢豐年是詩也大武之樂章也夫曰綏萬邦不惟不害民也民於斯安眾於斯和矣曰屢豐年不惟不傷財也年於斯豐財於

斯豐矣武王之爲武異乎人之武矣此其故楚
莊王知之昔楚莊王勝晉師於邲潘黨請築武
軍莊王乃援止戈之義以釋其文因頌武王之
詩以陳七德而及於和衆豐財夫衆之不和財
之不豐固不可以爲國也然軍旅之事雖以制
勝者行之不能不害民而傷財以任耨耨供租
稅之百姓而驅之效命疆場民人愁痛不知所
庇辛苦墊隘無所底告夫且蕩析流離之不遑
恤將何以和衆乎賦重役煩舍我稽事荒札頻

仍蠲貸無濟雖欲豐財又安得乎武王不若是也武王除暴以安天下應乎人而順乎天萬姓悅服百穀用成故勿謂兵民之殘也財用之蠹也武之爲武以召和也以致豐也小民固皆樂其樂而利其利矣夫以衛文公敬教訓農通商惠工而衛以之治晉悼公息民施舍出積節用而晉以之霸况乎聖王順天應人以有天下雖曰武功豈非文德哉楚莊王僻在荆蠻未嘗聞偃武修文之盛而其言乃有合於王者其亦高

出桓文之上也與

晉胥臣舉冀缺論

觀人之道有於一節之難能而知其人爲有德之人可以有用於國家也如晉胥臣之舉冀缺可謂知人者矣昔晉胥臣使過冀見冀缺耨其妻饁之相待如賓於是言於晉侯以爲下軍大夫賢其敬也夫敬身之基也而人之所難能者也况於夫婦之間境之至近情之至暱尤人所易忽者乎於所易忽者猶雍雍乎式禮無愆使

之立身朝廷宣勤公室臨大專決大議其不敢慢易以將可知已能敬必有德冀缺其庶幾乎彼郤錡之乞師成肅公之受賑高厚之相太子以先會諸侯皆以不敬自貽之疚或則不免或則不反其見譏於人也誠不足惜無乃辱君命而敗國事與冀缺之敬加人一等然不遇胥臣未有能知其敬而舉之者且夫冀缺罪人子也晉侯以呂卻之難不欲用之胥臣乃援父子罪不相及之義以釋其憾而因以舜之興禹管敬

仲之相桓爲文公比類言之於是文公以冀缺爲下軍大夫箕之役冀缺果能獲白狄子襄公以其有功還其父之故邑而以爲卿是冀缺之得用實賴胥臣也厥後赤狄之服語諸大夫以勤而自謂寡德衛睦於晉欲趙宣子歸衛之侵地而戒其不務德其言皆有可取胥臣謂冀缺之有德信矣夫祁奚之舉解狐王生之舉柳朔洵所謂外舉不避怨者也若胥臣者則又爲後世錄罪裔之法也若胥臣者可爲能舉人者矣

禮可以爲國論

辨上下而定民志者禮也上下之分旣明則威福之權皆出自上君君臣臣國本固矣春秋之時君弱臣強上失其政下執其柄國勢日替蓋禮之所廢衆之所亂也昔晏平仲因齊景公之問而言及陳氏將有齊國唯禮可以已之且詳言夫禮之可以爲國也試申論之夫禮國之榦也壞國者必先去其禮齊景公之時內亂迭作崔氏之逆慶氏之專幸天奪其魄矣無如有媯

後之育於姜者姜族弱而媯將昌也可若何先
王之以禮治天下也同律度量衡其或有用器
不中度者皆於大典有干然則豆區釜鍾之數
齊之舊量有定制矣國中惟聞有公量耳不當
聞有家量之名而又何有於以家量貸以公量
收之私惠於民者乎且夫陳氏之厚施亦惟以
小惠要結人心而已使能以禮之上下不紊者
整飭而修明之制命者君也承命者臣也家施
不及國施及民者君之德也大夫不收公利利

及民者君之澤也德澤厚於民民歸之而歌舞
之歸君之仁而歌舞君之惠也所謂君令而不
違臣共而不貳者也惠出於上而下不得私權
歸於上而下不得擅是猶敢有市惠以收人心
者乎無有也卽有其人國中之民共曉然於上
下之分且相謂臣之作福其害於而家凶於而
國不可與也如陳氏者亦奚以爲噫景公善晏
子之言而不能用晏子之言乃以數百年賜履
表海之封終爲田氏之所有也可勝慨乎

鮑叔牙薦管仲論

五霸桓公爲盛九合諸侯一匡天下考古者溯軌里連鄉之制讀牧民乘馬之書未嘗不歎管仲之有大造於桓公也然吾謂桓公之霸不在管仲而在鮑叔何也相桓公者管仲也薦管仲於桓公者鮑叔也桓公入齊使鮑叔爲宰鮑叔辭而請桓公求管仲於魯夫管仲桓之賊也乃自鮑叔薦之而尊爲仲父寵以亞卿霸主之業遂得天下才而爲之且夫鮑叔之智固非管仲

所能及也襄公卽位政令無常鮑叔知亂之將
作奉小白以奔莒管仲於亂之旣作奉子糾以
奔魯鮑叔之智固出管仲上矣管仲奉子糾奔
魯魯雖大而遠於齊鮑叔奉小白奔莒莒雖小
而近於齊故子糾未入齊而小白自莒先入鮑
叔之智又出管仲上矣然而管仲治國家之才
鮑叔知之鮑叔且能自下之少與管仲游而知
其賢以仲爲不差小節而恥功名不顯於天下
也故貪不以爲貪愚不以爲愚怯不以爲怯仲

之言曰生我者父母知我者鮑子鮑叔誠能知人者也雖然桓公使鮑叔爲宰假令鮑叔有執齊柄之私則將如臧氏知展禽之賢而不與立雖有治於高後者焉與知政乃鮑叔以庸臣自居且詳言其不若夷吾者五因以釋中鉤之怨脫束縛之囚三釁三浴而進之鮑叔又能下人者也管仲乃子糾傅耳微鮑叔而桓公安得以之爲相也哉噫管仲由鮑叔薦已而其卒也不能薦賢以自代遂令豎刁易牙開方輩爲禍於

齊仲之為國謀也不逮鮑叔遠甚矣吾故曰桓公之霸不在管仲而在鮑叔

鄭子皮宋子罕賑貸論

分散者仁之施也匡乏困救災患士大夫有能之者然其心之出於公與出於私則自有異心係乎私欲以為己德也自為謀也心存乎公不以為己德也為國謀也為國謀者知體國恤民而已讀左氏傳於鄭之罕宋之樂見之矣昔鄭之饑也子皮餼國人粟以子展命餼之曰父命

也宋之饑也子罕出公粟以貸請於平公而出
之曰君命也夫天災流行何國蔑有魯爲周請
糴秦爲晉輸粟或以勤王或以睦鄰未有甘爲
幸災之不仁者况爲國執政而忍視其民之轉
溝壑而不救耶雖然家施不及國禮也公子商
人之驟施則盡其家矣公子鮑之貸於人則竭
其粟矣陳氏之以家量貸則豆區釜鍾有加矣
或因饑以詡恩或無故以市惠皆以陰濟其竊
國之私豈其心乎民而爲之者哉子皮之餼不

使人謂子皮餼也歸美於親所謂善則稱親者也子罕之貸不使人謂子罕貸也歸美於君所謂善則稱君者也噫古聖王圖匱於豐三年耕必有一年之食豐年補敗雖有凶旱水溢民無菜色賑貸之策三代盛時未嘗聞也至於春秋饑饉薦臻人主漠視民依苛求無厭爲之臣者助之掊克不知所恤而竊國者又假以爲要結人心之謀夫乃歎公爾忘私之難其人也若子皮子罕之得國其爲叔向所稱也宜哉

子產放游楚於吳論

春秋時鄭有國僑諸侯之良也厯事簡公定公
執政二十餘年鄭實賴之然其所行有以權術
劑其用而爲人所莫測者如放游楚於吳固有
異矣夫子皙之惡甚於子南不待智者而辨也
楚已聘之婦黑乃強委禽焉無禮甚矣而子產
曰唯所欲與是乖乎禮之正也旣而橐甲以見
子南傷於戈而歸乃其所也而子產曰直鈞幼
賤有罪是又失乎罰之公也豈子產而有私於

子皙耶抑亦觀釁而動有見於時勢之不可急
爲耶彼子皙者罪不容於死然其爲人也無禮
而好陵人怙富而舉其上操之太蹙恐子皙之
有異謀也且恐駟氏與諸大夫之有異志也曩
者子駟氏欲攻子產子皮怒而止之使斯時也
子皙與駟氏之甲以與子產爲難豈無助國氏
以相與敵者然而同列稱兵亂國之大者子產
禁之不遑而顧身爲之乎故前有伯有之難後
有薰隧之盟皆不討也凶人不終天將厚其毒

而降之罰其與幾何雖然子南之放不亦左乎
子南在鄭兵端不息莫知所底行之使遠乃所
以全之矣子皙之後討固非眾人所能料也子
南之獨見放亦非眾人所能知也其後黑將作
亂子產乘機討罪固以疾作之報天既殃之而
亦以諸大夫欲殺之機不可失也且以駟氏欲
殺之機尤不可緩也其斃子皙也如斃豚犬然
尸衢加木而子南之獄以平乃知處凶人者之
有其權有其術也不然以子產之賢智勝人豈

其弱者威之而强者避之也哉

魯卑邾不設備論

備豫不虞善之大者也古之爲國者常以不虞爲戒况外虞之旣至而乃不知備乎嘗讀左氏傳而歎魯之敗於升陘也實自敗也以其卑邾而不設備也夫魯嘗修好於邾矣蔑與趙相繼而盟矣自邾人滅須句魯公以成風之言伐邾取須句反其君焉君子韙之謂其得恤寡小之禮也然而魯與邾人固已相爲敵讎矣魯旣搆

怨於邾邾豈甘心於魯邾不來伐當於未事防
之邾已出師又當於臨事慎之軍旅之事慎之
又慎猶恐不能必勝况不設備者乎昔魯先公
之征徐戎其誓師也於弓矢戈矛糗糧芻茭之
具不憚諄諄申令焉先公之明德無不難也無
不懼也卽莊公之世其敗齊師也俟其三鼓然
後鼓之望其旗視其轍然後逐之其敗宋師也
乘邲則以臯比先犯之鄩之勝則以未陣薄之
若此役也魯而不敢卑邾也無亦召諸司而訓

之於外侮之未靖戒懼之不可以怠討軍實而
申儆之於勝之不可保國之弱小而不可以易
夫兵凶器也戰危事也不可不慎也燕人以不
虞制人而敗屈瑕以趾高小羅而敗皆不知備
故也前車之鑒魯公其未之聞耶臧文仲曰國
無小不可易也無備雖眾不可恃也僖公不聽
文仲之言而卒使邾人肆其蠶蠹之毒致獲公
胄懸魚門也不大可恥乎厥後魯報升陘之役
伐邾而取訾婁邾人亦不設備邾其忘乎升陘

之戰魯之所以喪師也與

甯武子復衛侯論

夫子曰甯武子其愚不可及也謂其履艱蹈險能使君與身兩全也春秋傳詳衛成公之復國曰晉人歸衛侯蓋其時晉文公以叔武入盟踐土乃聽衛侯歸國故左氏稱晉人復也雖然衛侯之得復衛不在晉人在甯武子昔衛文公嘗不禮於晉文公及晉文公入國假道伐曹成公弗許斂孟之盟又不得請此衛侯之所以欲與

楚也柰國人不欲出成公以說於晉公之出也
武子從焉始居襄牛後奔楚適陳淹恤在外非
一日矣天禍衛國也夫然出其君者則國人也
國人既出其君懼之者曰君若得反衛國吾儕
罪其無可追乎疑之者曰君自襄牛奔楚自楚
適陳有二國以爲外主君其入乎且疑且懼不
相圖則相拒矣國人而有貳心焉欲歸得乎武
子於是爲宛濮之盟以喻之其言曰不有居者
誰守社稷又曰居者無懼其罪和以解之人可

以不懼矣既牖之以天又要之以明神先君信以結之人可以不疑矣有是盟也國人而後不貳猶恐眾之或有未安於其入也武子又爲之先若武子之盡瘁於君固非石制分鄭之計公孫申改立君之謀所可同日而語卽如宋公子目夷爲君守國而襄公得以歸宋楚申包胥爲國復讎而昭王得以歸楚雖有外侮猶無內患未若武子所處尤難而盡心竭力不辟艱險卒能保其身以濟其君也厥後深室之辱職納橐

魯文公十四年春西狩獲麟
卷一
一
館醫衍之毒貨使薄醜皆武子一身任之愚之甚忠之甚也噫武子之用心良苦矣而不能使叔武得生也惜哉

孟僖子能補過論

繫辭傳云无咎者善補過也言人之得免譽尤以能悔過而補其闕也雖然補過者人之所難而在世祿之家則尤難昔夫子嘗稱孟僖子爲能補過之君子夫僖子者不惟匡救其身而且垂訓及於後人者也魯昭公七年如楚僖子爲

介不能相儀又不能答郊勞心甚病之還自楚
乃講學之苟能禮者從之自是以後十餘年間
講習討論凜凜乎惟恐失墜故十年如齊殷聘
十一年會邾莊公盟于祲祥皆未聞有失禮之
譏蓋其習禮有年誠能補過者也然而僖子則
加人一等矣其將沒也召其大夫屬其二子師
事聖人詩曰詒厥孫謀以燕翼子僖子有焉夫
魯之以知禮稱者如穆叔叔弓輩自不乏人曾
不如不能相禮者猶以義方教子耶且世之所

以爲後人計者席祿位之榮蓄蓋藏之厚大抵以守富守貴爲遺訓而已僖子易簣之言則惟屬其子學禮以定其位是其於禮也終身不忘而因以之啟迪後人則誠能補過之大者也古人懿戒賓筵之詩年雖老耄猶且知非自警朝夕不忘不然如伯有之廷勞不敬華定之不知答賦失禮而不自悟夫豈不能自保其身而遑恤其後也哉孟僖子可則倣已矣

公叔文子可以爲文論

諡以尊名欲使後人之聞其諡而知其行也故諡爲國之公論以文爲諡又諡之美稱春秋大夫諡文者豈其乏人然而名稱其實者鮮若衛之公叔文子人皆賢之不言不笑不取稱之且過其實而與僕同升一事未有人言及者自非夫子言之則文子薦賢之舉幾湮沒而不傳且使人臣之以人事君者不足以文稱也夫文子爲衛國之卿僕則其家臣也胡爲乎升諸公也文子與之同升也儻文子有僕而不知其賢知

其賢而以家臣之賤不得與已並立於朝是不
智也是不公也是不忠也而何以文稱且夫卿
相之以文諡而不可爲文者賢大夫亦有之矣
魯臧文仲知柳下惠之賢而不與立晉趙文子
舉管庫之士七十餘家或知之而不舉或舉之
而委以賤職不與同立公朝况其人旣爲已之
家臣而能舉之而與之同升乎是其以文爲諡
其亦有愧否乎大臣之謀國莫先乎爲國求賢
文子以僕爲賢而舉之其知人也智也昔爲已

臣今與已同爲公臣其忘已也公也爲國進賢以衛社稷而保民人其以人事君也忠也有此三者可以風後世矣戴記有之公叔文子卒其子請所以易名者諡曰貞惠文子或謂其以三字爲諡而惟稱文子者文足以兼貞惠也然所謂文則曰修班制與四鄰交而已不知與僕同升一事乃可以爲文者而其子未嘗言之衛之君臣亦未嘗言之不有夫子之言以表彰之則文子之爲國薦賢何以傳於後世也哉

伯夷叔齊不念舊惡論

古之人有聖之清者曰伯夷叔齊立身潔介不
視惡色不聽惡聲其疾惡如讎也人知其清而
不知其有容人之量也雖然夷齊之惡惡惡其
惡也非惡其人也昔者夫子嘗稱其不念舊惡
矣夫人不能有好而無惡每觀常人之情人之
有惡惡之宜矣人之既改其惡又從而追念之
是其所憎者一事之惡百端匡正無以救其失
也一時之惡終身悔悟無以蓋其愆也噫是惡

其人而已何其量之不能容人如斯也且夫容人之量爲人所難况清如夷齊者則尤難兄弟讓國相與俱遁當紂之時避居北海厥後武王伐紂援忠孝之義以沮之武王滅商恥食周粟終餓而死後之人聞叩馬之諫誦采薇之歌未嘗不三復咨嗟謂其廉而且貞也故推其惡惡之心思與鄉人處其冠不正望望然去之若將浼焉誠有如介石之不移者君子謂其清矣君子謂其隘矣然使夷齊之清而隘也亦烏足以

爲聖之清也哉其於人也人有惡則見其惡也
人改其惡則其人能自新矣其惡爲舊惡矣見
其善不見其惡也人之有惡人自取之不係於
我也人改其惡我則忘之不留於人也夷齊之
於人無私也無私則其心一正大和平之心也
其惡惡也惡其惡也非惡其人也惟其清而能
容也斯爲聖之清也與

晉國之盜逃奔於秦論

詰盜之法自古有之雖然法之所禁盜不必盡

去也善人在上則國無幸民觀於晉之用士會也而知之昔晉景公以士會之有功也請於王以黻冕命士會將中軍且爲太傅於是晉國之盜逃奔於秦夫晉之中軍執政者也晉之太傅主禮刑之近官也盜之逃奔毋亦畏太傅之尊操賞罰之柄而慄慄然避之也乎然大傅不獨士會爲之也前乎此者陽子爲之矣後乎此者士渥濁爲之矣皆未嘗以弭盜聞也且夫盜固難弭矣魯季武子賞竊邑者而魯國多盜鄭游

吉爲政不忍猛而寬而鄭國亦多盜盜之去非
易易也易曰小人而乘君子之器盜思奪之矣
上慢下暴盜思伐之矣蓋舉非其人則德薄位
尊已啟羣小覬覦之心而以小人竊君子之位
則上慢其君而賞罰自專下暴其民而賞罰失
措無善人則民多幸奪之伐之者盜也而致之
者固有由也然則晉盜之逃奔以爲太傅之有
士會耳士會光輔五君其家事無猜其祝史不
祈於神人皆無怨矣而何患乎盜羊舌職謂禹

稱善人不善人遠士會固不逮於禹而亦諸侯之良也噫使士會之爲秦用而不復歸晉則晉不亦爲逋逃淵藪也哉

鄭人大敗戎師論

春秋之始鄭最强非獨時勢然也亦用兵之有其人耳敗燕師以前後軍敗王師以左右拒皆武之善經也而挫敵之計莫如敗北戎一役昔者北戎侵鄭鄭伯患北戎徒兵之利懼車兵爲其所侵軼也乃用公子突之謀而大敗之因其

所長誘其所短使勇而無剛者嘗寇而速去之
爲三覆以待之嘗之而彼將怒我矣去之而彼
將逐我矣彼雖有步卒之利而誘之使來待其
深入二覆之兵衝我師爲二鄭師橫陳其師於
戎師之中三覆之兵擊其前一覆之兵擊其後
首尾受敵無所逃命是以盡殪也且夫車兵之
不若徒兵者遇阨尤困也北戎所侵其地當險
道險則步卒利也公子突之謀蓋誘於坦夷之
處而與之戰則車戰不難於進退故取勝如神

也然則步卒之利不可恃乎晉荀吳之敗無終及羣狄也毀車爲行以兩伍專參之卒爲前後左右之陳崇卒勝也戎以徒兵敗何也不能用也有徒兵而不能盡徒兵之長亦勝不相讓敗不相救之北戎耳其後北戎伐齊鄭太子忽帥師救齊大敗戎師豈北戎之不能與鄭敵耶抑北戎之輕而不整已爲鄭人所熟計也耶

晉鑄刑鼎論

先王之法垂裕後昆所當世世守之而罔或失

墜者也况刑以弼教豈敢蔑棄舊章而以不可
爲法者擅作其器乎嘗讀左氏傳有慨於晉之
鑄刑鼎矣夫晉自唐叔肇封其受命於周先王
者法度具備固與懷姓九宗職官五正相衍於
勿替豈如弁髦而因以棄之昔鄭子產鑄刑書
於鼎欲以救世叔向非之夫固謂先王議事以
制不豫設法也若晉刑鼎之鑄則著范宣子所
爲刑書也噫以唐叔所受周先王之法度曾不
若宣子所用之法也哉執晉政者無亦念乎文

公之霸蒐被廬以修舊法庶幾可以長爲盟主也古者五刑之用聽其時事以議其重輕或輕而罪無可寬或重而情有可恕法未可以豫定也今乃鑄之於鼎以爲定法其輕而難寬者違法以治其罪不得也其重而可恕者曲法以諒其情不敢也且鼎之所鑄必不能舉科條而備載之民之所犯不必與鑄之鼎者相同在上者或涉偏私在下者各思遁飾而紛爭巧詐之端起矣然則刑鼎之鑄胡爲乎以旣廢之刑書而

復興之耶况乎范宣子所用之刑夷蒐之法也
夷之蒐三易中軍賈季箕鄭之徒因以作亂是
晉國之亂制也何以法爲詩云不愆不忘率由
舊章先王之法不可易也而乃以不可爲法者
擅作刑器晉之衰也范氏中行氏之亡也不亦
宜乎

脩身爲本論

人受天地之中以生凡所以爲人之道大矣至
矣然而萬化有其基百行有其原返而求之無

貴賤一也昔曾子述夫子之言以大學示人首
挈綱領申明條目而復爲之揭其要曰自天子
以至於庶人壹是皆以脩身爲本試申論之夫
天子有天下者也諸侯有國者也卿大夫士庶
人有家者也有人雖有尊卑治雖有遠近然均之
爲人皆當從事於大學則皆不可以不脩身堯
之欽明舜之恭塞禹之祗承湯之懋昭文武之
緝熙執競雖古帝王之聖猶兢兢焉以脩身爲
務也蓋人之一身理無不備言平脩身而所謂

格物也致知也誠意也正心也皆在其中矣言
行之際風俗繫焉威儀之間法則立焉小而家
大而國廣而天下皆自一身推之然則身也者
其萬化之基而百行之原乎如木之柯條敷榮
華實暢遂而培植有本同此根也如水之脈絡
分明支派散注而淵深有本同此源也天下之
本在國國之本在家家之本在身良有以也如
不脩身則物之未格知之未致是非淆而汨於
事幾者多矣意之不誠心之不正譬尤集而失

於施措者多矣其爲父子兄弟皆不足法夫固無以成教於家矣其如國何其如天下何本之不務亦猶木之傷其根而枝葉之附不殖將落也水之塞其源而溝澮之盈其涸可待也人而從事於大學也不以脩身爲本將何所本哉

樂正子好善論

爲政之道用己之長而不足集人之益則有餘禹拜善言舜取於人以爲善古帝王尙如是也况人臣乎昔者魯欲使樂正子爲政孟子喜之

公孫丑疑之孟子曰其爲人也好善夫樂正子善人也善與善相契故好之也彼不好善者聞一善言耳不樂聽見一善行心不樂從與善日疎將與不善日暱矣親小人遠君子君上之驕汰卿相之諂諛法令之紛煩刑賞之僭濫日甚一日國政尙可問乎且夫好善豈易言哉不知爲善而拒之是不明也知其爲善而憎之是不公也秉國政者或以才能顯或以勳業稱往往求一眞能好善之人而不可數覩眞能好善者

心無所蔽灼然有別故善之來也有以清好之
之源也心無所私廓然有容故善之聚也有以
擴好之之量也善之在己也以善召善無以異
於人也善之在人也以善投善亦如有諸己也
夫如是則四海之內皆將輕千里而來告之以
善以天下之善治天下之事綽綽然有餘裕矣
而國於何有樂正子而好善若是乎則毋問其
強否也毋問其有知慮否也毋問其多聞識否
也善言善行好之而卽用之將見彰瘝至明黜

陟至公善之爲所用者廣矣又豈徒强者有知慮者多聞識者之不乏其人也哉

晉文公譎而不正論

五霸桓文並稱然以其先詐力也聖門五尺童子羞道之故桓文之霸心皆不正而事跡之昭著晉文又齊桓之不若矣夫子有言曰晉文公譎而不正試申論之夫文公之定襄王以示義伐原以示信大蒐以示禮所謂假之也者霸王之所同也然而文公之譎有甚焉者在外十九

年矣險阻艱難備嘗之矣民之情僞盡知之矣蓋其狃於機變之私者已久而囿於狡獪之習者已深也且夫霸主之意以勤王攘夷爲名文公爲襄王靖叔帶之難固大義也乃始決以卜繼驗以筮終則辭秦河上之師而專居納王之功及王之入也以隧爲蕭而因得陽樊諸田以啟南陽是其用心爲何如耶至於城濮之役伐楚以攘夷也然文於宋有德於曹衛有怨是時楚方圍宋且始得曹而新昏於衛故其起師也

因宋告急而假道於衛以伐曹衛不假道則又以重衛之罪雖曰攘夷實以報宋之德曹衛之怨也是其用心又何如耶然則文公之勤王攘夷皆一譎耳而其他可知矣况乎爲之臣者又助之譎也受塊拜賜盥腦伏罪子犯詐爲之說救患取威私復攜敵先軫陰爲之謀及其戰之取勝也則蒙馬而犯者胥臣也設施而退者狐毛也曳柴而僞遁者欒枝也文公之譎不又有與之相濟者乎噫文公旣歿其柩有聲如牛使

大夫有君命大事之拜豈其魂魄猶以譎爲憑
依也哉

德教洽而民氣樂論

天佑下民作之君作之師君所以長民也師所
以教民也天子者以君道而兼師道者也化民
成俗亦曰綏之以德而已昔賈誼陳政事疏有
言曰德教洽而民氣樂試申論之夫帝王之治
天下也保惠訓告感人心而天下和平非其時
民情獨厚不待齊以刑也以德化民不肅而成

刑措而不用也堯之時光被四表於變時雍舜之時敬敷五教四方風動禹之時東漸西被聲教遠訖湯之時懋昭大德表正萬邦文武之時宣重光莫麗陳教肆不違自古帝王未有不以德教化成天下者也且夫德化之流行其感格甚神焉邳治薰蒸雍雍乎和氣翔洽羣倫咸若雖昆蟲草木莫不遂其性而暢其天况人爲萬物之靈者乎是故聖人治天下以五禮防萬民之僞以六樂防萬民之情輔之翼之使自得之

陶斯世於聲明文物之中淑斯世於鐘鼓管絃之內風移俗易日遷善而不知爲之者蓋善教得民心心億則樂薄海內外舉欣欣然有喜色蹈德詠仁含和吐氣以鼓舞太平此何如氣象也周之季教化不興風俗日薄及秦之世置天下於法令刑罰二世而亡得失之故人皆知之矣夫五刑之典自古有之所以弼五教也書曰臯陶邁種德德乃降臯陶刑官也而曰種德古聖之治所謂刑期于無刑者一德意之浹洽也

賈生之言其有以得致治之原也已

孟子之功不在禹下論

天道有所不足人補救之氣化之衰也戕人生者爲天下害惑人心者尤爲天下害天不能使害之不作而有人焉出而拯之三代以上功在帝王三代以後功在聖賢昌黎嘗謂孟子之功不在禹下試申論之當堯之時洪水橫流汎濫於天下禹疏九河濶濟漯決汝漢排淮泗因其勢而導之順其性而濬之水由地中行於是天

下名川皆歸禹之疆理矣美哉禹功明德遠矣
今夫異端者人心之洪水也楊朱自愛其身拔
一毛而利天下不爲爲其說者使人疑楊子之
潔身爲我有似乎義不知自愛其身是無君也
無君乃賊乎義也墨翟愛無差等視其至親無
異於路人爲其說者使人疑墨子之親疎兼愛
有似乎仁不知愛無差等是無父也無父乃賊
乎仁也夫人之所以爲人者以其有父子君臣
之道也若使楊墨無父無君之教邪說日熾則

充塞仁義人道滅絕亦禽獸而已天下之害安
知其所終極哉且洪水之害人生在於一時異
端之害人心流於無窮禹抑洪水而天下平人
心之洪水無人抑之天下何以爲天下乎孟子
闢其說使人知異端之學爲非而邪說不得惑
人世道日趨於正君臣父子之道賴以不墜其
功豈在禹下乎孔子曰攻乎異端斯害也已楊
墨之道不息孔子之道不著孟子不惟有禹之
功也堯舜以來道統傳之孔子者賴有孟子爲

之衍其傳也已

片言折獄論

三代以上民氣和樂刑仁講讓未嘗聞有獄也
後世人情寢薄泯芴胥漸訟獄於是乎起獄旣
民所常有則折獄者亦吏治之常耳乃夫子於
及門諸人獨以片言折獄許子路者何也夫獄
者曲直相淆是非互易是者情見其直非者又
飾其情以爲直直者情達其是曲者又遁其情
以爲是用意鉤察不能得其情也反復鍛鍊亦

不能得其情也獄之折難矣而况以片言耶子
路者忠信明決人也惟誠也故能通天下之志
惟果也故能斷天下之疑示人以詐人亦得而
詐之自居於惑人更從而惑之夫使人之有以
詐已有以惑已無異乎兩造之交質無以剖其
曲直析其是非也子路之忠信進於誠也明決
卽其果也不欺人者人不忍欺不受欺於人者
人又不能欺也其折獄也豈其取辨於言也哉
蓋其蓄之有素而人之服之者已在未言之先

矣然後知明決不以忠信無以孚於平日也忠信而不明決又無以斷於臨時也噫一道同風之盛未易覲矣乃求一折獄惟良之人而已不可多得仲氏之子其庶幾乎左氏傳詳小邾射之言曰使季路要我吾無盟矣一言而信孚鄰國則以片言折獄也何不可之有

事親孝故忠可移於君論

天下之理繫乎人倫之大而發乎人心之良其事不同其理一也家人有嚴君焉父母之謂也

父母爲一家之主猶國之有君也然則知所以
事親亦知所以事君矣夫子有言曰事親孝故
忠可移於君試申論之夫父子有親君臣有義
子之事親也有隱無犯就養無方臣之事君也
道合則從不合則去事親事君之道自不同矣
胡爲乎移孝作忠也今夫理非自外至者也自
中出生於心者也事親能竭其力事君能致其
身皆出於心之至誠也爲人子者心乎父母爲
人臣者亦心乎君心乎父母者以父母之心爲

心心乎君者以君之心爲心君恩之重猶親恩之厚也愛敬之心發於至性忠也孝也一愛敬之盡其心而已矣故事親而溫清定省克共子職事君則先後奔奏用輸臣力也事親而先意承志諭父母於道事君則陳善閉邪責難於君也觀夫舜之佐堯也百揆時敘地平天成固有以極臣道之盛矣然其齊夔祗見乃所稱大孝者也周公之相武王也股肱周室綏定王家亦有以立臣道之則矣然其繼志述事乃所稱達

孝者也自古以來豈有在家不能爲令子而在國能爲蓋臣者哉忠孝之理皆愛敬之心出於性天者也其理一也故曰以孝事君則忠

君子可大受小人可小知論

君子務知大者遠者小人務知小者近者君子小人德不相同也材不相類也故其器量迥不相侔也用人者可不慎與夫子有言曰君子不可小知而可大受小人不可大受而可小知試申論之夫君子體無不具用無不周而一材一

藝之能不屑與人爭也小人材或稱優技或稱巧而經邦治世之模不足與有爲也用君子者卽彼之所受者而授之用小人者卽我之所知者而別之亦於不可審之而已天生君子非爲一人也立億萬人之命者也非爲一事也握千萬事之綱者也如以細行觀之則失人矣昔者伊尹太公相湯武以有天下勳業隆矣當其耕有莘之野釣渭水之濱與農夫漁父爲侶何所異於人哉及其佐表正之績襄耆定之功商

周數百年之規模皆伊呂所創制也記曰大德不官大道不器君子之所受不容誣也若夫小人其才豈無足取智所能及力所能勝使之服一官效一職簿書之會指臂之勞未嘗不可以剋期奏效然其所尙者小廉也所矜者小節也所飾者小忠也所執者小義也若委以艱鉅之任則智不能及力不能勝非至於因循廢弛必至於紛擾更張智小而謀大力小而任重其貽害於國家豈淺哉能官人者以君子爲之主而

總持其柄以小人爲之屬而各盡其長師師濟濟於以成到治之盛也不然以治人者而治於人以治於人者而治人黜陟不明紀綱日隳豈國家之無其人哉抑亦用人者之不能用耶

閔子騫不臣季氏論

戴記有之曰仕於家曰僕又曰仕於家者出鄉不與士齒爲大夫臣古人賤之自好者猶不肯爲况以竊政專權之大夫而賢者豈爲之臣耶聖門有閔子騫者以德行稱也觀其不臣季氏

而其人已知矣昔季氏浮慕好賢之名使人
召閔子爲費宰夫季氏魯世家也自季友有莒
役之功僖公以費賜之費遂爲季氏私邑爲費
宰是臣季氏也彼季氏者旅泰山舞八佾歌雍
以徹僭矣妄矣無君之罪不可救止爲之宰者
將枉道從之而爲之助也歟抑亦直道拒之而
使之改也歟夫破公家而強私室閔子不肯爲
也亦不忍爲也然以季氏僭妄日久豈能虛已
下賢而聽人之匡正其失乎且夫子路冉有嘗

爲季氏宰矣子路勇敢過人而其後於衛不得其死冉有藝可從政而爲季氏聚斂附益剛則取禍柔則取辱閔子其有見於此耶長府改作謂宜仍舊豈其於一身出處之節而不知所守乎要經從事退而致仕豈其於世祿悖道之家而願服其官乎辭費宰之召非仲氏冉氏所能及矣然則邑宰不可爲乎子夏爲莒父宰子游爲武城宰子賤爲單父宰非邑宰乎其所宰者公邑也費乃季氏私邑也且自季氏城費後南

蒯公山弗擾輩爲之宰而因據以叛厥後孔子
爲魯司寇以其藏甲而墮之閔子固有先見之
知也不爲費宰不屑臣季氏也其亦無愧於聖
門德行之選也歟


荀息不食其言論

信近於義言可復也君子於其言必有以慮其
所終而慎之於始故行之可無憾也若夫失言
於前而徒欲踐言於後其信何足稱哉春秋時
晉大夫有荀息者獻公使傅奚齊獻公病篤以

信訊之荀息則以其所謂信者對之及里克亂作荀息果死於難公羊子賢之以爲不食其言也宜哉詩曰白圭之玷尙可磨也斯言之玷不可爲也荀息有焉雖然荀息之言已玷於獻公未歿之先矣古人有言曰立嫡以長正也獻公殺世子申生逐重耳夷吾而欲立嬖子當其命傅奚齊也執廢長立幼廢正立不正之說開陳大義以格君心之非使獻公知奚齊之不可立也且知奚齊之果立不免於禍愛之適所以害

之也是其爲君謀也非惟自全其身亦可爲奚
齊卓子久全計矣乃荀息計不出此從君於昏
而徒以死許之至於三怨亂作遂以身殉身固
不可愛也豈其於奚齊卓子而有益乎抑亦於
獻公付託之意而果無愧乎且夫奚齊之立受
命於獻公矣卓子之立則荀息擅立也乃知荀
息之爲人徑情直行不審是非不論成敗不顧
安危彼所謂信者匹夫溝瀆之諒烈士任俠之
風而已夫何足爲信哉雖然荀息之死固不足

備而其執節守信可以愧千古智巧之士習於
趨避而不知踐言者其亦人傑也哉



樂道堂文鈔卷二

恭親王著

戰國四公子養士論

君之仁者善養士士之爲言事也謂其有德有
才能任事也先王之制有選士進士之典所以
明乎士之重也春秋以來選舉之制廢矣然其
間列國賢大夫若祁奚公叔發諸人猶有以人
事君之遺意焉至於戰國諸侯放恣從橫競雄
維時齊有孟嘗君田文趙有平原君公子勝魏

有信陵君公子無忌楚有春申君黃歇爭相傾以待士門下食客皆數千人於是世人傳爲美談以爲四公子皆能養士者也雖然彼所謂士者果可以士稱乎夫使士而可以數千人計也則士不足貴矣且使四公子而真能得士也則齊趙魏楚不難以一二士而王天下矣乃其門下之客如馮諼毛遂侯嬴朱英輩非以辯給稱長卽以任俠相尙耳然則四公子所養之士可知已古者三年大比攷其德行道藝而興賢者

能者有德故謂之賢有才故謂之能蓋疏附先後奔奏禦侮之材由此其選也四公子者假下士之名以相傾奪非有相士之智也其所禮交不問爲何如人皆羅而致之噫以雞鳴狗盜之徒而皆出其門詡詡焉自負爲士士之眞者方且恥與爲伍裹足不前而士亦安肯爲其所養乎而養士者又何嘗得一士乎班孟堅以四公子爲游俠首且曰四豪者六國之罪人也其貶之也固可爲篤論矣夫招致賓客不以富貴驕

人如四公子者亦有可取然所招致者謂之客可也若謂之士不且重誣天下士而轉令天下士羞言士也耶

子罕分謗論

立人之朝不能爲君相匡救其失亦已有忝於臣道矣况乎獨受美名以顯其君相之失哉左氏傳詳宋子罕扶謳者之譽已人以其分謗爲善身之道不知其所以爲君相計者深也昔宋皇國父爲平公築臺妨於農收子罕請俟農功

之畢公弗許於是築者有澤門邑中之謳其謳也美子罕也乃子罕親執扑而扶其不勉者何哉其以人之譽已恐爲皇國父之所忌而得罪於平公故以分謗也與雖然猶淺之乎視子罕也夫築臺不以其時太宰之過也不許子罕之請平公之過也築者之謳有詛有祝以視城者之嘲巡功其又甚焉以蚩蚩之氓而誹及其上民情尙可問乎子罕行築者而喻以大義使皆怵然於上下之分而服勞趨公之不可以怠其

止謳也不欲君相之過聞於國人而隱以靖民心也非惟分謗以全身而已也彼季氏之得眾陳氏之厚施掠美市恩以濟其私固不可同年而語矣厥後宋饑請於平公出粟以貸自貸而不書其歸美於公而不自德也亦此意也夫

范宣子讓其下皆讓論

大臣者表率羣僚者也大臣以身先之羣臣則而倣之觀於晉士匄之讓而知之矣昔晉悼公蒐繇上以命帥使士匄將中軍辭從伯游而爲

之佐於是韓起辭以趙武而讓之欒黶又以不
如韓起從而讓之彼韓起好仁者也宜知讓爲
懿德矣胡爲以欒黶之汰而亦弗敢違耶君子
之德風也宣子一讓而其下皆讓刑善也夫夫
讓禮之主也夫子曰能以禮讓爲國乎何有中
古之盛也司空之命讓於臯陶稷契共工之命
讓於夔斯伯與作虞之命讓於朱虎熊羆雍容
遜順之風負乎尙矣宣子之賢奚足以與此然
以中軍之佐讓善於下使諸大夫知所矜式卽

所謂汰虐已甚者且循循焉不欲上人古人推賢讓能之遺意猶可見也宣子其亦諸侯之良也與抑又聞之君者所則也君好之則臣爲之昔晉文公文文而有禮維時治兵謀帥狐偃讓於狐毛趙衰讓於欒枝先軫被廬之蒐上德也悼公舉不失選故前有荀偃士魴魏絳後有士匄韓起欒黶其卿皆讓於善臣之賢君之明也夫讓者禮之實也必以實意行之若伯石之辭太史而復請命蘧子馮以疾辭令尹而避禍則又

開後世僞讓之風豈范宣子之所肯爲哉

孔子稱禹無閒論

書曰克勤于邦克儉于家此虞帝之所以稱禹也雖然禹之克勤克儉非比其事而合觀之無以見其德之至也昔者夫子嘗以無閒稱禹矣其儉於自奉也於其菲飲食惡衣服卑宮室見之其勤於制作也於其致孝鬼神致美黻冕盡力溝洫見之或豐或約各得其宜負哉禹乎弗可及也已夫君神之主而民之望也乃或肅明

禮恤民事文物具飭而服食居處之間有因以
崇厚者矣又或凜危微儆逸欲嗜好聿清而郊
廟井疆之制有因以簡略者矣蓋無間若斯之
難也且夫禹固處易於有間之時也文明漸啟
朝野待理上以答天地祖宗之靈下以裕衣食
農桑之本粢盛不備冠裳不肅疆理不周其若
神人何而况水土平府事治四海方致物產之
貢一人已多逸樂之緣禹以八年荒度手足胼
胝非一朝一夕矣即使口體之私稍有豐豫亦

人所當諒而已所不必過慮者禹之爲禹不誠
易於有間乎乃禹則於一身之奉無不薄而於
神人之際無不隆古帝醇樸之風禹爲之存後
王經綸之盛禹爲之啟德至矣哉夫孰得而議
之觀其垂戒以示後人甘酒彫牆與禽色交倣
關石和鈞與典則並貽皆本克勤克儉之意以
垂裕後昆此有天下而不與之實也負哉禹乎
弗可及也已

叔向黜子朱論

春秋時晉有賢大夫曰叔向古之遺直也然所謂直者以理而已矣血氣之強君子弗尙也惜乎叔向以直聞而有不免以血氣爭者於其黜子朱見之昔秦人如晉修成叔向召行人子員使答秦命子朱以其當御也爭之又以叔向之不應也怒之遂撫劍於朝夫子朱之不知大義固不足論若叔向者諸侯之選也援國事以責子朱其言足以深折其心矣奈何爲子朱所激而亦有拂衣之舉也哉幸也人救之也若無人

救不幾以一朝之忿而隕其身耶夫子曰忿思
難易曰君子懲忿凡人於外侮之來當從容鎮
靜以理應之心志平辭氣和所謂卒然臨之而
不驚無故加之而不怒者其所養有素矣叔向
以晉國之望不忍小忿而逞匹夫之勇效俠士
之豪以僥倖得免此君子所爲深惜者也平公
猶以其所爭者大不亦誣乎不心競而力爭不
務德而爭善使叔向聞師曠之言其亦當自悔
矣雖然叔向賢大夫也好直之名人皆信之豈

其以一眚而疑其有愧於遺直也哉

晉人敗秦師于殽論

春秋書秦晉之交兵始於韓之戰終於報櫟之役搆怨數世矣然秦晉之釁不自韓始而自殽始不自秦始而自晉始何則韓之役秦許晉平其後秦穆與晉惠文修好相繼十餘年文公卽世數月有殽之師噫是役也無故啟釁者晉人也前此者晉侯以鄭之無禮於晉與秦伯圍鄭秦伯說於燭之武之言不能和鄭於晉乃私與

鄭盟且使人戍旣而復有東門之師此固秦之
反覆無道也然其時未嘗稱兵於晉晉人忘秦
之大德蔑棄昏姻興師一旦以啟數十年之干
戈背德結怨於此爲甚先軫之言曰縱敵患生
違天不祥秦之出師襲鄭非襲晉也入滑未入
晉也何得目之敵乎未報秦施而伐其師謀則
由人出也兵則由人起也何得假之天乎其言
又曰秦以貪勤民伐吾同姓晉以秦之襲鄭爲
貪晉之要擊秦師獨非貪乎晉以秦之入滑爲

伐同姓晉之與秦圍鄭鄭豈爲異姓乎且其時
墨衰從戎以爲禮之變也雖然禮變於不得已
昔者徐戎淮夷寇魯魯公凶服命師君子韙之
以寇之及門庭也若晉之薄人於險以邀鄰國
之利豈不得已耶胡爲乎君在乎殯而用師耶
夫晉之謀秦非一朝一夕矣當秦之戍鄭也子
犯請擊之幸文公之追念前勳耳文公之卒也
乃因樞聲妖言以君命動眾且曰西師軼我擊
之必大捷焉是晉之諸臣久已包藏禍心豈獨

先軫也哉蓋晉之必欲逞志於秦也以其再置
晉君威德數加於晉恐爲秦所輕故欲乘間制
勝以杜侵陵之漸絕舊好而長寇讎彭衙以往
兩國不以玉帛相見而以兵戎皆肇端於殺之
師矣厥後令狐一役負已之使禦人之師昧心
拂理其曲無以自解不又甚於殺之師也與

師曠因石言納諫論

聖門記夫子所不語以怪爲首謂其不正易惑
人心也雖然其說可以惑人其事亦可以警人

不善之徵惟人所召君人者以是修國政而慎
行之臣人者亦以是匡君德而補救之昔晉平
公時石言于晉魏榆師曠於晉侯之間因以作
事不時怨讟動於民述所聞以闡其故信乎君
子之言也夫天反時爲災地反物爲妖書曰惟
天降災祥在德傳曰妖不自作人棄常則妖興
古之人於夢寐之奇童謠之異猶且以之占休
咎卜吉凶而每有所驗况乎人事之順逆與天
地之氣相爲感應其假之物以示人鑑戒固有

昭然不爽者矣然則石言豈無因耶當平公之世霸業已衰公室日卑內則政移乎家門外則德離乎同姓庶民罷傲而宮室滋侈道殫相望而女富溢尤人棄其常戾氣應之參汾之祟見於神羽淵之厲徵於鬼石之言也又烏足怪世之治也政教行於上頌聲作於下蹈德詠仁夫且效擊壤之謳華封之祝鼓舞太平以鳴其盛能盡人之性則能盡物之性安有非言之物而言也哉噫石言之可駭不若人言之可信師曠

之言信而有徵非如強諫之鬻拳驟諫之趙盾也。使平公而能用其言，罷虜祁之役，改行修政，以永其年，豈其使戊子之說驗於裨竈也與？

衛公子荆善居室論

書有之曰：夙夜浚明，有家。謂大夫之有家者，固宜敬共朝夕，以保其家室也。時至春秋，政在家門，大夫多貪其能，不以驕淫成習者鮮矣。衛大夫公子荆以善居室爲夫子所許，夫子周流列國，與諸大夫交遊，非一日矣。當其時，公室日以

弱私室日以強如晉之欒卻齊之崔慶宋之戴桓鄭之駟良類皆貪慾無藝恃其富寵以泰於國卽在衛之望族若甯喜公叔戌輩亦以怙侈滅義封殖自專我聞曰世祿之家鮮克由禮其勢然也淫人富謂之殃或隕其身或亡在外噫有其室而不能居也不亦傷乎公子荆則不然其始有也在他人以爲未合也彼則曰苟合矣其少有也在他人猶以爲未完也彼則曰苟完矣旣而富有也在他人猶以爲未美也彼則曰

苟美矣無欲速也無兼營也無求備也荆也其亦加於人一等矣夫以居室之善論人在古人固不足難然春秋二百四十年間保家之主不可多覲况荆以公子而少年攝相事能以恬淡自持此季札之所以稱爲君子也與

申包胥辭賞論

勞而不伐有功而不德惟君子能之蓋其器識之深度量之遠非人所可及也春秋時楚大夫有申包胥者有大功於國昭王賞之不受而逃

讀左氏傳想見其人信乎有功而不自有其功者與夫功懋懋賞國之典也雖然因功以邀賞者有之矣向戌以弭兵爲名請免死之邑子重以圍宋一役請申呂之田甚至曲縣繁纓不顧名器以干大典賞所不逮猶自求之况與於其賞而反逃之也耶申包胥則異於人矣斯時也吳入郢昭王奔隨楚幾爲吳之楚矣然吳以五戰入郢胡爲又以五敗而歸也則以秦師之援也秦師胡爲而出也則以申包胥之乞師於秦

也楚之復興一人之力也君子謂包胥於是乎忠昭王賞之而卽受之誰曰不然且其時受賞者非一人矣包胥之功在鬪辛由于之上而不欲受賞何也彼其心以爲爲人臣者君憂臣勞君辱臣死君而越在草莽未獲所伏皆臣之罪也故立哭不絕聲勺飲不入口皆其至情至性發於不容已也旣而退吳師安社稷以爲國定君入庶可告無罪耳何賞之有若包胥者非惟能以忠報國也其殆有古大臣之風與前此者

伍員如吳謂申包胥曰我必復楚國申包胥曰子能復之我必能興之包胥誠能踐其言矣然徒以踐約稱之亦淺之乎視包胥也觀其辭賞而其爲君非爲身固有以大過人也已惜乎昭王不能重用之耳若能用之其治國也以視逃富之子文不又加一等也哉

宋襄公不當列五霸論

王道衰而霸業興昔之稱五霸者有二昆吾爲夏伯大彭豷韋爲商伯齊桓晉文爲周伯主是

說者曰三代之五霸也或專以春秋時稱之則曰齊桓晉文秦穆宋襄楚莊夫秦穆楚莊雖遜桓文然猶可以爲次若宋襄則愚而不足有爲者也焉得廁於五霸之列乎孟子曰以力假仁者霸宋襄欲圖霸業乃執滕宣公用鄆子於次睢之社以虐示諸侯其不足以求霸也子魚早言之矣然其喪師取禍尤有貽笑於天下後世者一言以蔽之曰愚夫霸之爲言伯也伯者長也謂以牧伯之長爲諸侯主也宋襄豈不知宋

之弱小而不自量力以人從欲爲鹿上之盟以
求諸侯於強鄰抑亦愚矣齊桓之霸宋襄所目
覩也責貢許盟桓之於楚僅得志耳宋襄自以
爲與齊桓孰愈而致楚成王於會抑又愚矣孟
之會旣已見執幸而獲釋數月而忘前日之辱
乃因爭鄭興師以挑強鄰之釁旣而楚人救鄭
尙敢稱兵以與之抗至於師敗身傷乃爲不鼓
不禽之說假古道以自飾其非則愚之甚者也
噫以宋襄而得以霸稱毋乃爲霸者之所恥乎

且夫霸者之功以尊王室攘夷狄爲先故齊桓
有首止之會召陵之師晉文有陽樊之役城濮
之戰當襄公時王室多難戎爲外患叔帶爲內
憂襄公不能伸大義以安王室南夷之強爲害
黃徐而溫爲狄滅衛爲狄伐襄公又不能恤同
惡以靖中夏然則宋襄之不得爲霸也明矣或
曰五霸無宋襄而以越王句踐當之或又以吳
王闔廬當之然闔廬得國不義且以傷足而卒
句踐非遇愼諫之夫差而越已爲吳所滅斯皆

未足稱霸也言五霸者當黜宋襄而進晉悼晉悼以十四歲卽位任賢使能事業偉然三駕之功不亞桓文左氏傳稱其復霸也信哉若宋襄者焉得廁於五霸之列乎

晏子一言齊侯省刑論

嘗讀太史公晏嬰傳謂其諫說犯君之顏以進思盡忠許之晏子固以直諫聞也然其匡君又有以不諫爲諫者一言而齊侯省刑君子稱之昔齊景公繫於刑有鬻踊者晏子因景公問市

之貴賤而對曰踊貴屨賤踊何物也胡爲鬻於市而貴於屨也景公憬然悟矣爲是省於刑夫景公之於國政其失多矣維時梁邱據裔欵輩君所謂可而亦曰可君所謂否而亦曰否不能匡君而順從之妾婦之道也納誨補闕恃有平仲耳雖然人臣之進言也不在多言而在言之善於爲言鬻拳兵諫無道乃貽自刎之羞趙盾驟諫不入遂啟伏甲之釁諫君而不能保身况能以一言而導君於正也乎夫醫師不知術之

不精而徒患病之難除挾多方以攻之天下之庸醫也匠氏不知技之不巧而徒患器之難制合衆工以試之天下之拙匠也臣之於君也不知其言之不足動人而欲君之必用其言君而不用其言則愈求之於君而煩瀆其言雖言之正聽之滋厭誰能用之夫晏子之言其見用於景公者非一端矣免祝史辨和同毀關薄斂興發補不足皆晏子之力也若夫省刑則一言感悟不必以繁刑直諫而景公已知所過矣故曰

以不諫爲諫也噫以晏子之賢知姜族之弱媿將始昌而不能振救使國終歸於陳氏也惜哉

文王視民如傷論

虞書有之曰安民則惠蓋君以民爲體治之道安天下之民而已乃或民已安矣而視之猶若未安則聖人愛民之心之無已也孟子謂文王視民如傷試申論之天生民而樹之君使司牧之國之所以廢興盛衰者於民覘之故曰民爲邦本夫文王之時之民爲何如耶嘗讀周南

召南之詩江漢風行汝墳化洽人之視文王之
民也皆曰修和怙冒之仁彼民固已共享其利
矣文王之民之自視也亦曰惠鮮懷保之恩吾
民固已各得其所矣乃自文王視之則日衣食
之未足也德化之未孚也將何以拯之水火之
中而登之衽席之上也怵乎心觸乎目其視之
如傷也夫豈必鰥寡孤獨之無告耶無人而不
若有傷也又豈必水旱癘疫之可虞耶無時而
不若有傷也詩日文王旣勤止夫勤者勤於民

事也憂民之心惟恐養之之道未能厚生教之之道未能廣被不然以文王之聖德而又何待於勤哉無逸述文王之德曰自朝至于日中旣不遑暇食用咸和萬民文王之心以民常若有可憫可矜也者一夫不獲時予之辜故雖一食之頃有所不暇文王之愛民深矣於乎元后作民父母如文王者其可謂民之父母乎

爲政以人才爲先論

夫子有言曰爲政在人治國家者其經邦也恃

有政其行政也恃有人不有治人何有治法乎
先儒楊氏謂爲政以人才爲先旨哉斯言也夫
政者紀綱法度之所由布也一人統之一人不
能理之故有主治者以綜其要必有輔治者以
分其司使立政而不得其人材智之不逮措置
之失宜必至禮樂不興刑罰不中而民亦無所
措手足甚且剛愎者妄事紛更機變者習爲巧
佞君子觀於廉來崇奄之禍殷番聚蹶耦之敗
周未嘗不歎愴王之誤人家國非淺也古帝王

之治天下也四海之外六合之內莫不享平成
而安樂利觀其布政優優一若南面無爲垂拱
而理也不知兢兢業業固有先務之急也何也
曰爲天下得人是故堯有九佐舜有七友禹有
五丞湯有三輔文有八虞武有十亂以二帝三
王之盛猶且以任賢籲俊爲念况德之遜乎堯
舜禹湯文武而用人可不慎歟夫官人國之急
也誠使賢者在位能者在職大臣法小臣廉以
之事君則忠貞篤以之治國則謨猷宣以之化

民則德教洽上有喜起明良之慶下有華封衢
壤之謳猗與休哉政之隆也故曰明王立政不
惟其官惟其人

惟刑之恤論

五刑之設由來已久古聖人不得已而用之者
也好生之德刑期于無刑故用刑者聖人之法
不欲用刑者聖人之心虞書有之曰惟刑之恤
試申其旨夫帝王以天地生物之心爲心恐民
之不親不遜也敬敷五教爲之禮以防之爲之

義以閑之爲之政以正之其或不率五教者於
是乎有刑五刑之典堯舜之世有所不廢然而
流宥鞭扑因罪之輕重而定之法之經也眚災
怙終因情之輕重而酌之法之權也經者立乎
常法之中權者行乎常法之外此其心果何心
哉誠以刑爲民命所關慎之又慎一出於不忍
人之心而已昔人有言曰刑賞忠厚之至夫刑
者凶器也胡爲乎以忠厚言也聖人愛民至深
憂民至切不使執法之意有勝於好生之德觀

夫堯舜之世臯陶爲士士刑官也而禹稱其邁種德旣爲刑官而曰種德何也以刑弼教而使黎民懷德不犯于有司非忠厚之至乎文武以後周道漸衰穆王立命其臣呂侯而告之以刑謂之祥者欲民之協于中而歸於無刑也其命辭憂而不傷威而不怒嚴明而慈愛隱隱乎有哀矜無辜之深意故孔子猶有取焉春秋之時晉鑄刑鼎鄭鑄刑書已廢先王之法矣至於後世執法者有酷吏之名如史遷所云張湯趙

禹諸人皆以苛刻爲能夫豈先王設刑之本心也哉

尙志論

四民以士爲首所以明乎士之貴也其貴何也以其所蘊蓄者深而所持守者正也昔孟子因王子墊之問士何事而以尙志答之墊之問也蓋以上則公卿大夫各有其職敬而修之下則農工商賈各有其業勤而習之職也業也皆事也若夫士無職可循無業可守將何事乎於乎

何王子塾之輕視乎士耶夫欲知士之所以爲士宜知士之所以爲志人溺於功利士則卑之人狃於權謀士則污之人競於材智士則斥之士之所以爲志得志澤加於民不得志修身見於世其志之所以高尙者何也曰仁也義也天下之理莫尊於仁義仁人之安宅也義人之正路也以之修身則性氣全以之事君則謨猷懋以之治國平天下則道洽而政治聖賢之學術卽帝王之治術也仁者人人之體義者大人之

用士不必得大人之位耳大人之所以仁育萬物義正萬民者其事亦何所不備也哉王子墊生於戰國之時古之所謂士者非塾之所能知也無異乎其問也且當時之所尙者非游說之談卽任俠之風不知有仁義也旣不知有仁義又何知士之所志士之所尙而士之所以爲士耶噫以士之窮不失義達不離道而使世俗日爲無事之人可慨也夫

曹劌論兵論

春秋時魯人有曹劌者未有位於朝者也柯之盟手劌登壇要齊桓公以請汶陽之田疑其爲人類豪俠者之所爲及讀左氏傳長勺之戰則於劌之論兵異其人矣魯莊公十年齊師伐魯曹劌請見問何以戰公謂衣食不敢專犧牲玉帛不敢加劌則曰小惠民不從小信神弗福也公又謂其小大之獄必以情劌乃曰忠之屬也可以一戰夫獄之與戰事不相涉胡爲乎莊公言之而曹劌許之耶無乃使人視劌之迂遠而

不達於事耶不知有國者以得民心爲本上思利民忠也能利民然後能使民夫獄者天下之大命也呂刑云其刑其罰其審克之言聽獄者必盡其心也不盡其心則不公不明亦無以服民心矣民旣不服平日且不樂事勸功况危難之時豈肯爲上所用耶莊公所謂決獄以情者以己之情求人之情情與情相通惻然有哀矜慈祥之意故上有愛民之心下亦有愛君之心尊君親上民之望君如望慈父母焉大敵在前

子而思報父母之仇未有不竭力致死者也。蒧言可以一戰是知用兵之本者矣。及其戰也，齊人三鼓，然後鼓之。齊師既敗，視其轍望其旗，然後追之。其志慮之詳慎，又非輕而寡謀者之可比也。夫蒧魯之良也，觀於魯侯，觀社曹蒧進諫，其言曰：「書而不法，後嗣何觀？」乃所謂進思盡忠者也。豈徒習於用兵也哉？

孔子與顏淵子路言志論

聖賢之心同歸於仁，然其分量自不相侔。非惟

聖與賢有大小之差卽賢與賢亦有淺深之致
中心安仁者天下一人而已其次則不違仁又
其次則求仁昔者夫子嘗與顏淵子路言志矣
車馬輕裘與友共而做之無憾子路之志也有
善無伐有勞無施顏淵之志也安老者信朋友
懷少者夫子之志也夫以人心之不能忘私也
雖在骨肉之間猶不能無彼此之分况朋友乎
子路勇於義者物與人共不爲己私其志豈勢
利所得拘哉然車馬輕裘焉得人人而濟之故

其言惟及於朋友乃顏子善中之一善耳若顏子之志視子路則超然矣有善而不矜其善有勞而不矜其勞蓋學之深於克己者非一朝一夕也然其欲然不足猶有善勞之見存於中則猶未免出於有意也至於夫子一理渾然泛應曲當一天地之大而已嘗觀夫天地之於物也以不二之體極生物不測之神形形色色萬物並育於其間而莫知其所以然聖人之志亦如是也老者朋友少者人盡於斯矣老者當安朋

友當信少者當懷理則當然耳卽物之與我相接而予以物所自有之理因物付物無一不得其所一天地之大而已此非顏子之所可驟及而豈子路之所可企及也哉夫子路之忘私固篤於求仁者而與仁猶爲二也顏子之不違仁蓋處乎仁而能久者也若夫子則安而行之心卽仁仁卽心也學者必先從事乎子路之求仁以馴致乎顏子之不違仁庶幾漸近自然上希乎至聖之安仁也歟

君子以辨上下定民志論

書曰以禮制心禮也者理也古之王者懋德建中以之正一己之心莫如禮以之治天下人之心亦莫如禮孔子釋易履之象云君子以辨上下定民志試申其旨夫民性至愚也民心之所欲無恆也處於鄙野不知尊卑之有等貴賤之有差也習尚紛然僭濫侈靡之風日甚一日如賈誼所言富民大賈得爲帝服庶人婢妾得爲后服民俗以漓欲求天下之治而不可得其故

何也民志之不定也民志之不定何也上下之分不明也君子觀上天下澤之象而禮制行焉禮爲上下之紀所以昭軌物而辨等威者也辨乎上者以尊馭卑示民之不得以卑踰尊也辨乎下者以賤奉貴示民之不敢以賤陵貴也是故天子當陽諸侯用命公卿大夫士莫不恪循職守降而至於農工商賈亦皆各安其業各食其力而且冠裳則有采章以別之官室則有尺度以繩之器用則有法制以範之大典不可干

也大經不可紊也禮達而分定如權衡懸而輕
重有定數不能淆也規矩設而方圓有定式不
能越也繩墨陳而曲直有定象不能誣也禮之
教化也微其止邪也於未形使民日遷善遠罪
而不知也夫以堯舜之世不能無不親不遜之
民而自有以平章百姓者則以秩敘惇庸之教
無遠弗届也故曰安上治民莫善於禮

向戌尤室論

責善朋友之道也益友以直爲先以其得聞過

也春秋時政在家門權利相競友道亦已衰矣
然列國賢大夫聘問之際猶有古人忠告之遺
意其人可風也昔宋大夫向戌聘於魯見孟獻
子尤其室夫向戌諸侯之良也爲左師有年矣
見夫列國之卿相貪欲無厭如晉之欒郤齊之
崔慶鄭之駟良皆以淫佚取禍卽魯稱秉禮之
國而叔孫宣伯東門子家輩亦以怙侈滅義不
能爲保家之主良可慨也若孟獻子者則魯國
社稷之臣也與樂正裘牧仲等五人相友不自

挾貴而能忘其勢且嘗謂百乘之家不畜聚斂之臣是其爲人儉約自守所謂加於人一等者向戍聞之久矣豈意以獻子之夙有令聞而美其室也哉有爲之言者曰昔晉獻文子成室張老賀之君子謂之善頌齊景公爲晏子更宅晏子毀爲里室議者或以爲非爲國卿而美其室亦何足爲過耶雖然人臣之於國也國奢則示之以儉是時三家之侈其不能居公室也四方莫不聞矣獻子當力救其失使世祿之家皆克

由禮而乃自美其室不亦失向戌之所望乎向
戌既與獻子相契知其室美之非而不以告非
朋友規勸之道也以其夙有令聞而遂謂室美
之不必咎亦非朋友切劘之道也然則其尤之
也所謂友之直也夫向戌固能受責於人矣請
賞得邑子罕讓之而向戌辭邑且曰夫子存我
德莫大焉蓋惟能受善言者乃能盡朋友責善
之道也夫

宋子罕責向戌求賞論

春秋經於魯隱公二年書鄭人伐衛爲諸侯專
征伐之始自此以後列國日尋干戈以相征討
兵之爲害久矣安得息兵以紓民命乎魯襄公
二十七年宋大夫有向戌者欲弭諸侯之兵乃
合晉楚之成以盟於宋晉楚旣合向戌求賞宋
公與之邑以示子罕夫兵可弭也而賞不可求
也子罕責其求賞可也而乃責其弭兵之誣以
爲罪其說則僻矣兵民之殘也財用之蠹也雖
曰禁黷帝王不得已而用之者也帝王聯萬姓

爲一體合四海爲一家撫民以德不聞以兵也
湯十一征東面而征西夷怨南面而征北狄怨
武王伐紂壹戎衣天下大定萬姓悅服夫豈窮
兵於武也哉亦曰以德服人而已嘗觀中天之
世掌兵者無專職兵屬於刑以其不輕用也易
之師日毒天下而民從師以眾正尙謂之毒亦
可知兵之爲害矣時至春秋諸侯貪冒侵欲不
忌爭尋常以盡其民列國之苦於兵豈可勝言
向戍之欲弭兵雖欲以爲名然自弭兵之後晉

楚無相加我而中國之不侵伐者亦幾五十年
斯非向戌之功也乎有功求賞子罕斥之固宜
乃並以其弭兵爲誣則夏先后之班師振旅周
先王之偃武修文亦爲誣乎向戌聞子罕之言
而辭邑是能受直言者矣若援先王耀德不觀
兵之說而詰子罕以兵之無不可弭也子罕其
何辭以對

魯築郎囿論

書曰罔遊于佚罔淫于樂古聖以天子之尊御

平成之世猶以逸欲爲戒况在侯服而當國家
衰弱之時乎昔魯昭公九年築郎囿以其築於
冬也左氏與之於乎昭公之時爲何如時而尙
爲築囿之舉乎夫郎者卽莊公築臺于郎之郎
因之而築囿囿乃娛遊之所非國事民事之所
急也公之卽位也年十九矣猶有童心蓋不度
之人惟耽樂之從不知憂國憂民耳是時也公
室四分民食於他政在家門三世矣魯君失政
四公矣鄉使昭公有扶衰救弱之心則將朝夕

未遑以勤政愛民魯國其庶幾乎乃恣意縱欲
難將及身不恤其所以而且陵虐小國利人之難
元年伐莒取鄆四年取鄆八年大蒐于紅其黷
於武也民之罷敝已不可勝言今復有郎圍之
築雖曰以時於民何忍於已何暇哉然則圍之
不宜築也明矣而季孫意如欲其速成何也或
曰是時季孫專政欲以勞民歸惡魯公使民喟
喟然蓄怨於君而乃以得志也夫平子之不君
君無足論矣叔孫昭子之言曰無圍猶可無民

其可洵有志乎民者也然不能抉意如欲速之
隱情而講魯公止築圃之役也惜哉

學而不思則罔論

心者身之主也心之所司以思爲職生知之聖
不思而得非人所能企及至於學者由學而入
思則得之不思則不得也故學與思不可偏廢
也夫子有言曰學而不思則罔試申其旨夫學
將學乎古聖賢之所爲也內而身心性命之存
養外而家國天下之經綸進德修業莫不由學

以聚之雖然天地之間萬事萬物無不有當然
與所以然之理欲明其理豈專事於學乎初學
之時冥然罔覺朝夕思之由偏以會全由表以
徹裏由粗以及精日積月累於凡事物之理豁
然貫通蓋於其所不知者漸進於知於其所已
知者又擴充之以至於無所不知故曰以學愈
愚也乃若從事於學而亦昧昧若愚者何也不
思而已矣夫學非無裨於人之聰明也然以身
習之未嘗以心求之則固有之聰明亦以窒而

不聞即使多見多聞而不明其所當然不求其所以然俛俛乎無所持循如射者之日習乎弓矢決拾之前而不即志正體直之故以默會之不能巧也如匠氏之日習乎規矩繩墨之前而不即審曲面勢之故以深究之不能良也無所用心徒爲記誦章句之儒雖孜孜矻矻日從事於學而不能有所發明也學之不可不思也明矣然思而不學則雖終日不食終夜不寢而所思者恫恍無主無以範於中正之歸亦已殆矣

故曰學與思不可偏廢也

進賢如不得已論

知人則哲惟帝其難人君之治國也皆欲舉賢以自佐然所舉之賢未必爲賢何也知之難也知之難而用之得無難乎昔者孟子對齊王曰國君進賢如不得已夫賢者天下之楨榦也國家之事一人統之不能一人理之故爲政以人才爲先以人任政不得其人如治絲而棼之也如未能操刀而使割也如拙工拙射將思改繩

墨而變轂率也任之以政而後知其人之非賢也知其非賢則將廢之黜之而以新進更之新進之人乃亦庸庸碌碌然不能勝任則又將更之昔者所進今日不知其亡非國體也且國之政事無乃傾壞已甚也乎吾觀古帝之官人也敷奏以言又必明試以功以濬哲文明之聖猶且詢於四岳咨於十二牧其故何也又嘗讀王制一冊任官制祿由秀士而升之曰選士由選士而升之曰俊士曰造士曰進士司馬論進士

之賢者以告於王而定其論至於論定然後授之以官其故何也蓋古帝王之用人如此其慎也夫尊尊親親禮之常也苟不慎之於始則今所尊者未必賢後必求卑而賢者進之今所親者未必賢後必求疏而賢者進之不將使卑踰尊疏踰戚乎故人君用人之心未嘗不切而用之之時審之又審若有不欲用而迫於勢之不得不用者也夫國以一人興以一人亡有治法必有治人然而知人不易用人斯不易矣故曰

爲天下得人難

國之興也以福論

國家將興必有禎祥禎祥者福之兆也天道福善惟理之常然吾所謂福者不必卜之於天而實驗之於民左氏傳載陳大夫逢滑之言曰國之興也以福斯時也楚爲吳所敗人皆以爲吳可從而楚可棄也烏知夫吳未有福楚未有禍也夫所謂國之福者豈一人之福哉書曰民惟邦本民之安國之福也有國者亦心乎愛民而

已乃或視民如土芥不勤恤之而殘害之如桀之流毒下國紂之毒痛四海固無論矣春秋之時列國日尋干戈以相征討民人愁痛不知所底以含生負氣之儔而使日徹於兵暴骨如莽無乃非天之所以生民之心乎故其甚者則身弑國亡不甚則身危國削禍之大者其何福之爲夫欲治之主愛民如子視民如傷內修其德以軫念之外治其政以康乂之是故堯之在位也其仁如天民莫能名舜之受禪也好生之德

治于民心禹爲民除昏墊之災湯爲民翦苞蘖
之害文武爲民推怙冒保惠之恩古帝王之享
國久長蓋以此也非惟帝王之盛爲然也雖霸
業之興亦以之齊桓兵車之會猶無大戰也楚
莊止戈之論猶思戢兵也晉悼從魏絳之請猶
謀息民也此其狃於霸圖不逮二帝三王遠矣
然亦知拊循其民故能保國以爲諸侯主逢滑
之言信矣哉夫德福之基也德之臧否於民覘
之福之應違於民驗之觀於吳之入楚國旣勝

矣而視民如讎卒以亡國楚見敗於吳國幾滅矣而不艾殺其民卒以復國昔人有言曰禍兮福所倚福兮禍所伏其此之謂乎

驥雖有力其稱在德論

才者德之用也人謂士之見稱於天下者才與德並重不知善用其才乃其德也夫物則亦有然者也不觀夫驥乎夫子有言曰驥不稱其力稱其德也馬之良者曰驥一日可行千里者也日行千里是其力也善用其力是其德也力與

德驥皆有之然而有驥之名不可不卽其名以
繹之有驥之實不可不卽其實以核之驥之所
以稱爲驥者果何在乎如使其有力而無德也
則雖以強健之姿奮迅之足超軼乎牝牡驅黃
之羣然其氣不降其性不馴銜轡之不能束縛
羈絏之不能繫維鞵鞞鞅鞞之不能控制進退
不可周旋不能是固王良造父之所難御而伯
樂九方臯之所不屑顧噫是馬也且欲與常馬
等不可得何驥之稱然則驥之所以得稱爲驥

者以驥之善用其力不在力而在德也夫驥其小焉者也人之以俊傑稱猶馬之以驥稱也若有才而無德必將恃其聰明而誤用之其在於身則務求高遠有以異端壞士習者矣其在朝廷則妄事紛更有以經術誤國家者矣無亦如奔踶泛駕者之不可用而爲騏驎騾耳之羞與伍耶成德之士不以能矜不以智炫不以謀略相爭不以聲華自詡蓋德爲內美之含而才則其外見之迹也德爲全體之蘊而才則其偏見

之端也才雖過人以德範之其所以任重致遠
不愧爲天下士者固自有其眞也此所謂人中
之驥與

樂道堂文鈔卷三

恭親王著

晏嬰叔向語齊晉之事論

責難於君謂之恭陳善閉邪謂之敬人臣之事
君也有犯無隱况當國家傾覆之際尤賴社稷
之臣盡忠竭力爲之革弊救衰以培國脈而延
國祚若亡不能存危不能安亦何貴乎有謀臣
耶嘗讀左氏傳詳晏嬰叔向論齊晉之衰而於
二子有憾焉是時也齊晉皆季世也齊則民歸

陳氏晉則政在家門二卿
田氏代齊三卿分晉其兆
其時事之非語語惻然相
也然晏嬰叔向爲國卿亦
聚斂繁刑取怨平公以官
言納諫祛朽蠹之緣杜悞
強撥亂以歸於治使太公
乃可謂賢矣二卿不能匡
語竊歎目覩岌岌之勢而

夫二卿豈以爲君之必不能從其諫歟抑以國之衰微已甚而不可復振歟景公雖無德可稱而非若靈莊之無道也平公雖不能繼悼之業而非若靈厲之不君也踊貴履賤之諷已省刑矣祝益詛損之誠已寘政矣景公豈不用晏子之言乎貪求之論則歸陳使矣效辟之阻則逆楚使矣平公豈不聽叔向之言乎乃二卿不思格君心之非以救國之將亡而以日夜痛心者私議喟歎此婦人孺子之所爲非卿大夫之所

爲也賢者固如是乎或曰廢興存亡惟天所命
非人之所能爲也二卿非阿容也予曰不然天
道之遠非所知也卽謂氣運屯蹇而人臣以身
許國當以人事之艱濟天道之窮安在姜必爲
媯晉必爲韓魏趙乎二卿無乃有忝於人臣之
道乎雖然二卿憂國之心良苦矣以視齊之高
鮑晉之欒卻脩然遠矣其亦諸侯之良也歟

楚復使蘧子馮爲令尹論

書曰位不期驕祿不期侈驕侈固人臣之所宜

戒而人臣之所難免也愚者固不足道然或有過人之智而亦身蹈其轍甚矣祿位之惑人也春秋時楚大夫有遠子馮者觀其先後聞叔豫之言而聽信之一似有定識有定力者初康王使爲令尹以申叔豫多寵王弱之言遂以疾辭其識之卓可謂智矣厥後繼子南爲令尹又以申叔豫之言辭所寵者八人其力之果又可謂智矣然吾有譏焉夫遠子馮旣以叔豫之言臥冰鮮食辟榮祿如刀鋸思以自全其身然子南

得罪之後就令尹之命不復辭豈以子南旣誅而國卽可以爲耶胡爲乎辭於令尹無事之時而就命於令尹得罪之日哉且遠子馮旣爲令尹則當檢束其身以防子南取禍之漸乃一爲令尹更多寵人若茫然不顧者一觀起而足以禍令尹况八人乎夫子南之所以取禍者其轍迹可見也然而昏不知避是後車又將覆也他日朝三就叔豫叔豫三避之而子馮猶不解其故豈忘叔豫之前言歟抑不知有子南被禍之

事歟何以甘受小人之取寵而不自悟也嗚呼
若蘧子馮者雖有過人之智而既不再辭又不
知所以戒幸有一叔豫耳微斯人而其禍不將
甚於子南乎雖然子馮一聞叔豫之言遂自御
不能當道前日詐病今則果病矣能受友人之
善言故有以自全也夫子馮有友子南有子棄
疾而不能爲叔豫也惜哉

有若請專行徹法論

天生民而樹之君使司牧之君與民一體也足

國必先足民國之富藏於民者也故仁政必自
經界始昔魯哀公以年饑憂用之不足問於有
若宥若以行徹對夫哀公亦知國之不足非自
今日始乎魯自宣公稅畝什一之法遂廢至成
公作邱甲而賦民之力亦非古制及哀公用田
賦則民之財力竭矣哀公之憂不足思得一策
以救目前蓋仍欲加賦耳有若則不爲目前計
而爲久遠計故請行徹夫徹之法始於公劉徹
之制定於周公其於阜民裕國之經垂謀至悉

豈其貽後世以不足之道也耶徹者通也以言乎耕通力合作無此疆爾界之分是相足之義也徹者均也以言乎斂計畝均收無此多彼寡之殊是各足之義也民得其九公取其一惟正之供所謂什一而籍也什一者天下之中正也什一行而頌聲作矣或曰是時魯之公室四分行徹奚益乎不知分田卽以制祿自農田百畝等而上之士大夫卿以至於君十卿祿井地均而穀祿平取於民者有制用之上者有經夫何

不足之有况乎三年耕必有一年之食九年耕
必有三年之食雖有凶旱水溢民無菜色豈有
民不爲病而災荒獨爲國患之理乎哀公急於
足國有若急於足民未有民不足而國能足者
反本之論其在斯與不然有若豈不知哀公之
時二猶不足而顧以行徹答之爲此迂遠之圖
也哉抑又思之有若對哀公以徹法而孟子對
滕文公以助法何也魯之時履畝加賦而井田
之制未改故徹法不難舉行戰國之時阡陌已

開井田寢廢徹法不能復矣要之士君子爲國家計皆歸於王道之正而已

子路辭要言論

信者言之瑞也人而無信不知其可也雖然人以信相尙又或信而不知所以信者何也不能以義裁之也聖門子路其庶幾乎昔小邾射以句繹來奔曰使季路要我吾無盟矣使子路子路辭夫春秋二百四十年間百有餘盟口血未乾而背之者多矣可尋也亦可寒日盟何益小

邾射之不信盟也亦宜至其信子路之一言則以子路之信素孚於人且其性勇而果未有不與之要言者而孰意子路之堅辭不諾也哉夫子曰片言可以折獄者其由也與難折者獄也夫子以片言許子路門人因記其無宿諾然吾謂其無宿諾非難其不輕諾爲難耳何則子路固以義爲信者也其磊落光明之概剛方正直之風卓然自立安能爲竊邑之叛臣成其要言也乎前此者邾庶其以漆閭邱來奔莒牟夷以

牟婁防茲來奔邾黑肱以濫來奔魯皆受之是
召盜也故魯陽虎亦竊鄆謹龜陰之田以叛於
齊子路遂有墮三都之舉今射之以地來不臣
於小邾也不臣則大不義也而乃以濟其言也
可乎哉康子不知守信之有以害義而復使冉
有謂之康子固無足論冉有而爲康子所使聞
子路之言亦當有愧也歟

楚昭王知大道論

禍福之說自古有之國家將興必有禎祥國家

將亡必有妖孽休咎之徵有由來矣然自陰陽卜筮家競起人皆以趨吉避凶爲能遂爲禍福之說所動而惑於鬼神之不可知何也不知有道也楚昭王其庶幾乎昔楚昭王之救陳也卜戰不吉卜退不吉昭王以爲敗師逃讎皆不如死而何所避乎及其立後也命子西子期子闔而不及其子昭王以爲國家多難宜立長君而又何所私乎夫知死而不避立後而不私固非昧於道者之所能矣而其不惑於禍福之說尤

有人所難者救陳之歲有雲日之異周太史以災當王身請禳以移之前此者昭王有疾卜曰河爲祟大夫以卜人之言請郊以祭之夫德爲福之基不德爲禍之階有罪受罰宜矣太史所謂可移者不知其果能移否耶即使能移而腹心之疾移諸股肱庸有益乎卜人所謂爲祟者亦不知其果爲祟否耶即使爲祟而不德致咎禳之何損况祭不越望河非所獲罪乎昔先王之制祀典也必準乎禮之經與義之正禮者理

也義者宜也卽古今共由之道也自人之不明
乎禮與義一聞降祥降殃之說則竦於幽冥之
故迷於恍惚之談昵於禱祈之術如虢公之享
神而求田衛侯之因夢而祀相齊君之聽據欵
之言而欲誅祝史此皆惑於禍福之說而瀆於
鬼神者也非所禱勿禱非所祭勿祭昭王其知
之矣夫祭則不以卜而從戰則不以卜而避災
則不移於令尹司馬立後則及於令尹司馬是
惟明乎人道之常故天道神道之不可測皆不

得而惑之夫子稱其知大道也信矣哉

請益曰無倦論

書曰政貴有恆恆也者久於其道而始終如一也故爲政之道可大在可久也昔者子路問政於夫子夫子告以先之勞之夫政之不可緩者亦教養斯民之事而已曰先之者不可後也曰勞之者不可逸也夫子固於先勞之中示以不可倦之意矣何子路之勇於有爲猶以爲不足而請益耶嘻自古以來憚於爲者不足有爲喜

於有爲者亦不足有爲也何也始則易之繼則
厭之久則紛更之國事豈可問乎夫子因其請
益而告以無倦其益於先勞之外耶抑益於先
勞之中耶且夫敦龐之治不外乎正德厚生也
康濟之模未能一振作而無餘也井田學校之
規非可以急遽圖功且暮奏效也嘗觀天道之
不息也陰陽寒暑之往來循環而有度日月星
辰之迭嬗運行而有常終則有始天之所以爲
天也天道恆久而不已况人事乎孟子曰有恆

產者有恆心夫民所以有恆者皆在上之化導之使有恆也聖人久于其道而天下化成其斯之謂乎

教民節儉則財用足論

爲政之道在於足民民不足而可治者自古及今未之嘗聞先王之於民也使貧者咸致於富而又必使富者不復爲貧何也處貧之民自安於約處富之民日趨於華恃其衣食之不匱而漸以侈靡相競一歲之費或以耗數年之藏一

身之奉或以罄數世之蓄百人作之不能衣一人百人耕之不能養一人欲無饑無寒不可得也夫雕文刻鏤傷農事者也錦繡纂組害女工者也生之者甚難而靡之者無度小民財產何得不蹶如是而欲使民財用之恆足也非節儉不可然而小民無知也制節謹度非民之所能自爲也賴上有以教之爲民上者崇實黜華以身先之若堯之椽不斲茨不翦禹之菲飲食惡衣服躬行節儉爲天下倡使民皆化之樂乎風

俗之古而惜乎物力之艱雖洽比之歡往來之
誼人情之所不能免也然而歲時伏臘有常經
也賓祭冠婚有定式也於其所出也防其不足
斯於其所入也留其有餘日積月盈不必損上
益下而閭閻饒裕財不勝用蓋因民之所利而
利之而利且溥於無窮矣易曰節以制度書曰
慎乃儉德惟懷永圖古昔盛時所由使民熙熙
於耕鑿作息之天而忘帝力於何有者其以此
夫

知者樂水仁者樂山論

聖人之心渾然一理故仁知合德未可以一端名也未至於聖則各隨其材而有所成就或見爲知或見爲仁觀其心之所好而可知矣夫子有言曰知者樂水仁者樂山夫天地之氣行乎所不得不行在物水也在人知也天地之氣止乎所不得不止在物山也在人仁也山水一天地之知仁也嘗觀水之流而不息也大波瀾小波淪浩浩乎不舍晝夜亦如知者之動而不括

乎山之峙然屹立也一成坯再成英巍巍正
其廣大亦如仁者之靜而有常乎而吾以知
者仁者之所樂矣凡人之心膠於一定之目
不知變事物之來應之必多所滯以其不能
理故也凡人之心乘以百感之紛而不自持
物之來臨之必多所擾以其不能存理故也
者心明乎理心與理順境與心順萬事萬物
得而困之殆與水之流而不息也從其類也
者心存乎理心與理安境與心安萬事萬物

得而搖之殆與山之峙然屹立也從其類也知者其樂水乎仁者其樂山乎蓋知仁之德有得於心故其於山水也非有心於樂之也見山水而樂之不必見山水而亦樂之其動靜之體無時不有山水之趣斯無時所見非山水之境也水之性卽知之性山之性卽仁之性知者之樂水仁者之樂山不謂樂水樂山而謂自樂其知仁可也

劉康公言魯大夫儉侈論

書曰克儉于家又曰祿不期侈古帝王任人訓
官未有不以儉爲尙以侈爲戒者也後世爲人
臣者可以知保家之道矣昔劉康公聘於魯見
季文子孟獻子皆儉曰季孟其長處魯乎見叔
孫宣子東門子家皆侈曰叔孫東門其亡乎信
哉斯言也夫儉德之共也侈惡之大也制節謹
度上下同之不獨大夫爲然也處乎大夫之上
者君也兢兢業業謹爾侯度猶且不敢遊於佚
淫於樂也况大夫而敢忘官箴乎處乎大夫之

下者民也農工商賈各安其業猶知革侈靡之習而守醇樸之風也况大夫而不知所以庇身乎雖然祿位之足以移人也可畏矣世祿之家鮮克由禮挾權之貴恃爵之榮倚勢之尊日趨於奢靡驕淫而不自知其不能若季孟之儉而競爲叔孫東門之侈也莫可勝數豈知儉則令聞長世而侈乃階之爲禍也哉夫所謂儉以足用族可以庇者其處已也約其與人也廉以之立身能儉者無不勤也以之事君能儉者無不

恭也雖豚肩不掩豆澣衣濯冠以朝君子亦以爲隘然不失爲保家之主其庶幾乎若夫侈不恤匱憂必及之內肆其心外耽於逸般樂怠敖不知飲食之有節也衣服之有度也宮室器用之有定制也怙侈滅義以速戾于厥躬如晉之欒郤齊之崔慶鄭之駟良敗亡之禍近者及其身遠者及其子孫可哀也哉如劉康公之言季孟果昌於魯叔孫東門果犇於齊以此觀之吉凶休咎之徵不必卜筮之用卽其人之所以自

處者驗之可知已矣

伍員病楚論

春秋時吳楚構兵數十年而楚嘗爲吳所病以
予觀之楚之禍實自取也夫爲吳謀楚者前有
巫臣後有伍員怒巫臣者子重子反也巫臣教
吳乘車戰陳而楚罷於奔命蠻夷屬楚者吳盡
取之怒伍員者費無極也無極譖其父於王王
聽其言而殺伍員之父兄伍員至吳導闔閭伐
楚楚自昭王卽位無歲不有吳師至於入郢楚

國不絕若縷矣伍員之爲害於楚不又甚於巫臣哉夫長岸之役卒取乘舟雞父之戰大敗七國闔閭固習於兵者况翼以伍員士之甚勇之甚蓄怨旣深而又有才以濟之楚君大夫能勿盱食乎然吾謂楚之君臣旣知伍員之在吳則當內儆軍實外戢釁端以防吳師之來而乃彊其讎以重怒之啟吳王伐楚之謀而伍員之計得以行矣雖然三師以肆豈果無術以當之耶假使任患有入慎其四境完其守備以待不虞

彼以師肆我則分兵禦之以逸待勞如知武子
所謂三分四軍以逆來者吾恐吳人罷敝之不
堪又烏知勝負之所在且夫楚國非小弱也郢
之地勢自若也兵戈之威人民之衆不下於吳
也然而爲吳所病何也執政衆而乖莫適任患
出則皆出歸則皆歸伍員之料楚熟矣夫國以
一人興以一人亡荆楚擾攘諸夏雖齊桓晉文
無如之何而一伍員病之有餘怨毒之於人甚
矣哉詩曰誰生厲階至今爲梗其楚之謂乎

急親賢之爲務論

博愛之謂仁有天下者以仁心行仁政仁之爲道大矣雖然不知仁者之所務未可與之言仁天下之人以一人統之不能以一人理之故股肱耳目之任必有以得其人孟子有言曰仁者無不愛也急親賢之爲務試申論之夫賢者天下之楨榦也天生民而立之君有君而爲之貳君人者不急於求賢則雖有仁民愛物之心而君子在野小人在位紀綱之不振德教之不行

聰明日蔽於上怨讟日興於下民人罷敝將辛
苦墊隘之無所告何仁之有然則仁者之所務
可知己人君撫馭天下固欲使天下之民皆得
享其利而受其福也然而天下之大人民之眾
焉得人人而施濟之是故明王建邦設都樹后
王君公承以大夫師長有主治者以爲之君必
有輔治者以爲之佐誠能得賢而任之上以匡
君下以澤民民之所利爲興其利民之所害爲
除其害道洽政治而仁覆於天下矣古者堯舜

之垂裳而治也地平天成萬世永賴仁之至也
然其時平水土降播種明五刑敷五教疇咨都
俞惟以得禹稷契臯陶爲急耳亦越成周文武
宣重光怙冒之仁寵綏四方而其所以使民樂
之利之者又何非周召諸人爲之康濟也哉由
是觀之驩虞之治不足以稱仁也輸貸之恩不
可以爲仁也古聖人之急其所務者要在宣力
四方之得其人也故曰爲天下得人者謂之仁
春秋書梁亡鄭棄其師論

春秋一書筆削謹嚴義例固自不同然各以事實書之無加損焉正名而已故有變法以書如書梁亡鄭棄其師者春秋之意深矣夫梁之亡秦取之也鄭之師潰高克帥之也然不曰秦取梁而曰梁亡不曰高克師潰而曰鄭棄其師何也梁以區區之地介居大國之間則當內修國政休息其民外睦鄰封敬共幣帛以待來者不知慮此而土功是好驅耕作之民以供力役至於民罷而弗堪則曰某寇將至且曰秦將襲我

自以爲愚民得計矣乃果如其言使秦人不煩
兵戰而梁已爲秦之梁也其亡也又誰咎乎若
夫河上之師鄭伯爲惡高克而使也賞罰君之
大柄鄭伯旣惡高克則當案其不肖之狀以聲
其罪退之可也廢之可也曷爲使之將兵在外
而假以兵權耶又何爲久而弗召坐視師之失
伍散離而莫之恤耶高克出奔固不足惜清之
師其何辜歟是故梁之亡非取之者之罪也民
罷而潰國已亡矣已亡而後秦取之非由秦取

之而後亡也書曰梁亡所以惡梁也鄭師之潰
非帥師者之罪也鄭伯惡一高克而舉一邑之
民命授匪其人是棄之也書曰鄭棄其師所以
惡鄭也春秋之稱微而顯其書梁亡鄭棄其師
也辭若甚微而所以責梁責鄭之義則甚顯也
若曰非有亡其國者乃自亡爾非有敗其師者
乃自棄爾比事以觀春秋示人自咎之意深矣
後之讀春秋者其亦有戒於梁伯之罷敝其民
鄭伯之退臣不以其道也哉

不逆不億而常先覺論

君子之於人誠而已矣然未有誠而不明者故不以察察爲明而人之情僞皆有以知之昔吾夫子嘗以不逆詐不億不信稱先覺之賢試申其旨夫以人情之莫測也或因事幾之紛乘以欺我或乘事物之雜投以疑我人與人相接其挾詐不信以來者環相伺矣世之以忠厚待人者得無受其罔乎於是預爲之防者則必未至而迎之未見而意之吾不能禁人之詐不信

而能使詐不信之人不得以售其計如此亦可
無受人之罔矣然雖不受其罔而於人之未必
詐也以詐待之於人之未必不信也以不信揣
之私見之紛擾非君子之所以於人也今夫天
下之事雖殊其理一也君子待物以誠逆億之
私非誠也誠則其心虛惟其虛則心無所滯於
凡天下事物之理湛然涵萬象之蕃曠而通其
變誠則其心實惟其實則心有所主於凡天下
事物之理確然究萬善之精微而得其真如鑑

之懸妍媸自呈而無遁影也如燭之照纖悉畢現而無藏形也蓋其格物窮理之功所由來者深矣非一朝一夕也故不先事而料小人之偽亦不臨事而墮小人之計其斯謂誠明之君子乎若夫不逆不億而卒爲詐不信所罔則愚而無知者也豈足論哉

老莊之後其禍爲申韓論

事有不相謀而相因者時勢有所必至亦理之固然也三代而後德教不行以法相尙於是

刑名之學出爲其學者申不害韓非其最著也
後世之人習刑名家者莫不祖申韓而咎刑名
之禍者莫不歸罪於申韓雖然究其禍之所由
來不曰申韓而曰老莊昔有老聃其學以自隱
無名爲務著書言道德之意五千餘言道其所
道非聖賢所謂道也德其所德非聖賢所謂德
也厥後莊周泐洋自恣著書十餘萬言其學無
所不闕然其要歸於老子之言斯二子者以爲
聖賢之道無足奇乃爲虛無浮游之說以立異

於人夫子有言曰攻乎異端斯害也已在二子
不過自求異耳非有惡於天下也豈知後世有
因其術而以刑名之說爲天下毒也哉夫聖人
之治天下也尙德不尙刑故其治仁義禮樂而
已然仁義禮樂出於倫紀倫紀莫大於父子君
臣知有父子之恩則知相愛知有君臣之分則
知相敬相愛則有所不忍相敬則有所不敢聖
人之道所謂仁義禮樂者皆不忍不敢之心擴
而充之舉而措之者也至於老莊之談一任虛

無欲置天下於無有不知有父子之恩君臣之分也不知有父子之恩君臣之分則父不足愛君不足敬也不愛其父不敬其君則無所不忍無所不敢也夫是以仁義禮樂皆不足用而喜爲殘酷視天下無不可殺之人此刑名之學所由出也此刑名之禍所由熾也嘻老莊之弊流爲申韓理有固然豈獨時勢激之使然也哉史遷謂申韓慘覈少恩皆原於道德之意而未暢言之讀子瞻韓非論則道德刑名源流一脈之

故昭然若揭史遷之以老莊申韓合傳其意深矣

孔子請討陳恆論

聖人之於事衷乎理亦審乎勢蓋理之所當行者或迫於勢之所不能行事不足以有成也嘗論魯論記孔子請討陳恆而竊有疑於先賢之言焉昔陳恆弑簡公以臣弑君人倫之大變天理所不容人人得而誅之况齊魯鄰封密邇而置若罔聞乎大夫謀國義所當告故孔子雖已

致仕而必沐浴以告君請討重其事也然吾有
疑焉先賢謂左氏所載孔子對哀公之言非孔
子之言且謂計魯人之眾寡是以力不以義也
將使討罪者皆不必用兵而徒以大義驅之耶
孔子豈冥冥決事不復計強弱勝負之形而為
此請討之空言耶又謂孔子必將正名其罪上
告天子下告方伯而率與國以討之斯言也揆
之於理至正大矣然亦思其時勢爲何如也周
自平桓以後日以卑微諸侯僭妄陵虐王室若

鄭之交質射王晉之請隧召王由來久矣天子無如之何雖以此告之天子豈能聲罪致討乎此以知勢之必不能也且斯時也吳越構難晉楚淩弱小國諸侯無所適從尙有方伯可告乎魯介在東表敬共幣帛以待來者猶恐不免與國之侵侮而與國肯爲其所率乎此又以知勢之必不能也先儒又有言曰先發後聞可也夫兵柄專擅奸國之紀孔子作春秋於隱公二年書無駭帥師四年書翬帥師皆明以示人臣擅

自用兵之罪而謂聖人爲之豈理也哉夫請討
理也左氏詳對魯公之言則因魯公之懼怖而
決其勢之必能勝將以壯其氣而成其事也若
論理而不論勢則先賢之言自有不易之道矣

晏平仲論

有憂國之心者必有謀國之才然後可以扶危
而正傾惜乎以晏平仲之賢而不能使齊之不
爲陳氏也昔晏平仲相齊有年矣澣衣濯冠以
朝是其儉也與人交久而能敬是其恭也不受

邶殿辭居爽塏是其廉也洵所謂諸侯之良也
然吾有譏焉當是時公棄其民而歸於陳氏陳
氏厚施之德民歌舞之姜弱媯昌齊其爲陳氏
晏子不已深知之乎假使晏子導君修德政愛
人民不授陳氏以國柄安在有媯之後育於姜
而莫之與京也乎或曰晏子歷相三朝莊靈無
道固難圖治景公朝夕偷安不能有爲雖晏子
危言直諫亦不能從也夫景公豈不能從晏子
之言也哉彗星之禳祇以取誣祝史之誅不能

勝詛晏子言之公卽止之矣且景公又豈不知
愛民者哉省刑寬政薄斂去禁興發補不足皆
因晏子之言行之矣立國之道惟在愛民陳氏
厚施固竊國之私智然民之歌舞陳氏而愛之
如父母歸之如流水者以公之厚斂而棄其民
也若晏子者匡齊君以行慶施惠澤及小民上
無朽蠹之聚下無凍餒之苦則陳氏無所施其
噢休之計而民之歌舞不在陳氏而在齊君矣
卽使有陳氏之施不過如宋子罕鄭子展之後

亡已耳烏能以竊國乎哉晏子知齊之爲季世與叔向相語歛歔其憂國之心良苦矣而坐視齊之爲陳氏而不能救則才之不足也雖然若以國高欒鮑視之則固賢大夫矣

晉人迎立悼公論

春秋時侯伯稱雄桓文爲最然嘗讀左氏傳於晉悼公之立因其事以尙論其人則有勝於桓文者悼公襄公之曾孫羈於京師厲公之難晉人迎而立之卽位以後命官息民能復霸業三

駕之功嘖嘖人口矣然吾於悼公有異焉自古
大有爲之君必賴幹濟同心之臣以左右之故
桓之在外也叔牙奉之其入也又有夷吾隰朋
諸人文之在外也五人從之其入也又有欒枝
先軫諸人若悼公之在周未聞有爲之先容者
及其入國又未聞有人爲之心腹者外無所援
內無所輔以一身而正傾定國扶危救敝此固
桓文之所不能及也且桓文得國年已長矣悼
公此時生十四年耳其與諸大夫言名義自持

使強族大家無不怵色斂容而有所畏大凡有立君之功者必自以爲德卽爲其所立者亦以人之立己爲德國柄下移不可問矣悼公之言經權並用剛柔相劑曰始願不及此而歸之於天使立君者不敢貪天之功以爲己力也曰人之求君使出令也立而不從將安用君使人知名分之嚴不得竊國柄而威福自專也曰共而從君神之所福以神惕之以福嚮之使人知從君爲神所福不從君卽爲神所禍也媿媿數語

既厲且婉乃出自十四歲童稚之口斯亦奇矣
此又桓文幼年之所必不能及也昔人謂春秋
五霸當黜宋襄而進晉悼其篤論與惜乎悼公
之在位未久耳若使長有晉國晉國其能守唐
叔之舊也乎

曹劌要盟論

盟詛不及三王春秋書盟不可勝數至有脅人
相從而劫之使盟者是謂要盟要盟自曹劌始
魯人有曹劌者能遠謀者也長勺之役論戰則

明慎矣觀社之舉納諫則嚴正矣昔人謂其善
談兵且善言禮固非一劍之士也乃柯之盟竟
爲後世開俠烈之風何也前此者齊人伐魯魯
師敗績莊公請獻邑以平齊侯許之與魯會于
柯而盟夫齊魯之盟也將棄前怨以修舊好也
是時也齊桓霸業聿興方亟亟焉招攜懷遠以
德禮示人况在婚姻之邦而不相恤乎若曹劌
者固當語魯公以講信修睦之道好惡同之以
結外援齊旣親魯安在不歸魯地耶曹劌乃手

劔登壇劫齊桓公使悉反侵地而要桓公以盟
桓公既盟標劔去之夫桓公之不得不從以倉
猝一匕首耳然欲以信示天下故要盟可犯而
不欺曹劌可讎而不怨嘗讀史遷世家所載桓
公既盟而悔欲無與魯地而殺曹劌管仲諫之
謂不可棄信於諸侯而失天下之援是曹劌之
得免亦賴有管仲以全之也當此之時曹劌之
不死者其間不能容髮蓋亦危矣假令桓公不
聽管仲之言殺曹劌而移兵於魯以齊取魯如

反掌耳夫逞匹夫之勇不惟無以自保而且禍延及國其罪何可追哉戰國時燕太子丹使荆軻入秦猶曰得如曹劌之與齊桓公則大善而卒不能成其功以喪身而亡燕是曹劌啟之也史遷刺客傳之首曹劌也固宜於乎劌嘗言肉食者鄙未能遠謀是劌固以遠謀自許也若柯之要盟劌豈能遠謀者哉

敬勝怠論

自古帝王撫馭天下兢兢業業一日二日萬幾

未有不以心法爲治法者也心法授受敬而已矣昔武王受丹書之戒曰敬勝怠者吉試申其旨夫敬者德之聚也身之基也人受天地之中以生雖貴賤不同而自天子以至庶人皆以修身爲本心者身之主也故體道之君子朝乾夕惕猶且莊敬自持不敢稍有怠忽况乎首出席物基命宥密而可不以敬爲主哉雖然主敬之功未易言矣其或傲於始弛於後一時慎焉迨時之轉移而逸豫之念生矣其或謹於此疎於

彼一事凜焉迨事之紛乘而慢易之心入矣是
怠者敬之敵也防怠之萌杜怠之漸在有以勝
之耳教不可長立軌物之閑以拒之欲不可縱
樹道義之幟以攻之志不可滿樂不可極挾恐
懼修省之銳力以克治之夫大學一書由誠正
以推之治平中庸一書言性道以極之位育而
皆要其功於慎獨慎獨者君子居敬之學也推
而言之禮經曰毋不敬而其效至於安民洪範
曰敬用五事因肅乂哲謀聖而致休徵之驗可

知制治之原不外乎敬嘗思帝王之治世也無
怠無荒其難其慎如堯之欽明舜之溫恭禹之
祇承湯之聖敬日躋文之緝熙敬止皆主敬之
功也武王繼堯舜禹湯文王之統踐阼聿始卽
進尙父而拜十七銘之訓此其所以垂拱而治
定八百年之不基也敬勝怠一語其爲千古之
炯鑒也歟

女叔齊知禮論

古之言禮者未聞分禮與儀爲二也子思之言

曰禮儀三百禮與儀既不可離則未有禮外之儀後世文盛朝會燕享之間賓主以節儀相見遂斷斷於周旋揖讓之末而儀與禮分矣士大夫講禮者見爲儀而不知有禮矣左氏傳於女叔齊子太叔儀禮之辨皆詳言之而叔齊則爲太叔開其先者也昔魯昭公如晉自郊勞至于贈賄無失禮於是晉侯以善於禮許之而女叔齊以不可爲禮答之噫童心也而猶能習儀也在魯侯亦難得也然謂之善於禮不亦遠乎夫

禮者何也卽事之治也治國而無禮則上下之分何由而定綱紀之立何由而振舉錯之施何由而明黎庶之情何由而孚君人者將以爲社稷宗廟主也國爲其國在有以守之而所以守國之道則在於行政而得民國之安危視乎政之得失若君弱臣強國柄下移欲政令之行胡可得也國以民爲本苟無民何有君若公室日瘠厚施在家欲無失其民弗可得也此不能以禮爲國之故也今夫禮之可以爲國也大矣則

天之明因地之性如日月星辰
順其序如剛柔燥溼之分壤疆
善爲國者法天地之道以制甘
野相安政治日益隆民心日安
固此乃女叔齊之所謂禮也嘗
已甚政在家門民無所依叔齊
將失國矣且夫孝禮之始也叨
在感而有嘉容本心漓矣儀古
守其國行其政令無失其民者

所在也君子以知禮許之不亦宜乎

節以制度論

人君綜庶政養萬民未有不握乎足國之本而能長治久安者也然足國固有其道崇儉去奢制國用者開財之源必有以節財之流焉昔夫子釋節象辭曰節以制度試申論之攷之周官外府掌邦布之出入布泉也藏曰泉行曰布取名於水泉言其流行無不徧也夫財猶水也節用如水之蓄也水之流不蓄則洩之盡而水涸

矣財之流不節則用之耗而財匱矣凡人之情無不厭質而趨文衣好鮮麗食求甘美縱其欲以遂其意則奢侈之風日甚矣百人作之不能衣一人欲天下亡寒吾不信也百人耕之不能食一人欲天下亡飢吾弗信也此皆不知節之故也聖人有憂之且不節之害非獨此也奢則必驕侈則必汰不顧尊卑之體上下之分采章等威之別而僭濫之端因以起嗚呼其禍可勝言哉聖人在上知天下風俗之不古皆由於不

知節而人情之不知節皆由於無制度以範圍之故爲之會計以酌盈虛之數爲之典禮以明隆殺之常爲之法令以嚴玩好珍奇之禁制用之經卽理財之道也雖然移風易俗必自身始何則上有守約之主則下有敦龐之俗上有謹度之型則下有醇樸之風君好之則民應之上行之則下從之此之謂也今夫天道寒往則暑來暑往則寒來氣序有節而不過故二至二分四序不差人君代天而治量入爲出本樽節之

意以爲制度旣無妄費卽無苛斂不傷財不害民使在下者皆有所矜式國用以裕民財以阜與天下相安於豐亨豫大之規也豈不盛歟

曹劌諫觀社論

諸侯非民事不舉舉而必書記曰史載筆蓋人君之舉動史皆書之將以爲後嗣法也非所舉而舉謂之敗禮敗禮不可以爲法左氏傳詳魯莊公二十三年如齊觀社夫社者因祭社而蒐軍實也魯而猶秉周禮也則當勤求乎農隙講

事之典所謂中春教振旅遂以蒐田祭社者成
憲具在固可習而行之彼齊之有事於社於魯
何與公之往觀也亦異曹劌乃執禮以諫爲之
言會朝之經謂其修文事以睦鄰封也爲之言
征伐之制謂其講武事以戒不虞也禮者何也
卽事之治也有其事必有其禮事而非其事其
如禮何且夫行之於身而無過者曰禮垂之於
後而可則者曰法諸侯有王王有巡守禮之大
者也公之如齊其爲王之巡守歟抑爲諸侯之

從王事歟若謂有事於巡守也則公非天子何
敢有僭竊之心也若謂從王事也則彼非天子
奚以責職事於魯也人君之所爲將書之於策
記其事以爲後世法也非禮之舉適以貽後人
之訾議耳而何以爲儀式乎穀梁傳曰以是爲
尸女也公於前年納幣而婚議未定今復以觀
社爲辭盛飾車服以要姜氏從已故哀姜之未
入則爲之丹楹刻桷旣至則又使宗婦覲用幣
皆悖禮之甚矣觀社之舉曹劌不直揭其隱情

其亦爲公諱歟於戲如齊觀社非正也假觀社
而以圖婚尤非正也莊公其兩失之

豫讓論

嘗讀方希直學士豫讓論曰讓有未忠者存以
其不能扶危於未亂之先而捐軀於旣敗之後
也其責讓也固使讓九原心折矣然吾猶有譏
焉豫讓乃當時所稱義士也以吾論之讓固未
可爲忠亦未可爲義豫讓嘗事范中行氏無所
知名去而事知伯滅范中行氏者知伯也是知

伯爲范中行氏之讎安有義士而忍事故主之讎者哉夫士君子以身事人而必計人之所以待我者何若其心已有所私矣讓之復讎也爲知伯報也乃讓亦范中行氏之臣也知伯滅范中行氏讓不爲報讎反委質事知伯及知伯亡而報讎獨深其於知伯義矣其於范中行氏則謂之何觀其不肯善事趙襄子與其友所言者將以明君臣之義也夫讓旣不肯懷二心以事君奈何以一身而事二主乎讓旣不肯爲故君

賊新君奈何忘故主之讎而反事之乎伯夷叔齊古之義士也辟紂而居海濱不食周粟餓于首陽之下讓既不悅於范中行氏矣隱而去之可也胡爲而就知伯也豈知伯之爲人能賢於范中行氏也哉讓知襄子爲知伯之讎而不知知伯爲范中行氏之讎報之若此不報若彼其言曰范中行氏以眾人遇我我故眾人報之知伯以國士遇我我故國士報之夫讓而果事襄子也安知襄子不以國士遇之乎君臣之間大

義所在故臣之事君也惡之不敢遠好之不敢
近竭力致死以效命於君而已而乃視主之遇
我以相報是使後世之亂臣有所藉口也且知
伯之爲人也好利而驚復晉陽之圍知過郄疵
皆多方強諫而智伯不從其以國士遇豫讓毋
亦豫讓之阿諛以取媚也與賈生謂豫讓反君
事讎行若狗彘非過詆也噫自古有忠臣義士
而甘附於刺客之流者哉

管仲論

蘇老泉管仲論責仲不能舉天下之賢者以自代使豎刁易牙開方三子爲桓公用其論固令人無可置辨矣然吾謂仲之薦賢自代猶身後事也仲旣知三子非人情不可近盍不及其身而早去之也臧文仲有言曰爲人臣者見無禮於其君者誅之如鷹鷂之逐鳥雀也仲旣爲相則爲國家去邪尤所當急者矣夫桓公之用三子當霸業方盛之時仲視三子之進十有餘年仲若果有去邪之意則不待桓公之用三子而

早圖之耳其早圖之奈何左氏傳記寺人貂始漏師於多魚或曰漏洩軍事也或曰簡車徒曰漏師桓公使典兵權也豎刁以寺人而漏洩軍事其罪固無可追仲何不因其罪而誅之耶若桓公使典兵權則以寺人典兵尤乖政體仲何不因其事而力諫以阻之耶於此時而去豎刁則易牙無因薦羞以有寵矣豎刁易牙之旣去則開方之勢孤而自遠矣嗚呼仲與桓公處幾年矣豈桓公不能用仲之言乎甯母之盟仲言

子華之姦而桓公遽辭何仲之能卻外奸而不能去內惡也夫春秋之時齊之賢大夫嘖嘖人口者稱管晏矣晏子於景公稱梁邱據之和猶且辨其同而非和何仲以天下之才不聞其於未疾之先將三子之不可用爲桓公直言之耶仲之疾也桓公問可代爲相者語及鮑叔仲謂其人能好善而惡惡已甚使仲而如鮑叔之惡惡也彼三子者豈得爲桓公用也哉

業精於勤論

天生四民士農工商各有其業守其業而無失
猶恐不及故農之力田工之飭材商之服賈皆
朝夕習之而不敢自逸况士之講學以修業者
乎昌黎有言曰業精於勤試申論之夫人之從
事於學也知能所同具也然或學焉而精或學
焉而不精其故何也惰慢之氣日甚一日雖有
父兄之督責師友之規勸而講習討論皆無實
功徒以記誦辭章爲務不能進於道矣卽在銳
志之士以學自詡乃始而奮焉繼而倦焉是猶

一日暴之十日寒之所得不償所失無惑乎業之不精也不勤之故也是故君子之於學也知怠荒之生於忽也則爲之存心以防之知安肆之乘於漸也則爲之制心以勝之其或質之魯鈍材之愚拙孜孜矻矻人一能之已百之人十能之已千之終始如一困而學者及其成功一也昔陶侃云大禹聖人尙惜寸陰至於眾人當惜分陰誠以業之必勤而後能期於成也且自上以下孰有敢淫心舍力者哉人君之敷治也

兢兢業業一日二日萬幾慎終于始厥惟艱哉
卿大夫之在位也朝考其職晝講其政夕序其
業夜庀其家事而後卽安士居四民之首飭躬
砥行由小成以底於大成敢不夙夜自勵以免
於不學牆面之譏也哉書曰惟學遜志務時敏
記日學然後知不足知不足然後能自反其勤
之謂乎



樂道堂文鈔卷四

恭親王著

子玉不勤民論

書曰民爲邦本自古國之安危皆繫於民故賢君相之爲國計也有利於民則必爲之嘗讀左氏傳至城濮之戰而知楚子玉之剛而無禮以取敗者以其無勤民之心也夫子玉之敗不敗於敗之日蓋必有所由起子文之使子玉爲令尹也蘧呂臣已知其不勝任矣及其治兵於蔿

國老皆賀，薦賈不賀，亦知子玉之敗國矣。夫二子何以知子玉之必敗也？吾有以驗之矣。城濮一役，未戰之先，子玉夢河神求已之瓊弁玉纓，而許以孟諸之麋弗致也。又不聽榮黃諫，剛愎之至，雖神不畏，是卽取敗之道。榮黃謂其自敗，子玉又誰咎乎？且夫瓊弁玉纓，非有用之寶也，而可以濟師，將何愛焉？其敗也，非必河神之靈使之也。然楚人尙鬼習俗，使然，故以瓊玉畀神，自足以繫屬民心。今子玉惜無用之物而卒以

敗績人將謂其喪師辱國而身死者皆弗致瓊
玉之故假使子玉以瓊玉與河神有三利焉不
以瓊玉爲寶而成廉潔之名一也上邀神貺而
師徒無虧二也與神矣猶不免於敗績則申息
之老不必咎人而咎神身亦可以無戮三也夢
寐之事雖不可信然有可以藉鬼神之陰助以
壯民心者殺之役也卜偃假柩聲以決大事之
捷矣韓之戰也秦伯託妖夢以驗罰罪之言矣
子玉藉河神之賜以激眾安知其無救乎抑吾

又有說焉子玉而平日恤民也雖不以弁纓與神誰能敗之子玉而平日不恤民也雖以弁纓與神誰其佑之剛而無禮不惟不可治民而終至於亡身子文有知其有愧於叔伯焉賈也夫學然後知不足論

夫不登岱嶽者不知山之高也不觀滄海者不知水之大也不遊聖賢之域者不知道之無窮也記曰學然後知不足試申論之大凡人之未入於聖賢之門者以爲聖賢之道人所易及自

謂其才自行其是洋洋然若無往而不自得者何也夫固未嘗學也未嘗學則聰日以塞明日以蔽如蠶曠之質一無所見一無所聞又何異乎其自足也且夫學者之弊莫患乎自足也自足則自盈自盈則自是不復求進於道矣古聖人患人之不學也詩書禮樂以教之德行道藝以示之由小成以至大成事至曠也理至奧也盡格致之功極探索之力由淺以入深由表以徹裏由粗以求精孜孜矻矻終身無自弛之時

終身亦無自慊之時如農夫之望歲稼既登矣
猶若未慰乎億秭之祝也如商賈之市利價既
售矣猶若未獲乎倍蓰之償也顏子曰仰之彌
高鑽之彌堅曾子曰爲人謀而不忠乎與朋友
交而不信乎夫以顏子曾子之賢豈其苦於高
堅歉於忠信者惟其深於學也故才之若竭身
之日省愈形其不足也書曰學于古訓乃有獲
詩曰日就月將學有緝熙于光明古聖人猶不
敢廢學也而况於後人乎

季札論

春秋時吳有季札佳公了也先儒非之以其不當讓而讓以釀成吳光之禍然吾謂札之讓不足責而札之歸不討賊其咎實甚何也吳之亂諸樊啟之也諸樊餘祭夷昧與札同母弟兄皆愛札之賢故迭爲君而欲致國乎季札札之讓也以守節也夫使兄弟授受以及於札札不辭而受札之終將誰授之諸樊餘祭夷昧皆有子皆欲爭立是亦不免於亂也故責札之讓非篤

論也。迨光之難作，季札使而亡焉。及歸，復命復位而待舍光，而弗討。乃曰：社稷有奉，國家無傾，乃吾君也。吾誰敢怨？嗚呼！季札，吳公子也。誼之至親，情之弗忍，當正僭竊之名，明君臣之義，以討篡逆之罪。庶幾無愧於人臣之節也。大者天地，其次君臣。弑君之賊，天地之所不容，討之惟恐弗及也。而乃舍之，而不敢怨耶？守節之士，固如是耶？且札自以爲力不能討乎？使札而在國也，光將有所顧忌，而不敢逞其謀矣。觀光之言

曰季子雖至不吾廢也可知光之所畏憚者惟
札也况乎札之賢國人知之若札奉一國之眾
因掩餘燭庸之怒而濟以楚徐鍾吾之師事安
有不捷者乎乃計不及此置之不討以父子兄
弟相殺終身無已之言爲辭嗚呼若季子者德
有餘而才不足也昔人有言曰君弑臣不討賊
非臣也吾於季札亦云

以道制欲論

聖人之心渾然一理不思不勉而從容中道無

欲者也自非聖人治心之要遏欲爲先君子知欲之爲心害也故必有以防之樂記言君子之樂道而申之曰以道制欲夫道者天下古今之所共由人孰不知道之不可離哉然知之而不能守之則內而爲私所累外而爲物所引其不離乎道者鮮矣學者以修身爲務未有自以爲非禮而蹈之自以爲非義而干之者也而或一時不自檢攝則心無所主溺乎情之所牽狃乎習之所染以聲色貨利爲可欣可羨之事久而

失其固有之良卽或知爲欲之所汨有時悔悟而勢有不得而遏也惟君子防之於未然於是道制之夫欲心之蠹也道心之的也防欲之萌杜欲之漸攻取之緣自外入者多方以誘我我則以嚴翼之心拒之嗜好之端自內生者隱伏以錮我我則以鎮定之心祛之懍懍乎大中至正之道而不敢違如權衡之懸而不可欺以輕重也如規矩之設而不可欺以方圓也如繩墨之陳而不可欺以曲直也居以敬存以誠則

內不爲私所累外不爲物所引有道心而無人
心矣孟曰養心莫善於寡欲惟君子能之

子西論

用人非難所以知人者實難惜乎子西有拯危
定國之功而無知人之明也夫子西楚公子也
昭王之立能以國讓及王之奔隨爲輿服以保
路厥後遷郢於都改紀其政以定楚國子西不
亦有功於楚耶雖然郢都之復子西固有其功
白公之亂子西豈能辭其咎乎夫白公何人也

楚太子建無良爲鄭人所殺其子曰勝在吳詐而亂者也古人有言曰去疾莫如盡使勝在楚猶宜去之今旣在吳其無能爲禍於楚矣奈何子西召而用之使處吳境爲白公是猶引豺虎於室內而豢養之鮮有不爲其噬者子西之視勝固信而勇者也子西卽不知其人聞葉公之言亦可悟矣詐者之信不顧仁而但求復言亂者之勇不率義而惟期必死詐與信勇與亂正相反也何其識之謬也旣而白公因其私讎而

請伐鄭許之晉人伐鄭則又救之是激之變也
及勝厲劍直言禍端已起平旣以告先爲之討
猶易耳乃猶不悛而以翼而長之之言自解是
蓄之毒也何也夫固以詐而亂之勝爲信而勇
之勝不知其人若爲其愚弄而不自悟迨亂之
旣作以袖掩面而死楚國不絕若綫子西之咎
其何辭乎史稱昭王欲用孔子子西沮之書社
之封終止不行嗚乎子西不知白公之爲人而
謂其不爲不利豈能知吾夫子之聖耶

君子思不出其位論

昔者聖人之作易也示人以治身治心之道於卦象三致意焉其在艮之象曰君子思不出其位曾子嘗援其辭以示戒矣夫艮止也止其所也艮次乎震震動也物不可以終動止之君子觀其象而知人之素位而行貴有慎思之功焉今夫人所處之地不同所處之時亦不同大而君臣父子之經凡所謂止於仁止於敬止於孝止於慈者當各盡其道也近而視聽言動之際

凡所謂非禮勿視非禮勿聽非禮勿言非禮勿動者當自峻其閑也蓋日用事物之間莫不有當然之則而爲人所當止之所所謂位也然人各有其位而鮮不出其位者何也不慎思之故也心之官則思幾之動也動則隨感而應常擾於不靜矣愛惡之私汨於中攻取之緣引於外安有不出其位者哉君子則不然居敬之學窮理之功非一朝一夕也居敬者心至壹窮理者心至精大而君臣父子之經近而視聽言動之

際出不出之界固甚微且危矣君子於身之所處卽爲心之所思無過無不及不敢越思而軼乎位之外也不敢廢思而曠乎位之中也大學之道由知止以至得止其卽良之所謂止其所也歟

魏子辭梗陽人賂論

從諫如流士大夫難之春秋時世祿之家怙過不悛逞剛愎之私以致貪婪之咎者不可勝數如魏獻子之辭賂可謂能納諫矣當其時梗陽

人有獄其大宗賂以女樂魏子將受之夫斷獄者必公而無私然後曲直昭然易之訟曰利見大人尙中正也魏子若受梗陽人賂曲直又何論耶爲國家者非無賄之患而無令名之難魏子之舉也義其命也忠賢大夫也胡爲乎一念之貪遂欲受賂鬻獄而不自禁也夫豈無前車之鑒乎樂桓子之請帶范獻子之請冠貽誚鄰封魏子其亦知之况因獄而受女樂與羊舌氏之納女鬻獄同罪不亦惑乎使無閭沒女寬之

諫則受之矣且使有閻沒女寬之諫不聽其言則亦無可如何矣乃聞屬厭之言憬然而悟辭梗陽人二子未嘗以梗陽之獄諫也而魏子以爲小人之腹猶知屬厭君子之心豈不知足耶其辭梗陽人也若不知二子之爲梗陽人賂來諫也者斯眞能納諫者也抑又思之魏子將受梗陽人賂魏戍卽隱窺其意而屬閻沒女寬以必諫獻子有子矣閻沒女寬以食諫若不知有梗陽之事而使魏子自止其亦善諫者歟

善教得民心論

天生民而立之君使司牧之君之所以馭民恃有政也雖然致治固恃有政而致治之本不僅在政也作之君作之師以君道兼師道則教尙焉孟子有言曰善教得民心試申其旨夫得天下者得其民也得其民者得其心也三代而下民心日漓雖有禁讟詰奸之典而不能使梗頑之悉化衰慝之不萌長民者鮮不謂民之無良也噫民豈無良也哉有聖人起視民如子養之

斯以教之知民性之有恆也爲之推教思以節其性知民情之可見也爲之布教典以防其情教之仁以致其恩愛教之義以辨其等威教之禮以飭其彝倫教之樂以平其血氣天下風俗之原成之者在下而操之者在上風行草偃捷於影響仁以育之義以正之禮以齊之樂以和之勿謂民心之無常也勿謂民心之罔中也漸摩日久陶淑日深熙熙乎藹藹乎莫不尊親民之戴德於君以爲小民之性情而忘其爲天子

之訓迪也虞書曰敬敷五教王制曰明七教以
興民德周禮曰因民之常而施十有二教帝王
之治其所以得民心者有同揆也德教洽而民
氣樂所謂殺之而不怨利之而不庸民日遷善
而不知爲之者夫亦思乎致治之本而已

董狐古之良史論

自黃帝創史官之職後世因之春秋時列國皆
有史官世道衰微庶官多曠惟史官猶能存直
道而不失其職如晉之董狐孔子稱爲古之良

史且謂其書法不隱猶三代之遺也晉靈公不君趙盾數諫靈公忌之使士賊之伏甲攻之嗾獒害之盾之得免固幸也而靈公遂有桃園之難董狐書曰趙盾弑其君夫弑君者趙穿也不曰穿而曰盾何也人謂桃園之謀穿非盾所使必以爲盾之知情是誣盾也然穿之攻靈公也不在盾未出之前而在盾甫出之際穿固爲盾作難者也故太史以罪坐盾也靈公無道自不待言然君卽不令臣不可以不共棄人用犬雖

猛何爲其言已不遜矣而復身率力士格鬪而出心尙有君乎盾之無所逃罪一也提彌明盾爪牙也爲盾死也固宜靈輒乃公介耳倒戟以禦亦爲盾用是盾之黨已盈廷矣盾之無所逃罪二也其自亡也旣恐事之不成身罹重咎又恐事之有成身受惡名巧自爲計盾之無所逃罪三也且盾豈不知君臣之義者乎宋人弑昭公趙盾請師於靈公鳴鐘鼓以聲其罪乃於穿之攻靈公也反國而不討賊何盾於鄰國之難

如彼其急而於內難之作若弗知弗聞也者盾
之無所逃罪四也如謂穿之謀穿自爲之盾不
知情何盾之未出山而復不惟不討賊也而又
使穿迎新君以固其寵是德穿也盾之無所逃
罪五也以罪坐盾直矣哉董史之書也平桓以
降文武周公之澤旣湮仲尼之聖未出而史官
秉筆直書能使奸惡悚然欲掩其名於天下後
世而不可得齊崔杼之亂史書其名死者三人
猶有執簡爭往者焉鈇鑕可加也而筆鋒不可

挫也抑又考之晉鞏朔獻齊捷於周周王私厚其禮而告曰非禮也勿籍則史之有所不載將使簡編失實無可考信矣噫人心之不古若也於史已可概見也已

君子所其無逸論

自古帝王治法本於心法心法之傳敬而已矣敬則自矢於勤而不敢自安於逸人君綜理庶政撫綏兆民兢兢業業一日二日萬幾無怠無荒猶恐有叢脞之虞豈可圖厥政而逸厥逸乎

昔周公誡成王曰君子所其無逸誠以人君憂勤惕厲以敬宅身亦以敬宅心無逸之道卽君子自處之地而不可須臾離也夫人情莫不惡勞而好逸溺於所欲而求其所安則嚴憚之心亡而慢易之心生矣耳之於聲有足以娛聽者惑之目之於色有足以恣視者引之四肢之於安佚有足以供樂遊者從之欲敗度縱敗禮不恤民生之多困也不畏天命之難諶也怠勝敬則滅民棄不保天降之咎其誰曰不宜蓋人心

之生也勞則思思則善心生逸則淫淫則忘善
忘善則惡心生君子勞心小人勞力先王之訓
也公卿大夫各修其職士農工賈各習其業自
上以下無有敢耽於宴安者况人君任天下之
重熙帝載亮天工旰食宵衣慎乃在位而敢自
暇自逸以速戾於厥躬耶周公於成王之初政
恐其不能慎終于始也故作書以訓之曰無逸
者敬之德也曰所其無逸者以無逸爲所一動
一靜無不在是主敬之功也帝王心傳不外乎

敬其致治也亦不外乎敬敬以臨下而禮樂政
刑之典所以保民者無不備矣敬以承上而參
贊位育之化所以體天者無不至矣虞書曰無
教逸欲先聖後聖固有同揆而召公之告成王
以王敬作所者亦此意也

政在養民論

君之於民也猶父母之於子也天子作民父母
故爲民上者撫有四海統一寰夏不以天下奉
一人而以一人養天下虞書記大禹之言曰政

在養民誠致治之要也夫天生民而立之君使
司牧之天之愛民甚矣雖然天不能撫綏而保
乂之故必置一官出庶物之人以爲天子代天
而治俾天下之民皆仰賴焉而罔不生息然則
爲政之要不在養民乎古聖人之於民也興民
之利除民之害恐食之不足也爲之勸農事以
耕斂之恐衣之不裕也爲之詔女功以蠶織之
恐器用之不贍也爲之來百工以創作之恐貨
財之不通也爲之任商賈以交易之且也逸居

無教聖人憂之則以教民者養民爲之修禮以
飭其倫常爲之導樂以和其血氣爲之宣仁以
生其愛敬爲之明義以辨其等威相欺也爲之
權衡斗斛以信之相爭也爲之撻伐戒禁以平
之懼其未也年之荒歉則爲之賑卹以拯之人
之疾疫則爲之醫藥以濟之鰥寡孤獨之無告
則爲之常餼以給之瘠聾跛躄之殘廢則爲之
量能以食之民生斯時樂其樂利其利無一夫
不得其所此六府三事之治萬世所由永賴也

天下之民皆赤子也天生民而不能使民各得所養民各有其所養而又不能自養恃乎爲民上者父母斯民矢恩勤之意推鞠育之情以舉而措之於政所謂養民如子而民愛之如父母者乃政之所以爲善也與

介推論

春秋時晉有介推以隱稱者也焚骸禁火之說後世傳之聞其風者莫不追歎雖然讀左氏傳乃知推之不足以隱稱也何也謂其身雖隱而

心不甘於隱也介推之功傳記不載至其不言
祿後之人皆謂其超然世表可以爲濫功爭賞
者愧然推旣不言祿祿之弗及乃意中事耳胡
爲乎出怨言也從來隱逸之士皆行其心之所
安豈有以怨懟之深而隱其身以逞私忿者乎
且夫晉文之得反晉國雖曰天意豈非人力哉
從亡者如狐趙諸臣負羈縶以嘗險阻十九年
矣賞之不亦宜乎乃推以諸臣貪天功爲己力
而譏文公之濫賞則古帝王賞功之典皆貪天

耶推果以從亡之臣爲不當賞則已亦從亡之臣不賞乃其宜也何爲而怨也何爲而隱也不言已之有功而言人之無功不言已之當賞而言人之無功可賞不言之言甚於言者東萊呂氏謂推之借理以逞怨推無可置辨矣夫君天也天可怨乎推旣不言祿而因祿之弗及而出怨言是怨天也此豈高尚士之所爲耶古所謂高尚士者如巢許夷齊之儔或讓天下而隱或讓國而隱皆以潔身爲樂而有誰怨乎若推也

者特以祿之弗及乃隱耳使祿之及於推也吾知推之必無怨言而不肯自隱矣富貴之於人一浮雲也祿之及也何足爲喜祿之弗及何足爲憾推之隱其心非甘於隱也以視濫功爭賞之輩其相去能幾何哉

養心莫善於寡欲論

心者人之神明所以爲一身之主而應萬事者也天君泰然百體從令宰一身者此心可聽其自爲存亡而不知所養乎孟子曰養心莫善於

寡欲請申論之夫人受天地之中以生孰不知
體有貴賤有小大不可以賤害貴以小害大也
哉然人感物而動同此心而至於失其本心者
何也不能養也其所以不能養者欲累之也心
至虛也至靈也無所謂欲也欲與百體爲緣者
也口之於味鼻之於臭耳之於聲目之於色四
肢之於安佚皆吾人日用所不能無者然以口
鼻耳目四肢之各有所好因以求臭味聲色安
佚之必如所好則汨於臭味之可嗜而侈靡之

心生矣溺於聲色之可娛而邪僻之心生矣耽
於安佚之可以自便而怠荒慢易之心生矣噫
一心也而百體害之不亦危乎學者知欲之爲
害也損以修之節以制之物之引也絕之於外
私之伏也治之於內不敢以臭味之嗜耗其心
而凡歆羨之端必主一以持之不敢以聲色之
娛蕩其心而凡視聽之交必守正以拒之不敢
以安佚之自便放其心而凡動容周旋之際必
居敬以防之使口鼻耳目四肢各司其職而天

君爲之主則賤無以害貴小無以害夫此心常
葆其至虛至靈之體而不爲百體所役乃知心
之存係乎欲之寡而養之之道得矣若夫修省
之久克治之深其所以遏欲者寡之以至於無
斯其所以洗心者養之以幾於化清明在躬從
心所欲不踰矩則所謂聖者也然其詣豈易及
哉

狼臆論

古之人以義成勇者必得乎理之正未有任乎

氣之偏者也若以忿懷之激而逞其勇雖以身
許國乃烈士之所爲非義士之所爲也左氏傳
詳晉狼曠死秦師而得君子之稱吾竊有譏焉
殺之役曠因斬囚代萊駒爲右箕之役先軫黜
之而立續簡伯曠之爲右得之意外及其黜也
則亦失之意外曠之怒也亦人情之常也乃其
言曰死而不義非勇也是曠固以義自許矣彭
衙旣陳以其屬馳秦師死焉在曠之死自謂其
死於義也噫曠之死以黜右而死也會是以爲

義乎爲人臣者得志則竭力以致其身不得志則奉身而退唯命是聽而已若柳下惠爲士師三黜而不去子文爲令尹三已而無愠色其度量加人一等矣暉以黜右而逞其怒以至於忘其身此匹夫之勇也烏得謂之義乎夫義者宜也行而宜之之謂義使暉而死於前日之爲右也則其死宜也使暉卽不爲右而奉主將之令帥偏師以禦敵而死也則其死亦宜也若暉之死何爲而死者也不死於先軫而死於秦師假

公義以洩私憤狂乎氣之偏而未明乎理之正也孟子曰可以死可以無死死傷勇矜知死而不義之非勇而不知死而傷勇之不足爲勇尤不足爲義也噫使矜而不黜右也吾恐矜之未必能以身死敵也已

以道制欲論

人有七情欲要其終人非聖人孰能無欲然有之而不自制則心之害也記曰以道制欲蓋君子之所以爲君子也今夫人性皆善也性之所

同有理而無欲也然人感物而動始焉客感誘
之於外繼焉罔念錮之於內欲之爲害非一端
也其幾也伏於隱微若有不可制之形其發也
迭爲攻取又有不及制之勢噫嗜好之中乎人
心也奢侈因之淫佚因之怠荒傲慢因之凡人
視爲可欣可羨之事必求之而必得之其害可
勝言哉君子曰吾有以制之制之若何日以道
道者日用事物當行之理而天下古今之所共
由也以一心之克治爲百體之範圍口之甘於

味也則以淡泊之志禁之耳之悅於聲也則以
聰聽之神防之目之耽於色也則以清明之氣
遏之天下之物之不能相攝也必有以宰制之
者而莫不聽命天下之物之不能相下也必有
以節制之者而莫與爭強君子得其道矣道綜
乎萬變如軍中之有帥卒伍爲所節制而不敢
失其律也道統乎一尊如寰內之有君臣民爲
所宰制而不敢越厥志也書曰人心惟危道心
惟微人心者卽欲之與形氣爲緣者也君子精

以察之一以守之不使雜乎形氣之私而純乎
義理之正則道心常爲之主而人心退處於無
權斯卽所謂以道制欲者歟

鄭莊公不朝王論

春秋之始鄭莊稱強可爲桓文先聲然上凌天
子春秋二百四十年間諸侯不知有王者鄭莊
爲罪之魁昔人謂其首倡不臣之逆莊公固無
可置辨而論古者又有誅心之議何者人知鄭
莊不臣之罪無可追而不知鄭莊之不臣而不

自居於不臣其罪尤不可追鄭莊之不臣自取
禾取麥始怨王之貳於號交質因以交惡已不
知有王室矣然其後入朝於周又以齊人朝王
論者猶謂其有禮旣而宋公不王以王命討之
與齊人入郕亦以其違土命而討之論者亦謂
其有勤王之義焉乃以王之奪政而遂不朝且
以王之來伐而遂禦王師至於二拒合攻射王
中肩其不臣之罪彰彰矣然其罪猶有深焉者
王卒旣敗王以矢傷莊公於祝聃之請從也則

援君子以自况而以不敢陵天子爲辭是射王之咎加之祝聃一人矣且是夜也使人勞王兼問左右前之戰攻何倨而逆後之勞問何恭而順莊公欲逃憑陵天子之名僞爲悔悟之舉使後人共諒其不得已之情也故後世議者以爲繻葛之戰皆桓王之不禮奪政實以致之也然則莊公之詐險已甚矣推而按之前此入朝於周以齊朝王祇以周旋王室陽雖爲奉王之禮陰未釋貳虢之怨也至其伐宋則討以王命入

鄭則討違王命非有王師之出王命之頒特假
王命以爲名乃可挾天子以令諸侯耳以此斷
之莊公之不臣其情固無可恕莊公之不臣而
不自居於不臣其情尤爲可誅春秋時之大奸
人鄭莊爲首段弟也而逐之是謂不友武姜母
也而囚之是謂不孝不孝不友固不能逃不孝
不友之名也不臣而欲逃不臣之名也惡乎能

華元食士論

恩怨之於人甚矣恩無厚薄皆可以感人怨無

大小皆可以怒人夫以怨報怨自古有之乃有以區區飲食之故至仇深切齒者則怨豈在大哉左氏傳詳宋鄭大棘之役宋師敗績其敗也因羊斟之御與入鄭師故敗也雖然宋師之敗固羊斟使之羊斟之敗宋師則華元使之未戰之先華元殺羊食士其謂軍旅之事將與眾士同甘苦共死生也故示之以恩也若羊斟者乃其御也執鞭奉轡借出人有年親者近者莫御若矣在羊斟以爲元之食士於險阻共嘗之人

當先及也胡爲乎食及疎者遠者而親近之御
士乃不與耶與之而羊斟自謂分所應得不以
爲德不與則羊斟失之意外矣夫人情於失之
意外者其怫心實甚其蓄憾實深驅車趨敵師
喪帥擒報何如乎彼羊斟無良之人固不足論
華元身爲主將無以待親近之御士至於辱身
辱國其咎不亦重歟厥後華元逃歸見叔牂曰
子之馬然也羊斟以私憾而敗國殄民非元之
讎國之賊也執而戮之可也而華元反慰安之

三才圖會卷之五
三
愠耶愧耶抑自悔耶噫趙盾以簞食而免難華
元以分羊而敗師以此觀之恩怨之間所係固
不重哉戰國之時中山王以羊羹不遍而亡國
豈未聞華元之事乎

寡過論

從心所欲不踰矩聖人也生而知之安而行之
何過之有自非聖人進德居業朝乾夕惕不敢
云無過也而其克己之功兢兢然以治其心以
修其身者期於過之寡焉斯可矣夫過豈易言

寡哉人莫患乎有過而不自知也內則私意有以汨之外則物欲有以引之陷溺日甚錮蔽日深而愆尤日集冥然罔覺無怪乎其爲過之叢也乃或知之而不能改畏難苟安雖有父兄之督責師友之規勸而任過之爲疚於心爲害於身始焉去之不決繼焉順之自便久且習之以爲常然則過將何以寡乎君子戒愼恐懼慄慄乎日用出入之間其於過之未形也省過惟恐不嚴其於過之旣形也補過惟恐不及故一言

也呐呐如不敢出一行也惕惕如未能勝幽獨
隱微之地心無越思設吏監以繩糾之所謂謹
乎其內以防其外也出入周旋之間身無妄動
立規矩以範圍之所謂制乎其外以安其內也
慎言慎行非一朝一夕之功矣若夫寡之又寡
以至於無則亦進於聖矣然其詣豈易企及哉

卻宛論

書洪範詳三德一曰正直直也者謂其不枉已
以從人徑行自遂無所避忌吾聞直失之剛未

聞直而失之柔者也春秋時楚大夫有郤宛左氏稱其直而和以吾觀之謂之和則可謂之直則不可郤宛爲楚左尹攷其事蹟傳不多載而觀其致禍之由已決其未可謂直矣當是時囊瓦爲令尹賄而信讒費無極惡郤宛之爲人欲傾之久矣於是設爲令尹飲酒之謀以給郤宛使宛而爲耿介之人必固辭之乃宛則曰令尹來辱爲惠已甚何其辭之婉且卑也吾知其不能爲直也宛旣許令尹來飲則亦已矣而又患

無以酬之是其心既以令尹之來爲榮而更欲
圖報以求媚因無極之汲引思以投令尹之所
好則亦趨勢赴利者之所爲也吾又知其不能
爲直也夫無極之讒令尹之賄而信讒國人皆
知之矣宛獨不知乎使宛而果不知也乃告之
飲令尹酒則從之告之酬令尹甲則從之任人
愚弄一無所拒是懦也直者不爲也若知無極
之讒而強爲曲意以順承之知令尹之賄而信
讒而欲因私酬以固結之內實畏忌外事周旋

是僞也直者尤不爲也古之稱爲直者或以直諫得罪於君或以直言結怨於友直而不免於難者有之矣若卻宛之喪身亡族讒慝在前不自遠之而反近之和而已矣惡得爲直耶

士燮論

君子務知大者遠者自古良臣之謀國也深維其本急功喜事之爲所不取也嘗讀左氏傳於晉范文子之爲人知其器識卓越春秋賢大夫未有與之頡頏者鞍之戰振旅而還文子後入

以避代帥受名之嫌勞而不伐固可以爲保家之主矣至其憂國苦衷舉諸臣智勇之謀皆不足尙蓋其所見者大而所慮者遠也鄢陵之役晉大夫皆欲戰文子獨以爲不可未戰之先日諸侯皆叛晉可以逞旣戰之後日君幼諸臣不佞何以及此君其戒之以諸侯之叛爲可快以師之大勝爲可懼文子之言無人不異之者文子豈故爲此異人之談使人之忤耳莫能聽也哉夫國之所以久安長治者君令臣共上下和

睦禮之經也德之則也而國之福也是時厲公無道三郤驕奢政出多門亂將作矣而晉之君臣不以爲憂乃汲汲以伐鄭勝楚爲急務文子所謂羣臣輯睦釋楚以爲外懼者彼樂書中行偃諸人挾小智而貪近功亦何足以語此無敵國外患者國恆亡使楚鄭而爲晉患也君臣知懼三郤之難猶恐莫弭戰而勝楚是天奪其鑑而益其疾矣此文子所以未戰而憂旣勝而懼也文子不忍見禍之作故反自鄢陵遂使祝宗

祈死蓋韓厥之所爲文子所不爲也嗚呼書偃
之難作而文子之言驗矣而亦知文子之憂國
所見者大而所慮者遠矣

儉可助廉論

周官以六計弊羣吏曰善能敬正灋辨皆以廉
統之廉固人之所尙也士君子以廉自守則所
以濟其廉者亦自有道矣昔宋范忠宣公有言
曰惟儉可以助廉凡人之情患得之而患失之
者貪慄無厭惟利是視固不足論也乃或知廉

之爲貴始焉清潔自矢一介必嚴久則不免失其所守何也衣服以鮮麗爲榮飲食以旨甘爲美器用以雕幾刻鏤爲文嗜欲之緣萌於內紛華之習引於外奢靡競趨日甚一日百夫之力不能供一身之奉數歲之藏不能濟一時之需至於財之旣匱用之旣絀不得不取之於人雖夙慕乎廉之名而欲成其名不可得也不儉故也是以君子知不儉之有害於廉也衣服爲之制而以質爲貴飲食爲之節而以菲爲宜器用

爲之度數而以樸素爲尙外祛乎世風之靡內
思乎物產之艱日用有常量入爲出其出也無
憂其不足其入也日見其有餘夫人處有餘之
境而猶汲汲焉非所取而取之者未之有也以
之處家則不肯臨財苟得以虧義也以之爲國
則不敢誅求無藝以害民也以淡泊之志而全
不貪之名故曰儉可助廉也書曰克儉于家又
曰慎乃儉德古帝王猶且以儉相儆而况於臣
庶乎

范武子杖擊文子論

世祿之家鮮克由禮豈世家之子弟賢者少而不肖者多耶席寵怙侈固其身之罪也而皆父兄不能教之咎也嘗讀國語歎晉范武子家教之嚴也昔武子以文子三掩人於朝以杖擊之折委笄夫武子之有造於後人者大矣大凡世家之子資多穎敏不患其智之不及而患其智之或過不患其才之不足而患其才之有餘內用其聰慧外詡其英華則將自矜其才自逞其

智而以爲無所不知無所不能驕秦之心剛愎
之氣日甚一日矣如晉卿卻至之伐欒廩之汰
或身罹於禍或及嗣而亡良可慨也雖然卻至
猶知人之所以立而不敢先欒廩猶知從諸大
夫讓而不敢違夫豈不可訓誨惜無爲之父者
教之義方耳武子於文子之對秦客怒而辱之
所以深折其英年豪銳之氣使之動心忍性有
才而自斂有智而自抑庶幾可以爲保家之主
乎其請老也猶謂文子曰爾從二三子爲敬夫

敬者禮之輿也處世之道無過此者故文子終身無急功好名之心鄢陵之役師還不敢代帥受名鞍之役未戰而憂旣戰而懼皆懍懍於武子之教而不敢忘也厥後文子因士匄之多言而執戈逐之亦推武子之意以教其子也文子之善述其皆武子之善教也夫

宋襄公論

嘗讀公羊傳謂宋襄公泓之戰臨大事而不忘大禮雖文王之戰亦不過此固矣哉公羊氏之

論也夫宋襄公迂而愚者也觀夫宋襄之求霸也自敗齊圍曹以後視霸圖之易猶反手耳故爲鹿上之盟以求諸侯於楚已見其不度德不量力矣旣而諸侯會宋襄于孟楚人執之幸而釋之乃不以爲辱而猶伐鄭以致楚師小不可以敵大弱不可以敵強楚師之來不戰固上策也襄公不聽司馬子魚之諫而必與之戰旣與之戰矣則當乘其未濟未成列而薄之乃又不聽子魚之言以至於敗績傷股嗟夫宋襄之敗

實有以自取之也夫以楚之未可與爭也召陵之役桓公退師與屈完盟而還城濮之役文公合齊秦諸國之兵而僅獲一勝襄公自視與桓文何如而欲以區區之宋靖楚氛而創霸業耶且襄公會用鄆子於次睢之社不仁未有如此者矣而其戰也則曰不重傷不禽二毛不鼓不成列是之不忍爲而忍於用人祭社此何心哉既敗之後國人咎之猶假君子以自文援古之爲軍以自解其迂也甚矣以子魚之德之才而

不能用不免於敗師傷股之羞其愚也甚矣或曰五霸當黜宋襄宜哉

剛而無虐論

書之示人以剛者詳矣臯陶謨之言九德也曰剛而塞洪範之言三德也曰剛克剛德之美者也而有所以全剛之德者則如舜典記帝之命夔所謂剛而無虐者其義更切明矣夫剛之所以爲剛者固有其道也至聖之德其柔也足以有容其剛也足以有執柔與剛相濟而各得其

宜者也自非聖人則氣質之偏柔與剛過皆失之而失之剛者其弊滋甚戇直出於性情嚴威形於聲色而其見諸行與事者有因忿憶而入於殘苛者矣有因激厲而流於慘忍者矣暴君酷吏之所爲皆剛爲之累也是虐也是剛之必至於虐也聖人有憂之故於典樂之命詔以教之之道夫教之屬乎典樂者何也蓋致樂以治心有以養和平之德而救氣質之偏教之樂語以涵泳之教之樂舞以節文之教之樂德以陶

淑而化成之夫然後血氣和平暢於四支而發於事業以之立身則所謂望之儼然卽之溫也以之敷政則所謂猛以濟寬寬以濟猛也以之莅民則所謂無依勢作威無倚法以削也惟其無虐也乃可以爲剛也夫子於乾文言曰乾元用九乃見天則朱子釋之以爲剛而能柔天之法也又曰大哉乾乎剛健中正剛以體言健者剛之用也剛健歸於中正故純粹以精也是可與書之所云相爲發明也歟

原軫論

自古忠臣義士以身許國非死之難而所以處死者爲難惜乎晉大夫先軫以霸佐之才而爲匹夫之諒也晉文公之霸也報施救患先軫倡言之及城濮之役分田畀宋許復曹衛橫擊楚師皆軫之計其勇而有謀晉大夫無居其右者以下軍之佐而超將中軍洵無愧矣然吾有譏焉軫以晉襄公之歸秦囚不顧而唾自知逞志於君罪不容道遂於箕之役免胄而死狄師君

子曰其志洵可哀矣其死則
自知其無禮於君而欲痛
之正化血氣之剛內竭臣
汲於死乎卽謂罪不容道
請命於君而明示之罰乃
敵不顧義之所在豈死所
如人乎身爲主帥軍之號
人使以長子之寄而身死
卒伍驚變敵人乘亂而攻

白狄亦幸耳使不幸而師敗也先軫辱國之罪不益重乎且軫之辱國又不必師之敗也成師以出而軍帥先亡已大爲國之恥矣嗚呼是亦不善處死者也呂伯恭謂其沒有餘責與自經於溝瀆者等宜哉夫狼曠以黜右之忿死於彭衙之役人猶謂其出於忿激而非之然其所以死者欲以自效也死則死矣若先軫者何以死哉

寬而有制論

立人之道曰仁與義古聖人之致治也仁以愛之亦必義以正之撫民以寬仁之則也議事以制義之宜也致治者固不可不寬而又不可一於寬也成王之命君陳曰寬而有制誠得致治之要矣夫爲政者以好生之德而致無疆之休未有不以寬爲主者也雖然政有失之寬者以慈良而失之姑容以忠厚而失之偏黨以溫柔而失之因循其弊可勝言哉昔者堯舜以仁政平治天下虞書詳帝之命曰敬敷五教在寬又

曰明于五刑以弼五教臯陶之言曰御眾以寬
又曰罰弗及嗣賞延于世雖堯舜之時有教不
能無刑有賞不能無罰爲政者可以知所法矣
蓋政之所以爲政者固有公平正大之體紀綱
法度之施也祈年報嗇以慰三農也而畛洫涂
澮之規有其制也餼廩稱事以勸百工也而器
技奇巧之禁有其制也市廛而不稅以利天下
之商也而賣僂質劑之灋有其制也關譏而不
征以恤天下之旅也而啟閉節傳之令有其制

也推而言之等威有制以定尊卑之分則僭越之端自弭也冠婚有制以明內外之別則淫僻之行自消也財用有制以酌出入之宜則奢靡之習自化也且夫爲政之要在乎任人善者進之不善者退之若必以寬示含宏之量則巧佞相因濫膺仕版而賢才轉爲所阻欲人之稱任胡可得也爲政之要又在乎安民攷其行藝而勸之糾其過惡而戒之若必以寬詡博愛之名則奸競無忌擾害閭閻而良民皆爲所累欲民

之義安胡可得也不觀夫天道乎萬物資始天之所以無私覆也然而四時之錯行有其序日月之代明有其度風雨雷霆之流散鼓盪有其節候陰陽相摩溫肅相循故曰春作夏長仁也秋斂冬藏義也爲人君者體天之心以爲心溫慈惠和以效其生殖長育刑罰威獄以類其震曜殺戮則仁以育萬物而義以正萬民卽所謂保合太和各正性命之道也歟

經正則庶民興論

天之生斯民也有民卽有經經也者所以正民
之不正而使民歸於各正者也故治天下者必
於天下之大經而經綸之孟子有言曰經正則
庶民興請申其旨夫自綱常倫紀以及日用事
物之間其道爲天下之所共由而其理爲古今
之所不易者皆經也經固無不正也乃自異端
之競起也邪說無忌正道不明以兼愛爲我之
學誣民以索隱行怪之術欺民以清淨寂滅之
教惑民民性有恆也民情不相遠也然耳習聞

之目習見之則且受其所誣信其所欺喜其所
惑遂使固有之恆心日以失而農工商賈之恆
業不能相安此誠民之患也而非民之咎也何
也經不正之故也聖人之治天下也道之以德
齊之以禮慎修立極旣躬行以先之而秩敘惇
庸復有以教誨而訓告之其法禮樂政刑其文
詩書易春秋其人君臣父子昆弟夫婦朋友其
爲道易明而其爲教易行如權衡之於輕重如
繩墨之於曲直如規矩之於方圓民之仰之如

雲漢之昭回於上而莫不光被如日月之照臨乎下而莫不就瞻則見其龔乎鼓之軒乎舞之而勃然興矣然則爲民上者使民之漸仁摩義日遷善而不知爲之者非家至而日見之也董子曰爲人君者正心以正朝廷正朝廷以正百官正百官以正萬民是非之心人皆有之經旣正矣則聖教昌明一道同俗皆知崇正學以黜異端雖有一二愚民向爲異端所誤者亦自悔悟變化而與興起之庶民蒸蒸然同歸于治也

己

經通經文卷之四

五

樂道堂文鈔卷五

恭親王著

高宗夢得傳說辨

書有之高宗夢帝賚良弼乃審厥象以形旁求得說於傅巖之野爰立作相余甚疑之高宗果亟於求賢耶雖居亮陰之中而使羣臣各舉所知用揚側陋說必起自版築間矣何待夢之感格而以形求乎且人君欲爲天下得人其任人也考以言試以功何如其慎也若夢寐之間渺

冥不可知在常人猶未之信况高宗中興令主而乃示人以渺冥不可知之事乎夫天果以良弼予武丁君明臣良際會以時豈必假諸夢以賚之耶若武丁果以夢而得良弼則後世之君亦可晏然高拱而待天之賚耶向使武丁有其夢而無人以肖其形則將無可爲相耶且使肖其形者非如傳說而爲愴壬不可用之人則亦將立而爲相耶古史之事在存疑不可深論者多矣故曰盡信書則不如無書

周叔服能相人說

術有以相名者卽人之容貌顏色以決人之吉凶天壽似未可信然其說往往能驗何也相因乎心由微之顯自有其理非盡在乎術也左氏傳詳周叔服相公孫敖之二子曰食子曰收子曰豐下有後聽其言簡而賅厥後叔服之言皆驗矣人謂相者之術與巫醫等皆小道之無足深論者其言之有時而中亦幸耳否則叔服數語左氏爲文而修飾之也以吾觀之亦未盡然

叔服爲周內史非必習乎相人之術者也禍福
惟人所召固有可以預定者如左氏傳所載鄭
伯視流行速士貞伯知其不能久單子視下言
徐叔向知其將死邾隱公執玉高魯定公受玉
卑子貢知二君之心已亡其言之驗如影響之
於形聲若此者不可勝數豈皆言之幸中耶抑
皆左氏修飾之文耶夫相固術也然以一言定
人一身之休咎亦必有不易之理焉書曰惠迪
吉從逆凶孟子曰胸中正則眸子瞭焉胸中不

正則眸子眊焉誠於中形於外則心之善惡厚薄卽身之禍福所兆也推而言之至誠之道所謂善必先知不善必先知者亦於人之善不善決人之休咎耳文伯惠叔賢而孝者也賢者天所佑叔服之言其辭簡其意賅殆以心爲相者也以心爲相是理也非術也人固不可惑於相之說而明乎術之有合於理則容貌顏色之間善與不善卽禍福所倚伏不待龜卜蓍筮而決也然則人皆可以相人也豈獨叔服以能相傳

也哉

讀蘇老泉六國論書後

六國之亡賂秦也宋之衰賂契丹也予讀蘇老泉六國論譏六國以地賂秦坐受破亡之禍然而老泉之論非論六國也宋賂契丹歲幣日增雖未至於割地而與六國賂秦同一覆轍夫六國與秦等爲諸侯秦雖強一國也六國雖弱六國也假令六國同心并力西擊如老泉所言以賂秦之地封天下之謀臣以事秦之心禮天下

之奇才秦勢雖強豈能爲害耶宋之於契丹亦然真宗不聽寇準畫策乃遽許其和以議歲幣且曰必不得已百萬亦可何惴慄之甚也爲積威所劫宋之坐弊以此南渡後則又甚矣老泉遠識固有大過人者其言曰以天下之大從六國破亡之故事情詞危切撫時之感躍如與辨姦論皆有先見之明豈徒文辭也哉

讀歐陽子朋黨論書後

嘗讀宋史歐陽修傳稱其天資剛勁見義勇爲

殆所謂古之直也及讀其所作朋黨論則又知其正直可風矣公之論蓋有爲而作也時杜衍范仲淹韓琦富弼諸公相繼執政而王拱辰輩嫉其賢欲傾之希文之貶饒州也歐陽子及尹洙余靖諸人皆以直希文見黜羣邪目爲黨人於是朋黨之說起厥後杜范韓富諸公因劾被謫於是拱辰輩得以快志矣自古小人廣陷良善則指爲朋黨欲以盡去善類也公旣疏陳之復作朋黨論以暢言之其要旨謂小人無朋君

子有朋惟在人君辨君子小人不問其黨不黨也援古事以相證備陳治亂興亡之迹宜乎仁宗之感悟也公論事切直帝獎其敢言嘗謂侍臣曰如歐陽修者何處得來讀公此論知公之拒羣邪而釋君疑有裨於國者大矣至其文反覆曲暢婉切近人猶其餘事也東坡謂其論大道似韓愈論事似陸贄信哉

擬范浚心箴

人各有身心爲之宰出入無時乃招尤悔操之

則存舍之則亡人禽幾希曷其不防勗哉君子
體有小小大爲小役厥惟心害孰操孰舍孰亡
孰存曰誠曰敬入德之門制乎其動以養其靜
一日百年恐懼修省修齊治平正心爲先慎之
慎之用希聖賢

擬張方平四箴

敖不可長

直內之功君子主敬反之曰敖乃爲心病接人
以莊守己以正戰戰兢兢克念作聖

欲不可縱

情之所動欲斯隨之敗度敗禮莫能自持毋溺於習毋汨於私內外省治念茲在茲

志不可滿

在心爲志藏之於密滿則招損其惕其慄淵涵能容川沖不溢以虛受人日慎一日

樂不可極

樂得其道樂以道心樂其所樂卽於愒淫十愆斯儆四勿斯箴戒之戒之監史如臨

擬姚崇口箴

人之有口口司其職言無口過爲天下則君子
戒之德裕乃身勿以躁妄失口於人好言莠言
皆出自口口以立言斯爲不朽曰費而煩伊誰
之咎君子戒之惟默惟惺古訓是監口緘背銘
先儒是式守口如瓶彼何人斯習爲辯給利口
喋喋惡之所集讒口囂囂禍之所及君子戒之
慎爾樞機至樂無聲大音必希其性存存其口
啞啞孰司爾喉孰捫爾舌書誠起羞易傲騰說

口無擇言希聖希哲

擬崔子玉座右銘

斯人性皆善知能受自天毋爲習俗染毋爲物
欲牽待人順以恕修己壹以專慎言如不出砥
行其無愆誠乃德之固敬乃福之緣黜奢以儉
制警惰以勤先典禮常肄習詩書務精研有過
不自文有善不自賢聰明無敢作好惡無或偏
懷哉書座右箴規在目前

葆光室銘

山以玉輝而石胡爲乎
涇涇川以珠媚而水胡
爲乎茫茫夫惟韞而懷也
乃鬱久而大其發揚
今茲斗室

賜題葆光不滿不竭義取蒙莊繹高深之

訓誥重五夜之徬徨無斤斤以自喜無赫赫以
相將第加膏而希耳敢微炫其寸長而彼積厚
而流者顧未嘗不精燿華燭炳炳而煌煌吁嗟
乎天道下濟而光明地道卑而上行故君子之
道闇然而日章

賈筠堂相國夫子手書孝經讀本識語

道光丁酉余甫六齡出就外傳從翁二銘先生
越歲戊戌先生乞假歸里卽受業於賈筠堂先
生朝夕討論十有餘年賴先生切磋琢磨之功
略開茅塞先生品端學粹旣長於詩文尤工於
書法嘗於講習之餘手錄孝經一帙以便誦讀
大矣哉先生之意也夫孝天之經地之義民之
行也自天子以至於庶人辨等差別上下胥在
乎此人能明於孝敬之道則脩齊治平之理不

外是矣可知先生之教不僅爲經師卽立身行
政在在可奉爲圭臬余因是裝褫成冊用以收
藏并邀書齋諸先生抒句題之非惟誌余誠悅
之懷蓋欲使後之學者咸有所趨步云耳咸豐
丙辰仲春月識

朗潤園記

圓明園迤東而南舊有園寓一區俯枕長河周
圍不過里許是爲春和園咸豐辛亥余承
恩命賜居於此

特發帑金鳩工庀材繕完補闕是葺是營肯堂
肯構雍榛莽剔瓦礫無丹雘之飾無雕甍之靡
不尙其華尙其樸不稱其富稱其幽而軒墀亭
榭凸山凹池悉仍其舊越明年壬子而園成非
創也蓋因也是歲仲秋復蒙

皇帝臨幸

御書易園額曰朗潤

宸翰昭垂所以

訓迪余之拙陋之心者至深遠矣昔人有言曰

心容曠朗氣宇調暢又曰傾羣言之漑液漱六
藝之芳潤夫人生於天地之間陰陽合德渾然
全體耳司聽目司視各有所職而天君爲之主
孰不知體有貴賤有小大不可以賤害貴以小
害大也哉然人感物而動同此心而至於失其
本心者何也物欲有以蔽之也耳之於聲有足
以娛聽者惑之目之於色有足以恣視者引之
四肢之於安佚有足以供樂游者從之欲敗度
縱敗禮乃以心爲形役始焉視聽誘之於外繼

焉罔念結之於內萬事感其心萬物勞其形錮蔽日深聰明日塞而欲不失其本心也烏乎能心至虛也至誠也惟其虛則心無所窒於凡天下事物之理湛然涵萬象之蕃賾而通其變惟其誠則心有所主於凡天下事物之理確然究萬善之精微而得其真如鑑之懸妍媸自呈而無遁影也如燭之照纖細畢現而無藏形也記曰修禮以耕之陳義以種之講學以耨之本仁以聚之播樂以安之心鏡智珠礪磨日久則渣

滓盡消白生虛室物之誘也絕之於外私之伏也治之於內清明在躬於萬事萬物杳然紛擾之時而心得爲主宰先儒有言曰天君泰然百體從令熙熙乎藹藹乎蕩滌其邪穢涵濡其性情則常葆至虛至誠之心豁然無滯其庶乎有合於朗潤之道矣今夫天昭昭也寒暑之往來晦明之變化日月星辰光明晃朗雨雪霜露滋濡涵潤以成四時之序以遂萬物之生高也明也聖人之敷治也敬代天工順時布令善政善

教以化成天下如春陽秋露之光明潤澤所謂
大明無私照至公無私親金鏡常懸璿璣是握
而所以敷教化定民志者未有不本乎光明之
道以垂治天下卽如

賜額之意

訓迪教誨亦皆寓於其中矣是園也臨清溪面
層山樹木蔥蘢旣靜以深荷池環繞竹徑清幽
樂蕃植則有灌木叢花青翠交加也學耕耔則
有田畦蔬圃量雨較晴也松風水月入襟懷而

妙道自生也仙露甘膏常浥潤而俗慮自滌也
研經史以淑情習武備以較射或怡悅於斯或
歌詠於斯而於樂山樂水之旨其稍有合也既
蒙

賜園名曰朗潤又

賜額曰池水共心月同明齋曰明道軒曰棣華
曰萃賞余之渥承

恩眷固已榮矣厚矣而

奎章炳煥訓迪之意亦已深矣遠矣園之正室

爲堂五楹額曰樂道書屋曰正誼皆
宣宗成皇帝御書所賜也凡可以占溪山
供覽結之奇者爲榭爲亭爲廬爲廈每堂
則吟賞託懷草木爲之含輝山水因而增
焉修焉息焉游焉仰觀俯察風月之清朗
之秀潤遇日賞心亦有以愜夫恬澹之襟
歟抑余因之有感矣園之北不及里許是
春園余於王子移寓斯園而是年恭逢
孝靜康慈皇后駕臨綺春園循舊制也竊

安視膳朝夕承

歡於膝下得以常侍

慈顏敬聆

懿訓詎意乙卯孟秋

奄棄臣民呼天搶地五內摧傷迄今仰

宮殿之巍峩瞻雲樹之蒼鬱近在咫尺迴憶趨

庭歡奉

色笑宛在目前而

音容杳杳攀號莫及余於數年之間兩遭大故

岵岵之吟終身抱慟孰知不幸有至於此極哉
爰濡筆以記

皇帝訓迪之深恩兼以誌余孺慕之懷時咸豐
丙辰仲秋月也

賈筠堂相國夫子六十壽序

聖天子御極之九載治光玉鏡卜協金甌將庸
延禧造福之臣藉贊合曜斟元之化而我筠堂
夫子適自山左還

朝遂荷

丹綸重登黃閣望崇泰岱沛霖雨於人間瑞應
中台爛景星於天上領羣仙之隊騰壽木之華
蓋是時我夫子春秋六十有二矣潞國精神晚
年益健溫公事業再相彌隆竊敬述所聞以當
引年之祝焉夫砥礪廉隅則四知必懷率循義
路則三惑務祛我夫子玉質葆躬金心植體誦
抑抑其儀之戒抱躬躬如畏之忱周茂叔接人
朗同霽月許魯齋律已懍若秋霜其行誼有如
此者若乃以摘洛鉤河之學殫陶元浴素之功

陸又人號石經裴頌世稱武庫琅函玉笈徧讀
奇書月窟天根精研奧義訂遺經於虎觀五經
無雙叩往事於蟬編十事對九其學問有如此
者况乎蘊蓄旣厚著述益多黃絹之辭蜚聲於
綺歲青錢之選流譽於藝林迨登藜閣以校文
遂賦柏梁而應

制仙韶響協異藻輝騰其文章有如此者且夫
報

國以進賢爲上知人惟愛士爲先我夫子心濯

冰壺手提玉尺采珊瑚於網裏收藥物於籠中
桃李春濃栽依講幄桂林秋好植徧門牆陸宣
公能識昌黎蘇學士喜逢永叔其鑒衡有如此
者用是臺閣迴翔棘槐周歷王筠編集題以所
署之官甄濟命名授以所居之職當
先帝而恩榮至渥迨

皇上而寵任攸隆一德調元天下關其憂樂萬
民跂望域外問其起居鹽梅之職崇夔臯之業
偉已而我夫子委蛇益慎夙夜彌恭雖大猷炳

於巖廊小心匪懈卽餘慶衍於家術清節維嚴
以故膝下萊衣欽承庭誥階前蘭玉秀挺家聲
信乎德厚者祉蕃木深者末大至性之固固於
金石也達人之壽壽於旗翼也夙承辟呬親荷
裁成百尺宮牆久侍

三天之講習一編風雨難忘廿載之陶甄今者
學書幸成讀詩粗解而回憶髫年就傳講座摳
衣曉漏晨催便執經而問難午窗晝靜猶據案
以披吟小子之獲益良多函丈之追隨最久德

門行事耳熟能詳焉茲屆玉宇秋高瓊霄露浥
瞻壽星而彩耀登福地以筵開昔逢周甲之年
未伸郵祝今應鈞天之奏補獻瑤章韓魏公老
圃吟成恰喜香增晚節程明道經師望重所願
常坐春風謹序

咸豐丁巳年新正初四日同雲密布瑞雪續
紛喜成豐年頌八章章八句

聖人御宇功侔大造立我蒸民痼瘵在抱億萬
生生胥匡胥保實維豐年登成萬寶

右第一章

璣衡齊政玉燭呈祥時雨而雨時暘而暘和甘
以序用卜豐穰我疆我理自天降康

右第二章

天時旣順人工率作旣種旣戒田峻是若干耦
其耘邇阡遐陌總總林林亞旅主伯

右第三章

春作夏長力田逢年千疇綺錯萬頃雲連西成
咸告取困取廛乃慶多稼乃歌大田

右第四章

我庾我倉登我百穀黍稷重穆麻麥
自如籌車斯祝農夫之慶含哺鼓腹

右第五章

其慶曰何曰

聖之仁耕田鑿井

帝澤陶鈞勞民勸相

帝德彌綸樂樂利利仰賴

一人

右第六章

帝曰於戲康年有自如坻如京

天之所賜乃倉乃箱

天之所畀惟余一人寅承曷旣

右第七章

太平有象樂歲延洪年書大有是謂大同高廩
獻頌以答

宸衷猗與

盛世億載咸豐

右第八章

咸豐己未自題竹深荷淨小照讚

此境何境翛然絕塵猗猗山曲采采水濱汗泥
不染勁節有筠子猷曾種濂溪與鄰涼飈忽至
綠波微皺攤書獨坐片石嶙峋洞觀元化結清
淨因大地擾攘或喜或嗔繫余特立天懷常伸
明月照影空潭寫神香遠益韻心虛可親盡蠲
熱惱樂我性真有花有竹誰爲主賓披圖一笑
樂道主人

豐年爲瑞賦 以題爲韻

繫帝王之致治惟首重乎農功慶昇平於寰宇
仰美利於昊穹勿以祥符之昭應侈言福祚之
延洪欣倉盈而庾億頌櫛比而墉崇忭舞光天
之下歡騰樂歲之中蓋所以稱爲上瑞者在百
穀之綏豐誠以民爲邦本食爲民天三農斯任
八政攸先辨種稔於嘉種歌茨梁於甫田疆理
則地利必盡作訛則天時不愆是卽休徵之普
錫蕃祉之昭宣曰太平之有象以大熟之書年

彼夫獻瑞者鋪陳靈貺競迓神釐謂一人之有
慶宜百福之是綏奉瑞圖而效媚陳瑞牒而摛
詞四瑞則傳於唐志五瑞則歌於宋時十瑞則
記於祖氏百瑞則賦於左思雖揄揚乎前史乃
粉飾乎昌期非萬民之嘉賴亦稱慶兮奚爲豈
知率育偕歌降康有白銀甕丹甌何若耒耜耒
芟之貽以樂利寶鼎器車何若汗邪甌篋之厚
其儲積日抱戴而月重輪何若昏旦興作之勤
乎稽事雲紉縵而星聯珠何若風雨時若之愜

乎人意則且以雙歧合穎之生成爲屈軼華平
之奇異以黃粦黑秬之並登爲廚蕙階蓂之備
致以田鳩野鴈之相催爲朱雁蒼烏之畢至以
獻羔稱兕之相仍爲赤兔白狼之咸萃惟年穀
之豐盈乃可稱爲聖瑞我

皇上廛念民依敦崇本務艱難培稼穡之基康
阜廣

恩膏之布戴

德者頌多黍多稌之詩沐

仁者詠如坻如京之句乃歌曰南陌東阡兮瑞
靄布濩培以祥霏兮膏以甘澍千倉萬箱兮民
以饒裕稔稔臚歡兮鼓腹含哺上答
宸衷兮敬獻豐年之賦

自序

中庸曰喜怒哀樂之未發謂之中發而皆中節謂之和和也者中也天下之達道也孔子曰辭達而已矣辭喜怒哀樂之成章也達達其由中出也辭達而道達也故通之天地無二也夫文與詩一也分而言之曰詩文合而言之詩亦文也文亦詩也故爲詩者必以清正爲宗雅潔爲主若議論文章尤須根據性理機圓而通詞暢而逸然求其淵源聖賢表裏經術如文選序所

謂事出沈思義歸翰藻豈易窺其涯涘也耶余
既綜戊辰以後之詩編爲續鈔一卷復錄近年
所作雜著數篇另爲一卷一併付梓題曰樂道
堂文續鈔蓋文人學士博覽多聞淹通今古生
平著述言言有補於世道人心必有以詩文各
集行於世者夫集者非一類也各有體裁皆以
類續也以余之才識魯鈍卽偶有所記不能不
筆之於書紀其事以達其意工拙殊不計及是
不得稱之爲文也率爾操觚不假藻飾鈔胥成

帙錄存而已更不得稱之爲集也是鈔也首錄
同治壬申恭進方畧表文二篇皆係同人公擬
原不敢據爲己作惟旣濫膺樞密之司忝列總
裁之任日趨

丹禁時秉

宸謨際茲軍務救平大功底定誦

文德而紀

武成載賡載歌似應敬謹錄存亦和聲鳴盛之
意焉爾光緒三年歲次丁丑嘉平之月樂道主

人自序

樂道堂文續鈔

恭親王著

恭

進剿平粵匪方略表

欽惟我

皇上虹璧當陽

龍圖啟運靈臺測景值

漢日之再中柳谷占星識

堯天之無外

兩宮垂訓

孝治洽而鈎鈐明六幕同文

威稜張而玉衡正以

聖繼

聖秉大武於三曾

鞠人謀人揚

天聲於七德

商威有截軫馳桂海之文

姬籙無疆策探岱宗之字

善繼

觀成之志有此

武功實惟

懿德之光受茲

介福觀瑤光七宿爲河海清宴之休徵考

金版六韜見

旋轉乾坤之經緯

國家宗基磐固疆索丕安

六七作配

上帝之郊禋三萬里入司空之版籍慶霄輝宙
瑞露膏年閒有扞網之愚不煩折箠而定蝟蠖
翔泳涵

亭育之慈象寄譯鞮化陸梁之氣屬以神州康
阜潛伏蘖芽邊吏恬嬉偶寬銜轡乃有粵匪洪
秀泉者天資凶譎左道侮張恃嶺嶠之阻深謂
潢池之可試焚香絳帕入祆社而稱靈義米朱
符託神叢而號衆乘火旱木饑之厄五龍講經
聚跳刀走戟之徒斗米作賊裾緣采綫始過市

而無譏囊探赤丸遂犯門而罔忌紅巾六等白
梃千羣自知僂民甘效奴賊獠咋人而漸大螳
拒轍而能驕智高有邕廣自王之心王則造彌
勒持世之語妖星害氣宵躔藤峽之山虺毒豺
牙晝飲桂林之水牙璋初發鐵額方張蟲沙之
廟化已多蟲蚋之撲搔難盡四面招討圍鎮無
功諸道行營扼巢不效奔兕開樊於百粵駭鱗
觸網於三湘盧循下桑落之洲楊太奪洞庭之
口雖嬰城搏戰不少九攻九拒之方而散地投

戈難用四正四奇之陣名城大郡唳鶴驚風長
江洪湖飛鯨跋浪梁山橫鑠難爲扼截之謀采
石量繩坐失喉衿之險穿刀容足衝朱雀之大
航鳴鼓吹脣躍青絲之白馬奪艨艟而載火伏
鱗鱗以藏兵盜鍾山龍虎之都爲朱圉蹙餘之
穴蝟繁鋒厲傳烽達於淮塢兔狡窟多蘊毒延
乎江表方且扇其蠅醜綴我貔軍吳淠旣困於
攻梁晏鼂復創於襲晉眩迷歸路鋌走郊畿橫
行者宋江三十六人城守者河北二十四郡狼

星睽睨敢向

威弧鼇足撼搖自投

天網

文宗顯皇帝拯萬方之厄申

九伐之經歐刀行失律之誅

齋斧選折衝之將懿親藩衛河閒孝恭之賢異
姓名王沙陀赤心之勇廉頗李牧出自禁中閔
天泰顛拔於材武得狄青於西班而任以專閫
收徐勣於歸義而用作下城虞允文起自書生

岳家軍出於義勇

知之而善任

用之而不疑乃

幹璇機

闡金筴以爲欲傾孽窟先據上游欲折兇鋒先
清三輔河魁應將井鉞森芒太乙陳軍雷碾鬱
怒羊頭鶴膝尙方蘭錡之兵朔斡燕弧六郡良
家之子鼓洪爐而爍毳糾濛汜以澆螢桐鼓殷
天鏖旗捲霧老羆當道先扼勝於天津狂象走

林遂合圍於連鎮赤龍吐電挾礮石以飛鳴鐵
騎凌霜踏河冰而平渡中黃士勁箬矢三鏃太
白旗高衝鞞百丈長纓繫賊吉林詐馬之健兒
飛火注槍蒙古打生之蕃部布周陞而剗地暈
月成規拔渠答而踰濠陣雲如墨剖巢入穴桎
貳負以歸朝飲刃伏樞血溫禺而覺社高唐州
一鼓而下梟鳴牙中馮官屯三版難支鼃沈竈
底臨戎鼓蓋人識高敖曹之容破陣笳鏡軍奏
蘭陵王之曲投弓窮羿果知射日之難被髮狂

夫始悔渡河之誤然而北風雖勁南紀未康方
棄螯之將窮適前禽之不戒相州師潰蜀郡彭
亡致財賦之大藩成荆榛之戰地

神謀早定

天策無遺用陶侃鎮武昌之西門使諸葛督長
沙之軍賦長沙完而糧通甬道武昌奠而水建
高瓴築塢守濡須之城輕兵塞淮泗之口衣冠
愜慨范蠡立君子之營扁舸魏峨楊僕創樓船
之號楚歌四面八千子弟之軍湘水九迴十萬

水犀之弩三呼蒼兕黑貂公陷陣如飛十丈青
龍黃頭郎習流而舞先清岳鄂則夏口燒船繼
掃蕪黃則九江歸漢揚旂於皖公山下而殺師
之角先摧刷馬於彭郎湖中而攀鞬之臂已斷
蔽江流柁頓成破竹之形曳地明光已有撥釁
之勢當是時

文宗顯皇帝方以十科選士五聽求言

周宣側身

漢文拊髀

身道金匱授自九天

澄鑒銀華燭乎萬里

發蹤導窾晨披白阜之圖

具食求衣夜聽赤囊之報

輟裘效賜千營銜挾纊之温

畫箸伐謀諸將決埋根之計

爲民請命之語惻愴於

丹綸脅從罔治之條諄詳於

申命七旬弗格知頑惡之將殲百六已過卜貞

元之必復覩燕巢於齊幕待麋
毋野之弓聞鶴語於

堯年遽鑄

荆湖之鼎

應門顧命不忘未濟之艱難

畢郢升祠卽兆

大勲之底定

皇上上元膺運

下武作求當

秉璋奉瑁之辰有合璧聯珠之慶稟承

聖善奉若

詒謀凡

問

安視膳之年皆

訪道陳謨之日山川聚米

挈地絡於目中撻伐哀荆

運乾符於掌上

首清朝列

爰整戎機

知李靖有武略而兼文謀

命曹彬以大將而爲使相趙陽間馬皆

先帝簡拔之遺彭濮微瀘極公侯腹心之選時
則石達開就俘於蜀徼而蚤駟之形孤陳玉城
授首於壽陽而猱猱之齒拔南恢甌越洗兵胥
母之潮東取蘇松奪戟神亭之壘皆所以翦朝
吳之翼搆僑如之喉斷脅攻心扼吭拊背城開
鐵甕重收北府勁兵關叩秣陵增築藥園舊壘

常山列陣率然無自救之方坳水尺波鼃黽失
跳梁之勢九洑州斷其饒道乳哺立枯雨花臺
瞰其城闔走飛俱絕窮山睨酒徒聞呼癸之聲
約服舉旗已播伏辰之讖崇墉將圯不因壘而
乞降齊燼難收尙背城而借戰負嶠逞鬪奪刃
乘危埽其遊魂攻我夾寨下潦上霧鼓無死聲
升糈判冰士有朝氣十盪十決五兵五當鼉枝
墜而技窮鳶綆沈而書絕於是將騎將步爲鶴
爲鵝埽外援而足盡虵僵塞走路而河枯魚泣

地中鼓角道古攻其東南樓上梯衝亞夫備其
西北餘鯨失水遁甲開山劉窟頭將掘地之兵
甘興霸作升城之督指招搖之星怒雲旛飛揚
候箕壁之風高火輜具舉星丸撒火地軸都搖
素練騰風天梯直上雷公擊鼓應龍之翼齊張
庭氏彎弓妖鳥之巢立覆防風已戮辨巨骨於
專車侯景未寒藏漆頭於武庫滅塵鏟迹盪穢
湔腥舉旛炳乎騶牙積甲高於熊耳洛陽父老
重見漢官威儀常侍囊鞬來迎大將旗鼓思明

既殛朝義知窮懸瓠既夷洞曲自潰洪芒玕孽
童既殄遠行袁尙之廬李秀城副賊成禽生對
樓蘭之簿西江餘氣嶺外殘魂或逋誅於黔蜀
之交或遺種於雍秦之境靡不枯摧朽落冰泮
燼灰高張露布之長縑競唱勤歸之雅樂

甘泉飛報聞吉語於五日之中

明堂大開舞文于於兩階之上鐘鳴

長樂喜動

慈顏

弓掛橋陵慶邀

靈貺昔蓄今穫成

文王丕冒之功後舞前歌誦

太姒徽音之化惟

天惟

祖燔柴鏤璧之上儀視公視侯喬嶽翕河之茂
典

珠邱昭告三矢前驅

璇極光輝壹戎大定瓚圭鬯卣

釐召虎而剖符偉勒鑿旂

寵尸臣而銘鼎綜稽功簿皆容資轉三階永

詔勲常不僅侯封萬戶拔都標號如銀槍效節

之榮鷲尾影冠逾金璫附蟬之貴帷中閫外

露湛雲需尺功寸長

天施海潤蓋帷紆

惠醑勤事之蓋臣粟帛流

恩慰國殤之猛士

授羽林孤兒之職俾紹家聲

廣博士弟子之員用旌敵愾農租

蠲銓商算

裁緝猶復

慎垣思艱

涉淵知懼

智周善後不忘懲誌之詩

本務勸農特可墾屯之奏遣遊勇而脫巾不謀
散鄉團而賣劍無虞火猛水寬

舉循吏以安清剛吳輕楚剽

設水師以控長江

簫勺羣頑

盧牟六寓鏑銷燧灌劍脫戈包在昔殷伐鬼方
僅威夷落周平淮浦未滅徐戎唐中葉不能清
河朔戎馬之塵宋盛時不能取夏州彈丸之地
然猶揆張鴻號鋪侈駿聲以準

清時洵躋前古茲者肇修軍志臚紀

宸謨揆諸經文則雅頌以告成功之義稽諸史
例則通鑑紀事本末之編溯

禍牙徵發之初底

偃伯武成之日蓋俶擾者十有六省披猖者十有五年其黠鷲則甚於赤眉青犢之徒其孽萌則夥於方臘曹成之衆跨州連郡儼羽翼之將成襟江帶湖幾牢膠而不拔鴟鳴狸嘯已徧蹏通報德之維蟻國猴冠敢竊宇宙柱天之號此蓋仰賴

天戈仗順

廟算籌全張網羅賢不限以循資之格鑿門遣

將不撓以中制之權不臨陣易將而奪符不恡
賞惜官而刑印南人使船北人使馬不違地以
遷良衢地則合圍地則誅不隨方而浪戰盜兵
軫

念不舉獻俘受馘之儀旬戟歸

仁不用伍畀曹誅之法軍書駱驛而春千秋籥
不廢修文度支浩穰而丁算口錢不聞加賦
前光垂憲

繼序紹

聞用能

蒼緯孚精

珠鈴制勝下瀕慘黷上答

光靈

文母冠十亂之勲

湯孫建四方之極

鈞臺誓衆瞻

禹迹之重光

鄩邑升壇告

炎符之上瑞北征六月南征采芑

煥景命以

重熙內治天保外治采薇播休聲爲

大愷臣等依

光丹地載筆蘭臺實均慶於普天敢竭誠於測
海繫年繫月知

整軍經武之有方

丕顯

丕承著

保大定功之有本守難於創釋魏徵敷對之言
安不忘危鑒宣聖繫辭之訓訂長編四百廿卷
寶笈常輝祝

鴻祚億萬斯年金甌永鞏東南尉而西北候定
皇輿一統之經

天地闢而

日月光上

帝世六符之頌

恭

進剿平捻匪方略表

欽惟我

皇上抱表體天

握機括地八紘瑞玉車書鍾明備之期

七緯文鉤

律度邃緝熙之學

濬哲纂

放勳之業窮奇借禱杙而誅

紹庭率

昭考之規郁里繼淮夷而靖受駿厯而九圍式
湯鉞除殘斷鼇足而四極安

媯簧幹化崑崙薦版况中邦堂奧之區

招矩收鋒還率土壤衢之樂昔

平江左陋七策於隋書今

定淮瀆誦二篇之柳雅譬如錫圭導水而岷山
積石有南條北條之殊迎筴占星而竹筭天猿
有青方白方之異

紫極明潤則祲氛循次而銷鋒

黃輿久安則洪澤分趨而伏軌

奠三靈而拯水火是曰

寶慈

光四海而通神明斯爲

適孝衍

乾坤之策擬周易之有下經颺

神聖之功分虞書以爲二典原夫房心之分徐
豫之交淮潁下游海岱西境南連南豫東走東
蒙畫河山兩戒而適界中央歷南北六朝而常

爲戰地山川盤互風氣雄鷲人習椎埋戶高搏
擻矯虔亂紀往昔同符陽夏鳴狐彭城戲馬龐
萌李憲借銅馬以稱戈尹禮闕宣乘黃巾而樹
幟唐憲圖治而淮西拒命者四十年廣明不綱
而冤句弄兵者六十萬世爲巖邑俗等互鄉已
久漸翔洽之

皇風猶隱伏崖柴之故態越人揭篋借客彎弧
突鬢纓纓危冠利劍故嘗授健吏以潛柔其爪
距宿牙兵以默寓其維婁自瓠子決流宣房未

塞尉陀崛強魁結稱兵際元二之災年階萑苻
之厲梗察眉雖識傳桴鼓而先逃聖面成禽響
帶鈴而奪去數百人爲一捻捻各有旗數千家
爲一圩圩各有寨旗雜糅而如蝸蟪之沸寨錯
峙而如蠶蟻之屯淪牡者號將軍摸金者呼校
尉九千徒衆分領莫邪之都十五健兒便作難
當之賊毛面絳頭之狀浮雲白雀之名來則呼
嘯沸天去則燔焦赤地豺頑當道燕餒巢林據
渦口爲安窩視梁郊爲熟路向平原而馳驟空

設蘭防介四省之邊陲幾同甌脫釋兵執耒伏
戎則李密騎牛蹈釁擊虛出穴則王良策馬雖
復羊分九牧士募三科稍鍛羽毛未探要領
文宗顯皇帝憤其敷虐閱此化離琅鐸專征荆
幡聲討練民兵爲犄角發彊騎爲游軍畫圻固
封堅壁清野鴛央製陣指枉矢以鋒摧羸子名
軍望靈旗而膽落準備焦原撲燎射梁楚之黃
皇正逢天塹揚波晦東南之紫氣輸情通款甘
爐火以乞憐助虐增驕怙輔車而自固其意則

市中假虎其形則桀上連雞彼儼爲响沫之涸
鱗此實作兩端之首鼠雲磨壓壘彈羽張羅乃
指斗而誓天願捧鞞而伏地劉鋹執挺慣作甘
言孟獲還營仍藏辛螯捐埋多變反噬孤恩入
金鑑而難欺

振靈夔而決戰知我軍如羅掩雉急則抱馬而
歸誠知賊勢如鞞紮鷹緩則增陴而善背焚巢
可待不容鼓子之降解網已寬終正三危之罪
起雲中之故守將韓厥之新軍騰組練而接陰

殷柝鞞而聯響鳳陽城雌軍奪氣一丸難封臨
淮關大將懸權八面受敵千羣代馬振批亢之
勢於曹南二廣楚師成折首之勳於境外布成
勝局砥就神鋒徒以吳越一星未清餘沴文昌
上將尤急攻堅如劉裕北伐而海寇內訌如李
晟收京而懷光議後奔南備北議守謀攻致僵
蹙之梯芟延營魂於漏刻

丹浦之神旌方展待戮九嬰
蒼梧之僊馭難攀空還八駿

皇上迪光纂葉

襲慶提釐

誓師而

日月照臨

卜將而星辰感會

密須車鼓震

豐水之聲威呂伋干戈奉

南門之號令

有娥綏祐爰基

桓撥之規

開母鑄華曾贊

平成之略元戎

申命

天屈龔行西平則繡帽臨軍任城則黃鬚表勇
黃閒青角開二十石之神弓紫燕紅陽分八千
人爲驟騎碣磔發崑岡烈石之聲子母銃然
湯谷流金之燄馬中赤兔天上將軍曳落河絕
地而飛鬪體臺切雲而起高頰統九十總管嚴

若負霜樊噲禽十三將軍迅於沃雪礮投卵碎
一戰降七萬人弩疾縞穿終宵馳三百里雖落
星芒赤竟完馬革之忠而沸海波紅盡拔鯨牙
之刺星流波迸幕捲巢熏蓋賊之精銳皆亡而
賊之腹心已潰函車獸獵旣無可負之嶠失水
魚窮姑躍已焦之鼎遂乃跳跟河沛奔突燕齊
西過漢中東窮海表前行副騎後乘鹽尸灰不
灌而重然沙以流而善走于時樓船下瀨已報
平吳旗鼓出陘并兵擊楚慶緒以稽誅之孽種

惡木生槎蜚廉以逋竄之餘生隙光因熱蛇身
軼首判東部西部以分流龍翼雙飛設左甄右
甄而進討獬子貍貓子獲世濟其凶句兵捍刺
兵搏人自爲戰畫鴻溝之長塹難制觸藩移赤
堊之純鈎竟窮補履將來萬福風聲播草木之
名軍有臨淮營壘改旌旗之色上金城之戰略
扼玉壁之要衝開偃月之營置撒星之陣霜鋌
透甲有二丈五尺之纏矛火器連珠如一發十
枝之神弩歎山欲野搜鐵獬於園中陰雲陽開

覆醢雞於甕底迸竄過穆陵關下鼠入角端追
奔到陽主祠邊豆銜牛口囊沙秘計渡濰飛韓
信之軍閒道奇兵入海失田橫之路醜類殲旃
於劇縣若網絕流元凶遇伏於高郵如杵投曰
凡此奏膚之效悉由

廣運之神然而淮陽雖就救安關內尙煩獮薙
方擬馬隆之西討適逢項羽之東歸卜竇充翦
滅之相仍聞騰遂益兵而輒喜驛騷三輔汎濫
九河

皇上知殘賊之貫盈戒遷延之師老虎符趣戰
龍武發兵五諸侯伐楚出關十餘壁臨河救趙
建蕭鈇以發艾秉義燧以銷冰晝地爲牢因河
爲洫一斥一堠高闌羊馬之牆四正四隅寬布
烏蛇之陣蟻旋磨上兵十則圍鼠鬪穴中人百
其勇戈船截浦望楊素若江神刀雨飛空呼高
昂爲地虎觸機落羽蹈穿摧牙驗鼻死俘掉頭
生致潰逃放仗掌拒膏鋒惟勝殘久惻於
皇情故祐順兼滋乎

天贊驅灌壇之風雨三日爲霖決淮堰之蛟螭
百川到海冰蠓擊鼓龍伯揚麾左陷澤中右縛
鼓下木罌難渡眞看鼉令浮尸血杵同漂終使
楚囚流漢參旂河鼓高臨洗甲之銀潢黃道天
街滅盡如旗之蚩霧竊惟此賊本同草竊素鮮
籌謀宜冠以無賴之名絕不作白頭之計以視
弄兵桂管則狼脍并廢冠裳較之攘據石頭則
天險尙無衣帶然其衆如馬牛之量谷其凶如
蝨蟻之殘苗堅城不攻梟鋒莫挫得地不守鹿

角難圍鷓有九頭殲其魁而黨不滅蟲生百足
擊其尾而首不知剽疾別卷旗滅竈而難追冥
行則燒棧斷橋而莫遏故擊之視粵匪爲稍易
滅之比粵匪爲尤難其始禍不過什伯爲羣及
盪平豈止五十二戰自非

璿圖祕運

威柄高持縱勞奔命以曠時詎克掩羣而獲醜
櫛髮鋤苗之候撤屯銷戟之辰鄒魯誦絃梁臺
歌吹宋不塞夷庚之道陳不興堙井之波潁水

濁而復清芻陂荒而還熟蔡州歸化方飽粥餐
汴泗交流不聞鼓角宛市絕綠林之警壽陽無
白馬之謠曲阜之東郊開申息之北門啟妖殲
曹社弋雁無莪浪靜濠梁觀魚知樂築譙東之
精舍士盡讀書過苦縣之故墟人思問禮濯舊
汙而變獷起凋瘵以趣耕磳垢滌郵餐和飲化
刑牲告祭如瞻

原廟之衣冠

瑑册承歡加進

璇宮之馨膳

文克開而

武應受知

聖人繼述之心韋旣伐而顧亦平皆

帝命不違之眷銘燕然而闡

烈用攄宿憤於

山陵縛劉闢而獻

功益愴

孝思於

邊俎祁連造冢

倦懷昔日之鼓鞞傳穴搜巖光輔

清時之鼎鉉朱鷺鏡吹金雞赦書穀蒲班爵之
禮成杕杜勞還之詩作水衡之錢織室之錦駢
香於

賞軍銀青之綬金紫之魚汪淪於

錫命鴉音革戾

綸書安反側之心烏尾憐逋

玉燭照逃亡之屋歸德鎮建牙設戍虎在山而

藜藿安雉河集置縣築城鴻有宅而桑麻殖人
祇並豫諧變交臻洵景煥於圖書將葳蕤於史
牒恭承

天語編述兵機踵

累朝金鑰之成書代律署黃神之凱樂寫綈給
札領局然藜油素積盈汗青斯葳蕤分卷三百二
十如畫地而圖成閱時十有八年如編珠而繩
貫

軒經龍首呂策豹歿戊己屯戍之章甲戌芻菱

之誓丙子火車之算庚辰水鬪之符

先朝之所旣戡

嗣服之所耆定南軍北軍之徵調東決西決之
橫流羽林搏擊之場虎幟招降之地蚤駟所以
分合狼貙所以化生白波黑山之殊名罔象夔
羊之異種羅蒐羣牒燭照一編考之而得中原
肩髀之提綱循之而籌繡壤錯牙之控馭鑒之
而足懷螢爝焚林之戒究之而可知蟻隄防潰
之方覽之而念衝撓鋒鏑之艱難撫之而思煦

養瘡痍之有道固將折筮咎以威八表信可敷
衽席而奠兩儀宴清東海之鯨鯢震駭西傾之
烏鼠此

皇上所以運斗車而康神鼎禋社首而會爻間
者也臣等叨預樞機忝司寫定銅籤報夜親聞
咨儆於宵衣

華蓋承霄更仰

持盈於秋駕紀貞觀之政要才謝吳兢勒浯溪
之頌聲懽侔元結

春賞秋罰循元化以闕

天

河苞洛符罄愚忱而繪

日從此葉榆

畫斧譯成四字提官行看葱嶺挂弓更篲

三篇泰誓

答揚

光訓億年韜

顓頊之文戈

受此丕基萬國戴

重華之玉斗

座右箴

誠意

心發爲意善惡將萌存理則裕勿使私榮幾微
克謹僞妄不生以端厥始閑邪存誠

正心

天君泰然顧諟明命思則得之百體從令其平
如衡其明若鏡順應無方動必以正

修身

維家之則端本一人無偏無倚盡制盡倫克正
好惡不輕笑嘖助哉勿懈思永修身

齊家

家本在身齊始於修言誠行僞門內貽羞整躬
率物取法有由型仁講讓式好無尤

忠君

惟皇踐祚雨露均勻含齒戴髮同荷深仁况膺
職守搢笏垂紳寅清自矢能致其身

孝親

身體髮膚受之父母顧復深恩天高地厚何以
報之惟孝惟首奉養服勞瞠乎恐後

謹言

德功與言立三不朽白圭可磨惟言則否雖駟
難追如瓶之守試觀金人三緘其口

慎行

行成於思道在知幾作事謀始獨防其非經權
常變不逾範圍思艱圖易謹小慎微

去奢

十里錦帳五尺珊枝不能禦體不能療飢何如
返樸崇實爲宜欽哉大禹是卽我師

尙儉

紛華務去靡麗胥捐澣衣濯冠自適其天量入
爲出心志安然儉而得中止而不遷

敬賢

惟德堪欽惟善爲寶見賢思齊修學務早視如
準繩奉爲師保負屨擔簦藉資參考

遠佞

無礙辯才禦人以口屢憎於人誰職其咎巧言如簧不可與耦去之若浼掩耳而走

勤學

卓哉大禹尙惜寸陰矧茲後學茹古涵今技擅雕龍帖寫來禽學問之道求其放心

納勸

良藥苦心乃利於病忠言逆耳乃利於行從欲則危從諫則聖有唐太宗以人爲鏡

改過

在昔成湯改過不吝維今之人防維宜峻勿謂
小疵克治必迅勿謂幾微姑容當慎

擇交

以友輔仁情誼自厚比之匪人徒耽卮酒平生
之言要何能久雖無所挾交遊不苟

戒殺

飛潛動轉造物生成一飲一啄與我無爭非供
孝養非佐粢盛勿傷厥命以遂其生

放生

鳶飛戾天魚躍于淵任其所之心卽福田至聖
鈞弋網宿胥捐珠環有報千古昭然

勵志

功崇惟志業廣惟勤艱鉅自任逸豫不紛希賢
希聖惜寸惜分抗懷千古意氣凌雲

守身

作甘箴言守身爲要起居有常精神勿耗式飲
式食無偏嗜好履薄臨深斯爲至孝

重修福善禪林碑記

佛以空訓人山河大地一切空之何有於居邸
西有僧御藍乃諸天栖神清淨湮久不治爲佛
之鄰者竟陌而不恤則德恐成孤立已爰命都
料循其舊規虔爲整理非徒尙觀瞻已也並系
以偈曰有古佛刹在居之西大放光明曜我璇
題阿育王塔八萬四千一夜成造茲何擬焉將
膺多福厥維至善名以銘心禪宗重闡

重修古佛殿宇碑記

漆吏曰此身非吾有也是天地之委形也此生
非吾有也是天地之委蛻也易做者身不做者
神惟易做者弗令其做非具大智力顯大神通
者不能達摩西歸祇遺隻履神秀北住罔念三
衣以漢明帝之誠也飛行徒夢其容以唐憲宗
之感也片段空迎其骨承金臂迦葉外誰指雙
林布金沙給孤後誰躋十地茲修何福德幸許
皈依白日飛升勿謂無是肉身成聖眞稱希有
百蟲亡其門戶一鶴怖其光儀目之曰古遠邈

難稽尊之曰佛慈祥可接優乎其若有見愾然
其若有聞福佑我蒸黎恩覃我下土曇雲蒙其
芘蔭巖雨沐其醜醜億兆生民爭傳活佛昔大
檀越剏此伽藍也匠得獲精力肆塗墍之技工
稱預絕神運斧斤之奇棟宇簷楹輝煌典麗亦
云備矣迨其世異年湮金凋碧滅厯落宮鈴郎
當咽占風之韻模糊壁畫顏色涅淋雨之痕動
一方之觀感慨十笏之陵夷小集版築之役大
倡珠玉之捐再拓雞園重光鷲嶺接既往之緒

結將來之緣是知山不得師山終培塿師不得
山師只禪那何能與三大士化顯處並稱高廣
於閻浮也

自題陰隲文圖說兼示澂兒

書曰惟命不于常作善降之百祥作不善降之
百殃福善禍淫昭然不爽維今之人見善未嘗
弗爲也無如爲之不力見不善未嘗弗改也無
如改之不堅粉飾因循終歸何補予嘗於公退
之暇虔讀

文昌帝君寶訓並舊刊陰騭文圖說覺言言妙
劑字字驚心冀之曰或鼓舞之意深禁之曰毋
警戒之意切拯迷途於覺路真救世之慈航轉
苦海爲福田實濟人之寶筏雖頑夫稚子一見
了然有裨於世道人心者豈淺鮮哉惟鋟版日
久漸形漫漶因做舊本另繪其圖命澂兒敬書
其說願效其實勿博其名几杖盤盂恆觸於目
箕裘弓冶每塵於懷自能積善有餘慶天必錫
以純嘏爾其勉旃鑒茲勿怠

重輯樞垣記畧序

我

朝以武功定天下開

國之初經

特簡王大臣參贊密勿羣策羣力勲業爛然久
已載在史策雍正年間始設軍機處宣

綸綍司出納而典章益臻明備焉閩梁芷林中
丞充章京時撰樞垣記畧一書爲門七爲卷十
有六分類排纂具有條理蓋仿宋麟臺故事元

三
三
祕書監志等書之例惟其書成於道光壬午迄
今已五十餘年制度相沿因時損益

三朝除擢旣不乏人

恩遇之隆尤多異數非及時補纂何以徵文考
獻垂示來茲予仰蒙

宣宗成皇帝恩勤教誨講讀

三天於

國家掌故幸得稍窺涯涘

文宗朝命直樞廷

穆宗嗣統荷兩宮

皇太后

皇上鴻恩侍直如故十餘年來從公昕夕暇則披覽載籍凡

朝廷行政用人諸大典益得資所考鏡爰屬章京朱智等詳稽檔冊依原書體例重加修輯其訓諭

除授

恩敘規制題名詩文六門今增十二卷合原書

共爲二十八卷謹敘其事於簡端

墓誌銘

并記光緒元年十一月爲次女作

嗟乎吾初不料汝之遂居於此也方汝之卒吾固匆匆未暇爲汝謀葬事乃歲月倏忽距於今已十四年當汝之始生也爲咸豐十年二月二十三日辰時其時親郤來賀多謂汝豐頤廣顙可以享福澤而登耆艾乃汝遽於同治三年二月病竟以二十一日巳時死嗚呼人事固有未盡耶抑天事固有定數耶而汝遂長往耶汝卒

之四月而汝弟濬生閱二年而濬又死其殆汝之靈不昧而故託伊以來耶然無端而來又無端而去抑何必爲此一見再見以重傷吾之心耶其當皆歸於命耶汝弟生之一月蒙

恩封爲輔國公令將葬之於昌平州翠華山之原而畀以汝耐於其上又懼汝之無所表於後世也乃樹之碣而爲之銘俾後世以吾之故汝二人之墓胥勿樵蘇焉則汝雖死殆亦可以無憾耶銘曰汝生五載汝死千秋我銘此石天地

常留

--	--	--	--	--	--	--	--	--	--

樂道堂詩鈔目錄

賡獻集一卷

帖配懷音一卷

廣四時讀書樂詩試帖一卷

幽風詠一卷

正誼書屋試帖詩存二卷

樂道堂古近體詩二卷

春帖子詞一卷

樂道堂古近體詩續鈔一卷

1870
1871
1872
1873
1874
1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

廣
獸
集

董
恂
謹
題

W-234/07

自序

粵自卿雲相和卷阿矢音賡唱之作權輿於此
顧詩以道性情雖君歌臣答要必言之有物而
不可興可觀若第流連光景粉飾辭華如昔人
所譏月露之形風雲之狀體斯靡矣義曷取焉
余自幼年渥荷

宣宗成皇帝恩諭入學讀書時時親承

指教治經讀史之外粗習聲律迨庚戌以後
文宗顯皇帝推恩同氣

皇清集
訓迪有加

御製詩成輒蒙

特旨宣示或

命和韻以進余自維譎陋何能仰窺

天藻於萬一然每得

聖製伏讀深思竊見

寓意高深義蘊宏博雖偶然卽景之作而

勤政

愛民之心時流露於意言之表所謂言之有物

吐辭爲經洵足以世爲天下法豈止辭章之末
已哉夫珠玉在前尙慚形穢矧摹擬日月豈易
形容於此而欲勉爲賡載誠戛戛乎其難之故
當抽毫進牘之時兢兢焉惴惴焉不敢稍涉膚
廓之辭亦不敢徒作頌揚之語吾才旣竭欲罷
不能必靳合乎風人之旨而不敢於

聖人之意義稍刺謬焉詩旣進呈間蒙

嘉許而余心則不敢自信也副稟敬藏篋笥暇
時檢閱尙存若干首錄而次之非徒誌余祇肅

拜獻之忱實藉以闡揚

聖學想見當年

乾惕之心俾歷久而欽佩不忘云一二別紙類
附於後題曰賡獻集紀其實也同治初元歲次
壬戌仲秋之月恭親王謹序

廣獻集

恭親王著

恭和

御製庚戌仲秋八日

至聖先師瞻禮敬成長律二章示五弟惇郡王
六弟恭親王元韻

九拜

躬臨禮素王心傳默契見羹牆旰宵

勤政期無逸兢業

親賢永弗忘祇若庶言陳

黼座

幾餘萬卷展書牀三天講習叨

恩厚愛惜分陰敢怠遑

仰瞻

聖德邁前王奉

命欽承懷負牆自揣疎庸慚莫報常聆

訓示慎毋忘午風展卷依緇帙曉日濡毫對筆

牀

帝念篤親情至渥兢兢夙夜又何遑

恭和

御製孟冬十有七日雪元韻

大地新堆雪

皇心舊愛民欣看風舞絮不羨月如銀來復陽
春早綏豐樂事眞祥雲符

聖念寰海荷

陶鈞

恭題

御製先春寫意圖應

制

暄和祥靄護彤墀
瑤草琪花獻瑞時
繪出新韶承愛日
春光先到萬年枝

恭和

御製嘉平朔日闡福寺瞻禮元韻

瞻禮虔誠仰

聖躬嚮晨

天仗導

瓊宮欣承上界慈雲蔭永庇寰區樂歲同妙諦
參時存默默慧心悟豈在空空

萬幾兢業塵

宸念

錫福臣民

道大公

恭和

御製題宋徽宗鸚鵡圖依

高皇詩元韻二首元韻

松間禽影自蕭蕭怒目爭飛似擘椒那識宮中
圖畫日輸金歲幣甚於遼
奮翅高翔向樹頭烽煙幾度朔雲秋宣和時勢
何堪問不必褰襦笑魯侯

恭和

御製辛亥元旦敬依

皇考辛巳元旦詩韻元韻

咸豐元始紀瑞靄啟三陽時若休徵叶熙哉庶
事康年皆書大有民自說无疆

錫慶春祺普敷施

德至光

恭和

御製敬勝齋元韻

齋額承

貽訓

宸章煥至文慎修嚴宥密敬勝矢祇勤作則欽
皇極無私仰

聖君矧惟臣職勵敢不戒情紛

恭和

御製靜怡軒元韻

春光盎盎日遲遲茂對

天顏靜自怡軒外林陰含瑞靄和風徐拂兩三
枝

欣逢令節慶韶華

幾暇臨軒淑氣佳沐

澤書齋勤講習寸心自勗戒浮誇

恭題

御筆山水應

制

幾暇揮

宸翰煙嵐入畫圖
峯腰雲氣合城角
夏陰敷野渡茅亭
僻山家竹徑紆
麥秋欣有兆麗景
滿

皇都

恭和

御筆畫蘭詩元韻

素心映水自姍姍
欹側含芬滿石壇
揮翰

幾餘瞻

聖孝憑將詩什譜陔蘭

恭題

御筆山水應

制

雲樹鬱青葱山家碧靄籠

昇平無限景寫入畫圖中

奉

敕敬題王羲之快雪時晴帖

眞蹟多年

內府藏欽瞻炳燿

天章前人遺跋成緇帙臣下濡毫付錦囊神品
流傳千百載法書珍重兩三行疎庸蠶測慚

宸鑒奉

命賡歌荷

寵光

恭題

御筆雲龍畫軸應

制

雲龍變態盪層陰

幾暇揮毫愜

聖襟坎震成圖欣有象紛紜出岫本無心躍淵
文彩能昭瑞觸石氤氳欲作霖火燄輝煌光的
爍就瞻

黼陟矢丹忱

恭和

御製賦得山色湖光共一樓

得庠字五言八韻
鄉試題

元韻

湖山供眺望延爽氣颺颺黛色橫樓際澄光擁
樹梢崔嵬千尺峻波巘一通包水面皴鱗影峯
鬢認髻髻碧流窗外淨青靄坐中交嶂疊疑雲
冪瀾迴似雨敲智仁堪養性動靜互觀爻
聖德高深契襟懷自豁摩

恭題

御筆畫馬應

制

呈材神駿耀花鬣蹀躞高原氣自雄泉韻迴旋
如噴雪林陰趁趨欲嘶風權奇星駟超凡類毓
俊雲螭入畫中得路秋郊覘德力馳驅羣策仰
宸衷

恭和

御製御門聽政示在廷諸臣元韻
親臨黼辰訓諸卿濟濟駕行
聖世盈法守

舊章嚴宥密率由大典矢欽明琳琅

玉藻頌臣下宵旰

宸懷念庶氓職事願偕寮案勉承

恩弼直抒愚誠

恭和

緡製九日登延春閣述懷兼示諸弟元韻

屈指高秋佳節屆追思廿載不勝悲

萬幾揮翰承平日重九登臨

茂對時庶政惟和隆邳治羣工無曠共驅馳會

看桂嶺塵氛淨樂育均霑

雨露滋

恭和

御製養心殿對雪喜成
十月十九日
元韻

瓊霏應節塵

宸念逐日紛紛舞絮飄盈尺還占符樂歲綏豐
喜見答

熙朝寰區佳氣禎祥集粵嶺餘烽氛祲消億秭
來年同獻頌

天恩永佑慶連宵

恭和

御製闡福瞻禮至浴蘭軒理政作元韻

瞻禮

皇儀肅青蓮見佛身祥雲輝大地淑氣滿前津
覺世修長世

安民每牖民百僚承

訓諭弼直勉欽鄰

恭和

御製壬子春帖子詞元韻

木德傳佳節條風應律初

上林春色早

御柳綠將舒

仰瞻

宸極正當陽富庶生民迪吉康

聖德邁超千古世旰宵圖治

敕官方

欣承

德澤惠如春寰海嵩呼

聖世民綵燕土牛呈歲稔賡颺載筆荷
恩新

恭和

御製自題畫二首元韻

韶光先報

上林春山色蒼茫浪疊銀
明月初生銜嶺角暄
和景象最怡人

淑氣初回大地春

幾餘觸景管揮銀
千行綠柳含生意
兢業祇勤

仰

聖人

恭和

御製孟春十一日雪感

恩敬紀元韻

祈年卽日瓊霏霈寰海嵩呼沐

聖恩更喜雰雰盈尺瑞剛逢盎盎布春溫膏田
雪澤催鳩鴈近

陞朝班濟鷺鴛

帝德

天心齊默佑從知道本契淵源

奉

敕敬題陸吉安畫重華宮建福宮圖

琳琅

金殿瑞雲浮林樹葱龍綠蔭稠爍爍

重華浚寶閣巍巍

建福聳瓊樓鑪香宛轉和風蕩翠蓋交加宿靄

留

幾暇登臨邀

鑒賞韶春佳景滿

皇州

恭和

御製渡盧溝橋作恭依

皇祖詩韻元韻

嘉禾瑞麥滿芳溝

鑾輅經行

懍率由雨霽膏田欣渥澤鏡清寰海順源流敬

瞻

聖德孚中外普邇

皇仁達九洲

恩詔頻頒歡萬姓謳歌擊壤樂村頭

奉

敕敬題闕虎驪圖

神駿權奇入畫間驂騮獨步豢

天閑騰驤幸倚雲霄近鬚鬣還如錦繡斑彪炳

虎文輝

上殿雄姿龍種出塵寰

褒嘉鑒賞邀

奎藻羣策馳驅勵鷺班

恭和

御製詣齋宮作元韻

盱宵軫念民依切時雨虔祈

聖諭宣甘膏正當

雩祀日

皇仁立極治乘乾

敬展

皇穹念斐忱求言省過

聖人心廉纖嘉霽前期沛感格

天恩夙夜欽

明禋

達孝克欽承

雩祭齋莊肅豆登時若休徵先有兆萬方多福

一人膺

恭和

御製壬子孟夏

雩祭

園丘恭奉

皇考升配禮成敬述元韻

升配

園丘崇祀事八埏共覩

帝虔誠甘霖優渥邀

天眷豐稔昌期仰

聖明堵合洪流塵

軫念肅清氛
稜屢經營
逋蠲紅粟

恩綸沛

德澤均霑樂野氓

恭和

御製茗香室晚坐述悲恭依

皇祖詩韻元韻

展謁

珠邱法

舊章旰宵勤
政自如常仰瞻

聖德超千古普錫

皇仁被八荒祇遘

貽謀輝黼座

幾餘述志待斜陽最欣

鑾輅經行處瑞麥嘉禾滿路香

恭和

御製賜恭親王元韻

鑾輿臨蒞日晴明

是日

奕訢園寓

臨幸

常棣

恩周念弟兄更幸

賜詩承

渥澤勉輸愚悃頌

昇平

恭和

御製香山述志恭依

皇會祖詩韻元韻

宸念遵

家法咨詢

治紹

堯峰巒晴旭麗林麓瑞雲標侍直臣心懷謨猷
帝德昭山莊臨蒞處

勤政矢昕宵

恭和

御製策馬至靜宜園卽事元韻

警怠諄諄仰

聖明嵩呼寰海頌

昇平順時育物

君恩溥日月光華瑞靄生

高秋閱武遵

成憲兢業祇勤仰

聖心幾暇

宸遊時茂對澄觀山水發清音

恭和

御製郊行述悶元韻

鑾輅經行路向東

橋山展謁

舊章崇

溫綸屢沛沾

恩溥

宵旰祇勤仰

聖衷疆圉凱還殲楚寇長江軌順合豐工敬瞻
帝德超千古兢業

皇心格

昊穹

恭和

御製無倦齋晚坐作恭依

皇曾祖詩韻元韻

傍午

鑾輿駐玉驂遐觀煙樹接秋嵐

深恩下逮羣情洽默感昭通

聖德諳風物清涼澄遠墅山光掩映隱茅庵天
空雲淨楓林染妙境應從靜裏參

恭和

御製桃花寺行宮晚眺 九月十七日 元韻

萬壑蒼煙接浩茫林巒邈迤映斜陽團團明月

銜峰上皎皎燭龍徹夜光磊落泉聲秋氣靜蕭
森野色暮天長

幾餘茂對邀

宸賞欲待言詮辨已忘

恭和

御製薊州道中雜興元韻

羣峰結蒼秀翠影望模糊遙見秋空雁行行點
字如

野色曉初晴煙嵐近古城秋成真有象茂對愜

皇情

曛曛杲杲朝旭紫翠初開曉霞欣聽村中擊壤
同瞻日月光華

嚮晨啟

蹕六龍乘寺閣山樓取次登遙望羣峰最高頂
嵯峨鬱秀結層層

恭和

御製題關雎雅化圖元韻
宮闈端雅化風什譜麟雎

壺教編圖繪

宸章握管書雍容思儼若

內治政施於勤儉繩

家法

皇心念弼予

恭和

御製還宮紀事元韻

曉色纔分值孟冬鴛班趨侍

帝還宮時和

國泰民情洽巷舞衢歌歲事豐遙望城頭環百
雉晴看橋面架雙虹敬瞻

聖澤均遐邇共仰

昇平樂大同

恭和

御製詣齋宮作元韻

嚮晨日色迎

鑾駕報曉清風引

綵旂祀事虔誠昭

帝德萬方民瘼更勤求

致齋兢業仰

宸躬精一虛中更執沖喜聽捷音連日報楚南
從此靖兵戎

玉屑霏霏欣普被來年秀麥卜滋榮

天心定慰

皇心望鼓舞康衢答

聖情

仰覘

蹕路淨無塵黍谷陽回又迓春誌喜豐年徵肅
又寰區擊壤樂農人

恭和

御製小除夜作元韻

持盈

宸念切祗遙仰

前型

親政勤宵旰

臨軒廓視聽早朝聯鷺序

辛祀奉

龍駟

錫福春祺普

綸言炳日星

恭和

御製春帖子詞元韻

瑞雪雰雰渥和風藹藹過

皇心塵念處凱奏淨么麼

九十韶光

御苑新嵩呼寰海頌

堯仁均調玉燭休徵卜早見豐年樂有眞

東作初興勤穡事

西園

賜宴啟瓊筵南疆恬靖消

宸念

北極垂裳治體乾

恭和

御製癸丑元旦試筆成什元韻

首祚聯吟循

舊典迎韶

揮翰紀新篇年年有慶

宸心悅

聖

聖相承

祖訓傳

疇載寰區欣

德被

撫臨眾庶

主恩延南疆不日兵戎弭喜看紅旗報捷先

恭和

御製

先農壇禮成述志恭依

皇祖丙辰詩韻元韻

家法祇遵

親秉耒詣

壇修祀禮欽崇勤求民瘼

皇心念劭課農功望屢豐吉亥諏期循
舊典恪恭肅敬仰

宸衷欣聞寰宇籌車祝擊壤

天衢樂歲終

恭和

御製耕藉禾詞四首元韻

和靄霏霏風習習韶光恰值暮春初
繡塍綺陌
耰耨集萬姓歡呼計歲畲

躬耕率稼禮無更九鴈三農仰

聖情百穀豐登須力作民依

軫念勗公卿

四野聲傳鴈趣耘及時東作倍辛勤農人未報
西成慶宵旰常勞

帝念塵

融雪平疇土潤滋

天心默契

聖心慈叨

恩得與從耕列億秭倉箱喜預期

恭和

御製詣齋宮作元韻

德政頻頒拯萬姓
捷音屢奏靖民瘼
更瞻

雩祀

皇儀肅

蹕路平平日影遲

膏澤優霑慶有年
民依

軫念敬承

天虔祈甘霽
因時沛多稼
如雲萬頃連

行師勁旅喜增增步伐熊羆靡不勝

指示皆勞

神算運仰瞻

聖武共欽承

待看凱撤伍歸營風雨均調瑞靄榮於萬斯年

天佑庇

昇平歌舞樂愚氓

恭題

御筆仿顏輝李仙像圖應

制

修真煉性得成仙
隱跡終南四十年
卻笑世間名利客
無如此老絕塵緣

姓氏稱揚附呂韓
跛行鐵拐畫中看
況邀

宸翰揮圖像仙境
飄飄露筆端

恭和

御製孟夏二日

常雩禮成敬述元韻

禱雨覘龍見

勤民德意宣潔齋昭

聖敬

壇宇法

天園膏澤乘時渥嘉禾播種全

深宮承

昊貺祀事

懋朝乾

恭和

御製丙辰元旦開筆成什元韻

饒歲祥雲欣既渥飛花又見喜迎年瞻依

丙馭尊

元首兢業

辰居惕永肩

錫福無疆

宸翰賁止戈有慶捷書連綬豐已卜徵三白櫛

比壙崇頌大田

恭和

御製

皇考宣宗成皇帝聖訓實錄告成御保和殿行
禮恭紀元韻

體元順紀

帝承

天祇遙謨猷懍紹

先

寶訓輝煌延世世

皇清福祚慶綿綿

心傳續緒參三極

聖治昭垂億萬年敬仰

日新不

大烈重光炳煥

德威宣

奉

敕恭跋

御製棣華協力序寶鐔宣威序棣華寶鐔合編
識語並槍法譜刀法譜

咸豐三年歲在癸丑孟冬之初

上示臣以

御製棣華協力序寶鐔宣威序各一篇棣華寶
鐔合編識語一篇又槍法譜刀法譜各一則並
傳

旨命臣繫以跋語臣恭繹

御製序文拳拳於

賜名之意守器之不可不識仰見我

皇上孝思作則卽一物一藝無非

繼述祇邇之精心復恭繹

御製合編識語於槍法二十八勢刀法十八勢

指示周詳藝成德成一以貫之矣抑臣有宜加

勉者伏讀

御製棣華協力序曰分雖君臣情原一體惟期

交勸交做莫負

深恩今日之協力非昔日之協力也

聖意諄諄親愛與箴規兼至

臣蒙

皇上友誼之篤期望之殷迴憶曩歲槍法刀法
幸得隨

大聖人及時講肄常聆

訓言而

神武之莫能名非

臣

所得窺於萬一也頃因餘

孽未平聿彰

天討

特昇

臣

以巡防之任樞密之司

臣

末藝抱慚機

宜未悉竊恐材質魯鈍隕越貽羞無以副

聖主之迪簡惟思夙夜匪懈矢慎矢勤與諸王

大臣同心襄贊各竭股肱之力於以埽羣醜而

奏膚公期無負

先帝之

深恩而亦稍答

皇上勗

臣

協力之至意云爾謹拜手稽首恭跋

恭祝

皇上三旬萬壽頌

謹序

蓋聞華祝堯年紫極衍三多之慶箕陳禹範緣
圖膺五福之全賡保定於周詩象徵川至紀登
封於漢代瑞應嵩呼往牒周稽庶符允合天錫
純嘏有由來矣欽惟我

皇上積德稟和

重熙緝祉

量侔疇載

運啟苞符日月會而升恆嶽瀆資其貞固謙爻
三吉三利慶

聖壽於三旬乾卦六位六龍遘

昌辰於六月時則蒼靈薦瑞柔祇告祥林鍾暢
筩長羸屆候甘雨澆而

澤洽薰風煦而

化翔豹尾螭頭肅衣冠之拜舞龍言夔拊發金
石之鏗鏘揚

聖神文武之華名言莫罄合南朔東西之眾忭

祝交騰猗與允致

上儀茂矣聿開

景運溯自書齋

典學

身修昭

履信之功泊乎

皇極

綏猷

首出煥咸豐之號

紹丕基於二百載

聖以繼

聖而

宏業成

甄元化於億兆人工不言工而

大鈞運

格於上下

南郊

北郊之明禋祭以歲時

東陵

西陵之

孝享

寶訓則因循特

恩膏則蠲賑頻

篤念若乃夏姒

之詩出車六月

威張弧矢

揚天討而蜂蠆



運神謀而鯨鯢浪息貢珍納賚集萬國以來同
轉粟飛芻役百靈而受職

武功震鑠

文治離明

臨雍修太學之儀

御殿啟

經筵之講聽矢音於

九陛仰和

宸章捧

寶墨於

三霄高懸

奎藻

耽研性道爰鈔濂洛之書

綜覽詞章兼錄昭明之選覺序仰承

教化學額名增英髦咸沐

恩施進身途廣固已

裁成及於庶類觀感徧於寰瀛而

皇上盛德彌恭

淵衷益謚用能駢臻百祿增衍

億齡

慶榜宏開旣掄材於往歲

恩綸迭下更

錫福於元辰羣工則晉秩叨榮異數則崇封有
典鱗原露積緩徵沛直省之

恩犴獄風清

慎罰奉停年之

詔蕩蕩乎

如天普照蒸蒸然與物皆春臣以一本之親尤
荷

九重之眷枝分若木近

光而

愛日常依派衍天潢錫類之

恩波最渥繹

鸞綸而戴

德棣鄂偕榮錫麟趾以推

仁桐封世及以三齡之弱質忝八分之榮施是

皆仰庇

帡幪得以均霑

雨露臣感深寤寐學爲詠歌摹

天繪

日以何能窺管測蠡之是愧調三百六旬而春
添閏月占四海之長春歷萬八千歲而

壽邁古皇慶

一人之曼壽敬拜手稽首以獻頌曰

於維我

皇誕膺

天命

出震兆祥載錫之慶

沖齡就傅

功基作聖

遜志

敏修

日新月盛

其一

歲在庚戌

龍飛于天

纘

緒

承

統

鴻圖永肩迺布

新命

樹能

簡賢

三

三

皇建其極終日

乾乾

其二

維

皇敬

天

對越在上

穹壇升禋

寅承

昊貺維

皇繩

祖

肅將七鬯在

廟薦馨以天下養

其三

綱紀百度

綜理萬幾我

皇勤政

旰食

宵衣

撫循海寓

綏輯郊畿我

皇臨民

左德

右威

其四

赫赫元良桓桓猛士捷彼潢池羣醜摧靡遂及
遠人永靖奸詭凱還策勲

天顏有喜

其五

武功丕振

交教攸隆昔在癸丑

駕臨辟雍

御筵宣講道德是崇

大文炳耀多士嚮風

其六

儒林彬彬

帝心翼翼盛美弗居

幾康是敕以迓

天庥以合

天德制節謹度爲天下則

其七

迺膺

多祐迺沛

溫綸

惠薄寰海

誼先懿親行

慶施

賞與賢作人爰及赦宥咸與維新其八

相彼小民罄無不穀履義以趨戴

仁以育壤叟輟童含哺鼓腹願依

堯天以介

景福

其九

臣敬作頌拜獻我

皇南訛日永

天俾熾昌

凝神集祉

厚德迓祥受

天之祐

萬壽無疆

其十

峒
峒
懷
音

董
恂
謹
顯

自序

余於道光庚戌咸豐乙卯兩遭

大故抱慟終身欲報

深恩曷其有極年來歲時祭享屢膺

簡命

橋山叩謁

廟室申誠瞻拜之餘彌增愴慕每於致祭行禮
追憶

音容趨承難再哀鳴成什不能自己至若易水

燕雲郵程旅况歎露霜之悽愴悲風木之蕭條
轉瞬流光對青鐙而述感關心農事詠白雪以
占豐觸目縈懷都成吟境抒性據情語句工拙
殊不計及爰綜行役之作并爲一編敢云能詩
藉以誌孺慕云爾同治初元歲次壬戌孟冬之
月恭親王敬記

謁妃懷音

恭親王著

咸豐辛亥正月十四日

宣宗成皇帝初周年忌辰奉

命恭詣

慕陵行禮起程渡盧溝橋作

初春奉

命謁

松楸歲月驚逢候一周計日行鞍臨易水嚮晨

山
輕騎渡盧溝隴頭餘雪痕猶積峰角閒雲影故
留惟願河流長順軌安瀾普慶仰
神庥

房山道中

村壑起炊煙蒼茫萬壑連一鞭揚廣陌幾曲聽
寒泉旭日輝銀勒輕風送錦韉荆軻山遠望
縣有山俗呼慷慨笑當年
爲荆軻山

過拒馬河

曙色分林表迷離隱遠村泉流溪口合鳥語陌



遠村隱隱起晨炊展謁心殷覺馬遲去歲今朝承

色笑春風觸目不勝悲

轉瞬風光一歲更四圍山色近相迎年來易水經行熟何似今年倍愴情

冬至奉

命致祭

慕陵

宣宗成皇帝几筵前起程出阜成門作

嚮晨策馬出城闈，孺慕心殷易水濱。
曙色蒼茫含宿靄，雲容黯淡送行人。
聲喧臘鼓情何愴，影指春旛歲又新。
本年十二月立春敬籲天恩符

聖念祥霏續沛慰

楓宸

時值大高殿拈香祈雪

琉璃河恩惠寺小憩

日午暫停驂，天光淨蔚藍。
鐘聲塵外遠，梵唄靜中參。
積雪明瑤嶼，寒雲隱翠嵐。
冬風無限恨，翹

首望西南

壬子三月初二日

宣宗成皇帝梓宮永遠奉安

慕陵隨

扈起程良鄉道中感述

輕風裊裊送行人
節候暄和屆仲春
淡沱林陰
皴似畫
芊緜草色翠如茵
村容繚繞炊煙合
塔影嶙峋曙靄新
西望雲山
珠阜近
長途策騎倍酸辛

李家溝行營晚坐感述

躊躇行帳愴孤情
荏流光歲月更二載
銜哀傷往事終身抱
慟歎平生雲山杳杳
晴嵐冪松柏蒼蒼綠
靄橫讀罷蓼莪將夜
半時聞殘漏兩三聲

回程至易州作

永安禮葢返行鞍
一路瞻依扈御鑿
忍慟旋驂臨易水
含辛策騎度荆關
瞳矓曙色分晴靄
淡淡雲容映遠巒
只覺春風倍悽

斷斷懷音

慘涕零迴首淚汎瀾

四月十一日釋服禮成扈

蹕自

慕陵回程述哀

春仲會來謁

几筵慟逢今日

寶城前銜哀返轡悲難述迴首西瞻涕泗漣

長途漠漠景淒淒

蹕行臨易水西岩巒雲山增愴慕煙巒一路碧

峰齊

新秋感賦

颯颯金風來送暑
沈寥秋意滿郊原
蟬聲遠曳溪邊樹
雁影斜穿郭外村
物候關心催素節
光陰屈指近中元
銜哀計日

山陵謁翹首難名

鞠育恩

奉祭

命中元致慕陵

宿良鄉壽因寺

剛逢暑退又秋新

前一日處暑

斜日停驂宿壽因
繚

繞煙巒皴若畫蕭森禪室淨無塵
鑪香裊裊開仙界梵韻迢迢悟法輪
引領西瞻百餘里愁看雲樹益酸辛

琉璃河口占

雨霽山光淨新秋景倍佳帆檣林立處入望愜詩懷

顥氣澄郊野超然眼界清
沈寥天萬里旅雁一行鳴

策駿琉璃河畔雙雙驚起沙鳧
秋水長天一色

丹青妙手難摹

行盡幽溪曲徑淡煙遠冪柴門頓覺晴光開朗
依然水館山村

淡濃山色雨晴初幾片殘雲任卷舒玉宇澄清
饒野趣柳陰深處隱茅廬

山尖靄靄含輕靄林外蒼茫罨曉煙兩岸荻花
秋瑟瑟數行雁字點晴天

涿州城南藥王廟晚坐

長空秋雁逐斜陽野色蒼茫送晚涼雨洗峰巔

嵐更翠風吹柳岸葉初黃
法宮梵韻來深院古

寺鐘聲過短牆砌畔寒蛩音唧唧
行人寂寞話

僧房

五兄奉

命於七月二十五日致祭
昌陵途中相遇卽同宿此廟

涑水道中

嚮晨匝匝野雲低攬轡秋原景物淒
遠陌千疇高下映晴巒幾疊淺深齊
溟濛曉霧遮人面颯沓金風送馬蹏
涼意颼颼寒信早含悲策騎白沙隄

盧溝橋龍王廟小憩

蒼翠秋山淨澄空萬籟清峰頭雲欲散嶺角雨
初晴濟物邀

神貺安瀾衛

帝京波恬長順軌康樂頌

昇平

奉

命冬至致祭

慕陵良鄉道中成什

前期瞻禮謁花宮又向

山陵行寸衷

前一日奉

命處處

迎

春喧里

舍村村餞臘樂田翁數家茅屋寒雲外一路林
巒宿霧中惟望祥雲霑四野連番瑞兆慶年豐

易州曉行遇雪

飛雪灑寒天三冬景物妍
霧霧迷遠墅點點送行韉
玉挂千株樹銀鋪萬頃田
豐年欣有兆廣陌紀新篇

易州道中雪霽雲收朔風凜冽因憶賈幼
鄰雪晴雲散北風寒句馬上偶成四首

雪晴雲散北風寒
侵曉郵程跨錦鞍
瞻仰珠邱遙在望
含悲策馬淚汎瀾

料峭冬深歲已殘
雪晴雲散北風寒
四圍村落炊煙合
隱約山巔出翠巒

廣陌揮鞭臨易水
當年此地燕墟址
雪晴雲散北風寒
景物蕭蕭思俠士

棲鴉陣陣噪林端
蒼翠煙嵐畫裏看
展謁縈心增孺慕
雪晴雲散北風寒

曉發良鄉

山山樓
平臯曙色乍霏微數點寒鴉雜雁飛臘鼓聲聲
喧草舍晨炊處處起柴扉峰巒邈池含晴靄林
麓蒼茫映曉暉連日祥雲欣普被預占瑞麥徧
京畿

回程宿

宣仁廟作

斜日停驂

紫禁東等閒假宿梵王宮叢梅點點迎春早爆
竹聲聲餞臘終播惠順時蕃庶類

宣仁育物仰神功休徵日聖康年卜永佑波恬
慰

帝衷

癸丑正月十四日

宣宗成皇帝三周年忌辰奉

命恭詣

慕陵行禮起程宿良鄉城南宏恩寺

極日平原淑氣新禪關暫憩等閒身韶光藹藹
來芳甸梵唄空空悟筏津法炬智珠垂色相慈

波蕙水洗凡塵循環四序何其速三載銜哀慟
莫伸

易州懷古

羣山萬壑勢峻嶒觸景淒然感廢興幾處炊煙
遮遠隴連番瑞雪積前塍燕丹籌策殊堪笑荆
客圖功竟未能只有重城雲外峙浮屠露出最
高層

清明恭代致祭

慕陵行數土禮並大饗禮敬紀

逢時百五愴孤身塵世浮生夢幻眞從事肅將
儀自慄銜哀恭代慟難伸光陰倏遇清明日節
候偏驚失

怙人

展謁暫停非

聖意殷勤

布惠念蒸民

前奉

諭旨親詣

慕陵

境兵差絡繹

恐

敷

土

致

祭

禮

嗣

因

軍

務

未

竣

直

旨停止亦

聖

人

軫

念

窮

黎

因

時

布惠

萬不得已

之苦衷耳

古已夏行

中元致祭

慕陵常新店途中感懷

去歲今朝曾奉

使今年此日又西行關心節序重來速迴首鞍
塵一載更野色山容如有待風聲雲影豈無情
前途坦坦頻揮策旅雁徘徊送客程

盧溝橋口占

秋色淒清旅雁回曛曨旭日上林隈白蘋紅蓼
西風緊一路雲陰送去來

芳郊涼意自颼颼不覺重臨古渡頭漠漠平沙
三十里曉風殘月渡盧溝

丙辰正月十三日宿易州近山林卽事

展謁重申敬

十一日十四日兩祭

慕陵星輶此暫停泉

聲鳴石澗雲影罨茅亭雪擁千山白松排萬樹
青一行春雁唳悽愴不堪聽

七月初九日

孝靜康慈皇后初周年忌辰奉

命恭詣

慕東陵行禮起程感賦

愁雲浮四野黯淡眾山昏颯颯秋風起瀟瀟暮
雨繁淒涼悲忌日節序近中元欲報

如天德終銜

鞠育恩

七夕立秋

行鞍臨易水雲樹鬱葱葱涼意千巖雨秋聲半
夜風星河橫玉宇梧葉落高空四壁蟲啾唧商
音旅夢中

良鄉宏恩寺次定端親王題壁詩韻

僧房閒假宿少別已經年梵韻苔牆外鐘聲竹
院前蓮臺空色相禪室暫留連颯爽新秋夜虛
窗聽雨眠

丁巳正月十四日

宣宗成皇帝忌辰敬詣

安佑宮隨從

皇上行禮泣述

七載悲如夢恩恩序往還今朝趨

殿陛昨歲謁

橋山

去歲奉祭

使致慕陵

叩拜哀無極

音容杳莫攀

慈顏難再覩
翹首淚空漣

宿易州槐夏山房贈載鶴峯總鎮

話別纔經歲
重逢又夏初
愴懷

窀穸近揩淚
雨風餘

四月二十日

康慈皇后永遠奉安

孝靜

地宮奉命恭代行禮

清韻泉鳴澗
澄輝月入廬
古槐

濃蔭冪煮茗
擷園蔬

七月初九日

孝靜康慈皇后二周年忌辰述哀

星霜驚歲月忍慟抱烏私

仙馭升遐日兒心腸斷時涼宵風意慘秋夜雨
聲悲屈指

山陵謁潸潸淚自垂

奉
致祭

命二十五日

昌陵

雨後盧溝曉行

颼颼撲面遞金風嶽巢層巒宿靄籠拱極

城
名森

森環百雉盧溝隱隱架雙虹煙波縹緲宜晴後

山山懷古
三
雲巘參差入畫中山色水光看不足一行秋雁
倚長空

恩惠寺卽景

蕭森極目盡秋光攬轡徐行度石梁雨霽千峰
明紫翠雲橫一氣鬱青蒼深林隱約人家古寶
刹莊嚴佛殿涼百穀登場欣有慶西成早卜歲
豐穰

奉

命冬至致祭

慕陵泣述

旅館孤燈對短牀一年冬至夜偏長
哀哀奉

使頻揮淚鬱鬱思

親在斷腸抱痛終身悲愴慕空餘
四序薦馨香
無何返轡西迴首萬疊雲山認渺茫

鶴峯總鎮以詩見贈卽和元韻賦別

讀罷瑤章翰墨馨昨宵翦燭話茅亭
寒山雪霽容偏翠古柏冬深色更青
萬卷詩書該至道一窗風月養虛靈
愁聽鳴柝催行旅耿耿高天數

點星

易州道中詠懷古跡五首用杜工部韻

淒涼百戰瘡痍地
亘古英雄草莽間
風韻蕭蕭生易水
雲陰漠漠擁燕山
銅駝歷劫觀興廢
鴻雁忘情自往還
萬壑千巖環峭劣
亂峰高聳紫

荆關

黃金臺畔足傷悲
盛禮當年比事師
市駿按圖來異種
翹材挾策萃同時
卑身厚幣殷勤致
雪恥親賢夙夜思
一陷臨淄城七十
垂成功業誤

多疑

兩峰削立勢如門

易州東有山曰門山

隱約林坳見古村

落木遠巒煙黯黯孤城平野月昏昏朔風似訴
燕丹恨流水難招俠客魂千載悲歌徒感慨一
鐙青史細評論

荆客輕生辭故國就車慷慨向秦宮咸陽設險
三關上督亢全拋半幅中酒市高歌空俠士花
源避世說漁翁未能拔劍如曹劌勝負興亡一
夢同

移禍喪身何計拙田光智勇豈言高欲同楚國
稱三戶竟使秦兵虜二毛虛擲頭顱傷長者在
求七首副兒曹阿房一樣成焦土漫詡長城締
造勞

戊午七月初九日

孝靜康慈皇后三周年忌辰禁中寓直泣述
淒風苦雨助人愁蕭瑟商飈氣早秋近仰

慈闈瞻

殿陛遙悲

珠阜鬱松楸慟心隻影

音容杳彈指三年歲月周咫尺

壽康宮禁地直廬翹首淚交流

己未正月十四日

宣宗成皇帝忌辰奉

命恭詣

慕陵行禮起程宿良鄉壽因寺次定端親王題

壁詩韻

假宿禪林清淨因閒吟且作臥雲身鐘魚響動

參天籟花雨香飄洗俗塵法炬昭垂慈慧諦智
珠明徹性情真光明寶筏澄空相一善能通眾
妙津

涿州道中喜雪

餘寒料峭怯春風積雪層巒入望中萬隴堆瓊
鋪大地半天飛絮舞長空琉璃河畔開銀界涿
鹿城南駐玉驄一路歡呼多野叟西成有象兆
年豐

致祭

慕陵述哀

輜軒奉

使駐山陬斗柄迴寅歲又周此日心摧縈愴慕
幾年腸斷仰

松楸西行徒切瞻雲思東望彌增陟屺憂

謹按

慕東陵在陵之東相距不過數武

慕飲泣旋驂過易水孤鴻

嘹唳助人愁

回程宿壽因寺次瑞敏郡王題壁詩韻

挑鐙兀坐擁輕裘古刹停驂憶舊遊最喜春塍

沾雪澤麥苗幾日滿芳溝

林外參差樹不齊蒼茫雲菴遠峰低寂寥僧舍
留孤客魂夢猶馳易水西

中元奉

命致祭

慕陵起程宿壽因寺再和前韻

記會擲管坐披裘佛殿清涼許再遊

是日殘暑
立秋

水全消大地金風先到蓼花溝

多稼如雲綠整齊巖腰輕抹淡煙低蟬聲遠送

新秋到暝色霏微日漸西

題涿郡張桓侯廟

西行涿鹿謁桓侯廟宇巍峩古樹秋恍若威容
開虎帳凜然勁氣挾蛇矛壯心未泯孫曹恨故
里猶稱姓字留

地名張桓侯店

安得將軍奮雄武埽除

氛祲奠

皇州

致祭

慕陵禮成回程泣述

隆恩殿陛仰崔巍追憶

音容慟久違溫清當年歡可掬趨蹌此日淚空
揮淒風颯颯輕吹袂苦雨瀟瀟暗溼衣策騎長
途幾迴首思

親心逐嶺雲歸

同治壬戌九月朔日奉

命恭請

孝靜康慈懿昭端惠弼天撫聖成皇后神牌升
祔

太廟禮成敬紀

慈惠恩勤感露霜緬懷

聖孝溯

先皇

謹按咸豐辛酉十月初十日內閣奉
上諭朕惟我皇太后撫育深恩在位之日疊荷

康慈皇太后聖孝隆禮寰海聞知祇以
尊封仙馭升遐未申我兩宮配廟之儀暫行

奉祀於

先皇備知茲奉仁孝至誠之隱
夙侍無日不有懷明發也茲奉追惟

蓋無日不有懷明發也茲奉追惟
后聖母皇太后懿旨追惟

皇太后保護我皇考備極恩勤允宜聿
晉徽稱禮崇皇考在天之志以申沖人報

先用慰

皇考在天之志以申沖人報

古己襄旨

本之思應如何議加
學士會同六部九卿詳議具奏等因欽此
大事隆
繼述

徽音闡禮極推崇

懿德彰

報本尊

親承

撫育

顯稱祔

廟薦馨香

再謹按十月二十一日內閣奉
上諭本日大學士九卿會同議上

康慈皇太后

尊諡敬請

尊諡敬升

附 謹改擬併請加至十二字以表尊崇所擬詳慎

公允不獨於 康慈皇太后懿德洵相符

合實足以慰 皇考在天之志此天下萬

世之公論非朕一人顯揚之私亦非臣下尊親

頌美之私情也謹據所奏恭上 尊諡曰

升 附 孝靜康慈端惠極尊崇所有應行典禮

該部敬稽成例以聞仍將 尊諡恭擬加

至十二字以符舊制而表 恪恭銜

隆稱等因欽此

命申誠敬鉅典昭垂懍肅將

命申誠敬鉅典昭垂懍肅將

廣 四 時 讀 書
樂 詩 式 帖
董 慎
恂 顯

題詞

親切屏藩地中和雅頌聲詩書成日課珪組尙
儒生考律唐賢熟拈題宋什評紛斌舒錦綺洗
鍊出晶瑩秋早蟲吟壁春深鳥弄晴窗虛看竹
亞帳冷有梅橫急晷三餘惜雄才八斗傾眞如
羅列宿誰敢撼長城藻耀丹山鳳軒騰碧海鯨
句堪元白壓樂擬孔顏并異表天人仰閒情藝
事精五言會肄業低首拜問平

沈兆霖
朗亭

瑶章卅二寫烏絲歲序頻驚隙影馳繡虎不誇
曹植賦探驪勝讀秀卿詩松涼雪霽供吟興烏
語花香入妙思領悟天機眞至樂河間素與古
人期

黃倬 樹皆

南宋遺民賸短章偶耽理趣寫流光何緣誤自
華亭老石墨流傳署紫陽 嘗見石刻董思翁書
四時讀書樂詩誤以

爲朱
子作

先帝奎章萬古垂集中屢詠秀卿詩

廟御製詩
宣

有落花水面皆文章昨夜庭前葉有聲諸作

吾王樂道承

彝訓弄月吟風富不貲

朗潤園臨扇子湖四時佳景擬蓬壺傲他教授

隱居客

元時秀卿
隱居教授

會識瑯嬛福地無

本朝試律邁唐人獻縣

紀曉嵐

錢塘

吳穀人

各絕倫

不信東阿才似海小詩猶足壓詞臣

殷兆鏞

譜經

流傳佳句說翁森逐句重添雅頌音祕笈書羅
今古富瑤函道悟聖賢心分陰時惜珍逾璧五

字吟成響擲金詎止英辭誇格調名軒樂早孔
顏尋

張之萬 子青

三餘讀罷事吟哦樂道堂前樂趣多不取吳聲
增十曲空傳子夜四時歌

清詠流傳羨秀卿字梳句櫛義尤精孔顏樂處
皆心得豈僅三唐接正聲

鍾啟峒 伯平

一卷披吟樂有餘箇中滋味說經畬况瞻寶笈

天家富更讀人間未見書

句梳字櫛樣翻新想見詩懷澹絕塵漫道四時
風景好須知天上有長春

卅二驪珠顆顆圓吟來好句總如仙東平爲善
饒眞樂只恐詩情未盡傳

張桐 怡琴

帝子才華舊著聲風流千古軼間平書名詒晉
偕南韻詩格瑤華更紫瓊俊語妍章工五字明
珠仙露想雙清新篇卅二分在聲價從今長

秀卿

樂道堂開古藻香四時佳興足徜徉瓊思瑤想
經營處月眼星心翰墨場擊鉢才真爭七步截
金句早擅三唐陳思徵遍應劉筆籍湜深慚走
且僵

潘祖蔭
伯寅

聖主儲書詞臣採輯賢王讀書朋友講習四
術是崇四教斯立其樂陶陶望古遙集緬翁秀
卿宋季儒生經經緯史研都鍊京無間寒暑長

隨蟀鷓遙吟俯暢皆讀書聲當春宜讀膏雨如
沐入夏宜讀薰風動竹秋宜讀書桂花露簇冬
宜讀書梅梢陽復窮年矻矻考道孜孜隱居求
志樂此不疲傲風雅頌撰述四詩迄今讀之書
味華滋河間好書實有同德手此一編與時偕
極字櫛句梳日盈月昃如觀山海如志郡國歲
序匆匆樂在其中裒題縹碧勘筆丹紅圖史滿
架奎璧麗空贊襄

文治永永昌隆

會璧光 樞元

朗潤園開樂道 圖書萬軸燦琳瑯 四時景好

閒披卷八韻詩成特擅場 題采秀卿精考覈 翁秀

卿四時讀書樂詩 和徵枚叔富詞章吟懷豈獨

前人多誤作朱子 耽風雅撫序彌珍歲月長

張洵 肖眉

自序

宋翁森作四時讀書樂詩一年好景盡入謳吟
四序元機能參造化擬茂先之勵志敢負流光
比陶令之觀書偏求甚解古人所謂努力崇明
德隨時愛景光此詩有焉日逢冬至歲有餘閒
暖室風和晴窗雪霽一陽來復灰飛葭琯以春
生四運環周坐擁芸編而趣永用依成句各綴
新詩得五言排律三十二首亦以誌駒陰之宜
惜見蟬簡之可親云爾咸豐六年歲次丙辰仲

切江清月

冬之月樂道主人自誌

廣四時讀書樂詩試帖

恭親王著

山光照檻水繞廊

峩岉山臨水滌洄水抱山照來雕檻外繞向畫
廊間螺髻梳千疊魚鱗皴一灣雲皴青簇簇風
宕碧潺潺列嶂層欄映分流曲廡環巖腰翔鳥
舞波面浴鷗閑時覺清暉覽從教俗慮刪書齋
憑眺處樂意自相關

舞雩歸詠春風香

詠游狂者志來自舞雩歸春色延韶景風香逗
夕暉幾番吹淡蕩一路惹芳菲岸草青拖帶林
花翠拂衣影隨雲藹藹氣送霧醅醅緩步穿茅
徑長歌叩竹扉牧琴吾與契童冠若相依爲問
書齋樂如聞鼓瑟希

好鳥枝頭亦朋友

得意園林鳥鳴春一兩枝宛如良友契每聽好
音隨閑抱高柯穩斜依密葉敬相求相應沿載
止載飛宜雅叶班荆誼歌諧伐木詩送迎風習

習唱和日遲遲布穀催耕候提壺勸酌時空齋
饒樂趣逸韻到書帷

落花水面皆文章

書齋依曲沼樂趣挹春光飛落花千片飄來水
一方自然成藻采是處卽文章綠灑雲三徑紅
霏雨半塘無心工點綴得意寫芬芳活潑眞機
暢清華俗慮忘波瀾添畫本錦繡入詩囊良友
應相契枝頭好鳥翔

蹉跎莫遣韶光老

光陰偏易老幾度惜春韶莫以蹉跎誤而今歲
月消鶯花催早晚駒隙迫昕宵水面文堪賞枝
頭友欲招佳辰追往日淑景又今朝志在勤研
鍊功如致褻穠牙籤排淨几手帙映疏寮領畧
書中味披吟逸興超

人生惟有讀書好

世事貪求好蹉跎誤此身豈知尋樂境惟有讀
書人涵泳饒情趣披吟養性真聰明無外用功
利又誰因學本偕年進心將勗日新一生何所

癖萬卷獨相親猶得三餘用毋嫌百遍頻滿窗
穠綠意景欲駐韶春

讀書之樂樂何如

讀書知可樂其樂果何如勵志勤無怠程功密
莫疎趣應猜鄴架境或問陶廬自得原求我相
關孰起予對編頻想像開卷轉躊躇試驗通經
後迴思肄業初誤猶堪一適用豈忘三餘妙悟
生機暢窗前草不除

綠滿窗前草不除

春草除堪惜，生機結夙緣。
踏青尋徑外，送綠滿窗前。
潤覺經微雨，晴宜著淡煙。
疎櫺通曲折，虛牖鬪芳妍。
荇沼痕牽帶，苔階影綴錢。
不須勞翦，荆爲愛對芊。
眠色入丁簾，隙香薰午枕。
邊書齋吟詠處，樂趣口難傳。

新竹壓檐桑四圍

伴竹桑圍屋，依桑竹壓檐。
翠筠高下合，綠蔭淡濃兼。
椽角千竿拂，牆腰百本添。
秀如含雨潤，柔不怯風尖。
蔥蒨陰移檻，扶疎影透簾。
修篁搖棐

几沃葉映芸籤境靜原無俗懷澄自卻炎書齋
清晝永獨坐覺神恬

小齋幽敞明朱曦

讀書幽敞室消夏景殊佳綠帙陳高榻朱曦映
小齋芸窗晴乍晃斐几淨於指一晷陰留徑三
竿影上階碧雲隨雨散紅日與風偕竹向檐牙
聳桑依屋角排清和添畫本恬靜入詩脾長晝
剛吟罷蟬聲處處皆

晝長吟罷蟬鳴樹

樂趣宜長晝高
蟬鳴掩卷音猶
喜讀書聲嘒嘒
永遠噪綠雲平
幃下後螢火拂
夜深燼落
長晝遲遲過書
流螢然自禁宵
角影瓏玲小扇

綠蘭焰卻鐙青逸趣憑雕檻餘輝到畫屏盈囊
堪照讀曉漏響東丁

北窗高臥羲皇侶

人是羲皇侶消炎倚北窗舊書排几案高枕臥
牀杠午晷磚移八丁簾玳押雙性情留太古談
笑袞紛咙漏響遲銀箭茶香撲玉缸恥爲流輩
許盡使俗緣降曉榻開千帙宵檠對一缸風來
琴乍撫韻更譜新腔

祇因素詒讀書趣

未諗書中趣焉知樂意眞勤求惟有素宿好不
無因積久功深邃研精義引伸從教三味永豈
厭百回頻風月皆添興林泉亦會神情宜餘舊
癖緣似結前身物我兼忘候羲皇以上人北窗
高臥處靜境埽囂塵

讀書之樂樂無窮

樂有無窮樂孜孜讀我書愈愚惟學府尋味在
經畬探索神彌永研求志豈疎賞心泉石外展
卷雨風餘妙理微仍顯深懷實若虛意言皆不

盡身世兩相如幻境猜莊蝶閒情辨魯魚
瑤琴彈一曲雅韻繞吾廬

瑤琴一曲來薰風

一鼓瑤琴譜泠然契夙衷時方逢養日曲恰引
薰風挹爽延書篋諧音叶律筩炎銷朱夏候眠
向綠陰中俯仰空羣籟吹噓悟化工微涼生几
簟逸趣託絲桐理以成虧得歌應解阜同不須
牙曠賞餘韻寄飛鴻

昨夜庭前葉有聲

秋意今朝覺西風落葉天有聲來樹杪昨夜到
庭前虛閣聽尤朗匡牀臥未眠蟲吟添月下雁
唳和雲邊爽引礎鳴藁清借漏滴蓮五更寒
几一榻伴芸編逸趣應招我餘音尙邈然讀書
參物理樂處得真詮

籬豆花開蟋蟀鳴

落葉空庭際商秋景倍清豆花籬畔放蟋蟀壁
間鳴柔蔓沿畦引繁音繞檻生蕭疎添爽意啾
啾送寒聲鹿藿留三徑鴛機促五更香含朝雨

溼韻入曉風輕案右排連帙牀前對短檠書齋
勤誦讀雅趣自怡情

不覺商音滿林薄

應候商秋屆西風颯颯音幾番催落葉不覺滿
平林淅瀝三更夜蕭森一徑陰寒蟬吟遠墅征
雁唳遙岑聽向梧階久傳來竹鳴深清如偕滴
漏疎欲雜鳴礎雨後聲尤爽雲邊韻漸沈儻邀
明月上撫景好調琴

翛然萬籟涵虛清

卽日虛清境，翛然性素諳。四圍光洞澈，萬籟氣
高涵。地迴搖空翠，天澄淨蔚藍。涼風生水渚，疎
雨洗山嵐。雁唳侵晨早，蛩吟入夜酣。幽懷塵外
賞，爽靄宇中含。對景輒移八，怡情徑闢三。沈寥
秋意滿，書味好相參。

近牀賴有短檠在

莫嫌檠影短，喜近讀書牀。賴有紅釭伴，常依綠
帙旁。芸窗三味永，竹榻五更涼。吹擬然藜火，偷
嗤鑿壁光。擎來鐙一點，照徹字千行。膏焰焚蘭

桂牙籤映縹緗案惟陳蠹簡輝不借螢囊對此
功應倍從知俗慮忘

對此讀書功更倍

賴有檠相對宵光與晝同蘭釭堪照讀芸簡倍
加功影伴三更月吟殘一徑風忘疲神益聚尋
味意無窮帙展籤排碧膏焚焰吐紅賞心文字
外得趣性情中妙悟由探討真詮自貫通霜天
高處望澄景滿晴空

讀書之樂樂陶陶

樂惟書可讀樂意想陶陶玩索功宜密披吟興
倍豪祕應探壁府名莫笑倉曹邈爾心神暢超
然志趣高返觀皆自得有益又何勞臥許依欹
案歌將和執翽風聲來遠隴月色散平臯曠覽
霜天景描摹入綵毫

起弄明月霜天高

弄月何人起霜華正滿天青霄輝遠照皓魄影
高懸珠斗銀河迴瓊樓玉宇連杯邀來上界梯
取到層巔在手笑勞掬前身果有緣板橋雙屐

滑桂窟一輪圓景欲留三五光應印萬千此心
同皎潔書味得真詮

木落水盡千巖枯

水木遙無際經冬朔氣嚴寒光空萬籟枯影徧
千巖風力摩崖峻霜棱透石嵌不嫌容寂寂更
覺勢嶢嶢蕤韻林腰撒冰紋浦口銜吾懷原澹
泊此境出塵凡竹簡排烏几芸籤映翠岳小齋
猶誦讀樂意對琅函

迴然吾亦見真吾

撫景嚴冬際胸懷亦迥殊物惟能不物吾自見
眞吾雅意知超俗清標豈染污心原涵妙有境
欲課虛無地曠澄三界天空淨四隅此時形色
寂與我性情俱品是高人格身爲達士模優游
塵世外氣象許誰摹

坐對韋編鐙動壁

獨對韋編坐深宵朔氣凝書香翻綠帙壁影動
青鐙檻外霜千片窗前月半椽
蛭膏然細細蠹
簡映層層冷焰縈
鑪篆寒輝晃硯冰
一檠今夕

共三絕古人曾待旦知無倦窮年豈未能曉來
看雪景吟罷曲欄凭

高歌夜半雪壓廬

閒齋冬夜半嘯詠發高歌霏雪時無寐衣廬興
轉多倚筇猜野徑披氅向林阿刻篆香仍裊更
籌響乍過一天飛絮舞萬卷伴鐙哦拂几寒偏
耐開編凍欲呵襟懷原自得書味又如何映讀
人堪約深宵共揣摩

地鑪烹泉然活火

展帙書方讀圍鑪茗試煎然宜催活火烹合汲
新泉獸炭烘應暖蟬膏焙更研一鎗霏細焰萬
斛挹輕漣楫楸煨簾外旗槍鬪几前金沙融碧
液石鼎裊紅煙兩腋風生滿雙團月映圓此中
清意味長使洗塵緣

一清足娛讀書者

靜讀書齋裏煎茶一味清相逢皆樂趣卽此足
娛情月合雙團映風從兩腋生香猶煨石鼎韻
恰引瓶笙自與澄懷契何容俗慮縈百編隨意

覽七盃想歌成曉漏催籤遞宵檠對案明吾廬
剛雪後煮水又新烹

讀書之樂何處尋

領畧書齋味研求歲月深此中真可樂何處許
相尋枕葍該經史涵茹綜古今無從探妙諦祇
覺暢清襟佳境曾誰訪塵緣莫我侵追蹤空想
像得意但披吟自有天然趣偏如靜者心梅花
消息透春信問園林

數點梅花天地心



消息通天地寒梅已著花此心端可見數點候
無差北陸方含凍南枝早吐葩韶光憑漏洩疎
影任橫斜講易神堪悟吟詩興欲賒復亨推筮
策解坼啟萌芽草茁還看荔灰飛更驗葭書齋
春信到樂意擷芳華

跋

聞之文以載道古昔聖賢修道立教凡名教綱常之大儀文度數之蹟悉舉而筆之於書則夫書者道之府也漢董仲舒下帷績學三年不窺園圃其言正誼不謀利明道不計功粹然儒者可謂善讀書而能實有諸己者矣然則讀書所以求道而真知道之可樂者未有不樂於讀書者也 恭邸以明敏之資淵雅之學孜孜焉讀書之不倦因取翁森四時讀書樂詩句櫛而字

凡此皆言其
且
梳之以所心得者託之揚風扞雅而其胸次悠然無入不自得之概隱然見於言表且深願人之有以共味斯樂也此則樂道主人之意也夫

朱鳳標

桐軒

按宋翁森字秀卿著有一瓢集詩不多見惟四時讀書樂膾炙人口朱子嘗愛而書之後遂訛爲朱子作非也 恭邸讀書之暇句系以詩得卅二首以吟風弄月之懷寫莊史枕經之趣信乎樂在其中矣昔東平有言爲善最樂引而伸之豈獨讀書也哉

匡源鶴泉

1914

1914

昔者竟陵刻燭一寸詩成彭城數松十步句就
莫不觸辰玉映綺歲蘭清以泉瑩雪潔之才鬪
徵嚼商咀之韻縱橫萬里欬唾九天尙已然而
閉門覓句或競浮華脫帽看詩半尠真趣求其
兩風一卷松竹三椽道心水澄佳詠風發蓋亦
寡矣 樂道主人毓秀璇源孕靈天宇五經在
口六律諧心當夫風廊奏涼雪榭呈素對鳥讀
畫呼魚聽琴月睡煙醒花中酒半流連古籍陶
冶今情選秀卿詩爲三十二題比淮南集逾二

十一卷落葉設譜深柳讀書東平副言爲善最
樂河間得句大雅不羣諾重騏驎溢美於江夏
響軼鴛鶴比重於建安有能從我遊乎尋教授
四時之樂不圖至於斯也仿退之萬本之鈔

許彭壽

仁山

面

風

詠

董
恂
讓
顯

題詞

一句系一篇如布帛菽粟直補邠雅歛可作註
疏讀

道契三千餘載詩成八十五章吟罷鑿冰流火
恍覩袞衣繡裳

松雪老人曾進畫前明宣德亦題詩憐渠未覩
昇平景輸與河間絕妙詞

朱鳳標
桐軒

漫將月露撰良辰一卷笙詩溯古幽胸次五三

羅載籍篇中四十聚賢人時光鷓蟀分陰惜風
物瓜壺設色新寫出艱難王業意鴻文端合進

楓宸

建安才不數陳思卓爾河間今見之四韻能兼

風雅頌三長欲綜畫書詩

王詩序有攸作圖之意句系以詩之語

卒章同効觥觥祝

詩末題為萬壽無疆

新什宜悲玉籥歛

想見園林方朗潤自研仙露寫烏絲

沈兆霖

朗亭

大哉周元公精神洽井里幽風七月詩瓊屑及

婦子民依代爲謀一一具條理隱然睢麟意淪
浹到肌髓我

朝重農功

家法垂萬紀稼穡知艱難教自天潢始三復讀
斯編藹然見深旨如行邠岐間親覩風俗美章
解復句疏因端遂竟委八十有五篇組織工無
比河間經紛綸陳思文華綺兼得古人長於此
歎觀止

匡源鶴泉

楚元受詩浮邱伯名與申公傳在昔陳思才敏
高七步能踵風騷之遺跡偉哉 帝子負天才
詞章訓詁兩兼該

三天肄學識畎畝一卷幽風吟百回宋賢釋地
紀栢邑稼穡遺謨追有邵我

朝重農著

家法圖置

殿陛流風洽斯詠新成金石重一握靈珠光出
匣涼燠環周四序移星火西流霜降威彩筆紛

傳蜩鴟候清辭細寫瓜壺微曩者祈年與祭蜡
擊鼓歛幽祥可迓曷弗譜此八十五樂章上爲
我

皇獻

壽昌下爲蒼生萬姓歌樂歲之餘慶

黃倬樹皆

聖相八章詩 賢王句詠之間平多著述姬孔
接心期能寫艱難業遠追雅頌辭笑他趙承旨
翰墨重元時

列聖塵耕織

西清舊有圖茲編

家法在更倩畫工摹

時王方命人繪幽風圖

好綴茅檐景

將陳

黼座隅會教兵甲洗買犢慰霑塗

殷兆鏞

譜經

耕織艱難

念下民勸農善俗

詔頻頻

賢王日勵

三天學雅什風猶七月陳直爲篇章參傳註如
將寒暑歷岐邠行看圖繪呈

丹陛

奎藻標題列上珍

孔思周情樂道殷吟來民物更欣欣雕搜眞覺
丹青遜組織都成錦繡文開帙班香兼宋豔揮
毫柳骨與顏筋合當譜作昇平樂雅頌同銘翰
壘勲

張之萬
子青

一卷風詩溯有邠更從古意出新裁編珠綴玉
成高唱此是河間大雅才

勻裁繭紙界烏絲寫出琳瑯絕妙詞稼穡艱難
如在目不須圖擬馬和之

鍾啟峴 伯平

薰香摘豔寫瓜壺 帝子才華絕世無記得曾
攜青鏤管

詔書命補十洲圖

彭壽丙辰八月奉 敕補
書七月八章於明仇英幽風

圖冊

聯珠一串鬪詩牌親界烏絲寫折釵自是河間
真大雅漫誇詒晉舊名齋

許彭壽 仁山

周家農事朔開基井里桑麻細不遺會得風人
言有旨更尋章句譜新詩

詩成一字一珠璣清課

三天彩筆揮想見東平爲善日先知稼穡念民
依

張桐 怡琴

由來耕織

先朝重一幅幽風置座隅總爲艱難闕稼穡更
將景物寫瓜壺紛紛鄭孔勞箋疏碌碌閻吳但
畫圖詎識賢王深意在苦心琢句試描摹
自攜翠墨寫烏絲珠琲三千絕妙詞馬速枚工
何足擬班香宋豔遠相期扇湖秋水澄懷抱琴
館薰風憶阜熙我欲雲藍書萬本手舐口沫退
之詩

潘祖蔭 伯寅

析得幽風句長城列五言農桑描樹藝鷓蟀話
寒暄極寫艱難業遙追陟降原願將朝夕誦退
補稼名軒

耕織惟求舊重翻七月篇幽圖參畫本毛傳補
詩箋恍入胥原地如逢介福年東平空樂善孰
與奏艱鮮

曾璧光

樞元

逸藻陳思曠代無春鷓秋蟀供描摹分明一幅
詩中畫不數當年右相圖

欲憑稼穡寫民艱得句都將綺語刪雅樂河間
如進

御定知補入

座屏間

張洵
肖眉

自序

昔周公陳先公之風化明王業之創垂作七月
八章夫子敘詩以冠豳風田蠶之事衣食之謀
一篇之中三致意焉後世因詩繪圖莫著於閭
立本趙孟頫論者謂生於周處於豳古風宛然
必如是而後爲圖畫也我

朝愛民敦俗首重農桑耕織有圖棉花有圖
列聖奎藻昭垂炳煥萬古

皇上修四推之禮軫一夫之饑貴粟劭農所其

無逸綏萬邦而屢豐年猗歟盛矣書齋肄誦舊
業愛七月之詩意詳語質因倣昔人作圖之意
句系以詩務使田家風景如對丹青其隸事或
間及後代語亦聊比畫家烘托也至句經重見
則不復作再三之詠以避繁複總得五言律八
十五章迎寒逆暑愧無雅頌之才學圃明農冀
寫艱難之狀云爾咸豐七年歲次丁巳仲秋之
月樂道主人自誌

幽風詠

恭親王著

七月流火

首冠幽風冊篇名七月留中星看夕改大火紀
西流象欲分熒惑時剛戒葶收占辰矇誦切三
復重迎秋

九月授衣

歲序逢秋九循時正授衣風聲傳冷信霜氣肅
嚴威錦粲西人服蛩催嬾婦機禦寒知有備挾

續慰民依

一之日霽發

一陽開子月凜冽颯寒飈鳥跡千崖絕山容萬
木凋半天陰漠漠空谷響颼颼暖閣頻呵筆梅
花試畫描

二之日栗烈

冷氣天心釀星回序又殘瘦觀山骨露愁想客
衣單栗烈風如箭霏雪作團團鑪烹茗茗深
夜共消寒

無衣無褐

寒早清風戒章身豈日無不如衣且吉莫笑褐
之夫願匪求文繡人誰弗曳婁年華眞荏苒在
筭盍先圖

何以卒歲

一寒今至此急景待如何裋褐完猶未綈袍贈
孰過星霜催歲盡風雪逼人多禦臘裁縫備元
辰聽笑歌

三之日于耜

禹甸南東畝家家正務農其耘先勸課于耜莫
疎慵凍解池心活風柔地脈鬆殷勤修錢鎛俶
載待相從

四之日舉趾

鱗塍臺笠聚杏雨溼春衫荷鍤嘉苗殖揮鋤蔓
草芟分秧羣秉耒播種共攜鏡驅犢歸來晚村
村笑語喃

同我婦子

話到田園事勤劬婦子同百年中饋職五尺應

門童椎髻尸饔慣蓬頭執爨工炊煙村舍早饁
餉走匆匆

饁彼南畝

有噲看其饁相偕畝指南糞鹽包箬葉黍肉具
筠籃笑語加餐勸芳鮮下箸堪荷鋤歸帶月晚
飯飽餘甘

田峻至喜

國本民天重三時穡事勤野氓相矻矻田峻亦
欣欣誌喜含哺頌應憐曝背耘爾耕頻勸慰保

介共嘗芹

春日載陽

布令陽和早熙熙澹蕩辰曈曨光旭日天下氣
皆春修禊蘭亭渚流觴曲水濱浴沂欣載詠人
在綠楊津

有鳴倉庚

豔陽春色好黃鳥語琅琅求友辭幽谷遷喬下
建章一聲嘒睨睨千樹鬪芬芳織柳悠揚韻分
明巧奏簧

女執懿筐

鳴鳩纔拂羽村女懿筐擔千縷遲抽繭三眠正
養蠶閨中邀伴侶陌上執箒籃婦事從茲始桑
麻樂且耽

遵彼微行

周行原共示微步亦堪遵隴畔餘陳迹牆陰約
比鄰避人來蘚徑覓路認花茵戴勝還先引桑
疇指點頻

爰求柔桑

春遊非拾翠，不向桑林持筥頻。
相問摳衣試再尋，柔條初夾道。
嫩葉不成陰，曲徑新晴後。苔痕印屐深。

春日遲遲

清晝韶光永，陰晴正及時。
彩融春盎盎，紅暖日遲遲。
蓮漏籤徐轉，花磚影緩移。
和風蘇萬類，蠶事恰相宜。

采蘩祁祁

多少春閨女，叢蘩共采來。
祁祁宜沼沚，細細辨

蒿萊馬首初眠未
牛毛綴簇纒盈襜
藍綠好歸路踏青回

女心傷悲

陡覺縈愁緒傷哉淑女心有懷
常脈脈不語自惜惜歲月婚姻迫
庭闈眷戀深諸姑偕伯姊幾度勸
蘭襟

殆及公子同歸

公子應歡喜高堂盼嗣徽
傾筐今迨吉宜室卜于歸
豈識開粧鏡方嗔理嫁衣
盈門迎百兩含

卷之三
一
淚尚依依

八月萑葦

萑葦沙汀滿清華八月天蘆洲寒舞絮葭岸輓
披棉織事蠶功畢秋聲雁侶傳刈來成曲薄收
蓄待明年

蠶月條桑

月令當春序蠶忙汜未休條桑供採摘羣女競
筐鉤翠葉和煙重青枝帶露柔行行相黽勉憐
爾似薪樵

取彼斧斨

閒閒來柘館擣取器惟良直合揮神斧休教詠
缺斨干絲和雨折一翦任風颺曾斫吳剛桂雲
斤孰較長

以伐遠揚

婉孌看桑者鋤盃手自操條揚垂蔭滿枝遠出
牆高風裏揜衣袂煙中歇翦刀伐檀同坎坎長
日敢辭勞

猗彼女桑

迎眸濃綠意十畝女桑叢猗彼柔條綴惟時細
雨濛苑然枝嫋嫋沃若蓋童童嫩葉爭相掇攜
歸翠滿籠

七月鳴鴉

七月初秋候深宵聽鴉聲烏官司伯趙蠶室號
催明隴首陰晴喚枝頭架格鳴驚人修婦職姑
惡又誰名

八月載績

雪繭投薪圃蠶家課績嚴繰車聲軋軋素手影

織織有事勤機杼何遑理鏡匱玉梭抽萬縷百
室織新練

載元載黃

累絲成匹素染練曬桑村元袞方乘坎黃裳吉
協坤色分天地正典數禘嘗尊祭服光華煥文
章黼黻論

我朱孔陽

衣朱陽氣煥尙赤協離明瑞草香薰豔流霞綺
散晴紫難濃處奪碧豈看時成辨色繻緞讓光

晶杼柚盈

爲公子裳

黃裏無憂矣。緇衣又改爲天孫雲錦織。公子謁
裘宜赤紱。輝鳴佩丹綃。豔色絲敬供尊者服。補
袞喻傾葵。

四月秀萋

物感微陰長。生機種辨萋。朝華舒秀讓。遠志託
根超零露。分蔬圃輕風。引藥苗清和。天氣好采
采。認牆腰。

五月鳴蜩

律協蕤賓候新蜩嘒嘒鳴吟風雙翼弱飲露一身輕斷續聲纔送悠揚韻更清煙條初過雨噪處綠雲平

八月其穫

其耕嘉種降載穫大田多素月中秋影黃雲徧野歌腰鎌朝露溼肩擔夕陽過更祝篝車滿登場視早禾

十月隕穽

冬孟繁霜隕空山木盡零冷風來曲徑落葉滿
荒亭淅瀝驚寒早飄蕭攪夢醒後彫松柏在長
此色青青

一之日于貉

從獵田功暇嚴霜出遠郊長林馳玉勒淺草下
青骹鹿窖藏巖曲糴蹊覓路坳蒙茸誇搏獸歸
徑認鞭梢

取彼狐狸

百獸郊原逐俄看九尾馳取之從獮狩率彼獻

狐狸持火身難避聽冰性獨疑獲三田獵壯豈
止射羣麋

爲公子裘

毛深溫厚適公子得輕裘五絨縫皮合千金集
腋謀裼衣兼取稱良冶儻相求挾纊霑恩久愚
忱切獻酬

二之日其同

冬狩乘農隙輶車詠旣攻三驅君命駕兆庶爾
從公細柳觀兵地長楊校獵宮何如升大阜修

禮與民同

載績武功

肆武非勤武功成福孔皆績承弧矢利銘泐鼎
鐘借紹緒殊游豫從田想畏懷觀文經緯合干
羽舞于階

言私其縱

郊畋爭取獸回獵獲縱誇納上應封豕言私止
小豸三單咸虎膺壹發貫狼牙貴賤分明判充
庖豈敢奢

獻豸于公

共識君公貴田夫豕納豸曝芹偕野獻貍特異
庭懸苗者供三歲還兮進兩肩圓文登俎味膳
宰快烹鮮

五月斯螽動股

仲夏占蒙養斯螽綠野跳身輕常趯趯股動聽
嚶嚶細草鋪三徑微蟲化幾朝蝓蛄徵爾雅低
韻伴深宵

六月莎雞振羽

能飛鳴以翼氣候驗莎雞飲啄依苔徑扶搖近
竹谿蓬蒿難共伏時桀可曾栖窗外談誰答炎
銷畫檻西

七月在野

暑闌秋意到感物暢生機沃野增清曠寒蛩驗
細微山風梧葉落溪雨豆花肥啾唧聽深夜灑
灑湛露霏

八月在宇

寒蟲知節候音更激錚挺倏爾身依宇淒其韻

隔窗

颯氣

寂寂

秋深

客擁

冬初

閉藏

日

遷笑爾忙

穹窒熏鼠

穹窒搜饑鼠熏牆火氣蒸跳梁防齧橐穿穴厭
窺鐙夜動潛蹤祕宵藏詭伎憎欲投還忌器有
齒又何能

塞向瑾戶

向陽冬日好北戶漫迎風密密防應亟塗塗附
亦工燕泥銜恰似蟲窟蟄還同待到荆扉啟春
疇又課功

嗟我婦了

君相猶吁咈

啞啞婦歎非

苦念田家

曰爲改

斗柄將寅指

恫瘝歲待驅

得幾朝閒

入此室

轉瞬嚴威逼荒村屋可居消寒樽載酒佐食菜
嘗蔬未許風來室何憂雪壓廬豐年娛野老安
樂有誰如

六月食鬱及蓂

鬱莫原同類時哉品物咸紅鮮紛耀圃朱實熟
垂巖郁李防螭食含桃記鳥銜芳滋盈口腹莫
笑老農饒

七月烹葵及菘

村舍炊煙起新蔬富野庖折葵來老圃采菘到

秋郊柔蔓盈筐筥芳莖
淡勝嘉穀

八月剝棗

秋中新棗熟朱實綴離離
以時上林呼曼倩溟海日
筐手自持

十月穫稻

趣穫農田亟黃堆稻滿畦
扶犁擔壓霜華重鎌揮日

腹樂羣黎

爲此春酒

收得珠千斛憑將麴蘖糟大田登晚稻甘醴釀
春醪巧製還因杜怡情漫學陶歲時供伏臘歡
飲醉醕醕

以介眉壽

但願親長壽非矜介福詞一樽開笑口百歲祝
龐眉翁媪偕扶杖兒童亦洗卮白豪黃耆驗娛
老太平時

七月食瓜

新秋登絳實祛暑剖甘瓜玉液清肌骨瓊漿沁
齒牙種傳冰谷勝味擬蜜房嘉吉語初生祝絲
絲願未賒

八月斷壺

豆架瓜棚外秋風咏斷壺折腰除蔓葛拗頸笑
胡盧浮水休猜瓠沈雲儻類菰祇應烝鴨似珍
味飽山廚

九月叔苴

結子邱中有高秋共叔苴藝麻回首憶拾芥俯
身如粒粒團盈矧纍纍掇滿裾莫教牙慧誚一
樣美堪茹

采茶薪樗

野蔬同采采負荷析薪諳茶自霜前拚樗從月
下擔周原飴堇美吳客爨桐談莫謂斯材散還
譏集蓼甘

食我農夫

嘉種乘時降蒼穹食我農厥田因地利乃粒亦

天鍾歲稔休徵協人和稻事供生生皆大德率
土樂熙雍

九月築場圃

町疇深秋築田家晝夜忙揮鋤除舊圃荷笠打
新場耕種時無逸綢繆刻不遑待看平若砥多
稼聚茨梁

十月納禾稼

堆場高廩富禾稼納千疇萬億金穰頌倉箱玉
粒收寒汀來旅雁平野放耕牛耒板聲聲樂西

成慶有秋

黍稷重穆

萬寶登成告謹呼大有年黍與兼稷翼穆後勝
重先簠簋馨香備秬秠早晚聯餘糧棲畝滿沃
產說良田

禾麻菽麥

刈禾先割麥穫菽更漚麻誰及三農富欣看百
穀嘉克歧紛口食能辨讓田家一飽酬勤動饗
飧努力加

嗟我農夫

嗟彼躬耕者勤劬是永圖開田宜望杏播種更
瞻蒲汗雨揮阡陌炎陽曝髮膚營營當匪懈敦
本重農夫

我稼既同

大熟其陳取咸誇我稼同秉遺兼穗滯櫛比更
墉崇報賽三登告迎神八蜡通謳歌欣樂利擊
壤慶綏豐

上入執宮功

新穀升場後耕夫稽事終力田完爾賦執役治
于宮巢窟其風古經營不日攻庀材乘歲晚司
匠勸鳩工

晝爾于茅

于田營爾宅短晝莫輕拋構廈非資木攜鏡共
拔茅三重青嶂路九脊白雲郊歸擔招樵叟登
堂頌竹苞

宵爾索綯

攜得茅龍返寒宵課索綯影資篝火焰聲和紡

車縲短綆綢繆續長繩宛轉操一般桑土意龜
手敢言勞

亟其乘屋

編就菁茅薄於時屋亟乘避寒餘臘日結舍近
田塍温煖酬辛苦晨昏愜寢興來年春信早耕
作又相仍

其始播百穀

和風蘇土脈木德又回春南陌稽田始東菑播
穀勻四鄰相汲汲千耦共昉昉良耜勤耕耨休



過小卯晨

二之日鑿冰沖沖

鑿井分餘力乘時試伐冰波心移塊磊澤腹破
堅凝響雜鳴榔急光浮碎玉澄人聲邪許助寒
氣逼凌兢

三之日納于凌陰

凌人穿竇窖陰井納銀漿凍未東風解冰先北
陸藏玲瓏山似聳皎晶玉成方彷彿光明界休
誇一鑑塘

四之日其蚤

命官冰鑑具紀候夾鍾調卜爾蠲其蚤欽哉覲
以朝晨星明曉闕旭日麗晴霄夙夜先申儆雞
籌戒百寮

獻羔祭韭

月令開冰日年年祭典循柔毛羔獻潔豐本韭
嘗新鮮脯牲牢薦芳蔬俎豆陳陰陽時序順寢
廟展明禋

九月肅霜

露結爲霜候秋深氣肅嚴蘆花縈渚畔楓葉染
山尖小院蛩聲咽平橋屐齒黏曉來鋪玉淨皜
皜日光暹

十月滌場

冬初田事畢人更滌場論擁篲兒童學揚箕笑
語喧拚除新屐印灑埽舊苔痕小座還隨意茅
檐共負暄

朋酒斯饗

禮始鄉人飲言觀某在新作朋三壽共用饗兩

尊宜主伯分賓介餅鬯視鼎彝初筵開秩秩野
老亦修儀

日殺羔羊

觀蜡來三事牽羊戒爾曹登筵同舉爵佐飲尙
魚羔特殺加羹獻宜言用少牢委蛇還表節孔
武稱鸞刀

躋彼公堂

豈曰非公至升堂賦樂兮訟庭仍草滿親舍共
雲躋拾級瞻庠序重檐雜耄倪門階丹漆煥舉

步目先迷

稱彼兕觥

齒位惟其正冬來大飲烝劭農魚旒夢誓眾兕
觥稱酌彼揚而語觥然奏爾能屬民無撻罰善
治日蒸蒸日上

萬壽無疆

帝功天不息聖壽地無疆萬歲呼嵩嶽三階麗
角亢垓垓鼇紀拓億秭鶴籌量久照升恆協同
瞻日月光

跋

恭邸取豳風七月之篇句爲之詩詩各四韻旣成以示余余受而讀之旣卒業喟然歎曰周公聖人成王周之令主而當時所陳戒於君者皆野人婦子之言蓋人主深居九重使其精神念慮之間嘗在於民則放僻邪恣之萌無自而生而天下事無不可爲矣 恭邸日課一詩詞翰之美無以復加然吾以謂此數十篇者其用心爲尤不可及也

孫衣言 琴西

往者右相揮豪丹青馳譽王孫作繪煙墨爭飛
狀井里之古風寫田蠶之盛務靡弗導源姬水
觀象元公零雨東山雖圖兼乎錡斧夕陽幽館
實意注乎耕桑蓋因矇眊遺篇宣其景物用取
菑畲生計貌厥辛勤握管者旣思浹周原展卷
者宛神遊邵室也然而筆妙王維徒詡有詩之
畫箋羅鄭氏僅成無韻之文不有新吟何伸古
意揣稱侔色厥有俟焉 樂道主人逸才高世
異稟得天優游典籍之場休息篇章之圃每際

煎茶鬪險刻燭競長翰動若飛紙落成采有彥
昇之筆而詩壓休文有相如之工而速兼枚叔
雖昔陳思見稱於七步淮南取貴於食時無以
過也清暇

三天之課挖揚七月之篇雅正頌容效南宮之
三復露垂泉涌擬工部之五言調高而鷓蟀都
諧句秀而瓜壺亦韻宛宛閭閻之語委曲能詳
勤勤主伯之謀艱難如覩綠滕朱紱偏軫乎絲
麻列榭崇軒儼周乎場圃遂使一十五國風詩


之殿蔚成八十五章雲錦之華問誰吮墨研朱
擅斯麗則彌覺拂縑裂素邈此清新德儀親見
吟謳備觀著作口誦而百回不厭手胝而萬本
爭鈔比沛獻占易之詞用光翰牘願東平中興
之頌同譜籥章對鷓而辭快識臨淄賦筆如驂
之靳更齊詒晉書名

李德儀小磨

正
謨
書
屏
式

帖
詩
序

董
董
顯
惻



自序

正誼書屋者道光丙申

宣宗成皇帝御書所賜額也余於丁酉就傅而先於丙申叨蒙

慈訓夫正者是也守一以正也誼者理也人之所宜也先儒有言曰正其誼不謀其利明其道不計其功蒙養之初正誼爲要夫子云詩一言以蔽而指趣必歸於正而已矣爲詩者亦必先正其誼而已矣偶檢曩時窗課得試帖詩藁若

千首分爲二卷名曰正誼書屋試帖詩存咸豐
丙辰恭紀百韻一篇弁於卷首一體例也是編
也非敢粉飾詞章謬付剗劂以存之也蓋因此
以誌

賜額訓迪之深恩敬銘心版永矢弗諼冀可稍
酬

高厚於萬壽云爾同治六年歲次丁卯小春朔
日恭親王敬誌

咸豐丙辰十一月朔

宣宗成皇帝實錄聖訓告成

皇帝御保和殿受

書奉

命前引護視尊藏

乾清宮禮成敬紀五言百韻

景運丕基鞏

洪謨邁帝唐紹

先欽

聖主

佑後仰

宣皇赫赫

宏猷著巍巍

寶籙藏

八朝

衷協揆卅載

政提綱

建極符天健

歡 暉 迎 璇 膳 侍 耀 覆 持

慕永露還霜

曰孝立人極也 聖

齟齒勤惟誦

仔肩勛就將

慎修軌至道

養正肇

元良

曰學崇正宗也 聖

布闔醞沾雨含生渥酌漿

登三臻顯饗

撫五懷幾康

曰治宣教化也 聖

齋室凝精白

深宮格

昊蒼

雩壇

親步禱誠祝揭

宸章

日天疑

敬

寶命也

監

憲陪都莅

吟詩

祖誥彰貞釐皆

矩矱

繼述見

羹牆

日祖紹

法

鴻模也

率土

同文闡寰瀛

雅化昌

國書殷改試

恩榜覩頻張

日教

闡欽明也

文

箭殪初圍鹿星流迅翦狼

神鎗殲教匪

祕策靖回疆

日功除邪慝也武

廣業懷維惕

思艱刻不遑

緝熙歌大武

待旦媿成湯

日政建皇極也勤饑溺

求其瘼綏來

視若傷

鴻慈眞保赤

鳳詔徧騰黃日民敷仁政也愛

錫類欣惇睦

酬庸更篤慶本源縣

玉牒支派衍銀潢日族固本支也睦六計昭

澄敘羣僚悚激揚貪風懲簠簋循吏達圭璋日

察吏飭官常也

選士搽楨幹

掄賢任杜房

鑑衡懸九陛鴛鴦肅千行人日昭濬哲也用樸儉

崇逾切瑰奇

御未嘗貢鮮停越嶠採璞罷氏羌

日儉敦樸質也崇壤

賦舟車挽園錢出入量薄徵輸稅課查欠

剔官賊

日財慎明德也

理珥筆爭敷奏

從繩賴贊襄石看投水

受善

喜樹旌颺

日言廣益思也求

廬問同民隱輕徭

軫歲荒

寬和涵蔀屋

愷惻喻村莊日下達民情也恤豨獄

仁覃溥雞竿省赦常鞫研周雀鼠

明允恤桁楊日刑弼政教也慎牙爪嫻雲陣熊羆厚月

糧甲披叨

例賞戍役

念邊防日兵罷征戍也恤冬賑蒙

膏飫春祺沛

德洋逋會蠲火旱供只斂金穰日賑廩恫瘝也蠲

封號隆關廟裡儀

拜素王璧琮柔嶽瀆蘋藻薦馨香

日 崇祀 典嚴祈報也

告誠廉兼法

栽培棟與梁寅恭期左右

申勸效劬勩

日 工敘官方也 訓臣

指授攻騎射膚公紀斧斨勵兵咸虎奮簡伍亦龍

驥

日 勵將 士修戎政也 或世除邪慝

垂箴遏獫狁澁陬歸並育軌物範胥匡

日 嚴法紀定

也 民閑 定志尊卑辨緣情品制詳科條參損

益貴賤限冠裳日正制仗節功宜

泐

褒忠

詔立坊

綸音餘悼惜襲次表芬芳日節日振綱常也褒忠舊輔

嘉勞作前勳

眷對敷青珉銘帶礪

紫閣繪珩璜日舊懋延賞也篤勳南畝遙扶耒西

園各具筐

擴圖資粟帛

敦俗務農桑

日桑育羣生也重農

渾噩偕遵轍驕奢

戒濫觴黜華

頒敕諭尚質首膠庠

日俗端治化也厚風

內使闈應守

中涓竈懼煬紊干嚴宦豎僭侈斥貂璫

日

飭宦寺肅官廷也

伏莽譏奸宄耕田去莠稂廓

清開

泰寓撻伐秉

乾剛

日充安良善也靖奸

蠻服瞻

顏幸雄藩引領望語言通譯寄琛賚輳梯航日

綏藩服廣懷徠也

絕塞消瑕覺重臺戢寇攘牧游

安部落市易靜帆檣

日

疆固封土也

輯邊

太僕

閑分廐凌河草滿塘馳驅多駮駟肥膺共

牛羊

日

政達報章也

飭牧

礮械威掀震艨艟浪

破狂線沙巡遠島銅海穩飛艍

日

海防綏邊

也 檄 椿 誌

諮詢屢隄工砌築忙波恬桃泛汎岸闊葦堪杭

日

述平成也

河道

穀麥覘雙穗杭和集萬箱

班精恆發廩聚米久盈倉

曰儲

裕積聚也

倉轉漕籌江

浙牽船積稻梁銜連經堰濟瀦洩借睢漳

曰漕

運嚴正供也

淮楚新興販滇黔昔免商

睿裁虞淡食軍饟裕鹽場

曰法

普美利也

鹽貔旅能耨

種鱗塍解插秧耘耔攜子婦種稔熟甘涼

曰屯

墾寓兵農也

冊目紛璀璨

單心獨勉夔

配

郊辭享獻

三言言是言言不
又
一
附

廟謝朏薌

遺器陳都卻

豐碑讓弗當

緘朱留

異命

揮翰溢

謙光鼓舞孚林總
垓埏暢沿翔漸摩
包庶彙淪浹

徹遐方

珍笈祇編貝

瑤函敬飾緇

一人膺纘緒列卷炳琳琅

邳理時於變

聰聽治孔陽

式型行是

訓迓祉壽而臧

典鉅森杓斗材軫媿桷宗管窺驚浩蕩蠡測駭滄

茫錦帙齋宗族

籍門闔闔閭曙曦呈紉縵執事恪趨踰

嗣統延

麻祐

貽謀降福祥詠賡忱莫罄

鼎祚億年長

正誼書屋試帖詩存卷一

恭親王著

供菊 得枝字

一室延清供花逢賞菊時不須重九會相
對兩三枝蕊向疎籬擷莖從老圃移冷香
生几席佳色到簾帷座上陰如拂窗前影
半敲幽姿邀月伴晚節耐風吹釀許借觴
進囊還製枕宜好將詩品論典雅結心期

探梅 得探字

不知梅放處消息許頻探占信開應早尋
芳興覺酣人將詢七七徑欲步三三索笑
情無限衝寒候自諳一枝猜竹鳴數點訪
花龕雪後園常涉霜中蕊半含詩豪方寄
詠驛使好停驂

御苑春先到栽培

聖澤覃

纔有梅花便不同

得花字

猶是當窗月梅開興倍賒不同前夜景爲

有幾株花破蕊偏禁冷橫枝半欲斜一輪
明屋角數點燦檐牙更覺澄輝朗會無宿
靄遮添來香淡遠照處影交加映戶霜含
萼迎階雪綴葩未須攀庾嶺此夕最清華
岸容待臘將舒柳

得舒字

亞歲陽回後生機柳漸舒岸容看處處臘
信待徐徐澤腹痕仍沍隄頭影尙疎吹葭
灰動候喧社鼓鳴初月令嘉平近春光漏
洩如寒催三九過暖透二分餘萱色猶侵

徑芸香更繞廬來年韶景早新綠拂清渠
潘芝軒相國八十壽辰

帝陛明良慶臣工福祿綏引年尊上輔

錫祉荷

恩施弼亮羣僚式謨猷庶績熙三台名望重百
揆贊襄思玉律迎韶候瓊筵介壽時

溫綸頌

寵賚祥竿迓蕃釐演範康彊卜歌詩戩穀宜椒
觴方獻歲長此頌春祺

以鳥鳴春得鳴字

幾度韶光滿翔禽應候鳴於時春盎盎到
處鳥嚶嚶似愛暄妍景偏多睨睨情好音
偕下上芳信報陰晴語弄雙飛燕歌酣百
轉鶯提壺方勸酌布穀欲呼名宛轉隨風
韻悠揚間雨聲廣颺依

帝陸鴛鴦頌

昇平

農及雪澤得農字

積雪春消釋田功用課農及時借有事于
耜競相從沃野天膏渥芳塍地脈鬆一犁
晨旭暖干耦晚煙濃鱗隰含新潤鴻泥認
舊蹤爾耕隨亞旅其畝任衡縱東作勤耘
耜西成頌櫛墉豐年昭

聖瑞寰海樂熙雍

春草碧色

得春字

別緒生南浦關心草已春數叢痕似染一
碧色初勻翦許輕風試酥含細雨頻遙看

空翠地時有踏青人
匝野紫新帶緣隄展
軟茵影疑垂柳蔭
斑共古苔皴
霹靡侵幽徑
芊綿到遠津

御園嘉卉茂培植沐

恩均

春山半是雲

得雲字

指點春山狀空濛
半是雲千重
排遠岫萬疊散
清雰景覺陰晴幻
峯難向背分
浮嵐仍淡冶
觸石自氤氲
平抹煙綃影
橫拖霧

五言古詩卷之十一
一
穀紋巖腰被淺黛谷口吐輕雲曉色添朝
靄斜暉障夕曛甘霖知應候誌喜望同殷
麥田春雨 得時字

應候甘霖沛中田麥秀時恰宜春盎盎喜
得雨祁祁徧灑酥痕滑輕搖浪影敲千疇
平似蠶幾陣細如絲雉雊依前隴鳩鳴隔
遠陂期原符十日瑞早獻雙歧霰霖天膏
渥來牟地利貽迎秋農有慶仰答

一人思

圓荷浮小葉 得圓字

池面荷初放
勻鋪小葉圓
點溪看錯落
貼水自澄鮮
碎影千般活
輕陰一色連
未能擎翠蓋
已似疊青錢
薄霧方塘裏
微風曲沼前
人猶遲采采
歌許唱田田
好共新萍泛
還如弱荇牽
納涼應有待
吟賞少塵緣

山深四月始聞鶯 得鶯字

幾番春信度
陌上早聞鶯
此處深山隔
於時四月鳴
遠看峯疊疊
遲待鳥嚶嚶
已入

正言詩集卷之四
恢台律纔聽曉
曉聲巖腰風乍送
谷口雨
新晴繚繞重巒
峙悠揚百轉清
曉花期竟
晚織柳韻猶輕

禁苑應先到歌隨喜起賡

麥天晨氣潤

得晨字

麥氣浮芳甸天光正嚮晨
擢芒千頃秀含
潤一畦新曉靄涼如水
朝曦淨少塵清和
初入夏淡沱欲留春
浪皺因風岩歧分著
雨頻溼陰空翠合曙色
蔚藍勻餅餌香來

隴箒車慶比鄰豐年欽

帝德樂育荷

陶甄

麥浪 得豐字

一碧輕搖浪遙看麥隴中擢芒方幪幪抽
穗自芄芄波折干疇似瀾翻萬頃同田無
區上下流欲導西東雉影依前陌鱗紋宕
遠空漲添應待雨湍激或因風涼靄雲陰
護晴光日色烘雙歧欣獻瑞擊壤樂年豐

蟬始鳴

得鳴字

律中蕤賓候新蟬紀始鳴枝高棲處穩葉
密噪來清柳外濃陰合槐前宿靄平半窗
晨雨送兩翼午風生雲樹深重際煙條第
一聲啾啾音未遠嘒嘒韻猶輕語引雙飛
燕歌偕百轉鶯

上林嘉蔭好雅調叶韶龔

依舊青山綠樹多

得多字

極目江天曉舟行雨乍過山光青是舊樹

色綠偏多萬疊含蒼靄千章蔭碧柯煙條
添蓊鬱雲岫自嵯峨遠黛重巒積濃陰一
幅拖闌仍排嶺畔帷欲結林阿谷口谿環
竹巖腰徑挂蘿欣逢新霽後清景動吟哦
雨息雲猶漬

得猶字

甘澍時方息溟濛景倍幽雨餘仍淡泊雲
漬更夷猶浙瀝聽初罷氤氳意故留四圍
還冪冪一色尙油油如霧遮峯角和煙映
陌頭滴階知已歇觸石未曾收宿靄青於

王言重言不
染濃陰碧欲浮呈祥歌糺縵佳氣滿

皇州

初日芙蓉

得詩字

最愛芙蓉好佳評喻謝詩時剛升曉日華
欲映朝曦出水塵難染銷炎暑不知紅衣
添淨潔朱燼岩丰姿杲杲光徐上亭亭影
半敲一輪輝曲沼萬柄繞方池雕飾原無
事清新孰若斯天然非藻繪應許勝延之

竹深留客處

得留字

一林森碧竹客爲此君留處處看逾好深
深景倍幽境開三徑遠友勝七賢遊瀟灑
清陰展交加綠影稠主人何待問佳士自
相酬四座風如引千竿雨乍收生寒忘溽
暑延爽似新秋雅趣涼宜納蓮塘泛小舟
梧桐一葉落得桐字
節候新秋到先來百尺桐幾番收溽暑一
葉落晴空消息蟬聲外蕭疎雁影中占辰
如有約紀序恰相同珪樣誰會翦金商信

已通寒催三徑露涼透五更風知閨稱奇
異成雲悟化工

堯階奠獻瑞祥靄答

宸衷

一聲蟬送早秋來

得來字

節候秋光早鳴蟬已送來銷炎三伏退延
爽一聲催溽暑將收盡涼廳欲動纔時聽
音斷續遙望影徘徊吸露高依柳吟風穩
抱槐清陰生樹杪寒信到林隈振羽枝堪

借含商律又回更看賓雁侶結陣喜追陪

月中桂

得香字

桂樹生蟾窟高含皓魄光扶疎依月影
翫散天香花氣涵空際林陰護上方
枝如皴遠碧蕊亦綴輕黃託植非凡種
敷榮異眾芳瓊柯披霧縠金粟襲霓裳
皎潔冰輪朗婆娑玉宇涼仙根留萬古
修不借吳剛蟋蟀俟秋吟

得賢字

蟋蟀猶知節摛詞溯子淵藏形經夏久流

韻到秋圓消息疎籬畔光陰曲檻邊似諳
催織候爲待已涼天弱羽多時振清商得
氣先爽迎三伏後冷徹五更前幻質渾如
蝶寒聲欲和蟬賡歌逢

聖世雅奏集羣賢

紅樹青山無限詩

得陽字

詩思知無限登高逸興長疎紅皴樹色遠
碧挹山光村墅初經雨林巒已帶霜丹楓
看赭赭翠靄又蒼蒼澄景佳辰攬高懷好

句償停車頻想象躡屐且相羊
催豈煩銅鉢投應滿錦囊
此中參畫意妙手繪重陽
人淡如菊

得人字

妙喻推詩品悠然抒性真
宛如閒對菊偏覺淡宜人
疎影聯同契幽香結夙因
伴應三徑得賞向九秋
頻舊雨懷彭澤高風問
楚濱斑將偕竹立佩欲
共蘭紉冷豔原超俗清
姿自遠塵尙知崇典雅
摘藻侍

楓宸

雪後園林繞半樹 得梅字

雪意初晴後尋芳半樹梅園中香陣陣林
際色皚皚冷豔含風發清姿伴月開數枝
如有約六出暗相催寄興宜東閣裁詩憶
北臺澄輝添皎潔疎影共徘徊幾度衝寒
放何人索笑來春光先漏洩欣占百花魁

瑞雪兆豐年 得豐字

時雪借稱瑞康年誌喜同雙歧欣有兆六
出已占豐舞絮縈前陌飛花颺半空祥霽

培地脈渥澤仰天工宜穀徵三白餘糧話
二紅膏舍田上下稼卜畝南東墉櫛歌村
曳箒車祝野翁農家喧臘鼓歲稔答

宸衷

水泉動 得陽字

天一原生水微泉動一陽深深機暗引隱
隱氣潛藏玩象占蒙養乘時屆履長源頭
回暖意澤腹散寒光石竇膏含乳雲根玉
滉漿端倪迎子律消息轉壬方瑄共葭灰

測衡宜土炭量

液池春信早甘醴獻嘉祥

農乃登麥

得豐字

百穀先登麥農夫慶屢豐千疇看幪幪四
野正芄芄喜聽來牟頌香聞餅餌風雨歧
田遠近連理畝南東入夏場應築迎秋稼
已同薦魚時食進嘗彘禮文隆瑞早徵三
白歡宜飽二紅鑿耕忘

帝力樂育答

宸衷

五月榴花照眼明

得紅字

滿眼花光照榴開五月中柔條舒葉綠新
萼亞枝紅實未丹砂結華原火齊同朱英
輝一色絳燄豁雙瞳絢采搖層檻迎眸宕
遠叢痕添朝日映影趁晚霞烘濃似塗脂
染鮮應奪錦工

御園嘉植茂祥靄普晴空

陰陰夏木轉黃鸝

得聲字

夏木陰濃處黃鸝下上鳴千章看合沓百
轉聽分明斷續音彌遠悠揚韻自輕枝頭
含雨潤樹杪喚風生森鬱青柯密交加綠
蔭平巢來三徑古響入一林清遙隔扶疎
影時聞睨皖聲爲儀依

上苑喜起願同賡

雨過一蟬噪

得秋字

嘒嘒涼蟬噪剛逢雨乍收幾番消溽暑一
味覺新秋匝匝陰仍布悠揚韻故留吟風

依樹杪吸露抱枯
外流晴光含潤清
送林塘宿靄浮沈
青山郭外斜得畫
郭外山環繞山光
翠滿郊坰遙隔重
深淺黛送到短長
乍經雙峰排似闌
徑清暉入竹肩

御園延爽氣萬笏侍

天廷

學古有獲

得修字

說命詳言學人宜古訓求多聞觀治理有
獲益身修圖受羲開畫書陳禹演疇典謨
垂帝德誥誓著玉猷先正思儀式成章凜
率由宅心毋少怠牆面豈貽羞

主極隆軒頊臣才愧呂周不知勤夙業何以獻

嘉謀

涼風至 得秋字

應候金風至新涼報早秋輕颺何處起溽
暑及時收幾陣來松徑連番過竹樓披襟
添颯爽入座覺颼颼宿雨前宵歇微雲一
片浮天光偏寂淨人意更夷猶蟬韻林端
噪蛩音檻外流書齋吟賞際佳景倍清幽

民和年豐 得時字

民樂承平日年書大有時和親覘厚俗豐
稔迓蕃釐盎盎甄陶徧穰穰黍稌宜春臺

欣得庇秋稼頌如芙蓉象鄉循禮占魚牧
說詩惠風情與暢瑞雪兆先知觴豆興仁
義籌車獻祝辭潔粢何待告康阜

聖恩施

惟有新秋一味涼

得招字

何物延嘉客新秋暑乍銷早涼如有約一
味好相招爽意生虛榭清陰透曲寮風宜
揮塵送月想舉杯邀撫景心懷暢傾談興
趣饒鳥聲來舊侶蟲語伴深宵村墅看平

遠林巒望沈寥不須珍饌具此境絕塵囂

建官惟賢

得人字

立政官宜建推賢務得人旁求惟俊又弼
直在臣鄰熙績功其代分猷臬汝陳一心
同啟沃九德自忱恂日贊期予治風愆傲
乃身庸庸功以試采采事攸詢羞行泯偏

黨敷言黜巧嚚百僚欽

帝簡夙夜矢清寅

竹外一枝斜更好

得梅字

無竹花堪賞清姿自愛梅况於千个外更
好一枝開疎宕依深徑橫斜傍曲隈偏宜
修榦映時有暗香來敲側原超俗孤高不
受埃坐應佳士在問向主人猜索笑連番
約衝寒幾度催

上林欣得地長荷

帝恩培

不知細葉誰裁出

得風字

柳隴舒新葉韶光二月中不知垂拂處誰

試翦裁功熨貼痕俱化暄妍樣弗同擘來
青綰結劃到碧玲瓏弱線縈千縷遊絲裊
半空生機占物候巧手問天工惟有遲遲
日頻經習習風

上林嘉植茂庶彙仰

幘幘

雨後有人耕綠野

得春字

甘雨自依旬優霑麥隴春服耕來沃野舉
趾勉農人溼霧輕猶瀆流雲細欲斲一犁

村外拂干耦陌頭勻霰霏分疆渥膏腴尺
澤均載芟歌澤澤其畝喜昫昫慶合嘉禾
誌催聞布穀頻倉箱占歲稔樂育答

楓宸

吉人辭寡

得言字

辭亦因人異羞同躁者論吉哉彰有德寡
矣訥於言輯懌訏謨遠光暉善行敦志雖
文以足口豈費而煩所養頤占慎其旋履
叶元品原歌藹藹語自告溫溫圭玷磨何

及金緘矢弗諉敷陳知體要惠迪荷

天恩

麥隴青青三月時

得田字

綺陌春三月青青秀色連隴陰看合沓麥
氣自蕃鮮含潤浮芳甸抽芒徧遠阡畦開
空翠地浪映蔚藍天雨過添新靄風來罨
曉煙鳩聲千樹外雉影一村前餅餌催同
里麩麩慶大田迎秋先有兆長此頌康年

樓觀滄海日

得濤字

古寺雄觀壯登樓興倍豪海流澄玉宇日
影射銀濤鵬擊胸如盪烏駿勢欲翔滄瀛
千頃漾紅旭一輪高巨浪凌羣島晴暉散
遠臯扶桑搖瀕洞祇樹映周遭萬象疑噓
蜃重欄似駕鼇

宸衷金鏡握漸被

聖恩叨

五月鳴蜩 得高字

應候蜩鳴夏悠揚韻自高一林聽斷續千

樹蔭周遭弱翼棲枝穩輕身抱葉牢音如
穿竹徑響欲和松濤雅調來深隴殘吟曳
遠臯雨過猶淅淅風送共颺颺鳩影村前
巷蛙聲水半篙

御園欣得庇萬物

帝恩叨

千章夏木清

得陰字

夏木葱龍際千章茂綠陰炎光銷遠隴清
靄滿平林蓊鬱新枝拂交加古榦森喬柯

三徑密濃蔭四圍深紫燕搖輕翼黃鸝囀
好音雲容常冪冪日影轉沈沈自覺涼偏
早從教暑不侵披襟延爽氣拈韻試閒吟
高樹早涼歸

得秋字

頓覺涼生早森森樹蔭稠歸來先得氣高
處已迎秋匝地濃陰滿參天古榦留扶疎
三徑外蕭颯五更頭爽籟風徐引喬柯雨
乍收階前梧葉落庭畔桂香浮蟬噪聲如
曳蛩吟韻欲流省中方寓直佳句好相酬

冷露無聲溼桂花

得秋字

零露無聲浥澄鮮八月秋冷含花氣淨溼
浸桂陰稠寂寂三更爽灑灑一徑幽不聞
清響滴祇覺暗香浮金粟涼如許瓊漿曉
未收音誰傳鶴警叢自任人留對景閒憑
檻裁詩正倚樓中庭吟賞處風信更颼颼

九月寒砧催木葉

得砧字

木葉時將脫催聽處處砧關心惟晚節入
耳又寒音清切來前巷悠揚送遠林霜華

千杵冷風擗九秋深韻共棲鴉散聲隨唳
雁沈亭臯容慘淡乃尺氣蕭森擣素詞誰
續題紅句試吟明年芳信早轉瞬綠成陰
月照冰池

得清字

池面冰方結天心月正明乍看光四照倍
覺境雙清圓暈如輪抱方塘似鑑平玉壺
凝一片珠斗湛三更皎潔煙痕斂寥空夜
色晴澄輝涵上下皓彩射縱橫風信前汀
送霜華遠浦生就瞻欽

主極智燭徧寰瀛

冬至陽生春又來

得來字

黃鐘方應律長至一陽回冬令時仍屆春
光信又來土圭量遠景葭琯動飛灰斡轉
三辰運端倪半子開化工如漏洩元氣肇
根芡亞歲祥同迓條風候暗催綠將舒弱
柳紅欲放新梅瑞雪連番降綏豐

聖澤培

九九消寒圖

得消字

爻占日進遷乎善風歌導以廉納言官命
汝蔽志事詢僉

宸念持盈切沖和共仰瞻

百穀用成

得豐字

演範休徵叶登成紀歲功六符祥啟泰百
穀慶占豐種不遺糜芑名應辨稊種滋培
因地利長養荷天工報嗇三農祀巡方八
蜡通趣收循月令平秩驗宵中時若和甘
兆熙哉福祿同年年書大有康阜沐

恩隆

好雨知時節

得甘字

休徵占歲稔好雨喜流甘應候連番沛知
時幾陣酣恰依旬內外徧潤畝東南水面
添新漲山腰洗晚嵐期原符日十望已慰
農三酥灑天街細膏滋地脈含雲膚如有
約月額許相參優渥豐年慶欣承

聖澤覃

綠樹陰濃夏日長

得清字

銷夏山亭樹千章綠鬻生長偏宜日永濃
更覺陰清茂蔭牆腰羃喬柯屋角橫轉教
涼送午頓使伏忘庚度晷遲留影眠琴爽
挹情庭槐祛暑氣院柳遞秋聲宿雨澄芳
沼微風入畫楹吟哦依

御苑培植荷

恩榮

槐夏午陰清

得涼字

幾樹垂清蔭槐庭夏日長偏宜陰入晝頓

覺午生涼溼翠重帷結濃青
一蓋張潤如
含雨氣爽欲挹風光惟有喬柯拂渾教溽
暑忘水添高閣淨花帶小闌香薄靄留晨
旭斜暉送夕陽

上林培植茂瞻就效賡颺

淺深山色晚晴時

得佳字

傍晚看山色新晴覺更佳
深青皴似染淺碧淨於揩
斜日明孤嶂歸雲下斷崖
高低張畫本遠近入詩牌
霽景層層幻嵐光處

處皆淡煙捎柳帶濃黛壓松釵簾外屏如
列窗前闥並排

御園添爽氣茂對愜

宸懷

秋日懸清光

得澄字

羲馭躔西陸清輝杲杲升光含秋色淨懸
徹日華澄皓旭迎晨陽斜曛送晚暎映山
屏疊翠照水鏡開菱祇覺晴暄晃全無溽
暑蒸沈寥涵一氣朗豁幻千層爽引金風

度涼添玉露凝舒長遊

聖世萬寶慶豐登

故種芭蕉待雨來

得蕉字

爲待空階雨殷勤故種蕉窗前培細細簾
外想瀟瀟生意環雕檻清陰透綺寮手栽
來幾度膚合問崇朝雲幕旗猶卓風迴扇
欲搖話應遲燭翦韻許聽珠跳學字人相
契催詩客共邀更宜摩詰畫圖入雪中描

一枝梅影正當窗

得窗字

雅愛寒梅放尋芳倚畫杠一枝纔吐萼孤
影正當窗綽約移珠箔玲瓏映玉釭貞心
誰與伍冷豔本無雙疎宕霜能耐清寒雪
肯降出牆橫竹鳴臨水引花幢驛使驂應
駐詩豪筆可扛來年韶景早千樹鬧春江
石韞玉而山輝

得明字

巖石中藏玉山間瑞色明騰輝看崩劣含
韞毓瓊瑛有耀形難祕無瑕質自瑩千巒
晴靄合萬疊暖煙生靈秀丹崖聳清華翠

五言古詩卷一
三十一
三十四
岫橫神應完太璞產不讓層城隱隱虹光
吐璘璘寶氣呈安敦欽

聖德端拱運璣衡

水懷珠而川媚

得光字

淼淼平川闊誰知至寶藏媚如添水態懷
早印珠光源合璇紋折波看練影長四圍
含秀潤百琲吐精芒彩閣重淵底輝生兩
岸傍澄清縈曲渚玓瓌映方塘不借星躔
朗還疑月色涼士衡傳妙喻摛藻譬文章

重簾不捲留香久

得簾字

高齋香久爇明暖下重簾不許湘紋捲因
留篆影纖味延金鼎裊痕鎖玉鉤尖垂有
雙旌亞薰宜百和兼鑪煙防漏洩玳押護
深巖竟日蝦鬚鎮無風鳳腦添氤氳迴錦
罈醜鬪駐牙籤雅趣祛塵俗攤書養性恬

古硯微凹聚墨多

得凹字

雅愛端溪品研磨未肯拋墨多光久聚硯
古質微凹蒼玉誇龍璧烏金重鹿膠奩開

香似海瀋漬影成泡筆豔添清賞松滋憶
故交半規懷孔石盈缶筮義爻新樣何年
製奇書盡日鈔虛中宜染翰務觀句頻敲
遊鱗萃靈沼

得靈字

休徵

昌運協嘉應效龍靈碧沼涵清景金鱗見瑞形
頁圖遊

太液被彩萃中冷變化重淵閱之而幾歲經
雲從興澍雨風舉待春霆燦爛星輝渚光

明月印汀百祥呈

帝陛多士集

天廷正叔傳佳喻
摛詞祝

聖齡

大學之道 得之字

大道端由學精微
一貫之日新勤砥礪
風教重維持平治基
於此脩齊念在茲正
心常慎獨誠意戒毋
欺化育三才統經綸
百世師工夫須次第
指趣細研思玉振金
聲

德升堂入室資高堅參義蘊景仰緬宣尼

天命之謂性

得天字

述聖承心法尼山道統傳精純之謂性肅
穆命於天變化誠明矣中和位育焉自卑
還自邇無易更無偏抑抑威儀式存存德
行堅知仁參動靜飛躍察魚鳶克己從乎
善虛衷做乃愆慎修思體要涵養諦真詮
坐看雲起時

得看字

閱步尋幽勝清溪隔繇漫逢時雲乍起乘

興坐來看四面奇峰聳千重
攀絮攢因風迷嶺角伴月出
林端縹緲凌空際踟躕喜
縱觀霞裳皴遠岫霧縠擁層巒
細擬羅新織寒疑雪作團
輞川詩有畫卽景且盤桓
一瓶秋水玉簪香

得香字

膽瓶供雅玩秋水浸秋芳
花本簪惟肖姿如玉有香一
鬢標素質數朵逗寒光
金縷稱精舍瓊英束淡妝
清華憑點綴霜雪識行藏
守口心常靜搔頭影亦涼
幽芬偏蘊

蓄巧製恰纖長風月爲神魄瑤池是故鄉
喬木自成林 得林字

自有喬柯茂終南寄嘯吟交加多灌木翦
鬱喜成林雨露滋培久槎枒歲月深拂雲
青冪冪匝野碧沈沈詎待從繩直無容縱
斧尋參天原本性拔地抱貞心竹箭千竿
矗松釵百尺森何如依

上苑

芑蔭得清陰

八月洞庭秋

得秋字

有客洞庭遊平湖八月秋神怡雲夢澤心
曠岳陽樓玉宇涼如許金風爽倍適水天
同一色氣象豁雙眸湘浦空青瀉君山遠
翠浮朗吟閒伴鶴載酒欲盟鷗漱灩煙波
淨澄清宿雨收瞻依

蓬島近佳景滿

皇州

煙消日出見漁村

得漁字

言言集卷之四
三
羃歷煙消後
曛曩日出初
前村觀霽景
遠岸見秋漁
霧縠收青嶂
鞞紋漾碧渠
荆扉茅徑外
紅蓼白蘋疎
幾曲鳧鷗渚
新開水竹居
浪花清且泚
帆影卷還舒
顛氣凌空際
晴光滿太虛
黃樓欣眺望
覽勝記南徐

秋穫


得豐字

布令西成屆
康年喜告豐
有秋占歲稔
其穫詔農功
未雨場先築
如雲稼旣同
趣收方命鳳
紀候正賓鴻
恻恻謳歌裏
穰穰笑

語中耒聲鄰左右鑿影畝南東牧兆徵魚
夢民情樂蜡通厥田因地利乃粒仰天工
銓艾喧村舍倉箱祝野翁修和遊

舜日饗獻繪幽風高廩稱墉籥嘉禾話稔種三
登長誌慶忭舞答

宸衷



正
寔
書
屏
式

帖
詩
存

董
董
顯
恂

正誼書屋試帖詩存卷二

恭親王著

夏雲多奇峯

得峯字

忽訝雄奇狀參差
矗遠峯勢因雲乍合陰
入夏偏濃崛起排千仞
飛來疊萬重卷舒
何有意削劣若相逢
自以氤氳態都成峯
律容及時霖雨徧
霑渥慰三農

蟬噪林逾靜

得林字

嘒嘒涼蟬噪悠揚
正滿林新聲欣入聽
靜

言言不
卷二
境覺逾深幽遠濃陰合清虛眾籟沈不嫌
三徑寂遙曳一枝吟吸露流餘韻迴風送
好音山間鳴鳥和相對滌塵襟

樹杪百重泉

得泉字

山中逢雨後快瀉百重泉遠勢峯頭挂奔
流樹杪懸濺珠聲不斷曳練影相連濤擬
松崖近溪如竹隴穿浪花飛雪磴瀑布落
雲巔雅興棲巖挹詩應訪輞川

荷喧雨到時

得荷字

延爽池邊聽喧來萬柄荷香宜風遠送聲
是雨初過雜沓偕菱唱清冷閒櫂歌低搖
花有韻圓宕水生渦含潤紅衣淨流音翠
蓋多納涼依

御苑優渥沐

恩波

漁歌入浦深

得深字

沿浦漁舟唱悠揚幾處尋連檣歌乍起一
曲聽逾深別渚流餘韻前溪送遠音卽須

雙岸渺欵乃數聲沈移棹偕風信歸帆待
月陰輞川詩有畫吟詠滌塵襟

荷淨納涼時

得涼字

延爽宜何處荷開正滿塘似因花氣淨時
引水波涼萬柄紅蕖放層陰翠蓋張滴來
清露潤送到晚風香未許纖塵染能教溽
暑忘更看蓮沼外修竹又蒼蒼

山水有清音

得清字

何須絲竹盛盈耳覺音清邈爾山顛起冷

然水面生空中聞谷應漱處是泉鳴林麓
饒風韻溪流作雨聲樵歌層嶂遠漁唱一
帆晴雅好推仁智高深契性情

竹露滴清響

得清字

露滴亭前竹涼宵響最清千竿含液潤萬
个送音輕疎落添風韻廉纖誤雨聲敲來
如玉戛點處擬珠擊湛湛澄輝散猗猗爽
氣生更宜明月上皎潔夜三更

雲深不知處

得深字

只此山中去高蹤想易尋卻疑青嶂隔爲
入白雲深暝影迷前路煙痕隱遠林遙看
陰冪歷莫問徑崎崿樹暗遮層岫巒迴又
幾岑扶筇空悵望夕靄欲沈沈

山色有無中

得山字

疑無疑有際楚塞萬重山縹緲晴暉遠微
茫黛色環層層離合處隱隱淺深間影忽
排青闥光仍掩翠鬢偶窺眞面目旋失舊
孱顏悟得詩中畫塵襟自此刪

荷露漸成珠 得珠字

銀塘荷萬柄甘液喜沾濡
漸覺灑灑露都成顆顆珠
高原雲表降圓與夜光俱
錯落離仍合空明有若無
招涼珍可擬入掌象何殊
如醴嘉祥告含和

帝澤敷

殘暑蟬催盡 得涼字

寒蟬催節候爽氣到林塘
幾度收殘暑連朝引早涼
炎歊辭夏景蕭颯逐秋光
逸韻

蘆汀外疎音蓼岸傍清含風陣陣冷咽露
灑灑消息誰同覺排空雁數行

新秋雁帶來

得秋字

知時來雁侶消息帶新秋珠露光初浥金
風韻欲流數行斜影過一味早涼留結陣
寒先覺傳書信屢投遠音猜蓼岸爽意到
蘆洲更聽蟬聲噪催將暑盡收

爽氣澄蘭沼

得澄字

秋生池畔早爽氣卻炎蒸擷秀蘭方發臨

流沼自澄數叢風韻宕一色露華凝快想
披襟得紉宜作佩會香涵波灩灩涼暈碧
層層更喜林間桂尋芳曲檻憑

秋風動桂林

得林字

颼颼秋信到幾陣動芳林仙桂叢叢放清
風颯颯臨有聲枝夏玉作態粟搖金蕭瑟
含虛籟扶疎宕碎陰涼生三徑早馨入一
山深種欲分蟾窟澄輝愜素襟

秋色老梧桐

得桐字

幾度深秋色登樓望處同寒如生橘柚老
亦覺梧桐慘淡喬柯外蕭森落葉中疎零
三徑雨冷怯一林風絮引蘆汀白花餘蓼
岸紅來年春信早新綠又叢叢

秋菊有佳色

得佳字

尋芳秋景暮移菊向庭階老圃容雖淡幽
叢色更佳一籬疎雨歇三徑晚風借冷豔
寒能耐清姿淨似搯花黃分桂粟枝翠奪
松釵真意詢彭澤悠然契夙懷

霜葉紅於二月花

得紅字

麗景非花放楓林別樣紅飽經霜幾度濃
染葉干叢宛入桃源裏疑來杏隴中晚宜
斜日照曉趁早霞烘秋色看逾勝春華豔
莫同停車相賞處轉瞬又東風

猶有黃花晚節香

得黃字

園中花事盡籬菊綻輕黃莫厭秋容淡猶
餘晚節香重陽還許就三徑肯教荒擢秀
含佳色敷榮殿眾芳開時會冒雨殘景且

凌霜更喜延年種堪供益壽觴

冬嶺秀孤松

得青字

山中千萬樹冬日漸彫零惟有松含翠猶
依嶺送青孤標凌雪勁秀色任霜經側尙
橫釵影圓仍偃蓋形空巖今落落老榦自
亭亭願共升恆頌延年祝

聖齡

山高月小

得游字

寫出初冬景重尋赤壁游羣山高入畫一

月小於秋翠岫寒逾聳晶輪靜更幽嵯峨
孤嶺秀皎潔片雲收絕壁懸千尺清輝照
九州東坡拈賦筆遠眺豁雙眸

養花天氣半晴陰

得天字

尋芳春晝永天正養花天晴覺微暄布陰
看薄靄連日光斜徑外雲影曲欄邊嫩碧
香如暈酣紅色更妍化工多醞釀生意倍
纏綿暘雨徵時若嘉禾慶有年

榆青綴古錢

得榆字

生意如錢綴新青吐莢榆枝頭會化蝶林
際宛飛蛺錯落輸千疊勻圓貫五銖鑄宜
風試翦穿誤雨跳珠小樣苔痕共連文苻
影俱春光差可買萬卉更森敷

耕織圖

得圖字

耕織民依切樓君繪作圖詩篇憑綴屬畫
筆細鉤摹露潤扶犁便風和煮繭俱農桑
資勸課衣食賴勤劬播種耰耨戒縲絲黼
黻需

聖朝敦本業寰海樂康衢

渭北春天樹

得春字

懷友詩吟杜情深渭北春天光三月暮樹
色萬家新鬱鬱雲柯布層層雨葉勻漢陂
青靄合灞岸碧痕斂橋畔陰遮路城頭影
浥塵謫仙遊賞處誰與話芳辰

當軒知槿茂

得榮字

軒前嘉植茂木槿正敷榮候應天中節芳
留日及名紅葩含雨潤翠葉宕風輕光欲

移文砌華宜擷舜英牆腰陰遠羃椹齒影
交縈插處墉如列憑臨愜素情

山雜夏雲多

得多字

山外山無數巉巖望若何濃因雲半雜奇
入夏偏多峭似排青闥皴如擁翠螺添來
陰匝匝到處勢嵯峨萃嶽千尋矗氤氳萬
象羅徵祥書日至糾縵共賡歌

五月江深草閣寒

得寒字

草堂銷夏處嘉客共盤桓地接澄江近人

來小閣寒座中添爽靄檻外宕清瀾快覺
風生浪涼疑雨激湍波光搖蘚砌水氣浸
花欄卻似秋先到登臨興未闌

心清松下風

得心字

詩興龍門寄清機愜素心風前涼欲納松
下蔭尤深蓋偃擎圓影釵橫宕碎陰微颺
差滿袖爽意快披襟林暝含虛籟濤寒送
遠音此間饒雅趣俗慮未容侵

綠竹入幽徑

得幽字

夾路檀欒竹山居一徑幽陰看濃靄合色
共遠嵐浮个个邀誰賞猗猗爲客留千竿
青欲送萬籟翠如流曲隴清風引新叢宿
雨收生寒秋意滿憑眺豁雙眸

晚涼看洗馬

得池字

納涼借好友向晚步南池喜聽鳴蟬韻相
看洗馬時水邊炎暑退樹杪夕陽遲宛轉
金鞍解滌迴錦浪隨臨流猶蹠足顧影快
揚鬣自有馳驅力良才伯樂知

雲逐渡溪風

得風字

風信溪頭度雲陰若逐風連番來極浦幾
片曳層空爽意披襟候晴暉擘絮中輕颺
看細颭遠靄似低籠蕩漾機相引氤氲氣
自通納涼天色暮更趁晚霞烘

又展芭蕉數尺陰

得蕉字

又覺清陰展窗前對綠蕉幾重遮屋角數
尺護牆腰拓影旗交蔭舒莖扇競搖濃青
皺霧縠暈碧綰煙綃紙好書龕種圖宜畫

本描茅檐相賞處猶憶雨瀟瀟

清風似雨餘

得秋字

殘暑方消盡清飆報早秋快當風乍起宛
似雨初收爽挹層軒潤涼生一徑幽如聞
聲淅瀝不覺氣颼颼竹隴陰逾淨蕉窗韻
欲流塵襟應共滌颯颯與心謀

隔岫窺紅蕖

得蕖字

隔岫芙蓉渚遙窺萬柄蕖蓋擎新翠合花
放嫩紅初香送因風過聲喧似雨餘陰如

皴遠黛影尙隱清渠翻葉猜藏鷺凌波有
戲魚菱歌聽未歇相賞意何如

稻壟瀉泉聲

得聲字

一路清音瀉遊人趁早行沿途經稻壟流
水作泉聲秧記翻車浸田如漱玉鳴千畦
隨曲折百道聽分明前巷頻催曉新秔欲
報成劬農勤

聖念寰海樂豐盈

清露點荷珠

得珠字

清浥荷塘露勻圓宛似珠承囊如可取傾
蓋儼相須結處灑灑滴擎來顆顆俱光眞
明月比團共綠雲扶錯落分還合澄鮮有
若無招涼池畔近甘液喜沾濡

無弦琴

得琴字

高情陶令寄雅製有遺琴不鼓如同契無
弦自會心一張懷可委三疊響偏沈節未
金徽具聲難玉軫尋出虛應悟樂叩寂好
求音妙趣絲桐外悠然暢素襟

白水滿時雙鷺下

得堂字

近水饒清趣溪陰啟草堂一蟬聽嘹唳雙鷺任翱翔對影搖波面聯拳憩岸傍疊穿菱葉淨分掠藕花香漱灑添新漲翩翩送晚涼坡仙詩句好卽景足相羊

巖泉滴久石玲瓏

得泉字

磊磊湖中石玲瓏不計年濺來通乳竇滴處挹飛泉風磴流應漱雲根峭欲懸輝如含玉韞韻自瀉珠圓竟許堅能破居然溜

可穿裁詩留故事勝境結清緣

白菡萏香初過雨

得香字

白白花新放淩波菡萏香風如來曲檻雨
乍過方塘素蘂猶含潤清陰好納涼珠跳
餘滴瀝玉立散芬芳爽覺雕闌淨低看翠
蓋張一番秋意到露欲溼蓮房

香遠益清

得清字

君子花堪愛亭亭淨植生每聞香自遠益
覺氣含清影尙橫塘隔芬來曲檻迎銷炎

風乍送挹爽雨初晴芳意紅衣展澄陰翠
蓋擎納涼依

御苑萬柄正敷榮

新種竹都活

得新字

移竹猜難活關懷補種新卻看青解籜都
已碧成筠消息占風到滋培課雨頻手痕
清篠認生意嫩篁勻穿徑低如冪鋪陰細
欲皺依依君子比相對淨纖塵

舊栽花更妍

得妍字

栽種花無數爭開曲檻前轉教新減色更
覺舊生妍麗紫烘朝日酣紅帶晚煙含芬
尤旖旎摘豔又澄鮮次第猶占信滋培已
隔年夙緣如有約芳意總便娟

門前翠影山無數

得山字

翠影門前對嶽寄列遠山幾層遮鳥道無
數疊螺鬟積靄松窗外浮嵐竹戶間雲陰
斜界白日色晃生殷隔牖懸崖峭開簾遠
岫環煙巒依

御苑翹首欲登攀

叢桂留人 得留字

作賦才稱庾懷人雅溯劉小山相眺望叢
桂許淹留碧幹層陰拂清芬一徑幽月中
疎影宕雲外暗香浮種想仙壇界枝迎太
液秋不須招隱士勝擬廣寒游

未霜楊柳猶秋色 得猶字

柳塘霜未落卽景倍夷猶遙望千株色仍
含一片秋板橋無跡認灞岸尙陰稠暗覺

煙痕暮涼宜露氣
浮垂條縈蓼
澹交蔭夾
蘆洲來歲春光
早依依向陌頭

明朝是重九

得朝字

節候迎重九
河亭入望遙
關心惟令序
屈指卽明朝
菊殘期先約
萸囊伴待招
登高猜翼日
懷古話商飈
別緒縈千里
佳辰隔一宵
滿城風雨散
鄉思轉迢迢

雁來紅

得紅字

秋雁來賓候
疎林點綴紅
非花高下映
接

葉淺深同染出脂千片鋪成錦一叢迎晨
初日閃向夕晚霞烘影襯前汀蓼光分遠
岸楓卻疑秋色滿爛漫借東風

有菊卽重陽

得秋字

更作重陽會花看菊徑幽時非逢九日景
尙屬三秋寒已經霜未開仍冒雨不莫嫌
佳節晚爲愛冷香留落帽還嘲孟題糕欲
問劉坡公清賞處勝記嶺南游

望雲思雪意

得思字

遠望同雲布寒風欲雪時
溟濛陰乍積醞釀意先知
薄靄多層密祥雲下尺期
三農方稼卜六出盼花垂
澤沛天心驗膏霑地脈滋

宸衷勤軫念豐瑞慰民思

雪意屏山欲放梅

得山字

一片濃陰罩峰屏映半環
雪將飄六出梅欲放孤山
消息猜雲際芳馨動岫閒
紅猶含嫩萼翠盡斂輕鬟
幾度衝寒意何人索

笑顏陽和高處得庾嶺好登攀

嶺上多白雲

得陶字

繪出山居勝詩吟隱士陶白雲多處積翠
嶺望中高羣厯輕陰繞徘徊淡影遭平鋪
遮蘚磴低壓卷松濤岫復濃排闥嵐飛冷
映袍盤桓堪悅性還待霈醲膏

消寒圖

得消字

九九期方屆嚴寒未許消葭灰占律應梅
萼倩圖描粉白全教染脂紅試漸調閒中

殘臘盡靜裏豔陽招雪霽明瑤嶼風和度
綺寮

授時塵

聖慮

禁苑喜春韶

灞橋詩思 得橋字

詩思從何覓閒行度灞橋不嫌風力峭正
值雪花飄策蹇長吟爽衝寒逸興饒探懷
皆錦繡照眼盡瓊瑤芳信梅林動前程柳

岸遙推敲無限意此境絕塵囂

雲倚蓬山雪意新

得新字

望切祥霏布蓬山景乍新雲陰千仞疊雪
意四圍勻濃靄氤氲合寒光醞釀頻遙看
屏匝匝幻作玉嶙峋暝影層層結煙痕細
細皴及時盈尺告瑞兆答

楓宸

迎歲早梅新

得新字

殘臘將催盡紅梅放萼新衝寒先得氣迎

歲似知春雪後含香早檐前索笑頻枝橫
饒暖意蕊綻趁元辰萬卉無消息孤芳孰
比倫花風吹次第淑景更宜人

消冰水鑑開

得春字

解凍占風信暄和幾度春冰花消曲沼水
鑑宕清淪浪疊遙合翠流迴細皺鱗乍看
匿影散漸化纈紋勻漲暖添晴靄波明淨
遠塵涵濡沾

帝澤寰海樂陶鈞

東風解凍 得風字

韶春催凍解東陸告和風鼓盪波心暖吹
噓澤腹融纈紋痕漸化花信候潛通鑿想
沖沖後消來習習中剪刀頻欲試冰鑑已
如空五日休徵叶承宣答

帝衷

春寒花較遲 得遲字

幾度春光到花開竟後期祇因寒漠漠較
覺信遲遲料峭餘今日芳菲異昔時屢經

風試翦尙待雨霏絲紅未舒新萼青猶勒
舊枝

御園韶景早嘉卉共葳蕤

桃始華

得桃字

韶光春二月華始放天桃嫩萼開如許新
陰護幾遭林間拋燕翦水畔浸漁篙露井
香初散霞天影漸高遠皴榆吐莢低拂柳
垂條宛入仙源境尋芳欲問陶

瓊島春陰

得陰字

勝蹟稱瓊島春來晝景陰天光看藹藹雲
影欲沈沈溼翠浮前磴濃青鎖遠林潤生
嵐匝匝秀結石岨嶽

太液流波近

瀛臺接地深

幾餘

鑾蹕駐茂對愜

宸襟

花遠重重樹

得花字

林深千樹合，匝樹遠開花。幕幕濃垂蔭，重重秀吐葩。芳姿時旖旎，疎影正交加。白誤枝，霏雪紅猜水。浸霞晴烘，含日麗陰展。當雲遮，摘豔添詩思。吟哦興倍賒。

布穀聲中夏令新

得新字

紀時鳴布穀，入夏喚頻頻。乍覺聲相應，偏教令亦新。關心登麥候，傾耳插秧人。韻送薰風度，音隨澍雨勻。催耕曾幾日，拂羽又茲辰。循野農官課，鳩民並屬民。

秋光先到野人家

得先字

匝野人家住秋光到覺先
林泉相賞處村墅已涼天
爽靄松扉敞清陰竹屋連
籬根遮日影樹杪接雲巔
寒信催歸雁疎聲送
嘒蟬晚來風颯颯隔巷起
炊煙

高齋聞雁來

得聞字

霜天來雁侶客舍靜中聞
逸韻催寒信高齋聽夜分
數聲添別緒幾隊喚成羣
斷續如隨雨淒清半入雲
傳書偏得路列陣亦

能軍遙憶蘆汀外斜行送夕曛

秋叢繞舍似陶家 得花字

依稀陶令宅秋菊正開花繞舍輕黃綴成

叢晚翠遮一籬含冷豔三徑吐寒葩節屆

重陽候人來五柳家傲霜猶爛漫冒雨白

橫斜雅抱思元亮悠然興倍賒

寒山轉蒼翠 得寒字

轉覺山光滿千峯不礙寒鬱蒼形繚繞積

翠勢巒岈遠靄雲端合浮嵐雨後看冷疑

生疊嶂秀自聳層巒松陽柯分碧楓林葉
襯丹靄川詩句好摹景畫應難

遠雁入寒雲

得雲字

遙曳晴空裏翩翩逐隊分遠來千里雁寒
入幾層雲陣欲衝青靄書應界碧雯數行
看縹緲一氣共氤氳緩度銜蘆影橫皴擘
絮紋江天秋色晚俊翮帶斜曛

落葉滿空山

得尋字

高士何從訪行蹤未可尋空山千疊峙落

東閣添詩興應如水部何梅當官廨放花
咏法曹多信已催風度尋宜踏雪過衝寒
開次第索笑快吟哦檻外香逾暗毫端凍
欲呵一枝迎歲早麗句寫春和

雪中芭蕉

得圖字

妙得丹青趣天機寓畫圖意從蕉下會景
豈雪中無乍覺銀光逕還看扇影扶數叢
猶紙種一色竟瓊鋪踏處梅應共晴來竹
與俱羣芳同幅寫何必四時拘

山明望松雪

得明字

雪霽憑軒望嶽寄疊嶂明山容寒轉翠松
色冷逾清挺秀干尋立浮嵐萬壑晴巖腰
濤曳練峯頂樹堆瓊鱗老貞柯鬱鬢分遠
黛橫豐年三白見瑞兆答

昇平

彙

韻

堂

古

近

體

詩

董

慎

自序

詩者志之所之也在心爲志發言爲詩情動於中而形之於言言之不足故嗟歎之嗟歎之不足故詠歌之自古騷人逸士藉以發揮其才智涵濡其性情或蒿目民生或繫懷君國或俯察仰觀以寫其胸臆或賞心樂事以鼓其性靈蕩滌蕪穢振刷精神俾端趨向而識指歸此古人言詩之義也我

朝

龍興東土

肇造丕基以弧矢威天下

聖

聖相承

諄諄訓諭以國語騎射爲根本毋尙浮華務崇質樸須臾曷敢忽諸然歌詠

昇平亦必有和鳴

盛世者故

欽定熙朝雅頌編列天潢爲首集崇文教也余

於道光丁酉循例就傅

皇子例以六齡入學

誦讀之餘閒

習試帖及古近諸體每於花朝月夕令序嘉辰
景之所遇無非詩者惟賦性疎闊脫橐後隨意
置之頗多散失迨咸豐庚申辛酉公務紛紜刻
無暇晷幾不知世間有吟詠事同治建元復直
樞密時值軍書絡繹夙夜在公以余之才識迂
拘兢兢焉猶恐有隕越之虞更何敢耽於翰墨
之場致廢職事偶有以文字索者姑亦勉強應
之蓋性靈之汨沒於簿書者久矣丙寅仲秋偶

檢舊篋見蠹楮蟬縑亦閒有鈔錄成帙者或敷
言

黼展以效賡颺忭舞之忱或展敬

橋山以誌歲月露霜之感勵志寸分擴衍四時
之樂關心稼穡謳歌七月之篇他如芸窗斐几
唱和聯吟不取騁妍鬪巧之奇祇爲悅性怡情
之作則又有宜乎存者因編爲賡獻集一卷帖
記懷音一卷廣四時讀書樂詩試帖一卷幽風
詠一卷正誼書屋試帖詩存二卷樂道堂古近

體詩二卷閒有近作數首亦一併附錄樂道堂者道光戊申

宣宗成皇帝御書所賜額也因自號曰樂道主人斯集也爲記事觀可也爲記當年之辛苦觀亦可也詩云乎哉同治六年歲次丁卯孟冬之月樂道主人自誌

卷之三十一



三十一

三十一

三十一

三十一

三十一

三十一

樂道堂古近體詩卷一

恭親王著

新柳

陽和律轉喜韶春
弱柳垂條處處新
雨潤如酥經幾度
風裁似翦記前因
碧縈細帶陰猶淡
綠綰游絲色漸勻
此際

上林嘉植茂柔枝
低拂入朝人

春郊卽目

春景暄妍一望遙
郊原淑氣趁清朝
村前風暖

催花信野外煙濃拂柳條解凍綠波皴水面浮
嵐青靄束山腰平田似冢經新雨更喜千畦物
色饒

題李營邱煙巒春曉圖

一幅煙巒著色新山光匝匝更宜春晴嵐疊擁
層層結曉靄平鋪處處勻日上峰顛輝晃晷霞
皴石骨勢嶙峋營邱逸趣知無盡付與毫端畫
取真

太歲壇謝雨入城齋宿卽景

早行遠望暢襟懷
雨後郊原景更佳
萬樹濃陰
皴似畫千畦
秀色淨於揩
碧縈水面
鞞紋皴青
送山顛闌影排優渥
甘霖酬

聖念拈毫誌喜入詩牌

蕉扇

紈素何須製
招涼扇用蕉
團團如月掬
謾謾覺
風搖數尺陰
仍展三庚暑
可消綠天能
挹爽不
畏日炎歊

葛衫

章身服以時當夏衫宜葛兩袖覺風生千絲如
雪潑南邦績自工中谷材堪掇絺綌暑無侵按
襟心爽豁

題蘆雁便面

秋入畫圖中聯翩趁晚風蘆汀雙岸闊飛雁下
晴空

夾岸蘆花白涼生水國秋聲聲鳴雁過一碧水
光浮

落日照平沙橫空雁影斜似因天色暝隨意宿

蘆花

飲啄本無心江天夕靄沈
銜蘆非避繳影入白雲深

餅菊

老圃秋容菊吐葩
膽餅新供數枝花
亦分甘谷清如許
香采疎籬淡愈嘉
宛似席珍羅隱逸
獨標晚節洗鉛華
小齋點綴饒齒致
鄭重軒櫺護碧紗

秋柳

秋深花事盡池塘蕭颯猶餘柳幾行憶昔依依
環嫩綠祇今落落散疎黃淡容遠岸朝含雨寒
色平林曉帶霜轉瞬東風回陌上千條萬縷駐
韶光

早梅

芳信如傳嶺上梅幾株冷蕊已先開衝寒乍覺
春光洩迎臘應煩雪意催籬畔橫枝疎影動檐
前索笑暗香來從知羣卉都居後祇讓清標獨
占魁

紅葉

林巒一色逗寒光
葉葉疎紅半染霜
遠似丹霞烘萬樹
濃如絳雪灑千行
水邊偶閒蘆花白
籬下猶皺菊蕊黃
對景不知秋已晚
翻疑桃杏趁春陽

喜雪用東坡北臺詩韻

傍晚猶看月影纖
寒光頓覺五更嚴
隔窗玉液疑霏屑
卷幔瓊霏似撒鹽
一片清輝低映戶
幾分曉色冷侵檐
田家喜得豐年兆
來歲登場萬

庚尖

侵曉寒光噪凍鴉占豐瑞雪祝籌車霏霏似護
千畦麥晶晶欣飛六出花送臘歡騰喧里俗同
雲歌舞樂田家不須授簡相如賦誌喜詩成擬
八叉

冬日田家

鼓舞龔軒比戶封田家樂趣紀三冬獻羔堂上
方稱壽饗蜡村中正勞農納稼歡聲饒地利祈
年吉禮仰天宗欣看九屬嘉祥告作息均沾

帝澤醲

除夕立春

應候青陽布令辰剛逢除夜喜迎春起元恰值

時終亥

是日亥時立春

更始還宜月建寅爆竹聲聲宵

漏盡綵旛處處歲華新嚮晨同慶三朝節忭賀

羣工拜

帝宸

南苑小獵

扈隨

御蹕臨南苑小獵行圍穀雨春柳色千條青結
帶花陰一路翠成茵羽林騎合星搖勒翊仗弓
開月滿輪

綸綽疊承

恩澤沛應知時狩邁虞巡

春郊試馬

試馬春郊春色滿芊眠匝地草青青頓開芳徑
遙無際快引輕蹏迅未停一路翠茵香旖旎連
番金勒影瓏玲麥塍方獻雙歧瑞扈從欣隨

御蹕經

觀稼

似罨平田秀色浮
欣覘多稼綠雲稠
腴含膏壤香風送
潤浥鱗原澍雨收
穗影輕黃搖萬頃
隴陰空翠匝千疇
豐年誌喜倉箱富
雅頌歛幽比戶謳

藥欄

花信頻探逸興賒
春深還有殿春花
來尋紅藥情無限
看向朱欄影半斜
輕屐徘徊經宿雨
柔

枝爛漫染朝霞翻階華省傳佳詠鏤管詩應訪
謝家

刈麥

一路田歌答村村打麥聲腰鎌晨日映肩擔午
風輕銍艾時方屆來牟頌載賡雙歧呈上瑞寰
海慶

昇平

紅蓼

夾岸紅如染垂垂水蓼花淺深皴蟹舍疎密隱

漁家影欲烘朝日痕疑蘸晚霞暮天歸侶雁分
掠過寒沙

又展芭蕉數尺陰

又展芭蕉數尺陰綠天分影上衣襟憑欄乍覺
秋聲到疎雨斜風送遠林

書齋清景滌塵心又展芭蕉數尺陰幾片閒雲
新雨後窗前碧暈晝沈沈

花光旖旎環平圃竹影交加遮遠隴又展芭蕉
數尺陰檐牙陣陣芭蕉雨

秋色清華一徑深
翛然萬籟未容侵
半窗斜日三更月
又展芭蕉數尺陰

題沈石田風雨歸舟圖

寫出江村行樂趣
煙波縹緲送歸舟
斜風颯颯來帆外
細雨瀟瀟點浪頭
畫裏卽須雙岸暮
圖中欸乃一聲秋
輕橈停泊知何處
隔浦雲山翠黛浮

題唐六如寒江釣雪圖

釣叟孤舟入畫看
江天雪釀十分寒
凍雲溼霧

迷雙岸斜笠輕裘拂一竿極浦鳴榔誰作伴漫
空飛絮欲成團無人解得漁翁趣卻許高風繪
筆端

蠟梅

別有早梅迎歲放幾株蠟瓣十分黃輕看磬口
含疎態暗覺檀心孕冷香三徑人來頻著屐一
籬蜂去尙垂房衝寒同報春消息亦向園林壓
眾芳

水仙

梅兄礬弟問詩家清絕無塵有韻花疑自水鄉
來雅契換成仙骨奪凡葩芳姿綽約饒風致冷
豔玲瓏逗月華鮮潔更宜書室共瓊英拂几影
交加

種梅

逋仙高致問山家手自揮鋤夜種花移得寒梅
親位置邀來明月共清華蟾輝有約三更伴鴉
背分栽一徑斜爲語西湖好風景尋芳擬欲泛
星槎

送邢春浦協揆奉

使之四川

溫綸

寵賁下

丹霄奉

命駢征入蜀遙風送錦江波森森雲開玉壘影
迢迢祥輝樞輔臨行省歸路枌鄉駐使輶計日
節回新歲後暄和淑景喜春韶

歲暮書齋卽事

歲餘清景喜書齋文史三冬愜素懷梅影當窗
寒不覺芸香拂几淨於指凍雲如冪疑千片瑞
雪飛花護一階屈指春光回百五韶華吟詠入
詩牌

晴窗臨帖

講肄書齋滌俗襟倚窗古帖自摹臨揮毫影漸
三竿上拭硯塵無半點侵筆法縱橫閒會意墨
痕濃淡妙從心案頭更喜芸編富愛惜分陰况
寸陰

桃花初放

爛漫花千片新葩簇簇齊
詩人情更寄漁父路
應迷絳雪紫前岸紅雲映遠隄
繽紛春錦豔疑是武陵溪

春園曉月

幽賞卽清晨澄鮮月色新
金波搖素魄玉宇宕
冰輪惟愛暄妍景偏宜澹蕩春
靜觀皆自得皎潔悟前身

題王石谷夏山欲雨圖

前山漠漠雲初起後山隱隱雷似鳴
暝濛不辨東西嶺油雲霏霽觸石生
從龍有滄鱗紋皺出岫無心畫本成
層巒遠近罨蒼翠隔林疊嶂勢崢嶸
付與丹青傳妙手展圖祇覺聞風聲
欲雨未雨氣氤氳油然合沓起天末
嵯峨向背多奇峰四圍濃雲如墨潑
暮煙擁樹影迷離曳練排空皴一抹
數間茅屋小橋橫溪水溶溶兩岸闊
寫入生綃一幅中展卷忘炎心目豁

消暑八詠

湘簾

竹箔低垂下玉鉤
風前蕩漾似波浮
玲瓏一桁迴紋影
猶憶湘江古趣留

葵扇

葵葵巧製納涼佳
不必羅紈愜素懷
隨意揮來吟興發
風光颯颯入詩牌

涼棚

隨時舒卷任風過
晝影沈沈綠蔭多
更喜納涼新雨後
高齋延爽意如何

響竹

竹劈絲絲斷復連
翛然天籟靜中宣
此君揮灑應如意
蠅蚋潛祛几席前

冰鑑

炎夏頽冰納講堂
平揩淨面逗寒光
澄空一鑑渾忘暑
不待秋來送早涼

梅漿

消夏偏疑暑氣闌
梅漿沁齒味甘酸
由來止渴稱佳品
啜茗何須龍鳳團

葛衫

衫衣節候過天中細葛輕含欵欵風不羨裁詩
端午日賜衣杜老荷恩隆

筠几

窗前竹几暗涼招古節何曾費斲彫靜坐攤書
超象外悠然天籟度風簫

九日登高用杜牧之韻

蓼花斜舞荻花飛翠巘登臨雨意微好句題糕
欣共賞高懷落帽欲忘歸催寒風信來佳節向

晚雲陰淡夕暉菊盞萸囊添逸興煙嵐一路拂
人衣

秋色

萬景澄清豁遠眸長空霽色正深秋山腰雨洗
青如染水面風皺翠欲流疎影曉分楓葉岸寒
光晚浸荻花洲沈寥天氣添新興畫本詩牌望
裏收

秋聲

商音入律倍淒清聽取高秋處處聲隔院冷風

生萬籟空階疎雨滴三更一番啾唧寒蛩語幾
陣徘徊旅雁鳴又喜築場登稼後家家擊壤頌
昇平

題趙千里寒林蕭寺圖

杪冬景致自清淒一幅新圖好入題葉落寒林
含雪暝巖深蕭寺向雲低拈毫寫得幽居靜潑
墨皴來古木齊梵韻鐘聲何處覓山重水複路
應迷

文房四詠

筆

三品湘東別榮封受爵誇紫毫吟樂府彤管詠
詩葩雅製筒裁竹奇才夢見花史官書以直落
紙燦龍蛇

硯

澄泥含古色鸚鵡眼圓青漢瓦成風字端溪製
斧形紅絲涵月暈紫質點金星若到微凹日研
磨幾歲經

墨

龍香推上品雅契伴緇帷易水松煙造延川石
液滋漆膠凝古劑蘭麝邁隄隄廉璀璨成文字浮
光聚硯池

紙

自從更竹簡紙素貴澄心剡楮光瑩膩蜀牋色
淺深鮮華如截玉蘊藻重銷金新樣羅紋製詩
豪寄雅吟

釀雪

雲容含凍布層層欲散瓊霏尙未曾轉覺天心

多醞釀偏教人意怯嚴凝半空宿靄遮梅隴一
色濃陰接麥塍待看雪花飛六出來年百穀慶
豐登

炙硯

嚴寒不入硯田中轉覺消寒暖氣烘棐几濡毫
當曉試芸窗潑墨喜春融潤生石面如迎日凍
解池心豈畏風水火兼資成妙用人工巧許奪

天工

紅梅

迎歲寒梅占物華園林深淺綴紅葩柔枝恰好
烘朝日嫩萼還宜映晚霞濯錦新痕添旖旎染
脂疎影鬪橫斜尋芳緩步三三徑疑是韶春二
月花

望西山積雪

空明雪景層巒積指點山光

御苑西朗朗峯腰皴遠近皚皚嶺角辨高低皎
如月色輝無際淡曳雲陰望欲齊更喜豐年呈
瑞兆登臨佳景入新題

寒鴉

點點棲鴉倚檻看，數聲到耳逼人寒。
凍痕低釀雲如冪，宿靄遙分雪未殘。
斜曳炊煙歸樹杪，輕翻墨影噪林端。
會當送喜天明候，幾陣頻催曙色闌。

春雪

冬雪連番布澤殷，春來又喜雪雰雰。
花飛六出欣霑足，潤積千疇利種耘。
絮影暝含雲一色，絲痕暖帶雨三分。
恰逢節候逾驚蟄，田扈催耕穡

事勤

柳色

韶景暄妍二月初芳隄新柳葉將舒低垂弱線
黃猶淺輕裊遊絲碧尙疎遠陌陰添煙細細柔
枝影拂日徐徐萬千紅紫爭春色穠李天桃總
莫如

春詠三十首用蟬聯體

春風

暄妍紫陌融造化當春溥解凍颺仁風扇和回

暖煦生機地脈鬆芳信花心吐五日兆豐年及時霑澍雨

春雨

和甘春雨沛潤物喜霧霧柳岸垂新帶桃溪漲穀紋西成期樂育東作利耕耘翠洗山林淨峰腰東片雲

春雲

谷口吐輕雲天邊縈翠靄從龍有滄成觸石無心出欲雨釀氤氳傍山添嶺峯溶溶素練拖晃

朗含朝日

春日

春回斗柄東日耀峰如笏麗境照神山祥暉騰
海窟朝暎布皞熙初旭欣明發天保頌升恆清
輝澄皓月

春月

春夜高齋敞幽虛月上林玉蟾光皎皎素魄影
沈沈珠斗天心湛銀鉤水底深芳園清賞處花
柳幾重陰

春陰

陰容看漠漠澹沱曉煙輕燕子初能語鶯雛巧
弄聲一犁含霧潤千耦帶雲耕桃柳爭春色林
巒雨乍晴

春晴

新霽晴暉朗暄妍曉旭升養花天氣暖修禊日
光凝佳景舒徐暢清嵐秀麗增和風吹拂處曲
沼泮春冰

春冰

履薄書垂戒瑤池裂碎斑光仍凝皎晶聲未響
潺湲冰鑑方春縱瓊漿待夏頒貞心長潔白片
玉擬崑山

春山

春光映曉山嶺畔雲初起萬疊碧嵯峨千重青
邈迤闔排鳥道通屏列螺鬟峙飛瀑掛層巖源
頭來活水

春水

一溪桃浪暖春水印朝霞雨細魚苗長風輕燕

影斜人游青雀舫波漲白鷗家
漱瀼鱗紋皺漁舟逐落花

春花

春色園林滿尋芳不怯寒
芬菲來曲檻旖旎鬪重欄
染出脂千片鋪成錦一攢
楚辭懷雅契紉佩取香蘭

春蘭

九畹訪幽蘭春風經幾度
清芬自遠塵疎淡成殊趣
丹穎秀千叢紫翹香十步
亭亭品孰偕玉

立階前樹

春樹

渭北樹青葱
裁詩懷杜老
煙條雨乍過
古榦雲如抱
新葉放層層
朝曦升杲杲
清陰匝野勻
池畔生芳草

春草

夢句得池塘
關心南渡口
芊眠到遠津
霾靡侵陳牖
暖入徑三三
寒消天九九
遙看翠色鋪
隔岸垂楊柳

卷之二 詩集 二
春柳

緣隄春柳綠三起更三眠輕裊游絲細低垂弱
線牽新鶯鳴睨皖乳燕舞翩翹拂水環清沼迎
風冒曉煙

春煙

疑有疑無際蒼茫宿霧縈濛濛晴靄合漠漠野
雲橫旭日明還暗輕煙散復生江山如畫裏春
色鎖重城

春城

春色皇州滿熙熙景物蕃祥雲縈鳳闕瑞靄護
龍垣堞峙層埤隱泉流百道喧天葩香界散紅
雨灑芳園

春園

洛陽眞富貴金谷燦葳蕤旖旎紅如幕葱蘢綠
結帷瑞迎三秀草暖送萬年枝廿四番風信春
融太液池

春池

池塘春水綠雲度鏡中流映日晴光浸隨煙細

浪浮花香招戲蝶波暖浴輕鷗雨霽添新漲
澹迴遶小樓

春樓

結構層樓敞韶光市九垓
嘒鶯聲宛轉飛燕影
徘徊動靜生生合山川
面面開暄妍無限景
臨眺更登臺

春臺

書雲臺百尺羣動悉含包
花簇珊瑚樹松垂翡翠梢
層巒青靄罨曲沼碧流交
滿目饒春色和

風二月郊

春郊

春色郊坰滿
暝濛望轉迷
林間鳴野鶴
村外唱晨雞
崩劣山千疊
彎環水一溪
青帘招客飲
詩思曲江隄

春隄

長隄曙色新
極目江天曉
細雨潤濛濛
平川看淼淼
綠池綠柳垂
夾岸緋桃遶
韶景本無言
春光鳴假鳥

春鳥

應候鳥鳴春柳黃飄弱線銜花向遠村拂羽來
芳甸勸酌飲頻招呼名聲巧囀隔林聽好音語
共雙飛燕

春燕

舊壘來新燕呢喃弄語聲斜穿珠箔舞遙曳曉
煙輕呼侶游芳圃銜泥繞畫楹更聞深巷裏布
穀又催耕

春耕

積雪春消釋農人舉趾繞鶯嘯朝雨和鳩喚午
風來綺陌瞻蒲種芳田望杏開待看初霽後三
徑長新苔

春苔

窗前一抹青錢樣誰新種引興舊詩吟忘懷春
酒共沿階色淺深印屐痕輕重陋室趣偏殊怡
情惟讀誦

春誦

課誦情懷暢書齋挹曙暉修藏參物理風月悟

天機草色窗前綠
花光檻外緋
芳郊憑眺望
游子試春衣

春衣

春衣喜旣成
禊事宜
煙艇選勝會
蘭亭高懷游
竹町浴沂舞
詠歸極
浦江天迴日
暖展羅襟
長吟閒啜茗

春茗

當春新茗瀹
七椀憶盧仝
鑪鼎甘泉沸
旗槍活火烘
暗香浮玉盞
佳趣寄詩筒
沁齒清芬領
暄

和颺午風

四月十八日奉

命詣

廣育宮拈香恭紀

嚮晨瞻禮

御園中首夏清和祀典隆九拜申誠心慄慄瓣
香銜

命志欽崇琳宮輪奐慈雲蔭寶幄莊嚴瑞靄籠
敬籲

神庥垂福佑豐穰歲歲慰

宸衷

對松有會

雅愛喬柯挺孤標不計年一株偏向日獨立欲
擎天古榦蒼鱗老虬枝翠蓋圓後凋霜雪耐勁
直性清堅

題范寬山水卷

山光繞郭水連畦尺幅蒼茫望若迷雲樹難分
峰向背煙波直接岸東西縈迴鳥道疑無路蕩

漾鱗紋又一溪摩詰畫中詩興寄展圖擬共朝
川題

端陽六詠

蒲劍

十萬劍橫斜亭亭列水涯新蒲三尺穎寒鏑七
星華舞想風痕颭彈聽雨點譁天中開令節艾
虎共驅邪

艾人

掇取三年艾搏成五日人鬚眉經刻劃枝葉亦

精神作虎形同肖名醫術最眞芸生資保父彼
采記芳晨

角黍

磊落復崢嶸年年祀屈平紫菰黏黍米蒼宿應
星精九子芳名著三隅巧樣呈馨香知可薦圭
角自分明

壽縷

多壽人同壽家家繫綵絲百年長命祝五日佩
符時帖畫蠶功巧籌添鶴算奇迴環雙臂繞蒲

酒介龐眉

龍舟

天中逢令序
蜿蜒戲羣龍
饒鼓繁聲急
浪衝飛來晴
靄合動處彩
雲從
賈勇標
年繼舊蹤

鑄鏡

五日怒奔瀧
空明鏡鑄江
鑪開金躍隄
淙淙象物光
涵萬龍文紐
結雙妍媼眉
貢記南邦

夜窗喜雨

向夕濃雲布雷聲響遠岑
初昏纔沛澤半夜喜成霖
瑞麥沾方足新蔬漑既深
明朝欣一覽秀色徧干林

奉

命詣

時應宮

昭顯廟祈雨恭紀

奉

命虔祈杼悃忱恭瞻

玉輅又

親臨

是日

大高殿

上親詣拈香

薰風幾度催迎暑甘

雨知時待作霖望歲敬邀

天佑普書年仰企

聖懷深惟期優渥符

宸念九拜升香矢寸心

奉

命詣

時應宮

昭顯廟謝雨恭紀疊前韻

抒誠報謝展微忱敬答

神庥喜再臨侵曉氤氲留宿靄連宵浙瀝沛甘
霖欣看嘉澍分疆渥共喜良田尺澤深作肅休
徵欽

帝德

天心默佑慰

皇心

滿城風雨近重陽

滿城風雨近重陽
風韻蕭颼雨意涼
一室琴書酬令節
不須高會引壺觴

岸蓼疎紅籬菊黃
滿城風雨近重陽
山光水色詩無限
一路應投古錦囊

四壁蟲聲長短吟
半空雁影縱橫陣
滿城風雨近重陽
風雨爲秋送寒信

煙村遠望曉蒼蒼
幾度丹楓已染霜
天色沈陰秋色老
滿城風雨近重陽

喜雪

同雲一色布初
如積玉縱橫阡
兆豐年樂有真
楓宸

歲寒三友

松

寒林挺秀干尋
貫四時貞心爲

竹

干竿勁節影徘徊
粉籜輕筠不染埃
更好猗猗修榦外
檀欒斜映一枝梅

梅

尋芳幾度宿寒衝
冷豔幽香自耐冬
風格幾生修得到
前身知是後凋松

春耕

韶景暄和序又逢
催耕春事快相從
鄉村犁架田歌答
原隰鱗皴土脈鬆
習習風光寒亦暖
陰

陰雲影淡猶濃消融殘雪新泥滑暘雨因時慰
老農

桃始華

旖旎韶光春二月園林灼灼放天桃柔枝輕裊
鶯聲細嫩蕊初含蝶影高幾度風來裁似翦連
番雨過潤如膏繽紛滿樹胭脂染不羨仙源試

小舫

奉

命詣黑龍潭祈雨恭紀

侵曉天光淨蔚藍虔誠銜

命謁

神潭蒼茫村外輕煙冪淡沱林端宿靄含

詔納羣言資啟沃

恩清庶獄召和甘升香默禱符

宸念嘉霽均霑

聖澤覃

郊行微雨

剛逢首夏氣清和策騎芳郊趁雨過
震霖無聲

滋秀麥廉纖如膏潤嘉禾林陰罨畫含青靄山
色空濛洗翠螺敬籲甘霖慰農望優霑寰海沐
恩波

蟬

雲氣罨斜陽蟬聲帶晚涼垂綏棲綠柳流響過
青楊飲露身逾潔吟風韻自長書齋閒把卷雅
調叶清商

何處能忘暑十詠

何處能忘暑蕭疎竹徑深千竿初解箨萬个已

成林朗月篩金影清風夏玉音此君宜左右濃
蔭碧森森

何處能忘暑方塘淨碧藻宜人清更麗貼水密
仍疎葉颭微風度珠跳細雨餘應知塵不染延
爽步徐徐

何處能忘暑叢蘭夏日榮新英抽嫩穎密蔭茁
芳莖雨過花增秀風來氣共清金鈴堪護惜雅
馥散盈盈

何處能忘暑參天茂綠松幽姿千丈秀雅契五

美入生二...
株封鶴脰蒼枝老虬鬚翠影濃乘涼人更健月
映蔭重重

何處能忘暑高齋一榻眠時爲攤飯候靜想睡
禪詮鳥語空中遞花香夢裏傳醒來無俗韻飛
瀑漱涓涓

何處能忘暑蓮塘放釣舟新荷浮水面垂柳傍
溪頭翠浪隨風轉清波帶月流一聲歌欸乃雲
樹共悠悠

何處能忘暑憑將玉軫調高山流水趣松韻雨

聲招指下芳徽歇林端爽氣饒會心真不遠天
籟響蕭蕭

何處能忘暑深山古寺雄心超塵世外身在蕊
珠中入定三乘得安禪萬慮空清涼開福地佳
氣鬱葱葱

何處能忘暑臨溪竹榭涼雨餘菱葉淨風帶藕
花香野鷺翔清渚新蟬噪綠楊靜觀澄萬象心
水兩洋洋

何處能忘暑書堂遠俗氛怡情含太古納爽引

南薰寂靜攤絃縹光陰惜寸分新涼來戶牖花
木亦欣欣

蟋蟀

蛩聲唧唧逼清秋譜入商音景最幽梧葉階除
三徑外豆花籬落五更頭數家砧杵聲如和四
壁琴書韻欲流正是小齋新雨後短檠吟詠好
相酬

秋夜聞雁

秋老雁呼羣星河靜夜分傳書來遠塞結陣入

寒雲逸響空中遞餘音夢裏聞一聲鳴嘹唳霜
葉落紛紛

盆梅

小小盆開小小花玲瓏
几幾枝斜清姿亦自
饒風韻疎影依然伴月華
不羨林中多冷豔且
移軒內吐新葩書齋疑是春
先到座上幽芬護
碧紗

祈穀壇陪祀恭紀

玉律陽和轉明禋

鉅典崇上辛承祀肅吉亥兆年豐

是日辛亥

升配瞻

神座趨踰仰

帝衷

是日

宣宗成

皇帝親奉神牌

升配

班聯看鷺序稽

拜叩

蒼穹

春日望西山積雪

春仲怯春寒峰頭雪未殘花光銀燦爛樹影玉
琅玕宿靄含遙嶂澄輝映遠巒豐年欣有兆佳

景畫中看

題

御賜刻絲米南宮字卷

拜

賜珍藏邀

異數襄陽真跡誠罕覩

石渠寶笈祕琅函珠聯璧合輝

天府波磔筆法頗渾雄魄力一挽千鈞弩詎知
別有傳真處誰將妙手付機杼龍跳虎臥見精

神鳳鑷虬梭縈絲縷沈著不失名家筆鮫室夜
織世無侶圓勁健拔媿蘇黃酣厚開拓繼歐褚
鴛機軋軋染采成詞葩綺麗英華咀出神入化
想妙思片羽吉光託綃黼層城十二句新奇闐
苑澄懷素情抒展卷頓入清涼界詩吟避暑渾
忘暑卷內詩句有十二層城闐苑
西平時避暑拂虹霓等句鑄刻尙恐失
其真翦綵直欲相比伍倍教珍重玉溪吟洵爲
後學傳繩矩

扈

蹕臨幸香山卽景

扈從

鑾輿曉啟行山容積翠與雲平
侵晨曙色兼寒暖沿路晴嵐管送迎
日上峰尖光匝匝霞烘嶺畔勢崢嶸
綏豐更喜千畦秀策騎秋郊顥氣清

扈

蹕恭謁

東陵通州道中卽事

金風瑟瑟水茫茫遠浦揚帆秋氣涼
普慶安瀾

長順軌萬艘銜尾達

天倉

浮橋

橋是舟聯舟作橋風恬浪靜水迢迢不須石齒
橫空架穩渡行人有短橈

三河道中

秋光掩映碧峰巔景物澄清九月天萬壑涼風
催落木一輪新月印流泉遙林紅葉濃兼淡遠
壑蒼煙斷復連更喜太平真有象村村擊壤樂

豐年

薊州曉行

卽日蕭條景氣清
嚮晨拂面曉寒迎
蒼茫野色看無際
黯淡山光畫不成
一路衣巾含曙靄
數家砧杵送秋聲
前途漠漠揮鞭去
雲歛長空雁陣橫

遵化道中卽目

爲愛秋山淨
澄清眼界寬
茅檐鴉陣散
柳岸雁行單
野色添詩興
嵐光入畫看
沈寥開顚景
寒

信送銀鞍

孟冬喜雪

一色同雲接

帝城花飛六出霈祥霏欣乘良月膏頻降爲兆
豐年瑞早呈綺陌縱橫如舞絮

彤墀絢爛似堆瓊會逢

鳳詔恩覃日鴛鴦賡颺喜起聲

是日

頌詔

長至前一日

天壇侍班恭紀

齋宿虔誠仰

聖皇

皇心兢業格

穹蒼雲連樹色炊痕散風裊鑪煙篆影香導引
森森排羽仗趨蹌濟濟肅駕行更欣

法駕

郊壇日積雪堆瓊夾道旁

奉

命歲暮禘祭

太廟獻帛恭紀

大祀虔誠仰

聖躬明禋合祭

帝欽崇升香祇奉

丹楹下薦帛趨踰玉陛中樂舞九成

神聿格禮文三獻典攸隆恪恭襄事心增慄鳳

律初旋斗柄東

朝日壇陪祀恭紀

齋宿虔誠仰

聖躬寅賓修祀禮攸隆

當陽布令春逢仲大采登壇位設東有象照臨
昭日德無私長養感

神功萬方光被欣瞻就瑞兆重輪答

帝衷

豐工合龍奉

命敬詣

惠濟祠河神廟拈香恭紀

欣聞豐北奏功成日暖風和碧浪平順軌呈祥

拯萬姓安瀾告慶利羣生

天顏有喜孚民願

神貺無涯慰

聖情銜

命升香增敬畏虔恭申謝抒愚誠

文廟陪祀恭紀

日麗風和澹蕩時

躬親瞻禮肅

皇儀崇儒遠軼三雍典誌祀偕欽百世師俎豆

馨香承玉几衣冠踰濟拜瑤墀方今海寓敦文
治鼓舞

昇平德化熙

臨雍侍班恭紀

大昕舉典辟雍堂將事重臨拜素王宣講
宸章輝翰墨慎修

聖學見羹牆

道承洙泗心傳契教普垓埏

德化昌多士廉隅思砥礪園橋肅聽喜觀

光

春日樂道堂成什

習習春風淡淡雲
天邊春雁幾聲聞
青黃弱柳千條縮
紅白天桃數點分
窗外山光皴黛色
池心水影皺鱗紋
暄妍佳景書齋得
珍重光陰惜寸分

喜雨

向夕濃陰展
油然密布雲
熙春皆盎盎
喜雨共欣欣
碧隴含膏澤
清波漲縠紋
藉田

親秉耒農事利耕耘

翼日致祭壇

親行耕藉禮

從耕敬紀

由來

國本民天重秉耒

親耕遇亥亥

是日辛亥

昨日優霑欣雨足今朝朗豁

喜雲開

聖躬率稼逢初舉

行耕藉禮

上初次臣職叨陪盡五

推共慶豐年真有象和甘應候荷

栽培

玉蘭花

檀心標素質數朵殿芳春
玉樹亭亭立銀花片片新
瓊葩誰與伍明月是前身
潔白同冰雪清芬不染塵

夏日閒詠

芳樹葱蘢繞畫廊四圍濃蔭合
千章林端冪冪陰成綠晷影遲遲
日正長疑是層雲留宿靄偏
教永晝納微涼池塘更喜樓臺
映銷夏閒臨曲沼旁


扈

蹕臨幸玉泉山卽景

疊嶂深藏樹靄間
隔林不辨四圍山
忽經霜落空塵障
頓覺嵐霏出翠鬟
遠鷗無嫌容黯淡
羣峰盡露勢孱顏

御園佳景邀

宸賞萬笏如隨侍
從班



棗

薺

堂

古


近

體

詩

董

恂



樂道堂古近體詩卷二

恭親王著

乙卯嘉平十八日

賜福壽字敬紀

嘉平每仰

奎文煥

恩逮先春早一旬

二十八日立春

時雪占豐豐有象吾

皇錫福

福無垠雲箋近覩龍光燦

宸翰初頒墨寶新

壽寓恬熙叨

渥澤

覃敷繁祉被臣民

丙辰孟春明道齋成什

佳趣虛齋得春光韶景妍牙籤羅左右心鏡自
磨研魚躍鳶飛境吟風弄月天生機參妙理卽
此會真詮

上巳日喜雨

嘉節重三屆春暄萬卉滋蘭亭修禊日沂水舞
雩時元巳風光麗芳辰景物熙和甘微雨潤勝
紀曲江詩

自題

行營扈

蹕小照

行營趨職侍

龍轅曉仗遙開玉露繁赤驥驤騰嘶遠道白虹
環佩感

殊恩

道光己酉
桃皮鞘白虹刀並

宣宗成皇帝特恩賜金

諭在永遠佩帶

學慚對鑑勤稽古銘切如瓶矢寡言扈

蹕習勞聊寫照寸心兢惕最存存

秋詠三十首依上下平韻

秋月

皓月轉鴻濛祥光耀太空晶瑩升海上皎潔麗
天中鏡彩銜蟾魄冰輪出桂宮新涼澄玉宇佳
夕萬方同

秋雲

雲氣本從龍，氤氳淡復濃。
無心開霽景，有滄帶秋容。
絮影遮青嶂，羅紋鎖翠峰。
山村煙擁樹蒼蔚，疊千重。

秋雨

溟濛寒雨灑秋意，逗滄江風勢。
聲偏驟，雲陰氣未降。
飄瀟敲竹院，淅瀝聽蕉窗。
時若開新霽，煙波泛釣艫。

秋風

鐵馬響簷楣，西風著意吹。
早涼來竹徑，殘暑退

蘭陂桂子香飄處
楓林葉落時
秋光誰獨覺
搦管賦新詩

秋露

夜氣釀霏微
秋來露未晞
無聲連桂溼
有葉綴珠肥
淡想爲霜否
濃看似雨非
灑灑欣朗潤
的的爍映朝暉

秋霜

青女飛霜候
浮光映玉除
橋邊人印跡
塞外雁傳書
老圃留殘菊
秋池落故蕖
寒林欣遠望
楓

葉染紅初

秋陽

喜得秋陽暴晴曦
大地敷清光懸玉宇華景麗
蓬壺彩借金風漾輝連寶露濡
霜天逾淨潔皜皜聖人俱

秋山

萬笏碧琉璃朝來爽逼西
秋高迎日潔山淨極
天齊寒徑都環翠奇峰合號圭
遙看楓葉豔選勝快攀躋

秋水

幾曲聽泚泚秋光到水涯
泉聲珠共濺潭影鏡
初措波淨蘋猶漾花疎蓼亦佳
臨流情更爽清
澈滌詩懷

秋柳

秋色近樓臺蕭疎柳漸摧
寒枝高下鞞殘葉碧
黃堆雁影時相約風聲候暗催
綠絲垂似翦屈
指待春回

秋葉

灼灼如花豔
楓林點綴新
澄鮮濡露夕
燦爛醉
霜晨紅日輝
前嶺丹霞障
遠津停車相
賞處別
有四時春

秋菊

朵朵逗朝曛
籬邊菊最芬
晚香誰彷彿
瘦影愈
續紛冒雨開
芳序凌霜展
錦紋淡如人
共賞栗
里酒初薰

秋葵

花圃曲通園
秋葵浥露繁
疎莖清有韻
磬口靜

無言衛足成陰重傾心向日翻晚香三徑冷明
月照芳根

秋桂

高天秋月夜桂影護雕欄素萼香偏淡珠英露
未乾葉舒新翠展花發碎金攢異種分蟾窟清
虛擬廣寒

秋蘭

長阪燦爛嫋詩人賦秉薜三秋紅箭茁九畹素
心閒豔逗風光冷香浮月影彎紉蘭誰作佩琴

韻聽空山

秋荷

萬柄荷零亂餘芬曲沼前
花憐風信急蓋惹露華
研冉冉香雖減亭亭影尙圓
蓮房輕粉墜秋鷺浴池邊

秋聲

爽籟挹清颺商音透綺寮
雁聲來遠塞蟲語伴深宵
疎雨空階冷寒風落葉凋
歐陽拈賦筆天末響調刁

秋色

雲歛煙霏日秋高望遠郊淨分山萬疊澄徹水
干坳蘆白花翻激楓紅葉醉梢悟來空卽是玉
宇四圍包

秋漁

遠水逗秋濤漁來興最豪波痕明似鏡魚樣小
如刀三面疎開網千頭滿載舫細鱗還巨口赤
壁樂陶陶

秋樵

山靜採寒柯
樵蘇處處歌
峰迴雲擁樹
路轉霧牽蘿
肩擔紆楓徑
腰鑷下菊坡
歸來欣滿載
月照影婆娑

秋穫

秋稼祝汗邪
秋深穫萬家
鎌痕彎月小
擔影束雲斜
玉粒欣盈室
金穰慶滿車
綬豐宜介壽
春酒酌觴霞

秋吟

斗室快秋光
高吟興欲狂
韻同蘭氣馥
句入菊

花香倚樹怡情曠揮毫逸趣長夜深肩更聳影
逗月痕涼

秋社

報賽慶西成秋深宇宙清迎神維吉戊示本詠
由庚簫鼓聲張樂雞豚敬展牲黃琮酬地利擊
壤樂村氓

秋獮

時獮出郊坰平原草尚青良弓滕虎韞勁箭撚
雕翎卽鹿來深甸追狐到野亭馳驅爭搏獸班

馬過寒汀

秋射

秋射各分期
何人克奏能
角鳴弓霹憲
羽沒石峻嶒
菊徑賓初序
蘭堂耦共升
試看如樹者
繹志更心矜

秋礎

霜月五更頭
礎聲報晚秋
頻添幽閣思
漫起故園愁
響送丹楓岸
音傳白荻洲
千家刀尺冷
風信更颼颼

秋鴻

賓鴻驚旅夢蕭瑟寄寒音
結陣來空塞呼羣宿
遠林影穿紅葉冷聲入白雲
深寂寞高秋夜飛
鳴伴客吟

秋鷹

顥氣九天涵秋鷹搏擊諳
橫空盤遠塞作勢下
晴嵐祭鳥毆應百田狐獲計
三最宜人發縱獨
惜性殘貪

秋蛩

四壁蟲聲冷餘音入耳尖
豆花香滿架桂樹影
侵簾唧唧吟秋急
啾啾促織嚴虛齋
清夜永寒
月逗銀蟾

秋燕

啾唧蟲吟日還聽燕語
南春來棲月榭秋去趁
雲帆菊徑憐今別
芹泥燕昔銜韶華期不遠
舊壘杏梁嵌

嘉平十六日

賜福壽字敬紀疊乙卯詩韻

墨寶仰叨

宸翰賁嘉平

錫羨湖中甸

壽昌遐慶符三祝

福嘏延洪徧九垓

運協禎祥

天介祉

道隆庥泰日維新南疆從此銷兵氣鼓舞春臺

樂兆民

題殷譜經大理讀書修史圖

譜經先生南董儔
漆書蝌簡胸中收
灑然落筆
輕千秋有時論事張
兩眸滿堂滿谷聲
無休敝
車逐日東華遊一羸
一僕行夷猶步登琳館懷
鉛油八書十表同時修
渾渾噩噩追商周
讎訛直如尋寇仇
金銀杖杜窮殫搜
援據典確折輩
流如鑑照物射貫
侯退食一編時吟謳
整襟危坐常科頭
三毫添頰圖畫留
猶看雙袖鑪煙浮
題李迪江山無盡畫卷

萬里滄江萬里山，憑將寫入畫圖間。
葱葱雲樹濃兼淡，片片風帆往復還。
浩渺平川明水鏡，嵯峨疊嶂擁煙鬟。
臥遊台蕩多佳境，圖寫浙中山水繪出蒼茫意態閒。

題張文敏擘窠書赤子視萬類浮萍閱人

寰十字冊

并識咸豐丁巳

此冊向爲質莊親王所藏，曾邀履端親王暨書齋諸友聯吟題詠，並成哲親王倪敬堂太常各繫以跋，後歸故相琦靜。

菴家末有郭蘭石大理跋語當在其時
迨琦相籍沒此冊復入

御府余蒙

恩賜得之墨彩鸞騫詞葩鳳麗展翫不忍釋手
因疊元韻並邀書齋諸友同依前體聯
成二律以誌三天韻事

展冊澄觀喜欲顛天瓶十字永薪傳沈雄力挽
千鈞弩神妙珍逾萬選錢居士前身疑草聖書
齋舊雨憶詩仙追吟愧繼芳塵後什襲收藏翰

墨鮮

早歲心香藝米顛晚從魯國溯真傳虹樓瀛

海珍雙璧

朱桐軒宮保

蠹紙蟬縑直萬錢好事銀

潢頻鑑賞

匡鶴泉少宰

題詩玉署幾神仙蘭亭輾

轉經塵劫

殷譜經大理

天府重登墨尙鮮

石渠寶笈富僧顛

李小磨侍講

筆妙華亭有再傳

恩錫盤藩同分器

張怡琴太史

字珍角扇倍論錢評

書品擅琅函祕

孫琴西太史

摘句吟留玉局仙

天得

所書十字爲
坡仙詩句
更羨揮毫成雅詠
巴詞慚點碧

苔鮮
李蘭孫
太史

附錄原唱
乾隆辛卯

雲間家法繼張顛

睿賞天瓶搨本傳
履端親王
分得龍跳臚十字
質莊親王

憑教鷺換直千錢
持齋
同胞赤子心通佛
曉閱

世浮萍句挾仙
春谷
棐几展陳供靜玩墨花常

映筆花鮮
崑園

題趙子昂商山四皓卷索書齋諸友和韻

高風四皓寫來眞矍鑠翁傳畫裏神隱跡避居
秦政世狂歌且作葛天民煙霞入抱原超俗泉
石怡情迴出塵磊落放懷商雒士含貞養性樂
閒身

彩筆拈來妙逼真蒼顏皓齒足形神蔽名愚谷
稱逋客寄興窮巖號逸民雙鬢蓬蓬添白髮一
生落落軼紅塵羨他賢達偏逃俗友月交風自
在身

披圖吾亦見吾眞一幅生綃好會神劇藥逍遙

登壽域採芝恬澹是仁民
遨遊林澤辭名譽眷
戀松雲遠垢塵悟得尻輪誠妙旨
商山高隱百年身

畫裏鬚眉更肖真偏從毫耄見精神
恬心靜慮長生藥擁耒垂綸
上古民世味飽嘗堪大受名
場徧歷絕情塵高棲解脫鞵
繯苦幽隱山林好寄身

勞勞世事幻耶真大隱從知養谷神
到處爲家皆樂土由來肆志有遺民
同遊物外三山境盡

洗胸中萬斛塵左右琴書瀟灑甚採芝一曲認
吟身

淵衷朗澈具天真粉本描摹盡入神隱璞待時
扶漢室幽棲尙志似堯民張侯特達頻相訪疏
老追隨步後塵體逸懷遐情慮肅清虛同樂臥
雲身

識得山翁面目真好從商谷放心神壺中別有
千般景世表超然四老民酌酒風前欣散誕弄
琴月下謝鶯塵襟懷灑落操清節福地幽閒穩

致身

韜光養晦抱清真跡絕青崖葆至神堪歎世間
名利客不如雒上靜閒身考槃載詠空三昧嘉
遯忘機埽六塵悟澈浮生深趣味此身原是畫

圖身

再題二律仍用前韻酬書齋諸友

題句方家賞鑑真

鶴泉蘭孫俱精繪事

佳篇詠出筆通神

三天翰墨輝珠玉八儔才華式士民

後漢書謂李膺荀昱

杜密王暢劉祐魏朗趙典朱喁爲八儔時朱桐
軒宮保匡鶴泉少宰殷譜經大理吳竹言學士

李小磨侍講張怡琴孫琴西圖畫珍藏留古蹟
李蘭孫三太史同入直青齋

文章大雅振芳塵
焚香展讀參微妙
身問心兮

心問身

白香山有心問身身報
心心重答身詩三絕句

功成反璞樂歸真
境靜心清用保神
自是非仙

亦非隱還將斯道覺
斯民採芝應共壺
中藥辟

穀何愁甑上塵
白髮髟髟誇健鑠
眠雲臥石似

禪身

重陽前一日扈

蹕由萬壽山昆明湖泛舟至玉泉山恭紀

霽景澄清九月秋微風輕颭浪花浮林巒鬱鬱
迎

宸幄雲水空明護

御舟紺宇境超塵外賞錦帆天入鏡中遊仙山
萬壽符嘉頌歲歲重陽迓

翠旂

重陽十詠

菊盞

佳節屆重陽筵開一盞香前身原是菊此日恰

卷之三十一 雜言 二
稱觴玉笋光分碧金英色釀黃飛觥酬令序用
介壽而康

萸囊

菊花纔熟酒巧製又茱萸作佩重陽近于囊五
綵紆餘香殊艾綬去惡擬桃符自是寒堪禦無
邪辟不須

戲馬

天驥此呈才人登項羽臺馬多龍種選戲亦駿
圖開追電誰驅策嘶風幾往回重陽勤肄武歸

醉菊花杯

登高

玉宇快秋澄
高高試一登
眼開紅葉燦
足踏紫雲騰
遠水當前列
奇山落下乘
重陽宜雅宴
盛會集詩朋

題餠

養餌重籩羞
題餠共笑劉
百花呈巧製
一字苦旁搜
責實經堪攷
諧聲韻亦收
重陽欣搦管
句擬子京留

落帽

盛會開重九參軍落帽時滿城剛雨過四座任
風吹秋菊搖金盞香醪泛玉卮伊誰羞短髮珍
重肅賓儀

採菊

秋色滿庭皋金英拂曙袍籬邊開菊徑月下訪
詩曹裛露凝千片凌霜採幾遭餘香攜兩袖雅
愛舊吟陶

送酒

籬下菊縱橫偏無酒一罌多情王刺史逸興晉
淵明剝啄門初啟膏騰竦屢傾白衣歸報謝新
什愧瑤瓊

藥市

記得飛昇日遊仙號易元鑪丹成九轉市貨列
千屯藥品通衢集人聲徹夜喧茱萸應共買囊
佩徧江村

菊盞

菊影連盞影盞花雜菊花清光明燦爛傲態映

橫斜四照輝金燄千層簇錦葩宋宮傳軼事九

日鬪繁華

喜雪用禁體和東坡北臺詩韻

飛花冬孟喜廉纖

今歲十月初二日小雪節前得雪一次 小二九寒

添節候嚴優渥誠祈

頒寶炷馨香報謝薦形鹽

奉二十二日命於十一月

應宮

昭顯廟拈香祈雪先期三日祥

石峰明

滅撐孤塔冰柱參差掛短檐密灑低飄宵達旦

雁聲冷叫曉風尖

疎林點點散晨鴉有客披裘恰駐車盈尺祥徵
滋麥隴幾分香信透梅花屢豐合獻詩人頌高
臥誰過處士家此際山陰應訪戴定知難辨路
三叉

嘉平十六日

賜福壽字敬紀再疊乙卯丙辰詩韻

翥鳳翔鸞瞻

寶墨春祺

普錫近春旬

二十一
日立春

殊恩先逮

天潢胄

闔澤同沾月竈垠

同日賜蒙古諸王

頌範演

福疇

宸翰麗祥開

壽域物華新九如共獻升恆頌喜聽謳歌
盛世民

戊午元旦和李小磨侍講元日早朝詩韻
忭賀元辰拜

玉墀卿雲絢彩耀春曦臚歡

北闕仙韶奏送暖東郊斗柄移

首出不承歌下武

心傳默契緬宣尼椒花獻頌瓊筵啟

每歲元日
乾清宮

宴親 淑景陽回

上苑枝

元日

乾清宮

賜宴親藩恭紀疊前韻

錫宴承

恩侍

紫墀青方煦育轉陽曦雲隨

羽仗翩翩擁風裊鑪煙細細移清樂九成諧大

濩華鐙百寶綴摩尼

履端同慶三朝節繁衍

天潢詠柞枝

正月初九日孟春時享

太廟奉

命恭代行禮敬紀再疊前韻

展敬重來叩

殿墀經旬紀候屆賓曦

去歲十二月二十九日
歲暮禘祭曾奉命

恭代
行禮

曉煙煥作雲霞麗春露温覘歲月移

玉案升香焚艾蒔金盤仙脯薦伊尼萬年

廟貌明禋重瓜瓞祥開衍本枝

正月十四日

祈穀壇大祀奉

命恭代行禮敬紀三疊前韻

綸綍先期下

鳳墀就瞻雲靄近

堯曦吉蠲

紫禁銅壺永齋宿

青壇玉轡移

奉齋宿前一命先期在

紫禁城內 榭

栩仙蟲來老道

太常仙蝶俗呼為老道

脩脩春鵲噪芻尼

塵懷萬斛清如洗月朗蒼松映古枝

春雪

積素凝暉入望中漫天飛雪舞長空霏霏暖帶

三分雨習習輕颺二月風花綴瓊林枝向背泥
融綺陌畝南東綏豐時玉霑優渥共慶康年樂
大同

李小磨侍講索題尊慈蘭竹畫冊

筆妙今無論當知畫意深幽芬蘭氣馥勁節竹
陰森間寫清貞志常懷澹泊心披圖慈訓在好
作案頭箴

社稷壇侍班恭紀

瞻禮

皇儀肅趨踰近

社境共欣農得穀用卜稼如茨東作勤無暇西
成慶有期萬方皆樂歲仰慰

一人思

夢得松竹清陰共一亭句醒而足成之

深院茶香午夢醒捲簾恰對遠山青風泉古韻
流三徑松竹清陰共一亭汲水自澆栽藥圃呼
童爲繫護花鈴晴窗晝永閒無事把卷重溫舊

讀經

李小磨侍講索題雙磨閣著色花卉冊

靈椿樹老桂枝香燕翼貽謀有義方品繪拈毫
成韻事一經積善致餘慶

淑訓昭垂絳帳風劬勞教學勵丸熊繡餘彩筆
開生面絕勝甌香點染工

門庭雍肅振家聲翰墨同心抒素情初日芙蓉
誠妙喻雙磨書畫具雙清

文章世閎茂儒紳繼美長承手澤新堂構克丕
勤夙夜簪毫玉署見丰神

送小磨典試四川

調寄慶春澤

玉壘迢迢錦江淼淼衡文

寵命新頒蕊榜秋開荷風香送吟箋珊瑚鐵網

收良器坐中銓哲匠逢難路綿綿劍閣峻嶒巫

峽嶺岍

記曾史館勳勤著瞻慶成鉅典晉秩

恩覃考績名標玉堂管領仙班梗枏梓杞今搜

徧偉蘭翹羅盡英賢待歸來雪擁寒梅清話

三天

題五兄書畫禪圖小照

調寄好事近

獨自默參禪
縹帙緗囊爲伴
恍若瑯嬛福地
養恬虛蕭散
鑪煙一縷暗添香
細裊逐風轉隨
意拈毫摘藻
正月明天半

趺坐碧筠牀
篤學效乎伊洛
玉軸牙籤翫縷遠
塵氛灑落
陶家綠綺更無絃
妙解箇中樂
畫裏傳來真趣
放襟懷邱壑

齋居卽事

一枝棲借

禁城傍

奉

命在

紫禁城內齋宿敬抒丹誠達

上蒼晨闕近聞

宮漏報早朝纔惹

御鑪香睡餘滄茗風偏細飯罷攤書日正長添
得幾分清淨趣挑鐙兀坐誦金剛

孟夏四日

常雩大祀奉

命恭代行禮敬紀

園丘禱雨占龍見叩拜趨蹌勉寸忱

祈穀初春會敬事

常雩首夏又恭臨

今歲會奉

祈穀大祀肅將
命恭代行禮

祇恪攄愚悃

欽若精誠仰

聖心

皇帝前期仍感荷
在養心殿齋宿

昊穹塵渴望應時敷澤沛甘霖

本年入春以來盼雨甚切祭前

一日得一雨深透

題殷譜經大理小清涼界圖

六月日長如小年溽暑隆熾曦景炎林間聒耳

亂鳴蟬三庚赫赫腸似煎披圖眼底幻雲煙頓
覺涼生几席前清風颯爽來冷然別有人間一
洞天

上林里許東南偏澄懷園依扇湖邊樓臺近與

紫微連

澄懷園內有樓額曰近光成哲親王所書

山石嶽岑水漪漣

松陰羃屨護清泉苒苒香風翻碧蓮瀛洲雅會

集詩仙小清涼界舊名傳蟲書鳥篆青瑤鐫吟

風弄月想前賢已從佳夢結勝緣榻來潑墨擘

金箋腕弱詎稱珠斗懸

今春譜經索書小清涼界四字以補舊額五

兄揮毫寫清妍小圖一幅點染鮮

五兄繪小清涼界圖一幅

空階雨過破苔錢當牖紅蕉鬪便娟香茵鋪地
草芊絲老樹森森古藤纏寂靜渾無俗累牽怡
情飛躍有魚鳶瀟灑臨溪屋數椽綠窗夜月聳
吟肩小齋高臥枕雲眠心境卽此會真詮爲君
寫作逍遙篇

復和諧經自題小清涼界圖四首元韻

別有瀛洲地枝棲傍萬年樓懸青漢額

澄懷園內有康

熙年間

書青翠霄漢

四字

御

人集玉堂仙

園爲康熙年間索額圖所居雍

正年間以賜秋菊籬邊綻枯藤石畔緣

內廷行走翰林直寓題詩慚句拙勉賦柏梁篇

嘉樹繞庭栽青青砌點苔清風生曲榭涼月映
平臺雲屋三椽靜山屏四面開綠波消夏處時
有淨香來

澄懷得勝概菡萏徧晴湖峰遠松如畫池平水

似鋪雲深知地迴高適詩地迴雲徧心靜與天

徒莊子內直者與天爲徒外曲者與人只爲看

山色開窗紙不糊

去歲結鄰牆去年譜經會居祁春圃相國園寓距余朗潤園不過數武新荷

送晚香性耽山水趣機共鷺鷥忘地接蓬壺近

恩延

聖澤長和鈴趨

闕早遙聽韻央央

立秋日微雨

爽氣乍颼颼時逢大火流炎威當盛暑時在中伏風

信報新秋梧葉飄金井荷花映畫舟吉占微雨

潤秔稻熟西疇農政全書立秋日小雨吉大雨主傷禾

和五兄中秋日

敕免進領侍衛內大臣班紀

恩元韻

勛資表率羽林新當值聞雞屢徹晨

今歲仲夏
兄蒙

恩授領侍
衛內大臣

帝念平分秋令序

敕還好證月前身了無塵滓虛靈舍儘有禪通

色相因

會囑題書
畫禪圖

一樣承

恩逢歲節歸來又見斗回寅

向例祠竈除夕元
旦等日親郡王俱

蒙恩
敕免進班

和七弟奉

召五福五代堂較射蒙

賜玉鞞紀

恩元韻

五福堂開向

御園私朝欣覩

聖顏溫不同蕃牧春秋見彌覺

天威咫尺尊較射張侯承

三
二
一
勅旨當場

賜鞞拜

君恩近瞻弧矢綏南服長善常欽

德在元

八月初四日子生九月初一日奉

旨命名載激感

恩恭紀

三多合共華封聞

多

上喜諭日願汝兆共三
恩眷優隆感激無地

友愛情殷仰

聖君

丁巳六月御書賜額日祥

萬壽聖節

多男

一索震占

男子卦

時余年廿七甫得此子嫡室出

中秋天靄吉祥雲佛圖

切盼心同洗

帝命非關手有文願現如來金粟影常華鄂韡

競清芬

冬至大祀

園丘奉

命恭代行禮敬紀

銜

命申誠倍惕兢

南郊鉅典屢欽承

今歲上辛常雩冬至奉

命恭代致祭天壇凡

三九成律呂宣韶濩三獻馨香薦豆登吹管陽

回緹室驗觀臺雲煥紫霄澄瓊霏更喜霑優渥

祭前一日得霑祥霏

帝德

天心信可憑

嘉平十六日

賜福壽字敬紀三疊乙卯至丁巳詩韻

鷺序聯班同拜

賜虎臣戴

德紀來旬

督撫皆蒙
欽差大臣將軍
恩賜

蕃釐敷錫瞻

天翰

純嘏咸庥及地垠近捧

奎文承

眷篤重頒

璇勝荷

恩新十七日復蒙恩賜御書朱墨搨九永
如天保齊莊中正桂林一枝匾額三楹

昌莠祿

皇圖鞏子惠元元又庶民

歲暮裕祭

太廟奉

命恭代行禮敬紀

太室申誠敬趨蹌抒寸衷星迴云歲暮風信報
春融

合祭隆儀肅明禋祀典崇升香瞻

廟貌萬世仰

豐功

己未元旦和張子青殿撰元日早朝詩韻

拜賀瑤章達

上聞

元旦朝賀宣讀
王公百官賀表

御鑪香篆望氤氳聲傳竹爆來

三殿筵

錫椒觴近五雲

元日例於
宮錫宴親藩

丹陛喜聯鵷鷺序紅旌遙盼鶴鷺軍瞻

天共聽鈞天樂，紉縵祥煙耀曙氛。

折枝桃花

紅白天桃綻，何人點綴工。
折來芸几上，香滿膽瓶中。
嫩萼猶含雨，新枝尙帶風。
等芳嬌豔摘，清賞寄詩筒。

孟夏時享

太廟奉

命恭代行禮敬紀

湖時修夏祀

太室潔隆儀宗族司罇帛咸韶奏

殿墀九圍揚

大烈億禋鞏丕基銜

命申誠敬趨踰展孝思

子青侍讀繪江天清曉圖並題句見贈卽

和元韻致謝

極目江天尺幅看披圖五月氣猶寒雲山有路
通幽徑煙水無邊接遠灘樵唱喁于歸荷擔漁
歌欵乃坐垂竿輞川妙筆詩兼畫信是方家并

二難

賈筠堂相國夫子服闋補授大學士奉賀

二律

元老還

朝

帝眷優席前重賴獻嘉謀三台宿望資調鼎九

伐威靈仗運籌管理兵部事務會見奇才儲將帥已聞

多士滿瀛洲掌翰林院事書帷又入春風座當日會

陪杖履遊

綸扉夙夜贊調元

丹詔重聞下

紫垣撰杖

三天仍侍座宣麻兩度渥承

恩能令邊徼欽中國定有嘉猷告

至尊

帝正求賢勤拔擢先教桃李盛公門

本年三月
校士禮闈

恩文甫舅氏小飲於余之朗潤園承惠書

筆四律卽次元韻致謝

會磨盾墨寫軍容

公觀察九江曾在軍營辦理防勦

落日炊煙

萬竈濃似此狂瀾誰挽手
近來磊塊尙填胸
江邊雲樹愁千疊
夢裏關山隔幾重
今日挑燈試回首
園林深處又欣逢

璿題萃賞喜名軒

園中萃賞軒係御賜書額

小飲公餘禮

不煩冉冉新荷翻翠蓋
團團明月湧金盆
玩山鏡水攄懷抱
煮茗攤書共笑言
茅屋數椽容膝地
常依雲影作籬藩

渭陽摯誼感平生
架訓頻叨歲屢更
入座每增

珠玉愧問心應共驚鷗盟胸懷蘊藉如雲淡器
識高懸比鏡明趨步我慚爲宅相敢同無忌競
聲名

臨池妙筆擬鍾王晉帖從知遠勝唐詩句雲龍
徵變化賦才天馬共騰驤卽論風雅時賢少更
願簪纓世業勸葵藿有心惟向

主兢兢夙夜懍無荒

七弟二十壽辰

名園蔚秀絢秋光壽客筵開菊正黃廿載填篋

同硯席九霄雨露浥瓊觴平原筆力能穿紙幼弟

習顏平原書小謝詩才更擅場近年詩

端謹有法度境亦進

聖主恩深垂念切一編花萼許聯芳

讀屈原傳

牢落天涯客傷哉志未伸獨醒空感世直道不

容身忠藎遺騷雅高風問楚濱懷沙數行淚飲

恨汨羅津

冬至大祀

園丘奉

命恭代行禮敬紀

班聯蹌濟叩

皇穹嚴恪升香仰

聖躬

祭前一日
穹宇行禮奉

皇帝親詣

命敬謹分詣拈香

皇雲氣

三書調暢月

雲笈七籤冬至清旦正東望有朱
碧黃雲者是太霄玉妃太虛上真

人三素
雲也

天心七日驗融風東郊送暖行時令北

陸迎陽轉化工

帝念昭垂勤祀事更期雪澤兆年豐

時奉旨祈雪

冬日十詠

雪花

玉宇闢繁華嚴冬雪作花因風會舞絮著樹亦
成葩梅尙三分遜冰同六出斜拈來應一笑兆
瑞滿籌車

冰柱

似柱影亭亭清標列一庭結來冰皎晶垂作玉
瓏玲此日流成砥前身瀑瀉瓴良材資棟桷潔
白樹儀型

風門

冷氣逼簾櫳重門製最工有光迎霽日無隙透
寒風界已溫涼判人仍出入通常關宜斗室坐
我覺春融

火炕

長炕此橫陳氤氳燿火頻漫言衾似鐵未許釜
抽薪蒸透重茵暖薰成一室春不知冬栗烈窗
外雪鋪銀

呵筆

鬢發苦如何詩成筆數呵千行柔翰搦一氣暖

風和凍已毫端釋春從口上多管城承雅愛噓
植影婆娑

炙硯

廬壓雪迷漫窗間硯苦寒磨來冰作纈炙去瀋
生瀾煙想藍田暖春驚墨海寬卻教思玉質溫
潤入冬看

烹茶

煮雪茗新烹詩懷一味清旗槍斟玉盞楫棹爇
銀鎗甌泛花翻粟瓶開響雜笙品茶應計碗兩

腋好風生

唐花

百卉燦歲蕤清芬貫四時
豔香同馥郁火候莫
差池扇詎春風待催無羯鼓期
更應摩詰畫蕉
向雪中敬

獸炭

獸樣燦紛繁圍鑪炭火溫
槎枒猜虎伏突兀訝
熊蹲和煦添深室光芒耀古盆
德威原不猛春意盎層軒

冰牀

池面凍凝堅冰牀任引牽有衾寒似鐵無楫快
於船此去遊宜臥何人醉欲眠瑤瓊圍四面穩
擬泛槎仙

嘉平十六日

賜福壽字敬紀四疊乙卯至戊午詩韻

餞臘嵩呼歡萬姓迎春華祝慶

三旬

明歲庚申恭逢
三旬萬壽

近依

殿陛叨

宸藻遠洽

禴禘溥漢垠

壽衍八千洪筴永

福綏九五瑞圖新更逢

雅化崇文教蕊榜

恩覃惠士民

來春
恩科會試

奉

命敬詣

天神壇祈雪恭紀疊前韻

叩顙

壇壝申敬悃虔祈銜

命月初旬

本月初三日設壇祈雪奉 宣仁廟拈香 駕班

詔戒宜加勵

近奉命詣 硃諭訓 狂獄

仁覃飭守垠

前因祈雪清理庶獄按荀子刑稱 陳守其銀注稱謂當罪之法施陳

則各守其分

喜見同雲浮影密待看時雪舞花

新嚮晨

鑿輅

親誠禱定卜豐穰慰萬民

是日

大高殿拈香 皇帝親詣

庚申元旦朝賀禮成恭紀

彤靄卿雲映

帝星元辰稱賀拜

天庭

履端布闔敷

仁壽

乾始迎韶紀

聖齡

是日頒
旬萬壽恩詔

三

忭舞身隨

仙仗引就瞻衣惹

御鑪馨南疆指日塵氛靖

太學豐碑待勒銘

太和殿

錫宴宗室蒙古親郡王貝勒貝子公等滿漢大

員暨外藩使臣禮成敬紀疊前韻

壽昌南極拱祥星萬笏班聯集

闕庭喜慶九歌不

武烈

喜起舞慶隆

昇平四海祝

堯齡

丹陛清樂奏海宇昇平日之章

懷柔藩翰欣來服含哺華筵詠既馨任傑共沾
恩澤被年年柏葉獻新銘

長子載澂奉

旨封為入八分輔國公感

恩敬紀再疊前韻

九重閭闔爛春星手捧

丹書出

禁庭翠羽龍章榮八分金綖紫綬萃三齡

奉恩輔國

公入八分應用紅寶石頂雙眼花翎方龍補服
金銜玉方版飾貓睛石朝帶紫韉時澂年三歲

恩覃廕爵芝泥燦

澤沛加封棣萼馨

五兄晉封親王

高厚鴻慈難報稱惟將忠謹勗心銘

初二日

乾清宮

賜宴親藩敬紀三疊前韻

瑞應聯珠見五星先春喜氣溢

宮庭

十三日立春

欣逢

丹詔邀

仁惠

三旬萬壽恩
詔王公紀錄四次

再啟瓊筵頌

曼齡

向例元日
因太和殿錫宴

賜宴親藩今歲
故移於次日

桐葉承

恩叨

渥澤椒花迎歲獻芳馨

體元惇敘縣瓜瓞

首祚垂裳懍

展銘

謹按

乾清宮屏風正面鐫
高宗純皇帝御製銘

題文衡山競秀爭流畫卷

渡頭過客話歸途夾岸青青柳數株水影三篙

歌歛乃人聲一棹喚叩須游絲舞絮迷溪曲細
雨斜風伴釣徒悟得詩中參畫意煙波寫共輞
川圖

讀塔莊毅公斯哈及長武壯公瑞長勤勇

公壽父子列傳哲嗣榮仲華觀察囑題

羌戎戢後又蠻氛幾輩期門勇赴軍同是艱危
馳萬里合將忠義號三君霜風苜蓿莊前路霧
雨龍寮嶺外雲此日憐才修

曠典一杯還共酌斜曛同治建元欽奉
懿旨以莊毅公道光朝

在喀什噶爾殉節武壯勤勇二公
西殉節父子忠烈萃於一門各
十載潢池久弄兵圍師濠水惜垂成
揮戈志磊落姚萇讓馬情從古健白
今賢母慰嘗羹九原殺賊宜英魄日
斐鯨

恆雨亭太常囑題尊人敬文

菊花冊

翦取秋容當畫看畫工容易化工難
分明在長與騷人伴歲寒

別有廬山面目眞開函長對此花身雪霜風雨
休相妒須信孤芳不染塵

天教此卉壓羣芳入世惟期晚節香畢竟功名
兼壽考韓公託興豈尋常

詩卷長留自昔聞好延世德誦清芬而今展冊
懷風雅月夕花晨宛見君

題貞女瓜爾佳氏事

事見女弟魁華峯
侍郎所著碑誌

巾幗芳徽重景行盟心何止十年貞支離自古
全天賦淑慎於今播令名閩內黃香眞孝子女

中許武勝難兄好將閨範傳家乘潛德幽光共
闡明

題伊壯愍公

興額

事實

櫓槍星飛亂如織中原十萬黃巾賊潢池盜弄
何紛紛淨埽妖氛猶未得都護奮迹遼海東喑
鳴叱咤凌羣雄枕戈誓報

國恩重投筆原期成大功長淮千里鯨鯢穴毫
宿蒙徐皆牙孽都護轉戰凡幾年威稜屢挫凶
鋒折商水之戰大敵當諸將未有如公強賊渠

授首賊膽破二萬賊眾走且僵公之威名若韓
范伧伧長城誰敢犯保障淮濱漸肅清鋪敦又
見虎臣闕再蹶再起舊將軍汶上諸賊屯如雲
軍中羽書連夜至奉檄救兵如救焚飢卒日馳
三百里孤軍直入重圍裏賊眾我寡外無援都
護大呼吾死矣見危授命無所逃鞞中自有臨
淮刀部曲相隨同效命英雄氣壓蒙山高
天子褒忠有明詔

賜諡贈官兼祀廟汶水千年映月流大名長與

爭光耀秀才盛福忠臣兒手持行狀丐我詞我
持一言相訓勉忠孝家聲慎勿墮

同治丙寅嘉平八日

文宗顯皇帝實錄聖訓告成

皇帝御殿受

書奉

命前引護視尊藏

乾清宮禮成

恩賜御用貂冠一頂御用金龍褂一件恭紀二

律

卿雲紉縵碧空浮瑞應光天

德化周

謹按

共成三百六十

實錄

赫赫典謨垂帝範巍

巍誥誓著王猷

允文允武勤祗適

丕顯丕承懷率由

寶籙輝煌昭法守

貽謀

盛業煥千秋

精一垂裳治體元慶成

端辰重推恩感深鰲戴簪纓賁彩煥龍章

黼黻尊

惠洽彈冠

敷闔澤歡同挾纊布春温

欽奉

優敘

諭旨
在館

之王公宗室官員及其餘大小文武各員均
分別紀錄有差八旗兵丁各賞給一月錢糧

進

賢補袞慚臣職寅畏書紳矢弗諉

祝賈筠堂相國夫子七旬壽辰

南極秋宵炳壽星當年崧嶽降神靈

盛朝申甫推元老曠代歐韓有大齡五福陳疇
輝壁簡九如獻頌叶葩經祝釐不作尋常祝
鳳誥龍章下

紫廷

海岱文章夙擅名巍科鼎峙歷羣英迴翔玉署
聲華舊襄贊黃扉德業宏平格自宜延曼壽古
稀從此衍長生

九重倚畀應彌切

帝眷由來重老成

玉尺頻操式藝林門前桃李又新陰經師合並
人師仰耆德交孚

一德深士慶登龍收杞梓

朝歌鳴鹿答萃萃定知純嘏邀天錫耄耄期頤
券自今

清白傳家世澤長福緣善慶集嘉祥門承通德
簪纓盛

國有元臣鼎鼐光道履早占仁者壽詒謀應卜
熾而昌

三朝相業千秋望今日耆英勝洛陽

宣勤夙夜抒嘉謀潞國精神晚更邁望若斗山
人所式壽於旗翼世同麻九仙骨抱疑蓬島七
裘筵開紀海籌試傍

紫微瞻北極中台星朗瑞光浮

達尊兼備古猶難間氣天生翊治安庶績熙凝
光史冊百僚矜式徧

朝端康彊不藉扶鳩步豈樂宜歌酌兕歡
鳳閣威儀麟閣像方瞳玉面任人看

佳節重陽甫隔旬樽前黃菊正含新羣公競進
延年酒上古長留不老椿星鳳自堪爲世瑞夔
龍况復際

昌辰欣逢壽域同登日永佐

昇平四海春

夙從絳帳坐春風杖履追陪廿載中啟迪功深
欽道範步趨情切愧愚衷

三天舊學當年共九月佳辰每歲同拜手華堂
稱祝處願綏福祿頌來崇

重九日內閣會議和寶佩蘅大司農見贈

元韻

瀟灑文章憶萬年

孟嘉字萬年

更逢桂苑集羣仙

是日

順天秋

閣揭曉紫薇舊詠三台省黃菊遲開九月天

今歲

節候較晚菊

花尚未開放鳳嶺瑤觴張綺宴鸞臺金額煥雕

椽內閣大堂額

日調和元氣吟哦不為酬佳節媿乏奇謀議

靖邊

雨中賞菊和佩蘅大司農詩韻


繁英爛漫飽經霜旖旎清陰拂檻涼細雨斜風

催令序疎籬老圃逗寒香瘦憐蝶影穿芳徑冷
浸花光映酒觴富貴文章宜晚節笑他桃李傲

東皇

月下賞菊仍用前韻贈佩蘅大司農


寒叢如畫月如霜顥氣澄清夜色涼幾許秋光
風露冷滿身花影袖襟香天邊皎潔凝珠斗籬
下膏騰醉玉觴好事淵明頻嘯傲品偕隱逸侶
羲皇



高帖字詞

光緒戊寅七月上澣

沈桂芬拜題



自序

春帖子詞始於有宋蘇東坡歐陽永叔之作俊
逸清新膾炙人口玉堂雜記翰苑歲進春端帖
子歲時記學士院撰進春帖子絳羅金縷華粲
可觀我

朝稽古右文

昌明雅化每立春先一日軍機大臣暨南書房
翰林皆撰春帖子詞恭

進各爲一冊體裁悉同帖式不尙紛華詩句務

卷之二
一
崇直樸用以迎韶望歲介祉延釐仿葩經天保
之篇效虞陸賡颺之意猗歟盛矣余於咸豐癸
丑承乏樞廷當日所撰底稿時值多事散佚無
存迄於壬戌同治建元癸亥

顯廟國制期滿甲子立春循照舊例恭撰進
呈因按年敬錄副本以誌歌詠
昇平之盛迨甲戌季冬又遭

毅廟大故停止恭

進光緒戊寅仍循常例恭撰進

呈是冊琴於丁丑冬月其戊寅以後之詩尙俟
續刻云恭親王敬誌

春帖子詞

恭親王著

甲子

先甲占三日

是年十二月二十七日立春

天開子運初

慈雲雙庇蔭歡喜滿

宸居

鳳凰樓閣燦雲霞況復新年煥歲華

天子進觴醲柏葉侍臣獻頌麗椒花

致祥和氣報東風瑞肇

璇宮奉

兩宮萬戶千門騰吉語

重光日月五雲中

乙丑

苑柳千絲翠

宮梅萬樹花春風來穀旦喜送

玉皇家

正月九日立春是日
稱爲天誕

恩暉

慈蔭仰

尊親

御筆揮成四海春

敬本

御書恭進
兩宮匾額體

國宣猷臣拜

命嘉平望日恩賜臣奕訢
御書體國宣猷匾額

堯趨

舜步

帝興仁

乙火然藜

學古戶司

聖學勤

殿開弘德燦星雲
丑杓默運

乾行健樞紐全操

治右文

丙寅

日馭車迴丙年華
斗轉寅

九重勤典學萬象
總含春

頌柏銘椒歲歲祥
况逢景運煥

重光

侍臣

敬獻千秋鏡

時進講治
平寶鑑

聖主欣稱

萬壽觴

梅花香裏捷音傳
瑞雪還期潤麥田

塵念黎元

齋禱肅

精誠早已格

蒼天

丁卯

晴旭輝

三
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

鼇禁祥煙靄

鳳樓春來先一日
二月三日立春
麗景滿

皇州

與物爲春

帝治隆

乾行橐籥播元功
政成民樂干戈戢

慈訓親承自

兩宮

爲趣丁男小卯耕

劬農早盼迓祥霽

明禋日練初辛吉

天與豐年慰

聖情

戊辰

甲坼韶光轉

寅承

峻德彰

正月建寅

一年春兩度化日樂舒長

正月十二

月皆有立春

慈暉雙蔭悅

宸衷寰宇同春

孝治隆康樂陳書民物阜定知喜氣溢

璇宮

捷書喜奏月嘉平將士歸來凱唱聲

膏澤如春春似海欣看綠野有人耕

己巳

軒籙祥開八

皇圖有道長韶光今歲早四序樂青陽

六幕同春

德化馳端由

修己致雍熙

皇典學分陰惜

御製聯語中有典學惜分陰句上已何須曲

水詩

慈闈雙奉極

尊親柏頌椒銘歲月新吉語仰承

宸翰賜

天教繁祉慶駢臻

十二月初六日

御書繁祉駢臻匾

額

庚午

德被庚郵遠

天開午運新无疆基

聖學有象溥熙春

九重娛

志奉

慈闈

訓語欽承儆

萬幾

綏履

平安

天錫福雙瞻

護蔭荷

春暉

天上桃符迓歲華
千門萬戶燦雲霞
永綏吉劭

承

恩渥

十二月初六日

恩賜臣奕
御書永綏吉劭匾額

宸翰年年拜

寵嘉

辛未

瑞集初辛日

元日逢辛祥占建未年春來先半月二十

月十五
日立春

行慶

澤無邊

玉燭調和四序周

聖心敬畏迓

天庥

熙朝醲化如春溥

懿訓親承煥

帝猷

大歡喜卽萬方春

天上桃符氣象新

十一月十日
奕訢書

大歡喜匾額
命南北

烽煙從此埽九州都是太平人

壬申

壬林瞻

景運

申錫慶無疆

祇禱

慈闈訓釐延

寶籙長

和風旭日滿蓬萊
春色先從

上苑回華祝

三多添喜氣承

歡雙奉

萬年林

錫嘏

恩頒

寵眷深

上方珍品燦球琳

臣奕訢四十年生辰

敢言輔

政兼扶

德

宸翰彌增惕勵心

四字 御書輔政扶德 賜臣奕訢

癸酉

九開

運人日啟芳韶

人日立春

壽寓

春暉永祥風玉琯調

徽牒重編上

兩宮

聖人養

志極尊崇

鴻稱爲祝

康疆吉四海還欣

錫類同

璇題四字墨華明

天語褒嘉拜

賜榮百福皆緣為善樂酬

恩願效漢東平

匾額

御書

福與善生
賜臣奕訢

甲戌

令節占先甲迎年正浹辰

癸酉十二月十八日
壬辰立春距新年十

二日

垂裳臻郅治

帝祚八千春

五色祥雲護

兩宮銅儀玉琯協東風

皇家喜迓

天庥至慶集

星源拜舞同

重光徧德在羣黎平得滇黔定隴西


新正月初一日

定赤縣黃圖春普錫珍奇無取辟寒犀

樂
韻
風
古
新

體
正
詩
書
續
貝
鈔

沈桂芬
題



自序

曩於同治丁卯偶檢笥篋見蠹楮蟬縑舊時所作古近體詩除散失外尙存底槁數紙遂次第編輯詩鈔八卷付之剞劂棊旣竣裝成若干帙數年來爲戚友攜去無存不得不爲續印之舉因檢戊辰以後之作錄出一卷並付手民題曰樂道堂古近體詩續鈔余本賦性迂拙素不工於吟詠又兼樞掖趨公簿書叢脞更無暇耽於翰墨之場是鈔也或藉以紀事或勉爲唱酬自

同治戊辰迄今光緒丁丑爲時已閱十年得詩不及百首荒疎之誚夫復何辭舊作編爲麇獻集一卷以誌闡揚

聖學之高深帖吧懷音一卷以寫孺慕

音容之悲愴並丙辰恭紀百韻一章弁於試帖卷首用分門類戊辰以後之詩雖間有恭和天章之作述哀易水之吟不過寥寥數首紀

恩自警卅韻一篇亦偶爲之蓋不理於試帖工夫久矣茲因按年排次錄成一卷故未盡依舊

栞體例爰綴數語以誌梗概光緒三年歲次丁丑嘉平之月樂道主人自序

--	--	--	--	--	--	--	--	--	--

樂道堂古近體詩續鈔卷一

恭親王著

戊辰仲夏七弟以病起記事五言長律二
十八韻見示卽步元韻率成古體一章

愴心曠邈欲結雲鶴儔造化似流水天地一
虛舟明月映斗室清風滿竹樓百年如過鳥萬
事等漚浮長歌兼短咏逸興自相酬光陰倏荏
苒閒雲任去留煮茗消永晝待漏暫停騶轉瞬
炎歊盡颯爽喜新秋一洗塵萬斛氣象與神侔

鵬程九萬里恍若華胥遊欲知安樂法妙旨有

四休

黃庭堅四休居士詩序太醫孫君昉字景初自號四休居士祖茶淡飯飽即休補破

遮寒

煖即休三平四滿過即休不貪不妬老即

休山谷

曰此安樂法也弟欲以安樂窩顏所居

之室故

語及之欣占勿藥頌佳句入詩郵栩栩復遽遽

兩忘蝶與周倦眼朦如醉幻景說來由悟澈淨

生夢青蓮常在眸性本無所適飛躍類鳶鷗矜

平還躁釋沖淡是良謀吉士感物化詩酒埽閒

愁深夜不成寐寂寞數更籌勵志頰味道浴德

極薰修短檠坐相對渾脫語益道憶昔齟齬時

聯吟向案頭桐封慙在位獻替乏謨猷琢磨交
勸勉相勗更相求宅心貴坦蕩處世無瑕疵研
精察妙理山靜與川流蕉窗雨初霽蟬噪綠陰
稠雜誦驚奇絕寄懷聊寫憂

樞廬雨中退直佩蘅大司農贈紫薇花四

株率成一律賦謝

穠穢朝歸夏日長清風引入黑甜鄉來函有涼
開陶令之

窗清入周
公之夢句楚雲掩映當窗豔蜀錦續紛拂檻涼

喜得玉堂人共賞還疑晝省夜飄香消炎恰有

催詩雨洗出鉛華鬪晚妝

和七弟自題安樂窩元韻

紅塵十丈隱吟窩
警句詩成七字哦
盡性守常安所遇
宅心爲善樂偏多
牙籤滿座思無限
竹韻空階靜若何
清夢北窗風喚醒
冷然肅穆養天和

題沈石田春耕圖

石田先生畫最工
丹青妙筆冠吳中
更有一幅春耕圖
似爲田家課農功
是時雪已釋
含膏潤

土脈益以霖霖雨優渥徧阡陌亞旅相隨行且
歌婦子來饁樂如何一路花紅楊柳綠相攜耒
耜荷笠蓑架犁驅犢趁朝曛百畝縱橫千耦耘
村前鳥語又相催布穀布穀聲中聞昔唐宋璟
稱良弼手寫一圖曰無逸又宋樓璣爲賢令圖
將耕織各成帙此圖亦有勸農意勸農使農勤
農事旣勤東作慶西成千倉萬箱頌百世
七弟沈疴新愈乞假小住蔚秀園調理秋
初入城以攝疾雜詠古近體詩一卷見

示率成二律答之

探驪翹鳳擅清新筆底花濃更有神
心鏡磨礪參妙諦智珠朗慧見天眞
薰香摘豔輝瑤牒鋪采摛文潤玉塵
蓼岸蘆汀秋瑟瑟冰壺皎潔認前身

小園秋色景淒清回首蓬瀛倍愴情
勝地空留吟賞處劫塵如夢歲華更九思
慎獨資涵養

文宗賜額日九思堂

七德銘勳慶治平

日宣贊七德今上賜額

一壑一邱休悵惘玉門溟濤費經營

已

憶昔花

成往事

使愴歿

烏絲語

七步才

皆幻境

成卷帙

人持囑

後集卷之二

仲冬薨逝將次子載溼繼與爲
嗣奉 旨照例承襲員勒

喜雨

好雨應候降膏澤沐蒼穹幾日晴不雨炎歊氣
如烘忽看濃雲布油然四野同漫空爽籟發先
來解愠風屏翳神功播細絲散濛濛浙瀝宵達
旦地脈已潛通水添四五尺潤徧畝南東禾役
看穰穰黍苗自芘芘人心咸誌喜笠蓑笑語中
喜者何所喜霑足慶歲豐豈必雨珠玉尺澤利
無窮欣占秋大穫櫛比亦墉崇衢巷童田野翁

一歌一擊壤甘澍謝天工時暘時雨若胥歸造物功造物不自有化育慰宸衷

題王石谷暮嶺歸樵圖

樵客人不識身在畫圖裏畫工本無心貌得採樵子日日採樵去日暮歸村里上山山崎嶇下山山崩嶺古木束峰腰野花沒屐齒荷擔步巖徑路轉更邈迤人笑樵客勞樵客若自喜此趣有誰知畫工得形似

題石襄臣少司空餽餼吟集唐十二卷因

步司空自題卷後集唐一律元韻

薰香摘豔萃雕刊一串牟尼九轉丹格調翻成
新意思丰姿儼對古衣冠佳篇得趣神應助好
句頻鈔墨未乾璧合珠聯風雅頌奇文不厭百
回看

庚午夏日病中雜詠

藥爐灰燼撥殘紅世事全拋萬慮空卧對一鐙
偏不寐耳聾頻似雨兼風

閉戶家居靜養疴天中佳節扇清和蒲人艾虎
能祛祟怪底無方卻病魔

二豎相纏心氣積蕤賓應律歲華催斑衣憶昔

稱觴日陟屺悲吟淚滿頤

五月十一日恭逢

皇母孝靜成皇

辰后誕

茫茫情緒太支離斗室凝神夜睡遲沖淡達觀
參妙諦滿窗花影月明時

煮茗攤書強自寬朝來雨霽怯輕寒重衾坐擁
消長日一盃薑苓浸肺肝

扶杖芳園野色侵舊游如夢又重尋祇緣結習
難忘盡月下花前偶一吟

讀荆軻傳

秦政滅六國兵將臨易水燕丹爲國謀卑已求
俠士鞠武見田光光年已暮齒自言形不逮所
善軻可使丹乃得見軻避席且拜跪尊之爲上
卿欲雪見陵恥軻久無意行行必有所恃於期
頭一函督亢圖一紙賓客白衣冠祖送易水溪
蕭蕭風信寒歌聲雜羽徵就車去之秦終已不

顧視寵臣爲先言願與列侯比朝服設九賓秦
王色大喜頭函地圖匣以次進階阼圖窮匕首
見秦王卒驚起左右呼負劍擊軻軻廢矣自知
事不成箕踞罵不已八創身被傷笑倚庭柱死
軻死何足惜燕禍胡底止可憐薊都封一旦秦
墟址荆軻匹夫勇愚哉燕太子秦政與齊桓奚
啻去倍蓰生刼殊失計貽笑千古史

辛未季春自題小照

偶從身外諦眞詮虛擲光陰四十年畫裏是空

仍是幻箇中非俗亦非仙
幾株花柳延清賞數
卷詩書結夙緣吟罷靜觀雙鶴舞
公餘涵養學
逃禪

題五叔愛日齋集

旨遠辭深妙絕倫
清心寡慾見天真
學徵原本承前聖
意爲箴規啟後人
詩似春風能化物
文如秋水不沾塵
和平敦厚堪垂訓
思慕遺徽勵
自新

茹古涵今徵素蘊
推敲字字擬珠圓
馳驅拈韻

忠心耿山阜興歌孝意全寫景思真清似水好
賢禮果廣開筵驚人律細精研鍊俊逸超然句
若仙

題文與可畫盤谷圖

與可善畫以竹名山水未聞世所評豈知山水
亦妙手展圖更覺逸趣生袁家舊藏圖一幅與
可真蹟曰盤谷此谷盤旋依太行墨妙縱橫勝
墨竹曲折環抱兩山間甘泉可沿流潺湲四圍
巉峭居民少草木鬱鬱擁烟鬟隔山無數花滿

隴洩霧濛雲互吞吐中有人家隱士居水複山
重是樂土喜對此圖神曠怡想見與可揮毫時
如與李愿遊谷中亦向昌黎索歌詞

擬蘇東坡題郭熙畫秋山平遠圖元韻

書齋秋日晝清閒捲幔爽氣挹西山展圖會見
郭熙畫烟巒鎖入咫尺間秋日看山山更遠極
目江邨秋色晚空翠無邊天沈寥萬笏環列擁
碧巘是時楓林露未霜螺鬟點點映斜陽崩芳
羣峰新霽後疊嶂浮嵐趁雲光公有畫訣傳當

日妙論會無遺毫髮此中真趣有誰知悠然心
賞寄泉石

壬申春日赴健銳營閱武宿香山普覺寺
芳郊草色碧如茵細雨和風淡蕩春覽勝閒臨
清淨地停驂且作宦遊人慈航普覺誰先覺苦
海迷津孰問津大自在身空色相澄圓一夢證

緣因

普覺寺俗呼爲卧佛寺
純廟御書匾額曰得大自在

登靈光寺塔

曳杖叩禪關縈迴水一灣波溶天上月雲護雨

餘山此境畫難得相看心自閒浮圖高百尺絕
頂快登攀

龍泉菴卽景

九十韶華春未老輕寒輕暖風光好薄霧濛濛
映翠微烟消日出春山曉探奇逐勝快娛遊覓
路披榛尋古道扶筇直躡最高峯登崖一覽眾
山小神怡境曠胸襟開俯察仰觀舒懷抱一層
嵐影一層雲遠岫邐迤青未了招提幽邃隱空
山翠柏蒼松徧環繞松風謾謾水潺潺曳練排

空瀉靈沼龍泉菴下噴龍泉泉韻淙淙乳竇穿
雲根滴久漱芳潤怪石玲瓏不計年八德池邊
水清泚無相妙法喻青蓮洗心滌慮淨三業紺
宇琳宮別有天香徑雲深開福地竹院清幽屋
數椽我來息影長林下天君坦蕩靜如禪山色
溪聲供眺聽澄澈耳目心超然此身暫置是非
外從緣悟達諦真詮

香界寺題壁

風風雨雨近清明柳暗花稀春意生雲巒千峯

開畫本松鳴萬壑撼濤聲攀藤躡草臨流憇峭
壁危巒策杖行石佛有靈應笑我恣遊香界寄
詩情

遊寶珠洞

下山在雲底上山入雲穴雲氣釀氤氳山容忽
沒滅巖路多崎嶇岡巒互凹凸山遙馬力孱尋
幽步截嶺豁然天開朗遠近峯環列初日半山
紅洞口殘雲裂中隱古佛堂石徑莽迴折精舍
花木森松柏鬱蟠結曲澗瀉清流跳珠復噴雪

石罅韻泠泠如作廣長舌寶相飾莊嚴智珠光
明徹物我兩相忘妙證味禪悅遨遊歡喜地大
覺心源澈置身最上乘此行真奇絕

重遊碧雲寺有感

記得咸豐壬子秋靜宜

香山園名扈

蹕暫勾留公餘領畧名山趣二十年前憶舊遊
矗立青霄窳堵波盤旋石磴轉如螺葱蘢佳氣
雲霞近東望

皇州瑞靄多

層簷鈴語靜中喧璀璨天花綴寶幡五百金身

昭法相勝遊恍若到祇園寺內建廣廈八十一楹供奉五百尊金身

羅漢洵稱大觀

珠林吟賞昔曾經依舊雲嵐展畫屏惆悵不堪

傷往事幾回搔首向青冥

遊寶藏寺示澂兒

料峭春風勁山高覺馬遲鳥飛平地迴人語半

天疑力怯身先嬾心雄興不疲青年須奮迹學

問亦如斯寺建玉泉山北峯巒疊翠鳥道盤旋松林蒼鬱余由香山閱砥迴城肩輿

行至寺中小憩春雨溟濛山風料峭頗有高處
不勝寒之景寺外別起一峯峯頂構屋數椽額
曰清涼廣激兒策馬直造
峯巔饒有餘興故語及之

攝疾閒詠

三月春寒未解棉垂簾孤負海棠天虛窗閒聽
催花雨多少詩情付錦箋

不辨朝暉與夕曛輕煙薄靄久氤氳風儻雨憇
春將老眼界迷離入夢雲

風雨聲兼布穀聲韶華春去若爲情藥鑪藝火
添柔煖正好曹騰睡到明

古藤花落紫雲香
序漸清和晝漸長
二十四番風信過
狂吟只爲一春忙

胡小蘧少家宰囑題新建熊夫人事狀

鏡塘日夕澈靈液
泡影旋生旋無迹
圓流年年添恨聲
骨化爲石血成碧
粵維閨彥氏有熊嫺
媼牒溯陳胡公蔦蘿
松柏託其始珠聯璧合全
其終玉樓胡然遠天
召遘疾三年艾難療
扁鵲沈沈折臂驚老鴉
夜夜當檐笑勢殆
不起泣漉然露香
誓代回蒼天扼腕訣
與英皇伍剗肉竊

合夔木煎弱女非男嘆奚望出此冀得元穹諒
黑獄冥官返吟魂紅顏水府欽貞狀家人僉驚
拯溺身身僵貌宛如生人松直竹挺若森束衣
縞裙布蔽埃塵死者頓生生者死時異事尙稱
桑梓幽光積久發春官烈迹從此彰國史池之
源清且沈池之流平且深越今五十又七載如
見瑩瑩一片心

荷露烹茶七律二章應

制

言露爲茶味獨多乘涼晨起詣溪荷滿傾沈澹
盤珠洩小藝瓶笙爨玉羅夢醒每懷評茗客詩
清欣擬采蓮歌幸依

太液

恩波近得

賜金莖遍飲和

其二

攜來仙露甚清華消渴開烹顧渚茶七椀蓮香
陶客座一窗松影老詩家瓶珠洩碧金莖擷鑪

火初紅石鼎譁聞說月團天上味得嘗屢沐
聖恩加

題蟬齋八弟後月軒遺稿

四時多良辰昧者得偏少其志託清高所好卻
煩擾習靜後月人耽吟自少小秋日撰風雲春
天韻花鳥未冠興便豪取裁盡遠紹黃菊晉陶
潛青天齊謝眺及壯躋平澹馳情鄙天矯聲律
元和初摹仿建安表地擲金錚錚音繞梁裊裊
紙墨食兼眠咏嘆昏達曉八斗才成裘一尺集

裝縹形固如槁木神已森寒篠時博得髓譽早
應嘔心兆減量酒易醺當庭月初皎是夕月斜
時溘然季豹了

癸酉三月初五日扈

蹕祗謁

東陵出朝陽門通州道中卽事

天街警

蹕蕭郵程輕暖輕寒趁早行三月風光過上巳

幾分春色近清明

初九

日清明

上親詣

定陵行敷土禮大饗禮

定陵行敷土禮大饗禮

是日啟鑿花鬚柳眼河邊路雲影泉聲物外情指

點帆檣林立處永通橋畔綠波平永通橋即通州八里橋

過箭桿河口占

雨後新青長麥苗沙村環繞水迢迢窩頭河畔

垂楊綠箭桿河即窩頭河以經窩頭村而得一名窩頭河夾岸清陰覆

艤橋東西浮橋俱以舟聯

三河曉行

東作勤劬憫穡夫數行

恩詔特蠲租此次三河薊州遵化等五州縣地方應

徵本年錢糧奉旨蠲免十分之三

丁男處處歡聲聚子婦村

村笑語呼幾疊雲峯青遠列一灣春水綠平鋪
分明我已身如畫卻羨人家似畫圖

遊薊州獨樂寺

姓字標題筆有神巍然傑閣聳嶙峋

寺內閣上扁曰觀音

之閣唐李太白書慈雲縹緲縈香界寶月光明指妙津不

識不知昭法相無人無我了緣因琳宮古蹟蓮

花地清淨真成獨樂身

寺內後殿有卧佛

朱華山

岡巒勢崔嵬蒼茫如畫裏疊嶂聳嵯峨遠岫青
邈池石罅韻琤琮山泉清且泚古柏色蒼翠朝
霞散成綺野花不知名遍山豔紅紫山鳥似能
言閒關亂盈耳駐馬暫盤桓長松堪徙倚東望
鬱葱龍

昌瑞雲峯起

一統志

昌瑞山在遵化州西北

名鳳臺山

康熙二年又封爲昌瑞山從祀

地壇山脈自太行來重岡疊阜鳳翥龍蟠

海國家億萬年鍾祥福地
桃花寺卽景

幾曲斜盤徑停驂日漸西山

天低雲壑峯千疊桃花水一

景仰

宸題

蔣州志桃花寺在州東山有桃花開時獨先故

行宮於山半日下舊闕考

重修

御題八景曰湧

吟清籟日坐霄漢日雲外嘗滌襟泉日點筆石日繡雲壁

四月初六日

遣使冊封親王世襲罔替敬

殊恩兼以自警爰成五言長

咸豐壬子夏慶衍

帝恩宏行葦推

仁澤分茅翊

聖明光依桐葉茂蔭庇棟華榮

咸豐二年六月二十日

文宗顯皇帝遣使冊封親王

愧乏助勤術慙膺帶礪盟靖共

持素志兢惕表丹情

三年十月初七日蒙恩在軍機大臣上行走

屏翰

綸音沛輝煌

墨寶擎風愆時警慄日贊勵忠誠

四年二月二十六日蒙

賜御書額

日屏翰宣勤

顯廟貽鴻烈吾

皇適駿聲

兩宮臻邳理同治肇休禎

十一年十月初一日復蒙 恩入直樞

廷時值軍書絡繹庶務繁夙夜在公不遑寢處

懿訓垂千禩璿璣運九閔邊陲銷劍戟海澨剪

鯢鯨饑溺痾瘼抱綏安

軫慮榮東南沾樂利西朔埽欃槍細柳無傳箭

長楊靜掩旌

橋山增愾慕

太室潔粢盛昭告趨

壇境馨香薦

鎬京

同治三年六月克復江甯省城剿平粵匪又歷年餘搜捕餘孽殲除淨盡紅旗報捷

之日

禮並上親詣

遣親郡王等分詣

奉先殿壽皇壇

殿行

廟及盛京

西兩陵虔申祇告七年七月剿平捻匪

東

上親詣

景山

壽皇殿行禮關帝廟拈香

酬庸崇上爵

錫類媿蔥衡

金陵粵匪蕩平在事將帥及內外

臣工均蒙錫爵加恩長子載

澂由咸豐十年正月

初一日蒙

皇帝特恩封為奉恩輔國公同治元年正月初

皇帝特恩封為奉恩輔國公

同治元年正月初

文宗顯

三十一日

一日 兩宮皇太后 皇上加恩賞戴

三眼花翎 粵匪軍務告歲三年七月初二日復

蒙 恩晉封多羅貝勒 渥荷 闡化敷文教宣

兩朝殊恩 凡三錫命

威頌武成

訐謨承指授

宵旰仰經營 方略留青史

璇題煥彩囊

七年十一月初二日奉 命充

四百二十卷 剿平捻匪 方畧纂輯 剿平粵匪 方畧

一年八月二十七日全書告成 賞加二級

並蒙 慈禧端佑康頤皇

太后 殊書賜 額曰訐謨 辰告

親賢資夾輔 弼亮矢揚清

賜額頻叨賚仔肩敢弋名咸豐十一年三月初

親賢翊輔同治十年四月初度

瑞徵開泰宇厚載象坤貞

端本符周雅隆儀肅渭迎八年二月初五日欽

后懿旨襄辦大婚禮儀

賞延於世世

德洽遂生生

寵遇云何報衷懷受若驚十一年九月十五日

日欽奉兩宮皇太后懿旨恭親王輔政

多年勲勞懋著前於咸豐十一年十月間命以

親王世襲罔替因該親王再三懇辭允俟親政之年再行辦理現在大婚禮成親政伊遜著卽加恩以親王世襲罔替等因欽此

寅恭欽

繼述

申勸勗公卿

建極思康濟投艱賴幹楨

克勤仍克儉

惟一允惟精瞻就來重譯鈞陶徧八紘十二年正月二

十六日皇上親政豫日兩宮皇太后皇上同御養心殿召見內廷行走王貝

勒公等親郡王御前大臣軍機大臣大學士總
管內務府大臣六部尚書弘德殿行走大臣等

力戒因循毋避嫌怨諭以盡心匡弼 惴忱輸蓋獻啟沃效葵

傾每切修齊念常閑逸欲萌汲深虞綆短任鉅

懷才輕自滿須知損居高務忌盈坦夷占履吉

撝抑叶謙亨觥酒吟魚藻笙詩譜鹿萃宅心當

鑑水防意戒如城

玉牒嘉祥集

銀潢景福并大婚禮成親郡王貝勒貝子
公等皆蒙恩晉爵加銜賞賚

有差

卷之五
一
乾綱恢覆轉

鼎祚鞏昇平拜

命滋惶思歌颺喜起賡

重修福善禪林碑記

重尋勝業到春城修葺今番喜落成福
問雙樹善緣應許徧羣生禪衢徧少緇
影還分禁水清碑碣千秋昭景仰記詩
明情

戲題鍾馗畫扇

鄴足巾頭態踈躑開元進士姓名傳文章可有
驚人筆威令偏操捕鬼權驅盡妖氛舒化日釀
成和氣樂光天菖蒲酒熟榴花放公肯來乎抱
甕眠畫圖見聞志吳道子畫鍾馗衣藍衫鄴足巾首而蓬髮筆跡道勁實繪事之絕格楊
慎外集鍾馗卽終葵晉宋人猶以終葵爲名其
後說爲鍾馗俗畫一神像帖於門手執椎以擊
鬼好怪者便傅會說鍾馗能啖鬼畫士又作鍾
馗元夕出游圖又作鍾馗嫁妹圖說之又說矣
文人又戲作鍾馗傳言鍾馗爲開元進士尤爲
無稽按孫逖張說文集有謝賜鍾馗畫表先于
開元久矣

恭和

御製詣齋宮作元韻 十一月初二日

郵治覃敷秉

兩宮

帝心誠敬格

蒼穹

功成破竹寰區定 肅州報捷關 世荷分茅

錫賚豐 四月蒙冊封親王世襲罔替 恩遣使常捧

絲綸宣

聖德幸依帶礪翊

皇躬陽回預兆金穰歲物阜民康萬福同

七弟囑題朱文端相國遺照

仲弟情深感舊師丹青寫就貌清奇披圖猶憶
談經日展像曾懷問字時翠竹依稀同勁節黃
花點綴擬丰姿瓣香虔奉欽遺範重道崇儒萬
世規

甲戌二月二十四日扈

蹕祗謁

西陵出阜成門卽事

曉烟漠漠柳絲絲雲淡風輕日影遲物態迎人
都欲活山容難畫始爲奇芊綿細草鋪平野隱
約深林映古祠身在桑乾河畔路夢魂早已向
西馳

渡盧溝橋

初日影搖紅巍巍古鎮雄城頭環百雉石齒架

雙虹拱極重闔霽

破夢閒談議者謂盧溝畿輔
咽喉宜設兵防守又須築城

以衛兵於是爲斗城名拱北南門曰永昌北日
順治初於崇禎丁丑日下舊聞考拱北城本
朝更名拱極城改
永昌門曰威嚴
盧溝兩岸風波恬長順軌永

定慰

宸衷

畿輔安瀾志盧溝橋一名廣利橋在宛平縣南三十里跨盧溝河上金明昌年間建

元明屢加修築

本朝康熙元

年修七年水溢

圯東北十二丈重修

御製碑文雍正乾

隆年間疊加修葺

永定河舊名盧溝河即桑乾

下流也亦曰渾河水流無定衝決為患康熙三

十七年

賜名曰永定河

過巨馬河

宋時險要記分明巨拒同音互立名

宋史何繼筠傳咸平

二年詔聽邊民越拒馬塞北市何承矩上言曰

緣邊戰權自淘河至尼姑口屈曲乃百餘里此

天險也今聽公私貿易則人馬交度深非所宜

又河渠志自邊吳泊至尼姑海口綿互七州軍

屈曲九百里深不可以舟行淺不可以徒涉雖
 有勁兵不能渡也蓋拒馬河於宋時最為險要
 水經巨馬河出代郡廣昌縣涑山酈注即涑水
 也方輿紀要涑水源在廣昌縣南半里東流合
 拒馬河水源出七山晉劉琨守此以拒石勒因
 名拒馬河又袁紹遣將崔巨業攻固安不下退
 還公孫瓚擊之於巨馬水蓋明巨馬之名始見
 於此亦未詳言其得名之故至以拒敵得名以
 巨為拒紀要以為劉琨拒石勒而廣昌縣志霸
 州志又以為楊六郎拒遼人愈遠愈謬皆不足
 信
 寥廓天形垂野大高低山勢接雲平烟光變
 鬱添嵐氣風力蕭騷助水聲本是昔年征戰地
 即今阡陌盡耘耕

涑水道中即景

屈曲古山窪山居四五家綠楊三月雨是日微雨紅杏滿村花淺黛嫩巒影新青茁麥芽招提遙望處一徑入雲斜

易州道中感懷

萬疊烟巒望若迷四圍匝匝晚雲低垂楊拂拂迎人面新草茸茸沒馬蹏冀野城孤臨廣陌易州

禹貢冀州之域安河橋畔護長隄方輿紀要白楊嶺在易州西北四十里嶺多白楊樹俗訛爲白羊一統志源泉水在易州西北舊志在州西北十里源出白羊嶺由西轉東而南入易水白楊水於乾隆二年哀鳴怕聽天十六年濬治賜名安河

邊雁腸斷春風易水西

扈

躡敬詣

慕陵

慕東陵隨入

陵寢門行禮述哀恭紀

太行發脈鍾靈秀佳氣龍葱護

寶山一統志 永甯山即泰甯山在易州西五

甯山從祀拔脈秀力豐峻嶺崇山遠拱於外靈巖翠岫環

衛其間畿輔通志秀若拱壁簇若屯雲考其濼
洞延袤千里計所匯納襟帶百川易州志乾坤
聚秀之區陰陽和會玉筍金城如拱衛龍蟠鳳
之所洵爲上古之壤

翥勢迴環空吟岵岵悲無極追憶
音容杳莫攀今日澂兒隨叩拜椎心更慟舞衣

斑本年長子載澂十七歲奉派扈蹕並隨
慕陵慕東陵陵寢門敬謹

隨從
行禮

大風吟

甲戌二月廿八日扈

蹕秋瀾村行宮甫歇征鞍衣未解四野忽忽來

飄風塵霾蔽天天黯淡地軸震動發靈籟是時
絳日正卓午須臾昏暗迷西東行幄撼搖思傾
圯飛沙揚礫排簾櫳人聲馬聲聲嘈雜旌旆迷
離颺半空信道春風狂似虎飛廉肆虐恣其雄
怒號叫吼勢益盛肅然屏息心忡忡去冬無雪
春無雨蒼生翹首望昊穹昊穹應憫民疾苦沛
然膏澤仰天工東作方興待耕耨西成更冀卜
年豐綠野沾足慰農望雨暘時若愜

聖衷

孟夏四日常雩大祀

園丘前一日隨扈

壇內齋宮喜雨恭紀敬依癸酉冬至前一日
御製詩韻元韻

寅畏常存仰

法宮乘時

鑾輅禮

皇穹薰風披拂羣生遂甘雨優霑萬寶豐

光覲謙尊徵協吉

日昭乾惕羨持躬一心一德微誠矢況附

星源福祿同

仲秋下澣扈

蹕南苑敬依道光癸未

宣宗聖製行圍至團河行宮卽事元韻

春蒐秋獮總相宜羽衛森嚴廣陌馳風勁金商
添颯爽雲橫玉宇自透遲瞭鷹臺畔縈青靄飲
鹿池邊漾碧漪

家法

欽承時肄武旌旗掩映鳳河湄

宸垣識畧載團河一支醜為鳳

河其形如鳳源在南苑中

哭筠堂相國夫子

愴懷風景憶

三天絳帳青鐙侍講筵

舊制書處為室三層室各五

楹前日前垂天賦中日中天景物後日後天不老余於六齡就傅從二銘相國夫子逾年夫子

疏請終養即受業於筠堂相國夫子時聆架訓獲益良多握手平泉成永別

傷心華黍未終篇 九月二十二日為夫子誕日

知病體久虛醫藥罔效執余手歛歔長嘆又復強作笑顏談論逾時余亦含淚寬慰數語而去

越三日於二十五日溘然長逝享年七十有七鄉雲望斷千餘里化雨

親承卅六年余於道光陰三十一載夫子遽歸

道山遂成永別夫子以道光丙戌科一甲二名

進士及第由翰林入直上書房游陟正卿襄贊

繪扉迭司文柄畢生廉謹兩袖清風家業蕭然

猶是寒儒景況湛田令嗣出守彰德卓著循聲

聞訃到京治喪盡禮暫厝於城南寶應寺擇日扶柩回籍

重道崇儒

恩禮渥苾芬歆享

詔褒賢九月二十六日遺章入告上悼

太保照大學士例賜卹賞經被賜奠醊晉贈

良祠靈柩回籍時命沿途地方官妥為照

料令嗣子孫並蒙

恩禮優加

乙亥九月十八日辰刻

穆宗毅皇帝梓宮由觀德殿

孝哲毅皇后梓宮由永思殿同時奉移

東陵隆福寺

暫安殿恭理一切禮儀敬謹送往仍隨

扈軍機處入直恭紀

轉瞬光陰節序移又逢露冷欲霜時

本月十一日寒露二

十六日霜降
一、高夜月蒼涼映野曠秋風慘淡吹海

溼山陬同愛戴

龍駟

鳳翼擁幢麾濡毫和淚悲難述

觀德西偏近

永思

二十一日奉移禮成二十二日

几筵前大饗禮畢扈

輿恭謁

定陵行禮泣述

宛轉楓林淡著霜蕭森氣釀十分涼淒淒苦雨

催黃葉瑟瑟秋風下白楊

寶輅前年曾蒞止

靈輿今日妥馨香

癸酉季春會扈從
宗毅皇帝恭謁

東陵穆

斷腸更有椎心淚翹首

陵山哭

顯皇

丙子新正四日晤七弟於邸第並遊新闢

園亭卽事用心泉十弟題壁詩韻

大地韶回綺陌前亭臺新闢隔囂塵光風霽月

據懷抱錦暉牙籤結夙緣晚歲松筠標勁節向

榮花木欲春天

初十日立春

名園好擬重遊賞一日

清閒一日仙

新歲公務雖覺稍簡而俗尤未能盡除匆匆晤談不克作竟日之遊

適弟又有易水之行亦少暇晷因擬春融再為遊覽滄茗焚香定有一番佳致也

題毅勇侯大學士曾文正公遺像

舳艫千里誓師來建節東南半壁恢幹國謀猷

隆世望柱天功業濟時才江淮保障干城寄畿

甸鈞衡幕府開緯武經文真將相具瞻遺像想

風裁

端午日哭文博川相國

大旱甘霖望未成

今歲自春徂夏亢旱異常屢經設壇祈禱尙未渥沛甘霖

霾氛光掩輔星明志安中外臣心瘁功在旂常

帝念縈

遺章

入告

特恩賞給

騎都尉

世職

贈卹優加復蒙

正直一

生惟謹慎匡襄廿載矢忠誠從今別有盈懷淚
不向湘江哭屈平

嘉平廿一日立春喜雪用唐東方虬春雪

滿空來句依轆轤體口占五絕四首

春雪滿空來迎春淑景開

瀛洲春色早熙皞樂春臺

匝旬欣獻歲春雪滿空來喜誌綏豐兆連番地

脈培

本年冬間屢沾雪澤計已盈尺

人安老復丁律轉星居丑

明歲丁丑朱子詩人言洞裏春長在自慶

樽前老復丁史記天官書歲陰左行在寅歲星右轉居丑正月與斗牽牛晨出東方名曰監德

春雪滿空來西成占大有

鳳閣早朝回天街淨點埃裝成銀世界春雪滿空來

丁丑仲春六日春分喜雨

餞臘祥霽欣旣渥春來又喜雨
韶華滿潤物無聲大地敷五穀
荒綏謐靖萑苻史官奏春分日
方來五穀成亦
冀流甘溥霽霽頻沾澤洽濡

仲春廿七日奉

使

東陵出朝陽門卽事

石路經行處熹微曙色娛春筓
翰孤綠柳含煙靄青疇展畫圖

耦起耕夫

通州道中

流水長橋隔暖塵
潞河隄畔小逡巡
停輿且酌

三杯酒一樹桃花
野店春

曉發夏店鎮

雞聲驚客夢
山氣雜雲昏
結束勞僮僕
追隨有

季昆治姪暨澂兒俱奉派三分之一白沙

城外路綠柳水南村
百里漁陽道
停驂古薊門

是日宿薊州
計程百里

宿薊州天仙道院

淺深山色罨雲霞
曲徑彎環訪道家
紅杏溪邊香界隱
綠楊村外酒旗斜
春郊芳草嘶征騎
落日平林噪暮鴉
點綴韶華如畫裏
一層新柳一層花

季春朔日致祭

穆宗毅皇帝几筵前行釋服禮
述哀敬紀
奉

使蘭陽叩

几筵禪期遵古制相沿愴懷彌覺光陰迅觸景
偏驚歲月遷

武烈昭垂千百世

堯仁治洽十三年

橋山締構資羣力妥侑

珠邱待吉蠲

前一日借七弟敬謹察看
惠陵工程督飭監督等迅速妥辦

禮畢回程宿邦均鎮西市旅店適七弟宿

鎮東僧寺余於午間過此卽停輿晤談

有感因步弟舊作題壁詩韻

僧房簾捲見青山煮茗清談半日開驛館相逢

同氣洽雁行失序慟情關談及九弟逝後事風來松徑

笙簧韻雲護花幢玳瑁斑弟云寺僧酷好蒔花午院停輿

驚客夢弟適午睡初醒囂塵盡處有仙寰寺在東市盡頭

潞河口占

細雨燕郊路古隄芳草春桃花飛似雪來往送

行人

回程至京七弟以邦均廟暢談詩索和卽

步元韻奉答

百五韶華滿春光
瞥眼中良辰逢穀雨

是日穀雨

芳

信老花風雲定
禪心寂山稜瘦骨同
詩腸慙蹇

澀勉和付吟筒

李菊莊比部以尊人小磨學士遺集見示

有感率題一律

秋實春華勝三唐
氣格醇文章堪壯國
詩句亦

驚人鸞鳳音猶在
芝蘭味久親

學士於咸豐年間入直上書房

時相唱和遺編今展誦
字字著清新

次韻題七弟小照

照作朝服佩刀如同治朝任御前大臣時

行走後
護狀

星源並附屬親臣相勗忠誠答

帝宸入照鬚眉神畢肖愴懷同作夢中人

仲冬九日續修

玉牒告成由宗署請至

中和殿率提調等官行禮畢恭捧至

乾清門安設

乾清宮呈

覽後送至

壽皇殿尊藏禮成敬紀

九天闔闔晃朝曦奉職趨踰

鉅典司光緒丙子九月十八日派充總裁

玉牒祥增昭衍慶

銀潢源遠肇綿禧壽皇殿東室額曰衍慶尊藏黃檔西室

額曰綿禧尊藏紅檔風清

螭陛鑪煙細日麗

龍墀扇影移繼繼繩繩開

景運瑞徵百世篤宗支

季冬朔日奉

使

東陵

穆宗毅皇帝几筵前行三周年致祭禮出朝陽

門紀事

再使謁蘭陽

今歲春間曾經奉使行釋服禮

行行定福莊莊

原名以福

福早被於莊

奉內設殿放

旨莊木落山容瘦風尖曙

色涼凍雲陰釀雪渴望拯灾荒

本年山西陝西河南皆被旱灾

宿薊州道院

春季叩

靈筵曾經駐使羈浮蹤尋舊地孤客怯寒天夜
永頻添火風多冷叫鳶凍鴉亂人語暝色起炊
煙

敬詣

穆宗毅皇帝几筵前恭代行三周年致祭禮畢
回程宿邦均鎮旅寓

再朞舉典諱辰逢

帝命祗承矢肅恭九獻愴陳遺漢臘八音遏密
痛堯封型傳金篋思無改酒酌瑤樽淚倍衝迴
望煙嵐迷薊野寒光慘淡凍雲濃

曉發邦均鎮

車聲軋軋響長隄宿鳥林中尙穩栖凜冽霜晨
寒勝雪縈紆沙路軟於泥披裘纔聽村雞唱破
夢頻聞旅騎嘶河腹冰堅泉暗度行人已過錯

橋西

一統志錯橋一名草橋安瀾志稱
錯河橋橋下水流甚急蓋洵河也

